

宋書

梁 沈 約 撰

中 華 書 局

卷第

一四至卷二二(志)册

宋書卷十四

志第四

禮

況三 定衆儀 之,任己而不師古,秦氏以之致亡,師古而不適用,王莽所以身滅。然則漢、魏以來,各揆古 終歛去襲稱之數,晉武以丘郊不異,二至幷南北之祀。互相卽襲,以訖于今,豈三代之典 漢文以人情季薄,國喪革三年之紀;光武以中興崇儉,七廟有共堂之制;魏祖 今之中,以通一代之儀。 不存哉,取其應時之變而已。 國鼎峙,歷晉至宋,時代移改,各隨事立。 夫有國有家者,禮儀之用尚矣。然而歷代損益,每有不同,非務相改,隨時之宜故也**。** ,蜀朝則孟光、許慈創理制度,晉始則荀顗、鄭沖詳定晉禮,江左則荀崧、刁協緝理乖 司馬彪集後漢衆注,以爲禮儀志,校其行事,已與前漢頗不同矣。 且閔子譏古禮,退而致事,叔孫創漢制,化流後昆。由 自漢末剝亂,舊章乖弛,魏初則王粲、衞覬典 以侈惑宜矯, 此言

志

紊。 其 間 名儒 ||通學, 諸所論敍, 往往新出, 非可悉載。 今抄魏氏以後經國誕章, 以備此

命之義 牲 耳。 唐、虞之美, 輅,服周之冕,樂則韶舞。』此 三正 不 土 其餘 一德之數。 得 周 魏文帝雖受禪于漢,而以夏數爲得天,故黃初元年詔曰:「孔子稱『行夏之時,乘殷之 也。」 復 獨 之義 郊祀 改。 詔 至於 天地 今新 曰:「服 ,國家承漢氏 每四時之季月,服黃 正 建皇統,宜稽古典先代,以從 朝會四時之服,宜 朔, 色如所奏。 當依 人正之後,當受之以地正,犧牲宜 虞、夏故事。 |聖人集羣代之美事,爲後王制法 其餘宜 十八日,臘 如漢制。 如虞 若殊徽號,異器械,制 以丑, 承 宗廟 唐,但 天 命 所服 **性用白**, ,而告朔 臘 日 用 如周禮。 犧牲, 其飾節 也。 用白, 丑耳,此亦聖 禮樂,易服色,用牲幣,自 傳曰『夏數爲得天』。朕 。」尚書令桓階等奏 壹皆不改,非 今從漢十三月正,則 旄, 自當 人之制 赤, 也。 但節 所 以 明 幡 據 承 革 犧 黄

繼 爲 共 夫子 論 同 明 正 .體異德,或納大麓,受終文祖,或尋干戈,從天行誅。 作 帝 朔 春秋 了或以 即位 ·,便 通 改之爲宜,或以不改 三統, 有改正朔之意,朝 爲後 王法。 為是, 議 IÉ 多 朔 異 各從色, 意 同,故持疑 取駁 異,于今未 不同因 不 決。 襲。 雖遭遇異時, 決。 久乃] 自 五帝 朕 下 在 詔 三王 東宮 曰 步驟不 一時閒 以 黄 下 初 同, , 或 以來 然未有 意 父 諸 子 常 儒 相 以

不改正朔,用服色,表明文物,以章受命之符也。由此言之,何必以不改爲是邪。」

周以十一月爲正,法物之萌,其色尙赤。能察其類,能正其本,則嶽瀆致雲雨,四時和,五稼 天從民。夏以十三月爲正,法物之始,其色尚黑。殷以十二月爲正,法物之牙,其色尚白。 意大變,迅風雷雨,以明將去虞而適夏也。是以舜禹雖繼平受禪,猶制禮樂,改正朔,以應 繼周而王者,雖百世可知。以前檢後,文質相因,法度相改。三而復者,正色也,二而復者, 陽氏以十一月爲正,薦玉以赤繒。高辛氏以十三月爲正,薦玉以白繒。』尚書傳曰:『舜定鍾 人南面而治天下,必正度量,考文章,改正朔,易服色,殊徽號。』樂稽曜嘉曰:『禹將受位,天 月爲正,高陽、有虞、有周皆以十一月爲正。後雖百世,皆以前代三而復也。禮大傳曰:『聖 之日于耜。』傳曰:『一之日,周正月,二之日,殷正月,三之日,夏正月。』詩推度災曰:『如有 文質也。』以前檢後,謂軒轅、高辛、夏后氏、漢皆以十三月爲正,少昊、有唐、有殷皆以十二 石,論人聲,乃及鳥獸,咸變於前。故更四時,改堯正。』詩曰:『一之日觱發,二之日栗烈,三 正朔,易服色,以應天地三氣三色。』書曰:『若稽古帝舜曰重華,建皇授政改朔。』〔〕初『高 乎天,從乎人。』其義曰,水火更用事,猶王者必改正朔易服色也。 易通卦驗曰:『王者必改 戈,皆改正朔,所以明天道,定民心也。易曰:『革,元亨利貞。』『有学改命吉。』『湯武革命,應 於是公卿以下博議。侍中高堂隆議曰:「按自古有文章以來,帝王之興,受禪之與干

成,麟皇翔集。』春秋:『十七年夏六月甲子朔,日有蝕之。』傳曰:『當夏四月,是謂孟夏。』春

秋元命苞曰:『王者受命,昭然明於天地之理,故必移居處,更稱號,改正朔,易服色,以明天 命聖人之寶,質文再而改,窮則相承,自周則復始,正朔改則天命顯。』凡典籍所記,不盡於

此,略舉大較,亦足以明也。」

中 ·候中詔季岐以爲宜改,侍中繆襲、散騎常侍王肅、尚書郎魏衡、太子舍人黃史嗣以爲不 太尉司馬懿、尚書僕射衞臻、尚書薛悌、中書監劉放、中書侍郎刁幹、博士秦靜、趙怡

青龍五年,山在縣言黃龍見。帝乃詔三公曰:

宜改。[三]

唐、虞、夏后,世系相襲,同氣共祖,猶豫昭顯所受之運,著明天人去就之符,無不革易 以彰異代,曷疑其不然哉。 制度,更定禮樂,延羣后,班瑞信,使之煥炳可述于後也。至于正朔之事,當明示變改, 膺受命曆數之期,握皇靈遷興之運,承天改物,序其綱紀。 昔在庖犧,繼天而王,始據木德,爲羣代首。自茲以降,服物氏號,開元著統者,旣 雖炎、黃、少昊,顓頊、高辛,

籍之林,總公卿之議。夫言三統相變者,有明文,云虞、夏相因者,無其言也。曆志曰: 文皇帝踐阼之初,庶事草創,遂襲漢正,不革其統。朕在東宮,及臻在位,每覽書 志 第 四 禮 一

知,稱朕意焉

之遺風,揚先帝之休德,又使王敎之弛者不張,帝典之闕者未補,亹亹之德不著,亦惡 舜,以論三正,則其明義,豈使近在殷、周而已乎。 究人事,以貫百王之則。 始,言天地與人所以相通也。 「天統之正在子,物萌而赤;地統之正在丑,物化而白;人統之正在寅,物成而黑。」但含 可已乎。 **生氣,以微成著。故太極運三辰五星於上,元氣轉三統五行於下,登降周** 故於三微之月,每月稱王,以明三正迭相爲首。 仲尼以大聖之才,祖述堯、舜,範章文、武,制作春秋,論 **朕以眇身,繼承洪緒,旣不能紹上聖** 旋,終則又 夫祖述堯、

考大造之基,崇有魏維新之命。 建爲節。 旗, 年春三月爲景初元年孟夏四月。服色尚黃,犧牲用白,戎事乘黑首之白馬,建大赤之 烝、嘗,巡狩、蒐田,分至啓閉,班宣 朝會建大白之旗。春夏秋冬孟仲季月,雖與正歲不同,回 今推三統之次,魏得地統,當以建丑之月爲正。 此 曆數之序,乃上與先聖合符同契, 一時令,中氣晚早,敬授民事,諸若此者,皆以 重規疊矩者也。 考之羣藝,厥義彰矣。 **今遵其義**, 至於郊祀迎氣,耐、祀、 庶可 改青龍五 以顯祖 正 一歲斗

於戲 王公羣后、百辟卿士、靖康厥職、帥意無怠,以永天休。 司徒露布,咸使聞

案服色尚黄,據土行也。 黄,如此,用牲之義,未爲通也。 天地至尊, 用牲當同以所尚之色, 不得專以陰陽爲別也。 朝,大赤卽戎也。明帝又詔曰:「以建寅之月爲正者,其牲用玄,以建丑之月爲正者,其 「大白以卽戎」,此則周以正色之旗朝,以先代之旗卽戎。魏用殷禮,變周之制,故建 今祭皇皇帝天、皇皇后地、天地郊、明堂、宗廟,皆宜用白。 □ 其別祭五郊,各隨方色,祭日 用玄,則祭地不得獨疑於用白也。天地用牲,得無不宜異邪。更議。」於是議者各有引據, 白,以建子之月爲正者,其牲用騂。此爲牲色各從其正,不隨所祀之陰陽也。祭天不嫌於 無適可從。 又詔曰:「諸議所依據各參錯,若陽祀用騂,陰祀用黝,復云祭天用玄,祭地用 犧牲旂旗,一用殷禮,行殷之時故也。周禮巾車職,「建大赤以朝」, 、牲用 大白

甲乙。 萬 臣 制 月星辰之類用騂,社稷山川之屬用玄,此則尊卑方色,陰陽衆義暢矣。」 **[奉贄,後五日,乃大宴會作樂。」太尉屬朱誕議:「今因宜改之際,還修舊則,元首建寅,於** ·「省奏事, 五內斷絕, 奈何奈何! 烈祖明皇帝以正日棄天下, [k] 每與皇太后念此日至, 爲 國,禮,忌日不樂,甲乙之謂也。烈祖明皇帝建丑之月棄天下,臣妾之情,於此正日,有甚 便。」大 |年正月,帝崩,齊王卽位。 是年十二月,尚書盧毓奏: 「烈祖明皇帝以今年正日棄離 今若以 將軍屬劉肇議。「宜過正一日乃朝賀大會,明令天下,知崩亡之日不朝也。」詔 建 丑正朝四方,會羣臣,設盛樂,不合於禮。」博士樂祥議:「正日旦受朝貢,羣

帝通三統之義,斯亦子孫哀慘永懷。又夏正朔得天數者,其以建寅之月爲歲首。」 S) 有剝裂。不可以此日朝羣辟,受慶賀也。月二日會,又非故也。 聽當還夏正月。 雖違先

也。 道,其違甚矣。」及宋受禪,亦如魏、晉故事 尼答為邦之問,則曰行夏之時,輅冕之制,通爲百代之言。蓋期於從政濟治,不繫於行運 有虞遵唐故事,於義爲弘。」奏可。孫盛曰:「仍舊,非也。 今大晉繼三皇之蹤,踵舜、禹之迹,應天從民,受禪有魏,宜一用前代正 晉武帝泰始二年九月,羣公奏:「唐堯、舜、禹不以易祚改制,至於陽、武,各推行數。 且晉爲金行,服色尙赤,考之天 一朔服色, 皆如

位之元,則有延康之號,受禪之初,亦有黃初之稱。 知。 道變化,各正性命。保合大和,乃利貞。首出庶物,萬國咸寧。』宜爲太和元年。」詔闕 元改 載漢世之事,日建元元年,則後不見。宜若古稱元而已。」明帝不從。乃詔曰:「先帝卽 爾數,中、後之號不足,故更假取美名,非古也。述春秋之事,曰隱公元年,則簡 魏 明帝初,司空王朗議:「古者有年數,無年號,漢初猶然。 今名年可也。」於是尚書奏:「易曰:『乾 或有世而改,有中元、後元。 而易

周之五 禮,其五爲嘉。 嘉]春秋左氏傳曰:「晉侯問襄公年,季武子對曰:『會于沙隨

文始冠 云:「乘 者五 矣。 故 衞,冠于成公之廟,假鍾磬焉,禮也。」 賈、服說皆以爲人君禮十二而冠也。 古尚書說武王 節之,以先君之祧處之。 於 采 爲夏末上下相亂,篡弑由生,故作公侯冠禮,則明無天子冠禮之審也。 是成王年十五服除,周公冠之而後出也。按禮、傳之文,則天子諸侯近十二,遠十五,必冠 命史祝辭。辭,告也。是除喪冠也。周公居東未反,成王冠弁以開金縢之書,時十六矣。 崩,成王年十三。推武王以庚辰歲崩,周公以壬午歲出居東,以癸未歲反。 子,禮也。君可以冠矣。 其 筮 天子諸侯,無加數之文者,將以踐阼臨民,尊極德備,豈得復與士同? 十 議。 周禮雖有服冕之數,而無天子冠文。 H 寡君以生。』晉侯曰:『十二年矣,是謂一終。一星終也。國君十五而生子。 輿 緇 筮賓,冠於阼以著代,醮於客位,三加彌尊。皆士禮耳。然漢氏以來,天子諸侯,頗 而後爵,何大夫冠禮之有。周人年五十而有賢才,則試以大夫 (志)日 初 布 ,從古制也,冠於宗廟是也。 加 《緇布進賢,次爵弁、武弁,次通天,皆於高廟。王公以下,初 「儀從冠禮」是也。 今君在行,未可具也。 請及兄弟之國而假備焉。』晉侯許諾。 大夫盍爲冠具。』武子對曰:『君冠必以裸享之禮行之,以金石之樂 漢順帝冠,又兼用曹襃新禮。 魏天子冠一加,其說日,士禮 儀禮云:「公侯之有冠禮,夏之末造。」王、鄭皆以 襃新禮今不存。 三加,加有 入之 事, 大夫又無冠禮 此言非也。 加 進賢 禮周公冠成王, 猶行 而 成 已。」按此 禮儀志又 土禮 冠而生 夫以聖 也。 還及 至

咸以正月。晉咸寧二年秋閏九月,遣使冠汝南王柬,此則晉禮亦有非必歲首也。 歲之正,以月之令」。魯襄公冠以冬,漢惠帝冠以三月,明無定月也。後漢以來,帝加元服, 廟,魏以來不復在廟。然晉武、惠冠太子,皆卽廟見,斯亦擬在廟之儀也。晉穆帝、孝武將 冠,先以幣告廟,訖又廟見也。 加,皇子、王公世子乃三加。 人之才,猶三十而立,況十二之年,未及志學,便謂德成,無所勸勉,非理實也。 孫毓以爲一加再加皆非也。 禮醮詞曰[サ]「令月吉日」,又「以 魏氏太子再 禮冠於

服。 服,以授侍中、常侍。 **贊冠。**江左諸帝將冠, 下三稱萬歲,乃退。按儀注,一加幘冕而已。 福。」加冕訖,侍中繫玄紞。 侍中脫絳紗服,加袞服。 冠事畢,太保率羣臣奉觴上壽,王公以 皇帝穆穆,思弘袞職。 晉惠帝之爲太子將冠也,武帝臨軒,使兼司徒高陽王珪加冠,兼光祿勳、屯騎校尉華廙 太尉加幘,太保加冕。將加冕,太尉跪讀祝文曰:「令月吉日,始加元 金石宿設,百僚陪位。又豫於殿上鋪大牀。御府令奉冕幘簪導袞 欽若昊天,六合是式。率遵祖考,永永無極。眉壽惟期,介茲景

非古典。」於是制諸王十五冠,不復加命。元嘉十一年,營道侯將冠。 應冠。有司議奏:「禮十五成童。國君十五而生子,以明可冠之宜。又漢、魏遣使冠諸王, 朱冠皇太子及蕃王,亦一加也。官有其注。晉武帝泰始十年,南宮王承年十五,依舊 韶曰:「營道侯義綦可

克日冠。 外詳舊施行。」何楨冠儀約制及王堪私撰冠儀,公亦皆家人之可遵用者也。

魏齊王正始四年,立皇后甄氏,其儀不存。

晉武帝咸寧二年,臨軒,遣太尉賈充策立后楊氏,納悼后也。因大赦,賜王公以下各有

差。百僚上禮。

乘馬 匹,皆令夫家自備,唯璋官爲具致之。」[10]尚書朱整議:「按魏氏故事,王娶妃、公主嫁之禮, 璧用璋,其羊、雁、酒、米、玄纁如故。 諸侯昏禮加納采告期親迎各帛五匹,[4] 及納徵馬四 絹三百匹。」詔曰:「公主嫁由夫氏,不宜皆爲備物,賜錢使足而已。 唯給璋,餘如故事。」 二匹,夫人金五十斤,馬四匹。魏聘后、王娶妃、公主嫁之禮,用絹百九十匹。晉興,故事用 天子諸侯以皮馬爲庭實,天子加以穀珪,諸侯加以大璋。漢高后制,聘后黃金二百斤,馬十 **;大夫用玄纁,束帛加羊。 古者以皮馬爲庭實,天子加穀珪,諸侯加大璋。** 八年,有司奏:「昏禮納徵,大昏用玄纁,束帛加珪,馬二駟;王侯玄纁,束帛加璧, 可依周禮改

逆王后于紀。 杜氏 成 帝 咸康二年,臨軒,遣使兼太保領軍將軍諸葛恢、兼太尉護軍將軍孔腧六禮備物,拜 卽日入宮。 穀梁、左氏說與公羊又不同。 帝御太極殿,羣臣畢賀,非禮也。王者昏禮,禮無其制。 而漢、魏遺事闕略者衆。 晉武、惠納后,江左又 春秋祭公

爲 妹 婚 無 則 禮 復 丘 明 之幣 稱 儀 先 注,故成 詳 守某 錄 而 其事, 二二 已。 公之遺女若而 帝將納杜后,太常華恒始與博士參定其儀。 叉周 靈 蓋爲王者婚娶之禮也。 王求婚於齊,齊侯問於晏桓子,桓子對曰:「夫婦所 人。」此則天子之命,自得 故成帝臨 下達,臣下之答,徑自上通。 軒遣使稱制拜后。 據杜預左氏傳說主婚,是供 然其儀注,又不 生若而 人,姑姊 先 儒 其 以

具

其餘 耳。 之器 所以 皆卽 廟 易具 法 入宮 康 E 先帝 服 帝 法 也。」 御 建元 御 儀 服 物。 物 飾 升 詔 叉 ,而儀注 元年,納后褚氏。 粗 后禮 太極 今當臨 詔 令 舉 日 宜 者, 丁,其 「舊制 . 至尊袞冕升殿,旄 有降,不宜 軒遣使,而立五 以敬其始, 餘 兼 旣 副 難 雜器,停之。」 而儀注陛者不設旄頭。 建 準, 故 五 且於今 牛旗 備 牛旂旗 其 頭 、禮也。 而 不設, 前 作, 備 今猶 今云何 頭畢罕並出。 求量 亦 復設之邪? 非宜。 處。 殿中御史奏:「今迎皇后,依昔成恭 更闕 又案昔迎恭皇后,唯作青龍 府庫之儲,唯當以 所 旣 卽 重 不 用舊 而 設 撤 五牛旗,則 制,今闕。」〔三詔 法 物 邪? 供 又恭后 軍 旄 或 頭 畢罕 族, 神

非 純 公羊 臣 及 婚 也。 至 穆 禮 帝 夫 不 一崇三綱之始,以定乾坤之儀,安有天父之尊, 升 稱 平 主 人 元 之義。 年,將 納皇后 叉 日 『王者之於 何氏 大太常 四 王彪之始更 海, 無非 臣 大 而稱臣下 妾。 引經傳 雖復 及諸 ·之命, 父兄之親, 故 事,以 以納伉儷"安有 師 正 其 友 、禮、深 之賢,

志

舊典。今使使持節太常某、宗正某,以禮問名。」主人曰:「皇帝嘉命,使者某到,重宣中詔, 訓,衣履若而人,欽承舊章,肅奉典制。前太尉參軍都鄉侯糞土臣何琦稽首再拜承制詔。」 問臣名族。臣族女父母所生先臣故光祿大夫雩婁侯楨之遺玄孫,曰巴先臣故豫州刺史關中 次問名版文曰:「皇帝曰,咨某官某姓,兩儀配合,承天統物,正位于內,必俟令族,重章 納采。」主人曰:「皇帝嘉命,訪婚陋族,備數采擇。 臣從祖弟故散騎侍郎準之遺女,未閑教 婦,以奉天地宗廟社稷,謀于公卿,咸以爲宜率由舊典。今使使持節太常彪之、宗正綜以禮 詳推有典制,其納采版文璽書曰:「皇帝咨前太尉參軍何琦,渾元資始,肇經人倫,爰及夫 咸康羣臣賀爲失禮;故但依咸寧上禮,不復賀也。其告廟六禮版文等儀,皆彪之所定也。 晉已行之制,此恒猶識前事,故王彪之多從咸康,由此也。 故尚書左丞胄之外曾孫,先臣故侍中關內侯夷之外孫女。年十七。欽承舊章,肅奉典制。」 侯惲之曾孫,先臣故安豐太守關中侯叡之孫,自己先臣故散騎侍郎準之遺女。外出自先臣 情不安,於義不通。 也。〔111〕臣愚謂今納后儀制,宜一依咸康故事。」於是從之。 父兄主婚之文。又考大晉已行之事, 咸寧故事, 臣下之卑,而稱天父之名,以行大禮。遠尋古禮,無王者此制,近求史籍,無王者此比。於 案咸寧二年,納悼皇后時,弘訓太后母臨天下,而無命戚屬之臣爲武皇 不稱父兄師友, 華恒所定六禮,云宜依漢舊及大 惟以取婦之家,三日不舉樂,而 則咸康華恒所上合於舊

志第四 禮一

惟某 承舊章 遵典 堪。 宗 戰悸,欽承舊章,肅奉典制。」其稽首承 認。 某、太常某,以禮納徵。」主人曰:「皇帝嘉命,降婚卑陋,崇以上公,寵以典禮,備物 日 惟某, 正 **| 納吉版文曰:「皇帝曰,咨某官某姓,人謀龜從,僉曰貞吉,敬從典禮。** 某 欽承 禮 令月吉辰, 備禮以迎。 可 Щ 迎。 ',肅奉典制。」 次請期版文:「皇帝曰,咨某官某姓,謀于公卿,大筮元龜,罔有不臧,率 ,以禮納吉。」主人曰:「皇帝嘉命,使者某重宣中詔,太卜元吉。 率 如 ·舊章,肅奉典制。」次納徵版文:「皇帝曰,咨某官某姓之女,有母儀之德,窈窕之 今使使持節太常某、宗正某,以禮請期。」主人曰:「皇帝嘉命,使某重宣中詔,吉日 禮 河, 臣 以迎。 一欽承 宜奉宗廟,永承天祚。 ,舊章,肅奉典制。」次親迎版文:[[K][皇帝曰,咨某官某姓,歲吉月令,吉 今使使持節太保某、太尉某以迎。」主人曰:「皇帝嘉命, 上公宗卿,兼至副介,近臣百兩。 詔皆如 以玄纁皮帛馬羊錢壁,以章典禮。 初答。 臣蝝蟻之族,猥承大禮,憂懼 臣陋 今使持節太常某、 今使使持節司徒 族卑鄙,憂懼不 使者某重宣中 典策。 欽

康所奏,又有不 萬,玉璧 頭,酒米各十二斛。 孝 武 一枚,馬六頭 納王皇后, 同,官有其注。 唯納徴羊 其禮亦 ,酒米各十二斛,鄭玄所謂五雁六禮也。 如之。 頭,玄 其納采、 |練用 帛三匹, 問名、納吉、請期、親迎、こじ皆用白雁白羊 絳二匹, 絹二百匹,虎皮二枚,錢 其珪馬之制,備物之數,校太 · 各 一 二百

古者昏、冠皆有醮,鄭氏醮文三首具存。

陵廬陵南豐七國侍郎以上,諸二千石在都邑者,並豫會。又詔今小會可停妓樂,時有臨川 太極殿西堂敍宴二宮隊主副、司徒征北鎭南三府佐、楊克江三州綱、彭城江夏南譙始興武 宋文帝元嘉十五年四月,皇太子納妃,六禮文與納后不異。百官上禮。 其月壬戌,於

曹太妃服。

諸僻謬,並合詳裁。雖禮代不同,文質或異,而鄭爲儒宗,旣有明說,守文淺見,蓋有惟疑。 謂婚禮不辨王公之序,故取虎豹皮以尊革其事乎。虎豹雖文,而徵禮所不用。熊羆吉祥, 庭實,鹿皮也。』晉太子納妃〕儀注,『以虎皮二』。こむ太元中,公主納徵,以虎豹皮各一具。豈 合用珪璋豹皮熊羆皮與不?下禮官詳依經記更正。若應用者,爲各用一?爲應用兩。」博 兼炳蔚,熊羆亦昏禮吉徵,以類取象,亦宜並用,未詳何以遺文。晉氏江左,禮物多闕,後代 士裴昭明議:「案周禮,納徵,玄纁束帛儷皮。鄭玄注云:『束帛〔十端也。儷,兩也。 因襲,未遑研考。今法章徽儀,方將大備。 何所準況。或者虎取其威猛有彬炳,玉以象德而有溫潤。尋珪璋旣玉之美者,[15] 豹皮義 而 婚典所不及。 明帝泰始五年十一月,有司奏:「按晉江左以來,太子昏,納徵,禮用玉一,虎皮二,未詳 珪璋雖美,或爲用各異。今帝道弘明,徽則光闡,儲皇聘納,宜準經誥。凡 宜憲範經籍,稽諸舊典。今皇太子昏,納徵,禮 兩皮為

備。 品、采豹之彰、義齊虎文、熊羆表祥、繁衍攸寄。 禮納徵,直云玄纁束帛雜皮而已。 兼太常丞孫詵議以為:『聘幣之典,損益惟義, 居然用兩,珪壁宜仍舊各一也。』參詵、「蘇二議不異,今加珪璋各一,豹熊羆皮各二,以蘇議 禮稱束帛儷皮,則珪璋數合同璧,熊羆文豹,各應用二。』長兼國子博士虞龢議:『案儀 禮記郊特牲云虎豹皮與玉壁,非虛 歷代行事,取制士婚。 今儲后崇聘,禮先訓遠, 若珪 作也。 皮玉 璋 之美, 之用, 則虎豹之皮, 宜盡 實均壁

制 詔曰:「拜授可依魏氏故事。」於是臨軒使使持節兼太常拜夫人,兼御史中丞拜九嬪 漢、魏之禮,公主居第,尙公主者來第成婚。司空王朗以爲不可,其後乃革 晉武帝泰始十年,將聘拜三夫人九嬪。有司奏:「禮,皇后聘以穀珪,無妾媵 禮贄之

爲允。」詔可。

常侍 皆入。虎賁中郎將、羽林監分陸端門內。侍御史、謁者各一人監端門。廷尉監、平分陛東、 廂 西 中 之樂於殿前。漏上二刻,侍中、侍臣、冗從僕射、中謁者、節騎郎、虎賁,旄頭遮列,五牛旗 華門。 、給事: 凡遣大使拜皇后、三公,及冠皇太子,及拜蕃王,帝皆臨軒。其儀,太樂令宿設金石四 黃門侍郎、散騎侍郎升殿夾御座。尚書令以下應階者以次入。治禮引大 漏 上三刻,殿中侍御史奏開殿之殿門、南止車門、宣陽城門。軍校、侍中、散騎 上四刻,侍中奏三外辦。」皇帝服袞冕之服,升太極殿,臨軒南面。 鴻 臚

謁者前

陳

九賓。

漏

志

四

位皆再拜。 北 謁者引護當使者當拜者入就拜位。 !面一拜,跪奏:「大鴻臚臣某稽首言,羣臣就位。 謹具。」侍中稱制曰:「可。」謁者贊拜,在 大鴻臚稱臣一拜, 仰奏: 「請行事。」侍中稱制曰: 「可。」鴻臚舉手曰: 「可行事。」 四廂樂作。 將拜,樂止。 禮畢出。 官有其注。

也。 有桃 郡縣此禮往往猶存。 卯,無磔雞。 桃卯本漢所以輔,卯金又宜魏所除也,但未詳改仲夏在歲旦之所起耳。 舊時歲旦,常設葦菱桃梗,磔雞於宮及百寺門,如以釀惡氣。 案明帝大修釀禮、「三」故何晏釀祭議據雞牲供釀釁之事,磔雞宜起於魏 漢儀,則仲夏之月設之, 朱皆省,而諸

於今,又未周備也。 **尊卑而奉璋。」此則大饗悉在城外,不在宮內也。臣案魏司空王朗奏事曰:「故事,正月朔,** 又曰:「華幄映於飛雲,朱幕張于前庭。絙青帷於兩階,象紫極之崢嶸。延百辟于和門,等 無存者。案何楨許都賦曰:「川」」「元正大饗,壇彼西南。 殿下設兩百華鐙,對於二階之間。端門設庭燎火炬,端門外設五尺、三尺鐙。月照星 上代聘享之禮,雖頗見經傳,然首尾不全。。叔孫通傳載通所制漢元會儀,綱紀粗舉,施 魏國初建,事多兼闕,故黃初三年,始奉璧朝賀。何承天云,魏元會儀 旗幕峨峨,檐宇弘深。」 王沈正會賦

也。 明, 雖夜猶晝矣。」如此,則不在城外也。 王賦 又云「朝四國於東巡」,亦賦許昌正會也。 何、王二賦、本不在洛京。 何云許都賦,時在許昌

漏未 宮宿 儀。 典藝,採秦、漢之舊儀,定元正之嘉會。」此則兼採衆代可知矣。 登。」謁者引上殿,當御座。 禮 興,皆再拜。 帛羔雁雉, 石、二千石、千石、六百石當大行令西, 訖,謁者引下殿,還故位。 鍾鼓作, 刻,羣臣集到, 郞 讚 盡 漏 設王公卿校便坐於端門外,大樂鼓吹又宿設四廂樂及牛馬帷閤於殿前。 晉武 未 七 「皇帝延王登。」大鴻臚跪讚:「蕃王 百官皆拜伏。 帝世 盡 刻,羣司 再拜賀。」太常讚:「皇帝延君登。」治禮引公至金紫將軍 五. 皇帝坐,又再拜。 刻, 一, 更定元會注, 今有咸寧注是也。 庭燎起火。 乘車 謁者僕射、大鴻臚各奏: ·與百官及受贄郞下至計吏,同己皆入,詣陛部立。 太常導皇帝升御座。 治禮郞引公、特進、匈奴南單于子、金紫將軍 上賀謁報,又賀皇后。 皇帝興,王再拜。 跪置璧皮帛御座前,復再拜。 皆北 · 「羣臣就位定。」漏盡,侍中奏:「外辦。」皇帝出 面伏。 皇帝坐,復再拜,跪置壁御座前,復 鍾鼓 臣某等奉白璧各一 傅玄元會賦曰:「考夏后之遺訓,綜殷、周之 此。 還從雲龍東中華門入謁,詣 大鴻臚跪讚:「太尉、中二千石等奉璧皮 百官起。 成禮訖,讚者引下殿,還故位。 咸寧注,先正月一日,三三守 ,再拜賀。」 太常報: 「王 大鴻臚跪奏:「請朝賀。」治 上殿,三当當 當大鴻臚西,中 其陛 一衛者, 東閣 御座。 夜漏未盡十 再拜。 下便坐。 如臨軒 皇帝 三千 成 悉 禮

志

作。 帛 皆起。太官令持羹跪授司徒"持飯跪授大司農"尚食持案並授侍郎,侍郎跪進御座前。[三] 有天下,多仍舊儀,所損益可知矣。 謁者一人跪奏:「請罷退。」鍾鼓作,羣臣北面再拜出。 江左更隨事立位,大體亦無異也。 宋 **儛以次作。鼓吹令又前跪奏:「請以次進衆伎。」乃召諸郡計吏前,授敕戒於階下。宴樂畢,** 羣臣就席。太樂令跪奏:「食。舉樂。」太官行百官飯案遍。食畢,太樂令跪奏:「請進儛。」 御座前。乃行百官酒。太樂令跪奏:「奏登歌。」三。終,乃降。太官令跪請御飯到陛,羣臣 書令各於殿上上壽酒,登歌樂升,太官令又行御酒。 王臣某等奉觴再拜,上千萬歲壽。」侍中曰:「觴已上。」百官伏稱萬歲。 者引王詣尊酌壽酒,CMOJ跪授侍中。侍中跪置御座前。王還自酌,置位前。 王公置璧成禮時,大行令並讚,殿下中二千石以下同。成禮訖,以贄授受贄郎,曰心郎以璧 百官皆坐。 付謁者, 羔雁雉付太官。太樂令跪請奏雅樂。[]刊以次作樂。 已飲,又再拜。謁者引諸王等還本位。陛者傳就席,羣臣皆跪諾。 謁者僕射跪奏: 「請羣臣上。」謁者引王公至二千石上殿,[[元]千石、六百石停本位。 畫漏上水六刻,諸蠻夷胡客以次入,公司皆再拜訖,坐。御入三刻,又出。 御酒升階,太官令跪授侍郎,侍郎跪 乘黃令乃出車。 四廂樂作。 侍中、中書令、尚 謁者跪奏:「蕃 皇帝罷入, 百官再 謁 進

晉江左注,皇太子出會者,則在三恪下、王公上。宋文帝元嘉十一年,升在三恪上。

年。 奉聘。」奏可。 侯之國,其王公以下入朝者,四方各爲二番,三歲而周,周則更始。 來朝之後,更滿三歲乃復,不得從本數。朝禮執璧如舊朝之制。至三不朝之歲,各遣卿 魏 制,蕃王不得朝覲。明帝時有朝者,皆由特恩,不得以爲常。 江左王侯不之國,其有授任居外,則同方伯刺史二千石之禮,亦無朝聘之制, 若臨時有故,行三却在 晉泰始中,有司奏:「諸 明

此

禮逐

杜蕢 降,趨 記,知悼子卒,未葬,平公飲酒,師曠、李調侍,鼓鍾。 舉」。白虎 「子卯不樂,知悼子在堂,斯其爲子卯也大矣。 「在寢。」 何 也宰夫,唯 漢以高 洗 正 也 而 旦元會,設白虎樽於殿庭。樽蓋上施白虎,若有能獻直言者,則發此樽飲酒。 而 杜蕢]。]曰:「調也,君之褻臣 出。 揚 樽,蓋杜舉之遺式也。 帝十月定秦旦爲歲首,至武帝雖改用夏正,然朔猶常饗會,如元正之儀。 觶。 平公呼而進之曰:「實,曩者爾心或開予,是以不與爾言。 ·入寢,歷階而升,酌曰:「曠飲斯。」又酌 刀匕是供,又敢與知防,是以飲也。」平公曰:「寡人亦有過焉。 公謂侍者曰:「如我死,則必 也。爲一飲一食,忘君之疾,是以飲之也。」「爾飲,何也?」曰 畫爲虎,宜是後代所加,欲令言者猛 無廢斯爵。」至于今,旣畢獻, 曠也,太師也。 日 杜蕢自外來,聞鍾聲曰:「安在。」 調飲斯。」 不以詔,是以飲之也。」「爾飲 又酌,堂上北 如 虎,無所 爾飲 斯揚 **)**曠,何 酌 忌憚 觶 而 面 ",謂之「杜 飲寡人。」 也。二日: 坐飲之, 也。

魏、晉

志

第

四

督府者,亦宜同停。」

「慶冬使或遣不,事役宜省,〔圜〕今可悉停。

唯元正大慶, 不得廢耳。

郡縣遣冬使詣州及都

陽路 十餘 郊 壇。 氏 就陽位也。』漢初甘泉河東 月,〔三尚書右丞徐爰議:「郊祀之位,遠古蔑聞。 爲 兆於秣陵牛頭 過江,悉在北。 北湖 修遠。 里郊 皇宋受命,因 北 孫權始都武昌及建業,不立郊兆。 郊, 中是也。 移於湖塘西北。 晉成帝世始立, 謂宜移郊正午,以定天位。」博士司馬興之、傅郁、太常丞陸澄並 Щ 而弗改。 及郊兆之議,紛然不 晉氏 西,正在宮之午地。 南遷, **禋埋易位,終亦徙於長安南北。** 本在 其地卑下泥濕, 且居民之中,非邑外之謂。 立南郊於巳地, 覆舟山 南。 世祖 ____ 至末年太元元年十一月,祭南郊, 又南出道狹,未議開闡,遂於東南 又移於白石邨東。 崩,前廢帝. 宋太祖以其地爲樂游苑,移於 非禮所謂陽位之義也。 禮記『燔柴於泰壇,祭天也。』『兆於南郊, **今聖圖** 即位,以郊舊地爲吉祥,移還本處。 光武紹祚,定二郊洛陽南 重造, 其地又以爲湖, 舊章畢新, 宋孝武 其地 山西 同爱議。 巳地 北。 乃移於鍾山 大明三年九 今秣陵 南驛開塗, 後 北。 創立丘 以其

地 北原道西、江縣)與南郊相對。 後罷白石東湖,北郊還舊處。

興。 南 進 升 蒯 謁 鄎 用 牽 史 紗 天 太 皇 牽 者 金 牲 行 洗 祝 神 匏 袍,黑介幘,通天 詣 令 出 叉 羣 根 車 牲 座 爵 陶 南 引 臣 進 壇 跪 車 駕 庖。 前 入。 郊, 再 以瓦 皆 門, 饌,郎施饌。 光 出 授 到 執 拜 皇帝散 百百 以二陶豆酌毛血,其一 到 旅 再拜伏。 皇 爵 塷 樽盛酒, 治 伏 ·榜,稟犧令跪白:「請省牲。」舉 升 官 東門 帝。 跪 禮 壇 奠,如 應 舉 飮 齋七日, 終 金博 執樽 外。 齌 手 福 治 牲用 瓦圩斟酒。 獻。 及 白, 酒 皇天 禮 Щ 從 博 郎 訖, 日:「日 化駕塡街 致齋三日。 訖。 羣臣皆再拜伏。 授爵,酌 士、太常引入到黑攢。 蠒 之禮 博 栗二頭,羣神用 興。」博 先郊日 各降 士 .先置者,各隨 、太常 壁用 奠皇天 南 秬 階 未晡 鬯 士、太常引 面 蒼 官掌清者亦 還本位 引帝 授 北 丢。 八神座前 皇帝。 向,一 五 皇帝盤, 手曰:「腯 從 牛一 刻,夕牲。 蒯席各 申 東階下, 拜伏。 太祝 皇帝至 等,其 頭。 跪奠 太祝 攝 如之。 從 治禮曰:「興。」博 送 令跪 事。 皇天神 醴 奠太祖 太祝 公卿 一南階, 神 太祝令各酌 還南 不設茵 用 致齋之朝,御太極 執 柜 上 跪 令 京 階。 鬯,藉 座前。 匏 水 脫舃 執 神座 繞 兆 陶,酒 匏 | 蓐。 性,舉 尹 謁 刻, 陶 升 再 前。 衆官悉壇 用 福 者 古者席 壇, 土 白茅。 拜, 酒 以 引 御 手曰 酒 跪 灌 郊之日未 太常 服 詣 興。 以 日 合 地。 龍 殿幄 ...「充。」太祝 灌 罍 置 藁, 東就 玄 袞, 升 次詣 盥 地。 祠 皇 酒 壇 晉 坐。 事畢, 爵 帝 平 明 位,太祝 太祖 黄 江. 興。 器,器 中 ·天冠, 八刻 亞 再 左用 著絳 門 就 侍 令 直 跪 配

治禮 諸饌 燎。」博士、太常引皇帝就燎位,當壇東階,皇帝南向立。 則三 使三公行 壇 百官 東 一公行 物, 舉 西各二十人,以炬投壇,火半柴傾。 到 壇 手 三獻, 登柴壇施設之。 事,而太尉 日 ,乘輿罕出矣。 :「可埋。」二十人俱時下土。 悉 如 南 初獻,其亞獻、終獻,猶太常、光祿勳也。 郊之禮,唯事訖, 治禮舉手曰:「可 魏及晉初,儀注雖不具存,所損益漢制 博士仰白:「事畢。」皇帝出便坐。解嚴。天子有故, 太祝令牲玉饌物詣埳置牲上訖,又以一牲覆其上。 塡埳欲半,博士仰白:「事畢。」帝出。 療。」三人持火炬上。 太祝令以案奉玉璧牲體爵酒黍飯 北郊齋、夕牲、進熟,及乘輿 火發。 可 知 也。 太祝令等各下壇 江左以後,官有 自魏 以來, 多

其注

天郊 月。 夕月於西,今正月,非其 日 夕月于 之詞曰:「維某年某月上日。 此爲 神之道也。」黃初 魏文帝 西郊 卽 用郊日,不俟二分 韶曰:「漢氏 ,此古禮也。 一年正 時 不拜日於東郊,而 白虎通 也。 月 也。 明光于上下,勤施于四方, 漢郊祀志,「計」帝郊泰時,平旦出 乙亥,朝日于東門之外。 「王者父天、母地,兄日、姊月」, 明帝太和元年二月丁亥朔 旦夕常於殿下東 按禮, 旁作穆穆,維予一人。某敬拜迎 面拜日,煩褻似家 で一点 天子以春 竹宮 此其義也。 朝 1東向 H 于 分朝 揖 東郊,八月己丑, H 人之事, H 尙 其 於 書大傳,迎 (夕西 東 |向揖 秋 非

車 同 日于郊。」吳時郎陳融奏東郊頌,吳時亦行此禮也。 駕 復爲 祀 朝 無定 日 、「慰寒溫未適、 制。 間 ...者方難未平,故每從所奏。 可不親出。」詔曰:「禮儀宜 今戎事弭息,唯此爲大。」案此詔,帝復 晉武帝太康二年,有司奏:「 有常; 如 所奏,[80] 與故 太 春分依 尉 所 爲親 撰不 舊請

朝

日

也。

此後廢。

勳終 儀 治 攝 絳 則 太常 紗 從 禮 如 一公行 太祝 、光祿 郊 引 獻 袍, 事 殷 陰 祠, 黑介幘,通 室 令跪 上水一 事 凡 勳、三公等皆入在位。 皇帝散齋七日,致齋三日。 , 而 以 禘 讀 次 祫 太尉初獻,太常 刻,皇帝著平冕龍袞之服, 大 祝 奠爵于饌前。 /祭,則 文,訖,進奠神座前 天金博 神主 山冠。 悉出廟堂,爲昭 其功 亞獻,光祿 祠之日, 皇帝降車 臣 ,皇帝還本位。 配饗者, 百官清者亦如之。回己致齋之日,御太極殿幄 勳終獻 車駕出, 入廟,脫鳥,盥及 升金根 穆以 設 也。 坐 安 車, 百 於 坐,不 四時 博 官官 庭, 到 士 應齋從駕留守塡街 廟 祭祀, 謁 引太尉 復停室 洗 北 者奠爵于 門訖。 爵, 訖, 升殿。 亦皆於將祭必先 也。 亞獻, 訖, 治禮 晉氏 一饌前 謁 先置者,各依宣 叉 謁 初 有陰 者各 皇帝 獻 者 夕 叉引光祿 室 引 **奠**爵,樂 不 牲, 坐, 太樂、 親 四 祠, 其 著

晉武 帝 泰始 七年四月,帝將親祠,車駕夕牲,而儀注還不拜。 詔問 其故。 博 士奏三歷

也。 上帝之祠,無所爲廢。宮室至大,陌使至微,日又寬,可齋無疑。」甯非不知有此議,然不從 使於南書寺,於是詔書曰:「議郎蔡邕、博士任敏,問可齋祠不?得無不宜。」 邕等對曰:「按 臣竊以爲疑。」於是尚書奏使三公行事。昔漢靈帝世,立春尚齋迎氣東郊,尚書左丞毆殺陌 侍郎范甯奏:「案喪服傳,有死宮中者,三月不舉祭,不別長幼之與貴賤也。皇女雖在嬰孩, 晉王位,四三行天子殷祭之禮,非常之事也。 十一月一日合朔奠、冬烝、夕牲同日,可有司行事。 上旬他日。」案此則武帝夕牲必躬臨拜,而江左以來復止也。晉元帝建武元年三月辛卯,卽 相承 魏及晉初,祭儀雖不具存,江左則備矣。 如此。」帝曰:「非致敬宗廟之禮也。」於是實拜而還,遂以爲制。 孝武太元十一年九月,皇女亡及應烝祠。 官有其注。 韶曰:「夕牲而令有司行事,非也。 太康中,有司奏議, 改擇 中書

、太常、大司 祠 太社、帝社、太稷,常以歲二月八月二社日祠之。 農三獻也。 官有其注。 周禮王親祭,漢以來,有司行事。 太祝令夕牲進熟, 如郊廟儀。 司

漢安帝元初六年,立六宗祠於國西北戌亥地,四三祠儀比泰社

禮 所用幣,[四]叔孫昭子曰:「日有蝕之,天子不舉樂,[四]伐鼓於社,諸侯用幣於社,伐鼓於朝, 繞宮,伺察守備,周而復始。 鼓於門,聞鼓音,侍臣皆著赤幘,帶劍入侍。三臺令史以上,皆各持劍立其戶前。衞尉 皆著赤幘,以助陽也。 **l也。」又以赤絲爲繩繫社,祝史陳辭以責之。 社,勾龍之神,天子之上公,故責之。 合朔,** H 月將交會,太史上合朔。 日將蝕,天子素服避正殿,內外嚴警,太史登靈臺,伺候日變。 日復常,乃皆罷。」魯昭公十七年,六月朔,日有蝕之。 祝史請 尙書先事三日,宣攝內外, 戒嚴。 摯虞決疑曰:「凡救蝕者, 。更伐 卵馳

謬誤也。」文若及衆人咸喜而從之,遂朝會如舊,日亦不蝕。 劭由此顯名,魏史美而書之。 時廣平計吏劉劭在坐,曰:「梓愼、裨竈,古之良史,猶占水火,錯失天時。禮諸侯旅見天子, 入門不得終禮者四,日蝕在一。然則聖人垂制,不爲變異豫廢朝禮者,或災消異伏,或推術 昔漢建安中,將正會,而太史上言正旦當日蝕,朝士疑會不。 共詣尚書令荀文若諮之。 官有其注。

理,「思」無術以知,是以嘗禘郊社,日蝕則接祭,是亦前代史官不能審蝕也。 虧,故謂之日蝕。日掩月,則日於月上過,謂之陰不侵陽,雖交無變。日月相掩必食之 之負。史官答曰:「合朔之時,或有日掩月,或有月掩日。月掩日,則蔽障日體,使光景有 魏高貴鄉公正元二年三月朔,太史奏日蝕而不蝕。晉文王時爲大將軍,大推史官不驗 自漢故事,以爲

志

來黃帝 H 蝕 必當於交。 、顓頊、夏、殷、周、魯六歷,皆無推日蝕法,但有考課疏密而已。 每至其時, 申警百官,以備日變。 故甲寅詔有備蝕之制,無考負之法。古 負坐之條,由本無術

晉武帝咸寧三年、四年,並以正旦合朔却元會,改魏故事也。

可

`課,非司事之罪。」乃止。

陰也。 所 陳有正義,輒敕外改之。」 晉元 諸侯 一帝太興元年四月合朔,中書侍郎孔愉奏曰:「春秋日有蝕之,天子伐鼓于社,攻諸 伐鼓於朝,臣自攻也。 案尚書符,若日有變,便伐鼓於諸門,有違舊典。」詔曰:

災消異伏,又以慎 知 聃 異 八 而 百官降 其 助 豫 坐 以乙亥嘗祭,春秋譏之。 不 廢朝 了,于時有謂

劭爲不得禮意,

荀文若從之,是勝人之一失。 葬 至康帝建元元年,太史上元日合朔,朝士復疑應却會與否。 ·蝕乎? 於 物,用幣伐 禮,此 巷黨,以喪不見星而行,故日蝕 夫子、老聃豫行見星之防,而劭廢之,是棄聖賢之成規也。 則謬矣。 鼓,躬親而救之。 、竈猶有錯失,太史上言亦不必審,其理誠然也。 災祥之發,所以譴告人君,王者所 災事旣過,猶追懼未已,同己故廢宗廟之祭,況聞天眚將至,行慶 夫敬誠之事,與其疑而廢之,寧愼 而 止柩,日安知 其不 重誠。 見星也。 故蔡謨遂著議非之曰「劭論 庾冰輔政,寫劉劭議以示 故素服廢樂, 而云聖人垂 今史官言當 而 魯桓 行 之。 公壬申有災, 故 退避正 制,不爲變 蝕,亦安 孔子、老

· 聃巷黨之事,亦禮記所言,復遠而反之,進退無據。 耳,非先聞當蝕,而朝會不廢也。劭引此,「晉」可謂失其義指。劉劭所執者禮記也,夫子、老 樂之會,於禮乖矣。 禮記所云『諸侯入門不得終禮者』,謂日官不豫言,諸侯旣入,見蝕乃知 荀令所善,漢朝所從,遂使此言至今見

錯,「图〕故不豫廢朝禮也。」於是又從彪之,相承至今。 諸侯旅見天子,不得終禮而廢者四,自謂卒暴有之,非爲先存其 事 而 徼 幸 史 官 推 術 繆 至永和中,殷浩輔政,又欲從劉劭議不却會。王彪之據咸寧、建元故事,又曰「禮云,

稱,莫知其謬。後來君子,將擬以爲式,故正之云爾。」於是冰從衆議,遂以却會。

難,以帥先天下。「三」主者詳具其制,幷下河南處田地於東郊之南,洛水之北,平良中水者。 名,曾無供祀訓農之實,而有百官車徒之費。今修千畝之制,當與羣公卿士,躬稼穡之艱 王,躬耕帝籍,以供郊廟之粢盛,且以訓化天下。近代以來,耕籍止於數步中,空有慕古之 四年,有司奏始耕祠先農,可令有司行事。CMOJ詔曰:「夫民之大事,在祀與農。 月,東巡,耕於下邳。章帝元和三年正月北巡,耕於懷縣。魏三祖皆親耕籍。 ·無官田,隨宜便換,不得侵民人也。」自此之後,其事便廢。 耕籍之禮尚矣,漢文帝修之。及昭帝幼卽大位,耕於鈎盾弄田。明帝永平十五年二 史注載多有闕。江左元、哀二 是以古之聖 晉武帝泰始

帝,行三治將修耕籍,賀循等所上注,及裴憲爲胡中所定儀,又未詳允。

蕃王以下至六百石皆衣青。唯三臺武衞不耕,不改服章。車駕出,衆事如郊廟之儀。車駕 擇上辛後吉亥日,御乘耕根三蓋車,駕蒼駟,靑旂,著通天冠,靑幘,朝服靑袞,帶佩蒼玉。 之人出種稑之種,付籍田令。耕日,太祝以一太牢告祠先農,悉如祠帝社之儀。 立先農壇於中阡西陌南,御耕壇於中阡東陌北。將耕,宿設青幕于耕壇之上。皇后帥六宮 訓農功,躬耕帝籍,敬供粢盛。仰瞻前王,思遵令典,便可量處千畝,考卜元辰。 朕當親率 課。遊食之徒,咸令附業。考覈勤惰,行其誅賞,觀察能殿,嚴加黜陟。古者從時脉土,以 德未孚,以臻斯弊,抑亦耕桑未廣,地利多遺。宰守微化導之方,萌庶忘勤分之義。 以奏聞。乃下詔曰:「國以民爲本,民以食爲天。一夫輟耕,饑者必及。倉廪旣實, 至籍田, 侍中跪奏:「尊降車。」臨壇, 大司農跪奏: 「先農已享, 請皇帝親耕。」太史令讚曰: 內外,各使隨局從事。 司空、大農、京尹、令、尉,度宮之辰地八里之外,整制千畝,開阡陌 百辟,致禮郊甸。庶幾誠素,獎被斯民。」於是斟酌衆條,造定圖注。先立春九日,尚書宣攝 興。自頃在所貧耗,家無宿積,陰陽暫偏,至則人懷愁墊;年或不稔,而病乏比室。 濟,明發載懷。 元嘉二十年,太祖將親耕,以其久廢,使何承天撰定儀注。史學生山謙之已私鳩集,因 雖制令亟下,終莫懲勸,而坐望滋殖,庸可致乎。有司其班宣舊條,務盡敦 孟春之月, 禮節以 永言弘 誠 由 政

皇帝親耕。」三推三反。於是羣臣以次耕,王公五等開國諸侯五推五反,孤卿大夫七推七

反, 士九推 九反。 籍田令率其屬耕,竟畝,灑種,卽耰,禮 畢

東耕後,乃班下州郡縣,悉備其禮焉。 躬 秉 耒 魏氏 耜,以奉 雖天子耕籍,其蕃鎭 社稷宗廟,以勸率農功。 諸侯,並闕 百畝之禮。 今諸王治國, 宜修耕籍之義。」然未施行。 晉武帝末,有司奏:「古諸侯耕籍百畝 宋太祖

皇后 時漢 代 制 奏:「先王之制,天子諸侯 郊, 中門之外, 故 而 宜是與籍 體 注 事 周 天子 蠶 ', 以 資 已亡,更考撰 禮 禮 生之德,合配乾之義,而教道未先, ,王后帥內外命婦,蠶於北郊。 親 參今宜。 不 桑 修 籍以 田 林 一對其 在 中間 供粢盛,后夫 其 、方也。 其儀 明 東, 年 務 先 蠶 親耕 多 也。 施 行。」 魏文帝黃初七年正 未 千畝 壇在宮外門之外而 及至晉氏,先蠶 人 · 暇 崇備 於是使 躬 ",后 夫 蠶 以 侍 漢則 人躬蠶 備 今 中成粲草定 ·天下. 祭服。 鑑禮 東郊,非古也。 多采魏 月,命中宮蠶于北 桑宮。〔蓋〕今陛 ·無事, 東南。 尚闕。 所 以 法。 其儀。〔臺〕皇后 宜修 聿遵 取民妻六人爲 以爲宜依 晉 武· 禮 孝敬, 魏則 下 以示 帝太康六年,散騎常侍 以聖 郊。 北郊、依周 古式,備斯 明 四 采桑 海。 敎 明 按韋誕后蠶頌, 蠶 示訓 至仁,修先王之緒, 母。 壇 其 在 禮也。 詳 也。 蠶 盛 蠶 依 將 室 典。」 古典 **今籍** 西,惟 生,擇吉 晉 詔 華嶠 則于 則 及 田 有 近 西 宫

志

進夫人、外世婦、命婦,皆步搖、衣青,各載筐鉤從。 陪乘,載筐鉤。 還便坐,公主以下以次就位,設饗賜絹各有差。 采三條; 諸妃公主各采五條; 縣鄉君以下各采 日,[Pi] 太祝令以一太牢祠先蠶。 日,皇后著十二笄,依漢魏故事,衣靑衣,乘油蓋雲母安車,駕六馬。 。公主、三夫人、九嬪、世婦、諸太妃、公太夫人、公夫人,及縣鄕君、郡公侯特 皇后至西郊,升壇,公主以下陪列壇東。 九條。 宋孝武大明四年,又修此禮。 蠶桑前一日,蠶宮生蠶著薄上。「無〕躬桑 悉以桑授蠶母。 女尙書著貂蟬,佩璽, 還蠶室。 皇后東面 事訖,皇后

太學。明制黜陟,陳榮辱之路。」不從。晉武帝泰始八年,有司奏:「太學生七千餘人,才任 博士,取行爲人表,經任人師者,掌敎國子。依遵古法,使二千石以上子孫,年從十五,皆入 役,高門子弟,恥非其倫,故無學者。〔長〕雖有其名,而無其實,雖設其敎,而無其功。 起國子學,蓋周禮國之貴遊子弟所謂國子,受敎於師氏者也。太康五年,修作明堂、辟雍、 四品,聽留。」詔:「已試經者留之,其餘遣還郡國。大臣子弟堪受敎者,令入學。」咸寧二年, 正始中,劉馥上疏曰:「黃初以來,崇立太學,二十餘年,而成者蓋寡。 漢獻帝建安二十二年,魏國作泮宮于鄴城南。 魏文帝黃初五年,立太學於洛陽。 由博士選輕,諸生避 宜高 齊王 選

就業。 來,時事多故,吏民頗以目前趨務, 舊置學官,立五經博士,覈取應選, 孫休永安元年,詔曰:「古者建國,敎學爲先。所以導世治性,爲時養器也。 一歲課試,差其品第,加以位賞。 棄本就末,不循古道。 加其寵祿。 使見之者樂其榮,聞之者羨其譽。 科見吏之中及將吏子弟有志好者、「是己各令 夫所尚不淳,則傷化敗俗。 以淳王化,以隆 自建興以 其按

元帝爲晉王,建武初,驃騎將軍王導上疏:

風俗。」於是立學。

者也」。 然也。 後貴。 通,彝倫攸敍,有恥且格也。 父子兄弟夫婦長幼之序順,而君臣之義固矣。 家以及 所以尊道 遷善遠罪,而不自知。 家而天下定者也。 夫治化之本,在於正人倫。 於鄉,學於鄉以登於朝。反本復始,各求諸己,敦素之業著,浮僞之道息, 其取才用士,咸先本之于學。 故以之事君則忠,用之莅下則仁,卽孟軻所謂「未有仁而遺其親,義而後其君 而貴士也。人知士之所貴,由乎道存。 故聖王蒙以養正,少而教之,使化沾肌骨,習以成性,有若自然,日 行成德立,然後裁之以位。雖王之嫡子,猶與國子齒,使知道而 人倫之正,存乎設庠序。 。故焉禮,鄕大夫「獻賢能之書于王,王拜而受之」。 則退而修其身,修其身以及 庠序設而五教明, 易所謂 則德 其家,正 教使 化洽 正

情,獸心革面,揖讓而蠻夷服,緩帶而天下從,得乎其道者,豈難也哉。故有虞舞干戚 之所震者遠矣。 也。 **虜扇熾,節義陵遲,國恥未雪。 忠臣義士,所以扼腕拊心,禮樂政刑,當並陳以俱濟者** 經綸稽古,建明學校,闡揚六蓺,以訓後生,使文武之道,墜而復興。 方今小雅盡廢,戎 殿下以命世之資,屬當傾危之運,禮樂征伐,翼成中興,將滌穢蕩瑕,撥亂反正。 H 不爲樂,樂必崩」。 道,使朝之子弟,並入于學,立德出身者咸習之而後通。 德路開而偽塗塞,則其化不肅 而 而三苗化,魯僖作泮宮而淮夷平,桓、文之霸,皆先敎而後戰。今若聿遵前典,興復敎 成,不嚴而 辜,俎豆不設,先王之道彌遠,華僞之風遂滋,非所以習民靖俗,端本抑末之謂也。 自 頃皇綱失統,禮敎陵替,頌聲不興,于今二紀。 1治矣。選明博修禮之士以爲之師,隆敎貴道,化成俗定,莫尙於斯也。 由斯而進,則可朝服濟河,使帝典闕而復補,王綱弛而更張,饕餮改 而況如此其久者乎?先進漸忘揖讓之容,後生唯聞金革之響,干戈 傳曰「三年不爲禮」禮必壞,三年 誠宜

散騎常侍戴邈又上表曰:

國有明堂辟雍之制,鄉有庠序黌校之儀,皆所以抽導幽滯,啓廣才思。蓋以六四 臣 聞 ·天道之所運,莫大於陰陽,帝王之至務,莫重於禮學。 是以古之建國,教學爲

髦俊,斐然向風,受業身通者七十餘人。自茲以來,千載寂漠,豈天下小於魯國,賢哲 有困蒙之客,君子大養正之功也。昔仲尼列國之大夫耳,興禮修學於珠、泗之間,四方

乏於曩時,厲與不厲故也。

遭亂尙武,文武迭用,久長之道。譬之天地,昏明之迭,[ko]自古以來,未有不由之者 胡馬之足,圖讖無復孑遺於世。此蓋聖達之所深悼,有識之所咨嗟也。夫治世尙文, 與制禮作樂者哉!又貴遊之子,未必有斬將搴旗之才,亦未有從軍征戍之役,不及盛 成,古之俊义,必三年而通一經,比須寇賊淸夷,天下平泰,然後修之,則功成事定,誰 也。今或以天下未壹,「ミド」非興禮學之時,此言似是而非。夫儒道深奧,不可倉卒而 紀,如此之久邪!今末進後生,目不覩揖讓升降之禮,耳不聞鐘鼓管弦之音,文章散滅 于中原,何遽籩豆之事哉!然「三年不爲禮,禮必壞,三年不爲樂,樂必崩」。 況曠載累 年講肄道義,使明珠加瑩磨之功,荆、隨發采琢之美,不亦良可惜乎。〔於三 蕭條,鞠爲茂草,四海之內,人跡不交。霸主有旰食之憂,黎民懷荼毒之痛,戎首交幷 自頃遭無妄之禍,社稷有綴旒之危,寇羯飲馬於長江,凶狡虎步於萬里,遂使神州

天地造始,萬物權輿,聖朝以神武之德,值革命之運,蕩近世之流弊,繼千載之絕軌,篤 愚以世喪道久,民情玩於所習,純風日去,華競日彰,猶火之消膏而莫之覺也。今

第四 禮一

志

草,實在所以感之而已。臣以闇淺,不能遠識格言,謂宜以三時之隙,漸就經始。 道崇儒,創立大業。明主唱之於上,宰輔篤之於下,夫上之所好,下必有過之者焉。是 故雙劍之節崇,而飛白之俗成,挾琴之容飾,而赴曲之和作。君子之德風,小人之德

氏、春秋左傳杜氏、服氏,各置博士一人。其儀禮公羊穀梁及鄭易,皆省不置博士。太常荀 太興初,議欲修立學校,唯周易王氏、尚書鄭氏、古文孔氏、毛詩周官禮記論語孝經鄭

堂,奉酬顧問,二則參訓門子,以弘儒學,三則祠、儀二曹,及太常之職,以得藉用質疑。 今皇朝中興,美隆往初,宜憲章令軌,祖述前典。 之中,侍中、常侍、黃門之深博道奧,通洽古今,行爲世表者,領國子博士。 弘明道訓。今處學則闕朝廷之秀,仕朝則廢儒學之美。昔咸寧、太康、元康、永嘉 臣聞孔子有云,「才難,不其然乎」。自喪亂以來,經學尤寡。儒有席上之珍,然後 一則應對殿

建辟 博士十九人。 石經古文。 雅,告朔班政,鄉飲大射,西閤東序,圖書禁籍,臺省有宗廟太府金墉故事,太學有 世 祖 武皇帝聖德欽明,應運登禪,受終于魏。崇儒興學,治致升平。經始明堂,營 先儒典訓,賈、馬、鄭、杜、服、孔、王、何、顏、尹之徒,章句傳注 九州之中,師徒相傳,學士如林,猶是選張華、劉寔居太常之官,以重 衆家之學,置

江、揚二州,先漸聲教,學士遺文,於今爲盛,然方之疇昔,猶千之一也。臣學不章句, 道,將墜于地。陛下聖哲龍飛,闡弘祖烈,申命儒術,恢崇道敎,樂正雅、頌,於是乎在。 於百代之上,搢紳詠於千載之下。 才不弘道,階緣光寵,遂忝非服,方之華、寔,儒風邈遠,思竭駑駘,庶增萬分,願斯道隆 傳 稱「孔子沒而微言絕,七十子終而大義乖」。自頃中夏殄瘁,講誦遏密,斯文之

中半。 腴美辭,張本繼末,以發明經意,信多奇偉,學者好之。 親受,無不精究。 微辭妙旨,義 無方伯,善者誰賞,惡者誰罰,綱紀亂矣。孔子懼而作春秋,諸侯諱妬,懼犯時禁,是以 宜置鄭儀禮博士一人。 根源,誠可深惜,宜爲鄭易博士一人。儀禮一經,所謂曲禮,鄭玄於禮特明,皆有證據, 要,宜存於世,置博士一人。昔周之衰,下陵上替,臣弑其君,子弑其父,上無天子,下 伏聞節省之制,皆三分置二,博士舊員十有九人,今五經合九人。 準古計今,猶未 九人以外,猶宜增四。願陛下萬機餘暇,時垂省覽。周易一經,有鄭玄注,其書 不顯明,故曰「知我者其唯春秋,罪我者其唯春秋」。時左丘明、子夏造膝 孔子旣沒、微言將絕、於是丘明退撰所聞而爲之傳。其書善禮、多膏 春秋公羊,其書精隱,明於斷獄,宜置博士一人。穀梁簡約隱 儒者稱公羊高親受子夏,立於

志

四

禮

家異同之說,此乃義則戰爭之場,「係可辭亦劍戟之鋒,於理不可得共。博士宜各置一 遠,斯文將墜,與其過廢,寧過而立也。臣以爲三傳雖同一春秋,而發端異趣。 氏、公羊所不載,亦足有所訂正,是以<u>三傳並行於先代,通才未能孤廢。[kē]</u>今去聖久 時劉向父子,漢之名儒、猶執一家,莫肯相從。其書文淸義約,〔〈言〕諸所發明,或是左 漢朝,辭義清俊,斷決明審,多可採用,董仲舒之所善也。 穀梁赤師徒相傳,暫立於漢, 案如三

人,以傳其學。

忘本而 元帝詔曰:「崧表如此,皆經國大務,而爲治所由。 息馬投戈,猶可講藝。 今雖日不暇給,豈 [遺存邪。[kk] 可共博議之。] 有司奏宜如崧表。詔曰:「穀梁膚淺,不足立博士。 餘如

所奏。」會王敦之難,事不施行。

成帝咸康三年,國子祭酒袁褒、太常馮懷又上疏曰:

魯,觀易象 旣興,文史載煥,端委治於南蠻,頌聲逸於四海。故延州入聘,聞雅音而嗟咨,韓起適 臣聞先王之敎也,崇典訓,明禮學,以示後生,道萬物之性,暢爲善之道也。 而歎息。 何者。立人之道,於此爲首也。孔子恂恂,道化洙、泗,孟軻皇皇, 宗周

誨誘無倦。 是以仁義之聲,于今猶存,禮讓之風,千載未泯。

之則。實宜留心經籍,闡明學義,使諷頌之音,盈於京室,味道之賢,是則是詠,「尽了豈 所須者,治之本宜崇。況今陛下以聖明臨朝,百官以虔恭莅事,朝野無虞,江外靜謐 如之何泱泱之風,漠焉無聞,洋洋之美,墜於聖世乎。古人有言,詩書義之府,禮樂德 心之徒,抱志無由。昔魏武身親介胄,務在武功,猶尙息鞍披覽,投戈吟詠,以爲世之

不盛哉!

疏奏,帝有感焉。 由是議立國學,徵集生徒,而世尙莊、老,莫肯用心儒訓。 穆帝永和八年,

殷浩西征,以軍興罷遣,由此遂廢。

征西將軍庾亮在武昌,開置學官。教曰:

范會崇典,晉國以治。楚、魏之君,皆阻帶山河,憑城據漢,國富民殷,而不能保其强 以典誥。遂令詩、書荒塵,頌聲寂漠,仰瞻俯省,能弗歎慨。自胡夷交侵,殆三十年矣。 洙、泗邈遠,風、雅彌替,後生放任,不復憲章典謨。 臨官宰政者,務目前之治,不能閑 間,加之以 大,吳起、屈完所以爲歎也。由此言之,禮義之固,孰與金城湯池。季路稱攝乎大國之 而 ||未革面嚮風者,豈威武之用盡,抑文敎未洽,不足綏之邪。 昔魯秉周禮,齊不敢侮, 人情重交而輕財,好逸而惡勞,學業致苦,而祿答未厚,由捷徑者多,故莫肯用心。 師旅,因之以饑饉,爲之三年,猶欲行其義方。況今江表晏然,王道隆盛,而

+ 四 三六四

家,逮于建安之末,風塵未弭,然猶留心遠覽,大學興業,所謂顚沛必於是,眞通才也。 不能弘敷禮樂,敦明庠序,其何以訓彝倫而來遠人乎!魏武帝於馳騖之時,以馬上爲

階緣免役者,不得爲生。明爲條制,令法淸而人貴。 涉文學經綸者,建儒林祭酒,使班同三署,厚其供給,皆妙選邦彥,必有其宜者,以充此 所,籌量起立講舍。 參佐大將子弟,悉令入學,吾家子弟,亦令受業。 舉。近臨川、臨賀二郡,並求修復學校,可下聽之。若非束脩之流,禮敎所不及,而欲 今使三時旣務,五教並修,軍旅已整,俎豆無廢,豈非兼善者哉!便處分安學校處 四府博學識義通

又繕造禮器俎豆之屬,將行大射之禮。亮尋薨,又廢。 孝武帝太元九年,任己尚書謝石又陳之曰:

晉受命,值世多阻,雖聖化日融,而王道未備,庠序之業,或廢或興。遂令陶鑄闕日用 世不常治,道亦時亡。光武投戈而習誦,魏武息馬以修學,懼墜斯文,若此之至也。大 弘道之風,詩、書垂軌敎之典。敦詩悅禮,王化以斯而隆,甄陶九流,羣生於是乎穆。 之功,民性靡素絲之益,亹亹玄緒,翳焉莫抽,臣所以遠尋伏念,寤寐永歎者也。 立人之道,曰仁與義。翼善輔性,唯禮與學。雖理出自然,必須誘導。故洙、泗闡

今皇威遐震,戎車方靜,將灑玄風於四區,導斯民於至德。 豈可不弘敷禮樂,使煥

可 請興復國學,以訓胄子,班下州郡,普修鄉校。 雕琢琳琅,和寶必至,大啓羣

蒙,茂茲成德。 匪懈于事,必由之以通,則人競其業,道隆學備矣。

烈宗 納其言。 其年,選公卿二千石子弟爲生,增造廟屋一百五十五間。 而品課無章,

子恥與其列。國子祭酒殷茂言之曰:

肵 閑 稱 同 邪 回 風 ,以好學爲本,七十希仰,以善誘歸宗。 納善,潛被於日用者也。 臣 .聞 弘化正俗,存乎禮教,輔性成德,必資於學。 故能 疏 通玄理,窮綜幽微,一貫古今,彌綸治化。 雅、頌之音,流詠千載, 先王所以陶鑄天下,津梁萬物, 聖賢之淵範,哲王 且夫子

學,制 子貢 業不 學 典,權宜停 此之甚。 建 去朔之餼羊,仲尼猶 終。 彌 自 以 大晉中興,肇基江左,崇明學校,修建庠序,公卿子弟,並入國學。 年,而功無可名。 程 臣 陛 課。 廢者,別一 聞 下以聖德玄一,思隆前美,順通居方,導達物 舊 今者見生,或年在扞格,方圓殊趣,宜聽其去就,各從所安。 制 國子 理也。 憚業避役,就存者無幾,或假託親疾,眞僞難 愛其禮,況名實兼 生皆冠族華胄,比 若其 不然,宜依 、喪,面 列 舊準。 皇儲。 牆 竊謂羣臣 一世者乎。 而中者混 性,興復儒肆, . 内 雜贏艾,遂令人 若以當 外, 清官子 知,聲實渾亂 今急病 **僉與後生**。 尋値多故,訓 姪, 所 、未遑 情恥之。 上謬合, 普應入 斯 自

乞付外參議。

烈宗 下詔褒 納,又不施行。 朝廷及草萊之人有志於學者,莫不發憤歎息。

萬 岱淸通,黎庶蒙蘇,鳬藻奮化。 毁,先王之澤寢,聖賢之風絕,自此迄今,將及百年。造化有靈,否終以泰,河、濟夷徙. 諸土石,陶冶成器。 列 年十一月十七日,奉被明詔,采臣鄙議,敕下兗州魯郡,準舊營飾。故尚書令謝石令臣所須 級集邦邑,歸誠本朝。以<u>太元十年,遣臣奉表。</u> 所爲者微,所弘甚大。臣自致身輦轂,于今八稔,違親轉積,夙夜匪寧。 規 文,緝熙宏猷,將何以光贊時邕,克隆盛化哉。事有如賒而急,實此之謂也。亡父先臣回, 進,使油然 重符兗州刺史,遂成舊廟,蠲復數戶,以供掃灑。幷賜給六經,講立庠序,延請宿學,廣集後 上,又出家布,薄助興立。 世宗匠,忽焉淪廢,仰瞻俯慨,不覺涕流。旣達京輦,表求興復聖祀,修建講學。 清河 陛下體唐堯文思之美,訪宣尼善誘之勤,矜荒餘之凋昧,愍聲敎之未浹。愚謂可 人李遼又上表曰:「臣聞教者,治化之本,人倫之始,所以誘達羣方, 進德興仁, 譬 入道,發剖琢之功。 雖復百王殊禮,質文參差,至於斯道,其用不爽。自中華湮沒,闕里荒 故鎭北將軍譙王恬版臣行北魯縣令,賜許供遣。二臣薨徂,成 而典訓弗敷,雅、頌寂蔑,久凋之俗,大弊未改。 運仁義以征伐,敷道德以服遠,何招而不懷,何柔而不從。 路經闕里,過觀孔廟,庭宇傾頓,朝式頹弛, 振武將軍何澹之今 非演迪斯 至十四

震扞三齊,臣當隨反。裴回天邑,感戀罔極。 宋高祖受命、詔有司立學、未就而崩。 太祖元嘉二十年,復立國子學,二十七年廢。 乞臣表付外參議。」又不見省。

同 爲五更。今無其注,然漢禮具存也。 魏 高貴鄉公甘露三年,[40]車駕親率羣司行養老之禮於太學。 於是王祥爲三老,鄭小

肄舊典。 晉武帝泰始六年十二月,帝臨辟雍,行鄕飲酒之禮。詔曰:「禮儀之廢久矣,乃今復講 賜太常絹百匹,丞、博士及學生牛酒。」咸寧三年,惠帝元康九年,復行其禮。

孫六十人,事訖 于時無復國子生,有司奏:「應須二學生百二十人。太學生取見人六十,國子生權銓大臣子 帝之爲太子,及愍懷太子講經竟,並親釋奠於太學,太子進爵於先師,中庶子進爵於顏淵 三帝,亦皆親釋奠。孝武時,以太學在水南懸遠,有司議依升平元年,於中堂權立行太學。 元帝詔曰:「吾識太子此事,祠訖便請王公以下者,昔在洛時,嘗豫清坐也。」成、穆、孝武 魏 齊王正始中,齊王每講經遍,輒使太常釋奠先聖先師於辟雍,「引〕弗躬親。晉惠帝、明 罷。」奏可。 釋奠禮畢,會百官六品以上。一元嘉二十二年,太子釋奠,采晉故

志

第四

事,官有其注。 祭畢,太祖親臨學宴會,太子以下悉豫。

節, 所殺多也。狩者,冬物畢成,獲則取之,無所擇也。 田。 剂。 遂以蒐田。 仲秋教治兵, 獻禽以享蒸。 而凡師出曰治兵,入曰振旅,皆戰陳之事,辨鼓鐸鐲鐃之用,以教坐作進退疾 兵者,守國之備。 獻禽以祭社 如振旅之陳,遂以彌田,如蒐之法。 蒐者,蒐索取其不孕者也。 孔子曰:「以不教民戰,是謂棄之。」兵,凶事,不可空設,因蒐狩而習 仲夏教茇舍, 如振 苗者,爲苗除害而已。 旅之陳, 致禽以祀方。 遂以苗 田 如蒐之法。 獮者,殺也。 仲冬教大閱, 獻 徐 從秋氣 遂以狩 《禽以享 流數之

漢西京 吳兵 立 白馬 以令進退 秋 擇 法戰陳之儀,率以爲常。至獻帝建安二十一年,魏國有司奏:「古四時講武,皆於: 朱鬣,躬執弩射牲。太宰令以獲車送陵廟。 漢儀,立秋日,郊禮畢,始揚威武,斬牲於郊,以薦陵廟,名曰貙劉。 吉目 承秦制,三時不講,唯十月都試。今兵革未偃,士民素習,至三可 大朝車騎,號曰治兵。上合禮名,下承漢制。」奏可。是冬,治兵。 於是乘輿還宮,遣使以東帛賜武官, 其儀,乘輿御戎路, 無四時 講武。 魏王親金鼓 農隙 肄孫、 但以

延康元年,魏文帝爲魏王,是年六月立秋,治兵于東郊,公卿相儀。 王御華蓋,親令金

鼓之節。

明帝太和元年十月,治兵于東郊。

帝泰始四年、九年、咸寧元年、太康四年、六年冬,皆自臨宣武觀,大習衆軍。

自令進退也。自惠帝以後,其禮遂廢。

戲 兵於南郊之場,故其地因名圖場。自後蕃鎭桓、庾諸方伯,往往閱習,然朝廷無事焉。 元帝太興四年,詔左右衞及諸營教習,依大習儀作雁羽仗。成帝咸和中,詔內外諸軍

褶。 司,校獵非違。至日,會於宣武場,列爲重圍。 右丞、都官諸曹郎、都令史、都官諸曹令史幹、蘭臺治書侍御史令史、諸曹令史幹,督攝糾 領部曲先獵一日,遣屯布圍。領軍將軍一人督右甄;護軍一人督左甄;大司馬一人居中,董 殿中郎一人典獲車。主者二人收禽。吏二十四人配獲車。備獲車十二兩。校獵之官著袴 年閏二月,大蒐於宣武場,主司奉詔列奏申攝,「津三克日校獵,百官備辦。設行宮殿便坐武 正諸軍,悉受節度。殿中郎率獲車部曲,在司馬之後。尚書僕射、都官尚書、五兵尚書、左 帳於幕府山南岡。設王公百官便坐幔省如常儀,設南北左右四行旌門。 有帶武冠者。脫冠者上纓。二品以上擁刀,備槊、麾幡,三品以下帶刀。皆騎乘。將 太祖在位,依故事肄習衆軍,兼用漢、魏之禮。其後以時講武於宣武堂。元嘉二十五 設留守塡街位於雲龍門外內官道北,外官道 建獲旗以表獲車。

志

校獵 車門外內官道西,外官道東,以北爲上。設先置官還位於廣莫門外道之東西, 南 再嚴。 ,以西爲 日平旦,正直侍中奏嚴。 殿中侍御史奏開東中華雲龍門,引仗爲小駕鹵簿。百官非校獵之官,著朱服,集 Ļ 設從官位於雲龍門內大官階北,小官階南,以西爲上。 上水一刻,奏:「搥一鼓。」爲一嚴。上水二刻,奏:「搥二鼓。」 設先置官位於行止 以南爲上。

頭 次直侍中稱制曰:「可。」正直侍中俛伏起。皇帝降輦登御坐,侍臣升殿。直衞靸戟虎賁,旄 將至,威儀唱:「引先置前部從官就位。」再拜。 車駕至行殿前回輦,正直侍中跪奏:「降輦。」 鳴鼓角,不得諠譁,以次引出,警蹕如常儀。車駕出,騶讚,陛者再拜。皇太子入守。車駕 中、次直黃門侍郎護駕在前。又次直侍中佩信璽、行璽,與正直黃門侍郎從護駕在後。 著黑介幘單衣,乘輦。正直侍中負璽陪乘,不帶劍。殿中侍御史督攝 黃麾以內。次 直 侍 郎、軍校劍履進夾上閤。正直侍郎負璽,通事令史帶龜印中書之印。上水五刻,皇帝出。 水三刻,奏:「搥三鼓。」爲三嚴。上水四刻,奏:「外辦。」正次直侍中、散騎常侍、給事黃門侍 列廣莫門外。應還省者還省。 文衣、鷃尾,以次列階。正直侍中奏:「解嚴。」先置從駕百官還便坐幔省。 留守填街後部從官就位,前部從官依鹵簿,先置官先行。

衞。 黃麾內官,從入圍裏。 列置部曲,廣張甄圍,旗鼓相望,銜枚而進。 帝若躬親射禽,變御戎服,內外從官以及虎賁悉變服, 如校獵儀。 **靸戟抽鞘**,以備武 甄周圍會,督甄令

騎侍郎、軍校從至閤,亦如常儀。 稱制曰:「可。」正直侍中俛伏起。 留守塡街先置前部從官就位。」再拜。車駕至殿前回輦,正直侍中跪奏:「降輦。」次直侍中 給事黃門侍郎、軍校進夾御坐。正直侍中跪奏:「還宮。」次直侍中稱制曰:「可。」正直侍中 以 俛伏起。 中達,以犒饗校獵衆軍。 司 甄 史奔騎號法施令曰:「春禽懷孕,蒐而不射;鳥獸之肉不登於俎,不射;皮革齒牙骨角毛羽不 官先還。 登於器,不射。」甄會。 馬鳴鼓解圍復屯,殿中郎率其屬收禽,以實獲車,充庖厨。列言統曹正厨,置尊酒俎肉于 獲 帥 車 屯 ·收載,還陳於獲旗 左右 三嚴後二刻,正直侍中奏:「外辦。」皇帝著黑介幘單衣。 正次直侍中、散騎常侍 乘輿登輦還,衞從如常儀。大司馬鳴鼓散屯,以次就舍。車駕將至,威儀唱:「引 1旌門; 殿中中郎率獲車部曲入次北旌門內之右。皇帝從南旌門入射禽。 大司馬鳴鼓蹙圍,衆軍鼓譟警角,至宣武場止。 大司馬屯北旌門,二 北。 至晡,正直侍中量宜奏嚴,從官還著朱服,靸戟復鞘。 王公以下以次射禽,各送詣獲旗下,付收禽主者。事畢。 乘輿降入。正直次直侍中、散騎常侍、給事黃門侍郎、散 正直侍中奏:「解嚴。」內外百官拜表問訊如常儀,訖,罷。 再嚴,先置 謁者

校勘記

建皇授政改朔 錢大昕廿二史考異據李善文選注謂此乃尚書中候之語,作「建黃授政改朔」。

並 云:「『建皇』文選注作『建黃』。 皇甫謐謂以土承火,色尚黃也。 此作『皇』,疑誤。」

- ヘニン 窮則相承 「則」各本並作「明」,據局本及元龜五六三改。
- 太子舍人黃史嗣以爲不宜改 各本並脫「史嗣」二字、據远龜五六三補。
- 껃 雖 與正歲不同 各本並脫「正」字,據三國志魏志明帝紀
- (五) 皆宜用白 各本並作「皆宜同」,據通典禮典改。
- /"\ ベ 烈 祖明皇帝以正日棄天下 「明皇帝」各本並作「明帝」,據三國志魏志齊王芳紀
- Cセン 禮醮詞日 各本並脱「醮」字、據晉書禮志補。
- 漢云:「植字元榦。」則「禎」當作「楨」,今改正。 何楨冠儀約制及王堪私撰冠儀 「何楨」各本並作「何禎」。 參見本卷校勘記第二二條。 按北堂書鈔七二引虞預晉書何楨
- $\overline{}$ ナレ 諸侯昏禮 采 」後有「告期」。 加 納采告期親迎各帛五匹 又「親 迎」之「親」, 各本並脫去,據晉書禮志、元龜 \neg 告」各本譌「吉」,據远龜五七四改。 五七四 補。 按儀禮士昏禮「納 按儀禮士昏禮
- 唯璋官 爲 具致之 各本 並脫「致」字,據晉書禮志、元龜五七四補

「告期」後

爲「親迎」。

- 先儒 以 爲 丘明 詳 錄 其 事 「錄」各本並作「錬」,據晉書禮志、通典禮典改。
- 卽用 舊 制 今闕 各 本並作「卽用故至今闕」,據通典禮典改。

- 則咸康華恒所上合於舊也 「舊」下元龜五七五有「禮」字,文義更明。
- 臣族女父母 所 生先臣故 光祿 大夫雩婁侯楨之遺玄 孫 「楨」 各本並: 作 :「赬」。 按「禎」當作「楨」,

參見本卷校勘記第二二條

今改正。

- 至吾 先臣故安豐太守關中侯叡之孫 各本並脫「故」字、據通典禮典 補。
- (二六)次親迎版文 各本並脫「親」字,據通典禮典補。
- 子出 其納 采 問 名 納吉請 期 親 迎 各本並脱「親」字,據晉書禮志補
- 玉以 象 德 而 有 溫潤 葬 珪 璋旣 玉 之美者 各本並 脱「溫」 字, 據 通典禮典補。 專 」各本譌「栗」,

據晉書禮志、通典禮典、元龜五七六改。

- 注 鄭玄注 皮,鹿皮也」十字。 云束 今據鄭玄注原文及南齊書裴昭明傳,删「以」字,補「十端 帛 云束帛 以 儀 注以虎皮二」,文譌奪不 十端也儷 南齊書裴昭明傳作 兩也 兩 皮爲 庭 可 實 禮納 通。 鹿皮也晉太子 徴 **元** 儷 五七六引 皮爲庭實, 納妃儀注 此,「東帛」下 也至 鹿皮也。 以 晉太子納妃」十九 虎 皮二 有「十端 晉太子 各本 納 也。 並 妃注 作 儷, 兩 以 鄭 虎 也。 皮 玄
- 磔雞於宮及百寺門 「門」上通典禮典、 御覽二九引有「之」字。
- [三] 案明帝大修禳禮 「明帝」上晉書禮志有「魏」字。
- 案何 楨 許 都 賦 日 「楨」各本作「禎」。按三國志魏志管寧傳注引文士傳:「何楨字元榦)

有文學器榦,容貌甚偉。 歷幽州刺史、廷尉,入晉爲尚書、光祿大夫。」又御覽五八七引文士傳:

「靑龍元年,天子特詔曰:『揚州 別駕何楨,有文章才,試使作許都賦。成,封上,不得令人見。』植

逐造賦,上甚異之。」當卽其人。 古人名字相應,慎字元榦,字當作「楨」,不當作「禎」,今改正。

呈 先正月一 日 各本並脱「月」字、據通典禮典 補

呈 羣司 治禮引公至金紫將軍 乘車 與百官及受贄郎下至計吏 上 殿 各本並脫「治」字,通典禮典避唐諱,引此作掌禮。 「郞」字下,晉書禮志有「官以」二字。 晉武帝咸寧元

會注作「治禮」,今於「禮」字上補「治」字。

三台 以贄授受贄郎 各本並脫「受」字,據通典禮典補。 按上文有受贄郎。

宝 太樂令跪請奏雅樂 各本並脱「請」字、據通典禮典補。

会 諸蠻夷胡客以次入 「胡客」通典禮典作「朝客」。

二式 謁者引王公至二千石上殿 「謁者」二字上,各本並有「御」字。 晉書禮志、通典禮典無「御」字。

按「御」字是衍文,今删去。

謁者引王詣尊酌壽酒 「酒」各本並作「尊」,據晉書禮志、通典禮典改。 按下有跪上壽酒語。

侍郎跪進御座前 「進」各本並作「侍」,據晉書禮志、通典禮典改。

若臨時有故 「故」各本並作「解」,據晉書禮志、通典禮典改。

- 朝禮執璧如舊朝之制 「執璧」上,晉書禮志有「皆親」二字。
- 慶冬使或遺不事役宜省 各本並脫「事」字,據本書武帝紀補。
- 呈 宋孝武大明三年九月 各本並脫「孝」字,據本書孝武帝紀補。 按大明爲宋孝武帝年號。
- 乃移: 於鍾 山北原道西 「原」各本並作「京」,據通典禮典改。
- 漢郊祀志 按漢書郊祀志無此文。漢書武帝紀注臣瓚曰引漢儀注有此文。
- 明帝太和元年二月丁亥朔 按是月丁卯朔,丁亥爲二月二十一日,「朔」字疑衍文。 三國志魏志

明帝紀亦作「丁亥」。

- 春分依舊請車駕祀朝日 各本並脫「請」字及「祀」字。 據晉書禮志、元龜三二下補
- 〔图0〕如所奏 「如」字上晉書禮志、元龜三二下有「若」字。
- 百官淸者亦如之 「淸」,通典作「掌事」。又各本並脫「之」字,據通典禮典訂補。
- 按晉元帝於建武元年三月辛卯卽晉王位,見晉書元帝紀。 晉元帝建武元年三月辛卯卽晉王位 「三月」三朝本、北監本、毛本、殿本作「十月」。今從局本。
- 立六宗祠於國西北戌亥地 各本並脱「六」字,續漢書祭祀志:「安帝元初六年三月庚辰,初立

六宗,祀於雒陽西北戌亥之地。」六宗謂上下四方之宗。今據補。又「戌亥」各本並譌「城亥」, 據續漢志改。

志第四 校勘記

- 祝史請 所用幣 「用幣」各本並作「由」,據左傳昭十七年改正。
- 天子不舉樂 左傳原文無「樂」字。 杜預釋「不舉」爲「不舉饌」。
- 日月相掩必食之理 「日月」上,通典禮典有「至於」二字。
- [中国] **麵追懼未已** 「追」各本並作「退」,據元龜五七二改。

劭引此 「劯引」二字,三朝本、北監本、毛本、殿本譌作「別」一字。 局本作「引」字。

通典禮典

作「劭引」二字。今據通典訂正。

||四九| 非爲先存其事而徼幸史官推術繆錯 各本並奪「先」字,據三國志魏志劉劭傳裴注、晉書禮志、

通典禮典、元龜一〇七補。

- (HO) 可令有司 行事 各本並脫「令」字,據晉書禮志補。
- 呈 以帥先天下 各本並脫「先」字,據晉書禮志補
- 呈 江左元哀二帝 「江左」各本並作「止」一字,據晉書禮志改。
- 金 陰陽暫偏 「陰陽」本書文帝紀作「賦役」。
- 呈 后夫人躬蠶桑宫 各本並脫「宮」字,據晉書禮志、元龜五七四補。
- 於是使侍中成粲草定其儀 祭,宋孝武、明帝時人,豈能在晉武帝太康時儀定躬蠶儀,大誤。晉書禮志、元龜五七二作成**粲。** 三朝本「成」字空白。 北監本、毛本、殿本、局本作「袁粲」。 按袁

成粲字伯陽,太康中,爲侍中,轉太常。作成粲是,今據改。

至 蠶宮生蠶 著薄上 「蠶宮」各本並作「蠶官」,據晉書禮志、通典禮典改。

[至] 躬桑日 各本並脫「躬」字,據通典禮典補。

[云] 故無學者 各本並脫「無」字,據三國志魏志劉馥傳補,

(発力) 科見吏之中及將吏子弟有志好者 「見吏」各本並作「見史」,據三國志吳志孫休傳改。

会合 譬之天地昏明之迭 「迭」各本並作「術」,據晉書戴若思傳弟邈附傳 改。

会こ 今或以天下未壹 各本並脫「或」字,據晉書戴若思傳弟邈附 傳 補

会员 其書文淸義約 各本 並脫「義」字,據晉書荀崧傳補

各本並脱「可惜」二字、據晉書戴若思傳弟邈附

傳補。

会

不亦良可惜乎

[KB] 通才未能孤廢 各本並脫「孤」字,據晉書荀崧傳補。

会 此乃義則戰爭之場 各本並脫「此乃」二字,據晉書荷崧傳補

会公 豊 忘 本而 遺存邪 「遺」各本並作「道」,據晉書荀崧傳改。

[K+] 疇昔陵替 「陵替」上晉書袁瓌傳有「皇運」二字。

是則 是詠 「是則」二字,三朝本空白,北監本、毛本、殿本、局本作「典謨」。 晉書袁褒傳作「是

則」。今據晉書袁瓌傳訂正。

第四 校勘記

志

孝武帝太元九年 陳 此 議在淝水戰後。 「九年」各本並作「元年」。 淝水之戰在太元 八年, 則 {通 通典禮典作「九年」。 典作石陳此議在太元九年爲是,作元 按晉書謝安傳弟石附傳,石 年者誤。

今據改。

(C)(C) 魏高貴鄉公甘露三年 「三年」各本並作「二年」,據三國志魏志高貴鄉公紀改。

고리 齊王每講經 **遍輒使太常釋奠先聖先師於辟雍** 各本 並 脫 遍 .輒」二字,據晉: 書禮志、 通典禮典

補。

二十二 士民素習 各本並作「士民習素」、據三 一國志

二三 主司奉詔列奏申攝 「主司」各本並作「主胄」、據通典禮典改。 按主司,卽指主辦之有司。

宋書卷十五

志第五

禮二

有古巡幸之風焉。齊王正始元年,巡洛陽,賜高年、力田各有差。 無寧歲。蓋應時之務,又非舊章也。明帝凡三東巡,所過存問高年,恤人疾苦,或賜穀帛, 之役,多非舊典。唯後漢諸帝,頗有古禮焉。魏文帝值參分初創,方隅事多,皇輿亟動,略 古者天子巡狩之禮,布在方策。至秦、漢巡幸,或以厭望氣之祥,或以希神仙之應,煩擾

待旦。 寡,罔不得所。 職,不然則行人巡省,撢人誦志。故雖幽遐側微,心無壅隔。人情上通,上指遠喩。至于鰥 晉武帝泰始四年,詔刺史二千石長吏曰:「古之王者,以歲時巡狩方嶽,其次則二伯述 思四方水旱災眚,爲之怛然。勤躬約己,欲令事事當宜。常恐衆吏用情,誠心未著, 用垂風遺烈,休聲猶存。 **股在位累載,如臨深泉,夙興夕惕,明發不寐,坐而**

第五 禮二

志

焉。 虚 萬機兼猥,慮有不周,政刑失謬,而弗獲備覽。 命于王,以周知天下之故。』斯舊章前訓,今率由之。 亂作慝犯令爲一書,其札喪凶荒厄貧爲一書,其康樂和親安平爲一書。 天下,親見刺史二千石長吏,申喻朕心懇誠至意,訪求得失損益諸宜,觀省政治,問人間患 征巡省之事。人之未乂,其何以恤之。 一心以俟。其勉哉勗之,稱朕意焉。」 周典有之曰:『其萬民利害爲一書,〔〕其禮俗政事教治刑禁之逆順爲一書,其悖逆暴 大夫君子,其各悉乃心,各敬乃事,嘉謀令圖,苦言至戒,與使者盡之,無所隱諱。 今使使持節侍中、副給事黃門侍郎,衡命四出,周行 百姓有過,在予一人。 還具條奏,俾股昭然鑒于幽遠,若親行 惟歲之不易,未遑卜 。每國辨異之,以反 方將

者。 **擯及執贄皆如朝儀,而不建其旗。** 擊虞新禮議曰:「魏氏無巡狩故事,新禮則巡狩方岳,柴望告至,設壝宮,如禮諸侯之覲 詩稱『君子至止,言觀其旂』。宜定新禮建旗如舊禮。」然終晉世,巡狩廢矣。 臣虞案觀禮,諸侯覲天子,各建其旗章,所以殊爵

宋武帝永初元年,詔遣大使分行四方,舉善旌賢,問其疾苦。

布之半。繫囚見徒五歲刑以下,悉皆原遣。登城三戰及先大將家幷青泥關頭敗沒餘口,「引 徒離宮,升京城北顧。乙亥,饗父老舊勳于丹徒行宮,加賜衣裳各有差。 元嘉四年二月乙卯,[三]太祖東巡。丁卯,至丹徒。己巳,告覲園陵。 蠲丹徒縣其年租 三月甲戌,幸丹

城。 老疾單孤,叉諸戰亡家不能自存者,並隨宜隱恤。二十六年二月己亥,上東巡。 辛亥,謁二陵。丁巳,會舊京故老萬餘人,往還饗勞,孤疾勤勞之家,咸豪卹賚,發赦 辛丑,幸凉

其時皇太子監國,有司奏儀注。

令,蠲徭役。

某曹關某事云云。 。被令,儀宜 如是。 請爲牋如左。 謹 關 o

右署衆官如常儀。

尚書僕射、尚書左右丞某甲,死罪死罪。 某事云云。 參議以爲宜如是事諾。 奉行。 某

年月日。某曹上。

右牋儀準於啓事年月右方,關門下位及尚書官署。 其言選事者,依舊不 經

它官。

上處事諾。 太常主者寺押。某署令某甲辭。言某事云云。求告報如所稱。 明詳旨申勒,四依承不得有虧。符到奉行。年月日。 起尙書某曹。 詳檢相應。 **今聽如所**

右符儀。

某曹關 太常甲乙啓辭。 押。 某署令某甲上言。某事云云。 請臺告報如所稱。 主者詳

三八

檢相應。請聽如所上事諾。別符申攝奉行。謹關

年月日。

其尙書名下應云奏者,今言關。 右關事儀準於黃案年月日右方,關門下位年月下左方,下附列尚書衆官署。 餘皆如黃案式。

請臺告報如所 某曹關司徒長史王甲啓辭。 稱。 尚書某甲參議,以爲所論正如法令,告報聽如所上。〔E〕請爲令書如左。 押。 某州刺史丙丁解騰某郡縣令長李乙書言某事云云。

謹關。

右關門下位及尙書署,如上儀。

司 徒長史王甲啓辭。 押。 某州刺史丙丁解騰某郡縣令長李乙書言某事云云。 州府緣

案允值。請臺告報。

年月日。尚書令某甲上。

建康宮無令,稱僕射。

右令日下司徒,公 | 令報聽 如某所上。 某宣攝奉行如故事。[刊]文書如千里驛行。

年月朔 日子。(公 尙書令某甲下。 無令稱僕射。 司徒承書從事 到 上起某曹。

右外上事,內處報,下令書儀。

某曹關某事云云。令如是,請爲令書如右。謹關。

右關署如前式。

令司徒。 某事云云。令如是,其下所屬,奉行如故事。 文書如千里驛行。

年月日子,下起某曹。

右令書自內出下外儀。

令書前某官某甲。令以甲爲某官,如故事。

年月日。侍御史某甲受。「亞」

右令書板文準於詔事板文。

尚書下云云。 奏行如故事。

右以準尙書勑儀。 起某曹。

右並白紙書。凡內外應關牋之事,一準此爲儀。 其經宮臣者,依臣禮。

拜刺史二千石誡敕文曰制詔云云。某動靜屢聞。

右若拜詔書除者如舊文。其拜令書除者,「令」代「制詔」,餘如常儀。 辭關板

文云:「某官糞土臣某甲臨官。稽首再拜辭。」制曰右除糞土臣及稽首云云。

某官某甲再拜辭。以「令曰」代「制曰」。某官宮臣者,稱臣。

皇太子夜開諸門,墨令,銀字棨傳令信。

酒一巵。 皆白也。 太史每歲上其年曆。[10]先立春立夏大暑立秋立冬,常讀五時令。 帝升御坐,尚書令以下就席位,尚書三公郎以令著錄案上,奉以入,就席伏讀訖,賜 官有 其注。 傅咸曰:「立秋一日,白路光於紫庭,白旂陳於玉階。」然則其日旂、路 皇帝所服,各隨五時

臣華 騎 夏闕 後 而 侍 不 天 恒 讀 讀 郎曹宇駁曰:「尚書三公曹奏讀秋令儀注。 晉 而 令。 奉 議 成 一天時。 詔 帝咸和五年六月丁未,四百有司奏讀秋令。 ,武皇帝以秋夏盛暑,常闕不讀令,在春冬不廢也。夫先王所以從時讀令者,曰三蓋 今正 可。 服 六年三月,有司 正服,尊嚴之所重,今服章多闕如。 漸備,四 時讀令,是祗述天和隆赫之道。 奏、「今月十六日立夏。 新荒以來,舊典未備。 比熱隆赫,臣等謂可 **兼侍中散騎侍郎荀弈、兼黃門侍郎散** 案五年六月三十日門下駁,依 謂今故宜讀夏令。」奏可 臣等參議,光祿 如恒議,依故 武皇 事闕 大夫

立 王者四時之服正云駕倉龍,自己載赤旂,衣白衣,服黑玉。 秋 御 宋 文帝 讀 令,上應著緗幘,遂改用素,相承 元嘉六年六月辛酉朔,駙馬都尉奉朝 至今。 請徐道娛 臣淺學管見,竊有惟疑。 季夏則黃,文極於此,無白冠則某 上表曰:「謹案晉博士曹弘 伏 尋禮記 . [月]令, 之議,

儀。 在近,謂幘不宜變。萬秋雖云幘宜仍舊,而不明無讀土令之文。今書舊事于左。魏臺雜訪 博士荀萬秋議:「伏尋幘非古者冠冕之服,禮無其文。案蔡邕獨斷云:『幘是古卑賤供事不冠 是以服黃無令。』」其後太祖常謂土令,三公郎每讀時令,皇帝臨軒,百僚備位,多震悚失常 十八日。土生於火,故於火用事之末服黃,三季則否。其令則隨四時,不以五行爲分也。 故司馬彪輿服志曰『尚書幘名曰納言。迎氣五郊,各如其色,從章服也。』自茲相承,迄于 愚謂應恒與冠同色,不宜隨節變綵。土令在近,謹以上聞。如或可採,乞付外詳議。」太學 履某 鳥也。且幘又非古服,出自後代。上附於冠,下不屬衣。冠固不革,而幘豈容異色。 元年十二月二十一日,散騎常侍領太史令高堂隆上言曰:『黃於五行,中央土也。 王四季各 曰:『前後但見讀春夏秋冬四時令,至於服黃之時,獨闕不讀。今不解其故。』魏明帝景初 人所服。』又董仲舒止雨書曰:『其執事皆赤幘。』知並不冠之服也。 漢元始用,衆臣率從。 |宋唯||世祖世||劉勰、||太宗世||謝緯爲三公郎,善於其事,人主及公卿並屬目稱歎。 大宋受命、禮制因循。斯旣歷代成準、謂宜仍舊。」有司奏:「謹案道娛啓事,以土令 **總見**宗

舊說後漢有郭虞者,有三女。 以三月上辰產二女,上巳產一女。 二日之中,而三女並

緯,謝綜弟也。

隅,人胥祓除,國子水嬉。」又是用七月十四日也。自魏以後但用三日,不以已也。 都賦
祓院
豫文是也。或用秋,漢書八月祓於霸上。 舟。 蔡邕章句曰:「陽氣和暖,鮪魚時至,將取以薦寢廟,故因是乘舟禊於名川也。 草,拂不祥。」「三」此則其來甚久,非起郭虞之遺風、今世之度水也。,,,入,暮春,天子始乘 春浴乎沂。 以香薰草藥沐浴也。 行觴,遂成 俗以爲 曲 自上及下,古有此禮。今三月上巳,祓於水濱,蓋出此也。」邕之言然。 大忌。 水。 史臣案周禮女巫掌歲時祓除釁浴,如今三月上巳如水上之類也。 釁浴謂 至此月此日,不敢止家,皆於東流水上爲祈禳,自潔濯,謂之禊祠 韓詩曰:「鄭國之俗,三月上巳,之溱、洧兩水之上,招魂續魄。 劉楨魯都賦。日恩「素秋二七,天漢指 論語,暮 張衡南 秉蘭 分流

官人循之至今。 魏明帝天淵池南、設流杯石溝、燕羣臣。晉海西鍾山後流杯曲水,延百僚,皆其事也。

十五日,小紅十四日,纖七日而釋服。」文帝以已亥崩,乙巳葬,其間凡七日。 飲酒、食肉。 其當給喪事者,無跣。 経帶無過三寸。 下遵令,無復三年之禮。案於子,禹治水,爲喪法,曰毁必杖,哀必三年。 漢文帝始革三年喪制。 臨終詔曰:「天下吏民臨三日,皆釋服。 當臨者,皆旦夕各十五舉音。服大紅 無禁取婦、嫁女、祠祀、 是則水不救也。 自是之後,天

永平故事,絕刺史二千石告寧及父母喪服,又從之。 三年。 權制 寧,言事者或以爲刺史二千石宜同此制,帝從之。建光元年,自己尚書孟布奏宜復如建武 以上皆服喪三年。 卒以此獲譏於世。 年,詔書褒稱,以爲宗室儀表。薛脩服母喪三年,而兄宣曰:「人少能行之。」遂兄弟不同,宣 遭衰絰凶災,而吏徭事不得葬,傷孝子心。 乃令自非父母服,不得去職。是後吏又守職居官,不行三年喪服。 自以爲身備漢相,不敢踰國家典章。 送終,盡其子道。」至成帝時,丞相翟方進事父母孝謹,母終,旣葬,三十六日,除服 故使死於陵者葬於陵,死於澤者葬於澤。 三年服。 也。 及元后崩,漭乃自服三年之禮。事皆姦妄,天下疾之。 但漢文治致升平,四海寧晏,廢禮開薄,非也。 永壽二年,又使中常侍以下行三年服。至延熹元年,又皆絕之。 及莽母死,但服天子弔諸侯之服,一弔再會而已。而令子新都侯字服喪 是則喪禮見貴常存矣。至漢平帝崩,王莽欲眩惑天下示忠孝,使六百石 然而原涉行父喪三年,顯名天下。 桐棺三寸,制喪三日。 自今諸有大父母、父母喪者, 至桓帝永興二年,復令刺史二千石行 宣帝地節四年,詔曰:「今百姓或 漢安帝初,長吏多避事棄官。 然則聖人之於急病,必爲 其後又開長吏以下告 河間惠王行母喪三 勿徭事,使得收斂 視事

五岳四瀆,遣司徒分詣郊廟社稷。 後漢世,諸帝不豫,並告泰山、弘農、廬江、常山、潁川、南陽、河東、東郡、廣陵太守禱祠

志第五 禮一

服。 未至,不得告,告者抵罪。 守、相、尉、縣令長三日便除服。 得減死一等,自此遂絕。 喪,皆須交代乃去,然多犯者。 爲不踰月也。 其將兵屯戍者,不得離部。」帝以正月庚子崩,辛丑卽殯。 魏武臨終遺令曰:「天下尚未安定,未得遵古。百官臨殿中者,十五舉音。 諸葛亮受劉備遺詔,旣崩,羣臣發喪,滿三日除服,到葬復如禮。 顧雍等同綜議。 嘉禾六年,使羣臣議立制,胡綜以爲宜定大辟之科。 此則魏、蜀喪制,又並異於漢也。 從之。其後吳令孟仁聞喪輙去,陸遜陳其素行, 是月丁卯葬,葬畢反吉, 孫權令諸居任遭三年之 其郡國太 葬畢便除 叉使代 , 是

襲,蓋有由也。大晉紹承漢、魏,有革有因,期於足以興化致治而已。故未皆得返情太素,日刊 衣,降席撤膳。雖武丁行之於殷世,曾閔履之於布衣,未足以喻。 綏、中書監荀勗、中軍將軍羊祜等奏曰:「臣聞禮典軌度,豐殺隨時,虞、夏、商、周,咸不相 喪,然猶深衣素冠,降席撤膳。 萬機事殷,動勞神慮。豈遑全遂聖旨,以從至情。 同規上古也。陛下旣已俯遵漢、魏降喪之典,以濟時務,而躬蹈大孝,情過乎哀,素冠深 司馬望、司空荀顗、車騎將軍賈充、尙書令裴秀、尙書僕射武陔、都護大將軍郭建、侍中郭 晉宣帝崩,文、景並從權制。 太宰司馬孚、太傅鄭沖、太保王祥、太尉何曾、司徒領中領軍 及文帝崩,國內行服三日。武帝亦遵漢、魏之典,旣葬除 加歲時變易,期運忽過,山陵彌遠,攀慕 方今荆蠻未夷,庶政未义,

納愚款,以慰皇太后之心。」又詔曰:「重覽奏議,益以悲剝,不能自勝,奈何奈何!三年之 戢,武事未偃,萬機至重,天下至衆。陛下以萬乘之尊,履布衣之禮,服粗席藁,水飮疏食, 所施行,皆如舊制。」詔曰:「每感念幽冥,而不得終苴絰於草土,以存此痛,況當食稻衣錦, 永 朕更所不堪也。不宜反覆,重傷其心,言用斷絕,奈何奈何!]帝遂以此禮終三年。後居太 喪,自古達禮,誠聖人稱心立哀,明恕而行也。神靈日遠,無所告訴。雖薄於情,食旨服美, 是以臣等悚息不寧,誠懼神氣用損,以疚大事。輒敕有司改坐復常,率由舊典。惟陛下察 殷憂內盈,毁悴外表,而躬勤萬機,坐而待旦,降心接下,仄不遑食,所以勞力者如斯之甚。 韶,咸以悲懷。 從已多,可試省孔子答宰我之言,無事紛紜也。言及悲剝,奈何奈何」字等重奏:「伏讀明 誠佹然激切其心,非所以相解也。 絕。 臣等以爲陛下宜回慮割情,以康時濟治。輒敕御府易服,內省改坐,太官復膳。 輙思仲尼所以抑宰我之問,聖思所以不能已已,甚深甚篤。然今者干戈未 吾本諸生家,傳禮來久,何心一旦便易此情於所天。相

得叙 裴秀、尚書僕射武陔等奏:「陛下至孝蒸蒸,哀思罔極,衰麻雖除,毀顇過禮,疏食粗服,有損 人子情邪。思慕煩毒,欲詣陵瞻侍,以盡哀憤。主者具行備。」「「こ大宰司馬孚、尚書令 泰始二年八月,詔書曰:「此上旬,先帝棄天下日也。便以周年。

后之喪,亦如之。

志

神和。 哀僨。 之禮。今復制服,義無所依。 者謁陵,以敍哀慕,若加衰経,近臣期服,當復受制。 抑聖情,以慰萬國。」詔曰:「孤榮忽爾,日月已周,痛慕摧處, 所以不同,質文所以迭用也。陛下隨時之宜,旣降心克己,俯就權制,旣除衰麻,而行心喪 義,非先帝意也。」字等又奏:「臣聞聖人制作,必從時宜。故五帝殊樂,三王異禮。 在此麻布耳。然人子情思,爲欲令哀喪之物在身, 之于後。陛下以社稷宗廟之重,萬方億兆之故,旣從權制,釋降衰麻。 行。」字等重奏:「臣聞上古喪期無數,後世乃有年月之漸。 志,是以自割,不以副諸君子。有三年之愛,而身禮廓然,當見山陵,何心而無服,其以衰 如前奏。臣等敢固以請。」詔曰:「患情不能企及耳,衣服何在。諸君勤勤之至,豈苟相違。」 三十日, 泰始四年,皇太后崩。有司奏:「前代故事,倚廬中施白縑帳蓐,素牀,以布巾裹凷草。 體氣自佳,其又已涼,便當行,不得如所奏也。 今雖秋節,尚有餘暑,謁見山陵,悲處摧傷,羣下竊用悚息。 便爲梓宮所棄,遂離衰経,感痛豈可勝言。 若君服而臣不服,雖先帝厚恩,亦未之敢安也。**參量**平議,宜 蓋近情也。 顧漢文不使天下盡哀, 亦先帝至謙之 進退無當,不敢奉詔。」詔曰:「亦知不 主者便具行備。」又詔曰:「昔者哀適 漢文帝隨時之義,制爲短 永無逮及。 羣臣自當案舊制。 平議以爲宜惟遠體,降 羣臣庶僚吉服。今 欲奉瞻山陵,以敍 此古今 **远喪**,傳 期服之 経

軺輦板輿細犢車皆施縑裏。」詔不聽,但令以布衣車而已。 其餘居喪之制,一如禮文。 有司

葬已便除,所不堪也。 之制,從當時之宜。敢固以請。」詔曰:「攬省奏事,益增感剝。 始登翌室,猶戴冕臨朝。降於漢、魏,旣葬除釋,諒闇之禮,自遠代而廢矣。 就朝晡臨位。御除服訖,各還所次除衰服。」詔曰:「夫三年之喪,天下之達禮也。 流涕久之乃許。 心 之時異,誠有由然,非忽禮也。 愛,而無數年之報,奈何葬而便卽吉,情所不忍也。」有司又奏:「世有險易,道有洿隆,所遇 又奏「大行皇太后當以四月二十五日安厝。 以毁傷爲憂也。 ,非見念也。 每代禮典質文皆不同,此身何爲限以近制,使達喪闕然乎。」羣臣又固請,帝 誠知衣服末事耳。 當敍吾哀懷,言用斷絕,奈何奈何!有司又固請。 方今戎馬未散,王事至殷, 更須聽斷, 以熙庶績。 然今思存草土,率常以吉物奪之,江己乃所以重傷至 故事,虞著衰服,旣虞而除。其內外官僚,皆 夫三年之喪,所以盡情致禮 詔曰:「不能篤孝, 唯陛下割高宗 昔周 受終身之 康

及先 文帝崇陽陵先開一日,遣侍臣侍梓宮,又遣將軍校尉當直尉中監各一人,將殿中將軍 帝時左右常給使詣陵宿衞。 文明皇后崩及武元楊后崩,天下將吏發哀三日止。

始 元 年,詔諸將吏二千石以下遭三年喪,聽歸終寧,庶人復除徭役。

然元 康 七年,大鴻臚鄭默母喪,旣葬,當依舊攝職, 中,陳準、傅咸之徒,猶以權奪,不得終禮。 自茲至今,往往以爲成比也。 固陳不 起。 於是始制 大臣得終喪三

志第五 禮二

晉文帝之崩也,羊祜謂傅玄曰:「三年之喪,自天子達。漢文除之,毀禮傷義。 今上有

使主上遂服,猶爲善乎。」玄曰:「若上不除而臣下除,此爲但有父子,無復君臣,三綱之道 盡廢之,豈所以孝治天下乎。詩云『猷之未遠』,其傅玄之謂也。」 喪,不降父子之服,故四海黎庶,莫不盡情於其親。三綱之道,二服恒用於私室, 虧矣。」習鑿齒曰:「傅玄知無君臣之傷敎,而不知兼無父子爲重,豈不蔽哉。 |文以末世淺薄,不能復行國君之喪,故因而除之。 曾、閔之性, 實行喪禮。 喪禮實行,何爲除服。 若因此守先王之法,不亦善乎。」玄曰:「漢 數百年一旦復古,恐難行也。」話曰:「且 且漢廢君臣之 而王者獨

服。」博士段暢承述預旨,推引禮傳以成其說。 服喪之文,唯稱不言而已。漢文限三十六日,魏氏以旣虞爲斷。皇太子與國爲體, 議:「太子宜令服重。」尚書僕射盧欽、尚書魏舒、杜預奏:「諒闇之制,乃因自古,是以高宗無 泰始十年,武元楊皇后崩。博士張靖議:「太子宜依漢文權制,割情除服。」博 既卒哭,太子及三夫人以下皆隨御除 土陳逵 理宜釋 服

陵之後通婚嫁,不得作樂,以一朞爲限。」宋高祖崩,葬畢,吏民至于宮掖, 自漢文用權禮,無復□禁,歷代遵用之。至晉孝武崩,太傅錄尚書會稽王道子議:「 悉通樂, 唯殿 Щ

宋武帝永初元年,黄門侍郎王準之議:「回回「鄭玄喪制二十七月而終,學者多云得禮。晉

内禁。

初用王肅議,祥禪共月,遂以爲制。 江左以來,唯晉朝施用, 晉紳之士, 猶多遵玄議。 宜使

朝野一體。」詔可。

晉惠帝永康元年,愍懷太子薨,帝依禮服長子三年,羣臣服齊衰春。

晉孝武太元二十一年,孝武帝崩,李太后制三年之制。

朱武帝永初三年,武帝崩,蕭太后制三年之服。

故可無殤,非孩齓之謂也。 遠。而今注云,諸侯不降嫡殤,重嫌於無服,曰以大功爲重嫡之服。大功爲重嫡之服,則 中書令一下粹曰:「太子始生,故已尊重,不待命誓。 以爲諸侯之太子,誓與未誓,尊卑體殊,喪服云,爲嫡子長殤。 也。」博士蔡克同粹。 無服之殤,行成人之制邪。 雖誓,無復有三年之理明矣。 年,未誓而殤,則雖十九,當大功九月。誓與未誓,其爲升降也微,斬與大功,其爲輕重也 晉惠帝太安元年三月,皇太孫尚薨。 秘書監擊虞議:「太子初生,舉以成人之禮,則殤理除矣。 凡諸宜重之殤,皆士大夫不加服,而令至尊獨居其重,未之前聞 謂殤後者,尊之如父,猶無所加,而止殤服。況以天子之尊,爲 男能奉衞社稷,女能奉婦道,各以可成之年,而有已成之事, 有司奏:「御服齊衰朞。」韶通議。 。若衡議已誓不殤,則元服之子,當斬衰三 。謂未誓也。 已誓則不殤也 散騎常侍謝衡 太孫亦體

志

齊衰

君傳重,自己由位成而服全,非以年也。 天子無服殤之儀,絕朞故也。」 於是御史以 上皆服

名敎之重也。 晉康帝建元元年正月晦,成恭杜皇后周忌。 權制出於近代耳。」於是素服如舊。 有司奏:「至尊春年應改服。」詔曰:「君親, 非漢、魏之典。

於所天。豈可敬之以君道,而服廢於本親。 議。「圖」「資父事君而敬同。又禮傳,其夫屬乎父道者,妻皆母道也。 服后宜以資母之義。 晉孝武太元九年,四四崇德太后褚氏崩。四四后於帝爲從嫂,或疑其服。 魯譏逆祀,以明尊尊。今上躬奉康、穆、哀皇及靖后之祀,致敬同 謂應服齊衰朞。」於是帝制朞服。 ' 則夫屬君道,妻亦后道 太學博士徐藻

立制,若嫌明文不存,則疑斯從重。 號,文公服三年之喪,如此了於父之所生,體尊義重。且禮祖不厭孫,宜遂服無屈。 極,理制備盡,情禮彌申。陽秋之義,母以子貴。旣稱夫人,禮服從正。 百官亦一朞。」詔可。 晉安帝隆安四年,太皇太后李氏崩。 謂應同於爲祖母後齊衰春。 尚書祠部郎徐廣議:「太皇太后名位允正,體同皇 永安皇后無服,但一舉哀。 故成風顯夫人之 而緣情

朱文帝元嘉十七年七月壬子,元皇后崩。兼司徒給事中劉溫持節監喪。 神虎門設凶

門柏歷至西上閣, 皇太子於東宮崇正殿及永福省並設廬。諸皇子未有府第者, 於西廨

設廬。

以綅縞也。心喪已經十三月,大祥十五月,祥禪變除,至司禮畢餘一朞,不應復有禪。宣下 以爲永制。」詔可。 皇太子心喪畢,詔使博議。 **元嘉十七年,元皇后崩。皇太子心喪三年。禮心喪者,有禪無禪,禮無成文,世或兩** 有司奏:「喪禮有禪,以祥變有漸,不宜便除卽吉,故其間服

喪逝。 之限 子业 已。勒禮官處正。」太學博士王膺之議:「尊卑殊制,輕重有級,五服雖同,降厭則異。 著未公除時服,然後就除。未詳今皇后除心制日,當依舊更服。爲但釋心制中所著布素而 心喪,行喪三十日公除。至祖葬日,臨喪當著何服。又舊事,皇后心喪,服終除之日,更還 有緦麻 一降旁親,外舅緦麻,本在服例,但衰絰不可以臨朝饗,故有公除之議。 雖釋衰襲冕,尙 雖過,二功之服已釋,哀情所極,如之漢深於尸柩,親見之重,不可以無服。 之制。 至尊爲服總三月,成服,仍卽公除。至三月竟,未詳當除服與不?又皇后依朝制服 武孝建三年三月,有司奏:「故散騎常侍、右光祿大夫、開府儀同三司義陽王師王偃 愚謂至尊服三月旣竟,猶宜除釋。」又議: 「吉凶異容,情禮 相稱。 案周禮 皇后一 月

志

也。 兄弟旣除喪已, 愚 謂 王右光祿祖葬之日,皇后宜反齊衰。」又議:「喪禮卽遠,變除漸輕,情與日殺,服 及其葬也,反服其服。 輕喪雖除, 猶齊衰以臨葬。 舉輕明重, 則其理 可知 隨

時改。 月,欲反重服拜陵,頻詔勤勤, 不宜還著重服,直當釋除布素 權禮旣 行,服制已變, **豈容終除之日,而更重服乎?** 而已。」太常丞朱膺之議:「凡云公除,非全除之稱。 思申棘心。 于時朝議譬執,亦遂不果。 案晉泰始三年,武帝以朞除之 愚謂皇后終除之日, 今朝臣 私

膺之議。 重制耳。 與公除 國子助教蘇瑋生議:「案三日成服卽除,及皇后行喪三十日,禮 不同。 愚謂皇后除心制日,宜如舊反服未公除時服,以申創巨之情。」餘 無其文。 若並 謂 之 同

膺之云,晉武拜陵不遂反服,此時是權制,旣除衰麻,不

可

以

服,亦有公除,猶自窮其本制。

前,不除於後。 則可 粗相 依准。 雕 有 齊斬重制,猶爲功總除喪。 凡諸公除之設,蓋以王制奪禮。 夫公除暫奪,豈可遂以 葬及祥除,皆宜反服。 即吉邪。 未有服 愚謂 之於 至 尊

三月服竟 ,故應依 禮除釋。 皇后臨祖,及一周祥除,並宜反服齊衰。」尚書令、中軍將軍建平

「權事 王宏議謂:「至尊緦制終,止舉哀 ,變禮,五服俱革,總麻輕制,不容獨異。」謂:「至尊旣已公除,至三月竟,不復有除釋之 而已。 不須釋服。」餘同朱膺之議。 萷 祠 部郎中周景遠議

義。 其 餘 同 朱膺之議。 重加 研詳,以宏議為 允。 詔可。

大明二年正月,有司奏:「故右光祿大夫王偃喪,依格皇后服養,心喪三年,應再周來二

月晦。 建二年二月,其月末,諸公主心制終,則應從吉。于時猶心禪素衣,二十七月乃除,二事不 年,禍難深酷,聖心天至,喪紀過哀。是以出適公主,還同在室,卽情變禮,非革舊章。今皇 后二月晦,宜依元嘉十九年制,釋素卽吉。以爲永準。」詔可。如己 同。」領儀曹郎朱膺之議:「呉ン「詳尋禮文,心喪不應有禪,皇代考檢,「뻬〇〕已爲定制。 檢元嘉十九年舊事,武康公主出適,二十五月心制終盡,從禮卽吉。昔國哀再周,孝 元嘉季

文帝元嘉十五年,皇太子妃祖父右光祿大夫殷和喪,變除之禮,儀同皇后。

服。」從之。 服,子亦不敢服。故王公妾子服其所生母,練冠麻衣,旣葬而除。 置家令典喪事。 晉孝武太元十五年,淑媛陳氏卒,皇太子所生也。有司參詳母以子貴,贈淑媛爲夫人, 太子前衞率徐邈議:「喪服傳稱,與尊者爲體,則不服其私親。又君父所不 非五服之常,則謂之無

服,他日則否。 御服大功九月,設位太極東宮堂殿。中監、黃門侍郎、僕射並從服。從服者,御服衰乃從 置大匠卿斷草,司空告后土。謂葬曰山塋。祔文元皇后廟之陰室,在正堂後壁之外,北向。 宋孝武大明五年閏月,皇太子妃薨。樟木爲櫬,號曰樟宮。載以龍輔。造陵於龍山, 宮臣服齊衰三月,其居宮者處寧假。

議。「宮人從服者,若二御哭臨應著衰時,從服者悉著衰,非其日如常儀。 韶見之日,還著公服。 大明 五 |年閏月,有司奏:「依禮皇太后服太子妃小功五月,皇后大功九月。」 右丞徐爰參 若至尊非哭臨日幸東宮,太子見亦如之。宮臣見至尊,皆著朱衣。」 太子旣有妃朞服,

則下流大功,不容撤樂以終服。「訓」夫金石賓饗之禮,簫管警塗之衞,實人君之盛典,當陽之 體大,理絕凡庶。 後三御樂,宜使學官擬禮上。」興之又議:「案禮,大功至則辟琴瑟,誠無自奏之理。但王者 吹。」右丞徐爰議:「皇太子妃雖未山塋,臨軒拜官,舊不爲礙。 樟棺在殯,應縣而 詳二御何當得作鼓吹及樂。」博士司馬興之議:「案禮,『齊襄大功之喪,三月不從政』。今臨 喪,虛懸終窆,亦足以甄崇冢正,標明禮歸矣。」爰參議,皇太子朞服內,不合作樂及鼓吹。 威飾, 軒拜授,則人君之大典,今古旣異,賒促不同。愚謂皇太子妃祔廟之後,便可臨軒作樂及鼓 大明五年閏月,有司奏:「皇太子妃薨,至尊、皇后並服大功九月,皇太后小功五月。 未 固亦不可久廢於朝。又禮無天王服嫡婦之文,直後學推貴嫡之義耳。旣已制服成 故漢文旣葬,悉皆復吉,唯縣而不樂,以此表哀。 今准其輕重,侔其降殺, 耐

者,以王事奪之,非爲變禮也。婦人傳重義大,若從權制,義將安託。」於是國妃終三年之 年,嗣王乃來繼,不復追服,羣臣皆已反吉,國妃亦宜同除。詔曰:「朝廷所以從權制 明帝泰始中,陳貴妃父金寶卒。貴妃制服三十日滿,公除。晉穆帝時,東海國言哀王

制。 可 終 孫盛 本服,是爲吉凶之儀,雜陳於宮寢, 曰:「廢三年之禮,開偸薄之源,漢、魏失之大者也。 綵素之制,乖異於內外,無乃情禮俱違, 今若以丈夫宜奪以王事,婦人 哀樂失所

蕃

國寡務,宜如聖典,可無疑矣。」

禮 下 船。 宋 文帝元嘉四年八月,太傅長沙景王神主隨子南兗州刺 及至 鎭,入行廟。 大司 馬 臨川 烈 武 王神主 隨 子 荆州 刺 史義於鎭廣 史義慶江陵,亦如 . 陵,[三]備所加 殊

元嘉二十三年七月,白衣領御史中丞何承天奏:

削杖, 之、顏 尊,豈 譙王 官 諸王 年 九月, 下二學禮官博 一,雖 尙 得 測 衡 布帶 書刺 殷明 遂 行 陽 符修儀亡, . 士禮 服。 疏履, 王 海鹽 爲 、王淵之四 臺據經、傳正文, 所生太妃皆居 士議 是施於傍親及自己以下。 春, 公主所 廣德三主以 公主所 禮畢, 人同雅 生母蔣美人 服 心喪三年。』 重服, 輕 議 餘尊所厭, 幷引事例, 重 何惔 則 喪。 太學博士顧雅 公主情禮 博 海鹽 王羅雲 猶 至於 士 依源責失。 服 周 公主先離婚, 爲 大 野王 功。 帝王 二人同 亦宜· 議:『今旣 議 所 海鹽公主體自宸 家中朞服爲允。』 叉云 而博士顧雅 野王議。」 厭, "『今諸王公主咸用 **今應成服,** 猶 成用士禮 依古典。 如所 問 野王等捍不肯 上臺案。 極, 撰儀注參詳, 其 便宜 博 當 又永初三 土 H 同 士禮 今之 庾 齊衰 厭 邃

志

第

五

醴

不俟言而顯。太常統寺,曾不硏却,所謂同乎失者,亦未得之。宜加裁正,弘明國典。 殺攸宜,家國舊典。古之諸侯衆子,猶以尊厭,況在王室,而欲同之士庶。此之僻謬, 旣被催攝二三日,甫輸怗辭。雖理屈事窮,猶聞義恥服。臣聞喪紀有制,禮之大經,降 也。皇子公主不得申者,由有厭而然也。臺登重更責失制不得過十日,而復不酬答。 受朝命,爲國小君,是以二王得遂其服,豈可爲美人比例。尋蕃王得遂者,聖朝之所許 條,無救於失。又詰臺云:「蕃國得遂其私情,此義出何經記。」臣案南譙、衡陽太妃並 帝之時,三王之季。又言長子去斬衰,除禪杖,皆是古禮,不少今世。 厭 服大功,此先君餘尊之所厭者也。〔圖〕元嘉十三年,第七皇子不服曹婕妤,止於麻衣,此 陳氏,練冠縓緣,此則前代施行故事,謹依禮文者也。又廣德三公主爲所生母符修儀 至至尊者也。博士旣不據古,又不依今,背違施行見事,而多作浮辭自衞。 博士雖復引此諸 乃云五

博士遷員外散騎侍郎庾邃之等,咸蒙抽飾,備位前疑,旣不謹守舊文,又不審據前准,

謹案太學博士顧雅、國子助敎周野王、博士王羅雲、顏測、殷明、何惔、王淵之、前

四()()

雅 往 遂 野 反, 上背經典,下違故事,率意妄作,自造禮章。 王 Í 無研 初 立 却 議 ,混同茲失,亦宜及咎。 乖 · 舛, 中執捍愆失, 未違十日之限, 雖起一事, 合成三愆, 請以 見事並発今所居官,解 太常臣敬叔位居宗伯, 野王 問禮 領國子 羅雲掌 所司,騰述 助教 押捍

失,三人加禁固五年。

詔敬叔白衣領職。餘如奏。

反不得遂。」於是皇子皆申母 一古者與尊者爲體,不得服 元嘉二十九年,南平王鱳所生母吳淑儀薨。 英私 服 親。 而 比世 一諸侯咸用士禮,五 依禮無服,麻衣練冠,旣葬而除。 一服之內,悉皆成服,於其所生, 有司奏。

造 以 之以 秉正 沖王。 追胙土字,遠崇封 猶 以 免孺 存亡異數。 王 更 孝武 上。 ,得不爲王乎? 服 制 帝 子之制,全丈夫之義。 澄 孝 未 建元 有 重議:「竊謂贈之爲義,所以追 成 今**璽策咸秩**,是成人之禮;羣后臨哀,非下殤之制 秩,圭黻備典,成孰 准,輙下禮官詳 年六月已已,有司 然則 有在 生而 安有名頒 議。」太學博 大焉。 `奏:「故第十六皇弟休倩薨夭,年始及殤, 封,或旣沒而 《爵首, 典文式昭,殤名去矣。 加 名器。 士陸澄 而 一
臂,
俱受帝命,
不爲吉以 可 服以殤禮。」有司 故贈 議:「案禮有成 公者便成公,贈卿 夫 人人道 (典文垂式, 元 尋澄 若喪用 則 殊 議 不 典 者 成 無 ·爲殤。 追贈諡 便 明 人, 同 成 證 備 服 親以殤 卿。 文物, 表身, 却 今旣 東 贈 平 使

志

第

五.

禮

則 服,末學含疑,未之或辨。敢求詳衷如所稱。」左丞臣羊希參議:「尋澄議,旣無畫然前例,不 合准據。 、服其親服』,推此文旨,旁親自宜服殤,所不殤者唯施臣子而已。」詔可。 案禮,子不殤父,臣不殤君。君父至尊,臣子恩重,不得以幼年而降。又曰,『尊同

月薨 月, 謂 亡者,若用閏後月爲祥忌,則祥忌應在後年正月。祥涉三載,旣失周朞之義,至三冬亡而春 月 ? 已變,人情亦已衰,放有二祥之殺。是則祥忌皆以同月爲議,而閏亡者,明年必無其月,不 閨 士 後 |傅休議:「尋三禮,喪遇閨,月數者數閨,歲數者沒閨,閏在朞內故也。 鄱陽哀王去年閏三 (月)月名旣不殊,天時亦不異。 以 |正閏論雖各有所執, 商議爲允。宜以今六月爲忌。」左僕射建平王宏謂:「邁之議不可准 有司又奏「太常鄱陽哀王去年閏三月十八日薨。今爲何月末祥除。」下禮官議正。博 爲取七月。勒禮官議正」。博士丘邁之議:「案吳商議,閏月亡者,應以本正之月爲忌。 案晉世 月祥,先代成准,則是今比。」太常丞庾蔚之議:「禮,正月存親,故有忌日之感。四時旣 無其月而 ,月次節物,則定是四月之分,應以今年四月末爲祥。 晉元、明二帝,並以閏二月崩,以 |孝建元年六月,湘東國刺稱「國太妃以去三十年閏六月二十八日薨。 未詳周忌當在六 **[及皇代以來,閏月亡者,以閏之後月祥。宜以來七月爲祥忌。」及大明元年二** 不祥忌,故必宜用閏所附之月。 若用閏之後月,則春夏永革,節候亦舛。 閏月附正,公羊明議,故班固 設 以閏 有人以閏 九月爲後 臘 月

可

年正朝爲忌,此必不然。則閨亡可知也。」通關並同蔚之議,三月末祥。 忌,又乖致感之本。譬今年末三十日亡,明年末月小,若以去年二十九日親尙存,則應用後

殤,以登官爲斷。今永陽國臣,自應全服,至於傍親,宜從殤禮。」詔「景遠議爲允」。 成,故鄱陽哀王追贈太常,親戚不降。愚謂下殤以上,身居封爵,宜同成人。年在無服之 殤君,子不殤父』。 推此,則知傍親故依殤制。東平沖王已經前議。若升仕朝列,則爲大 參議:「南面君國,繼體承家,雖則佩觿,未闕成德,君父名正,臣子不容服殤,clk]故云『臣不 平沖王服殤,實由追贈,異於已受茅土」。博士司馬興之議:「應同東平殤服。」左丞荀萬秋等 學博士虞龢、領軍長史周景遠、司馬朱膺之、前太常丞庾蔚之等議,並云「宜同成人之服。東 後廢帝元徽二年七月,有司奏:「第七皇弟訓養母鄭修容喪。未詳服制,下禮官正議。」 大明五年七月,有司奏:「故永陽縣開國侯劉叔子夭喪,年始四歲,傍親服制有疑。」太

庶母慈己之服。』愚謂第七皇弟宜從小功之制。」參議並同。 太學博士周山文議:「案庶母慈己者,小功五月。鄭玄云:『其使養之不命爲母子,「訓」亦服

「故辟舉綱紀吏,不計違適,皆反服舊君齊衰三月。」於是詔書下其奏,所適無貴賤,悉同依 漢、魏廢帝喪親三年之制,而魏世或爲舊君服三年者。至晉泰始四年,尚書何楨奏〔一尽〕

四〇四

魏武以正月崩,魏文以其年七月設伎樂百戲,是魏不以喪廢樂也。 晉武帝以來,國有

大 修復,頻年會,輒廢樂。 喪未除,正會亦廢樂。 是時太后臨朝,后父褚裒薨,元會又廢樂。 太安元年,太子喪未除,正會亦廢樂。 穆帝永和中,爲中原山陵未

晉世孝武太元六年,爲皇后王氏喪,亦廢樂。宋大喪則廢樂。

陪陵。 物 篋,題識其上,春秋冬夏日有不諱,隨時以斂。 無所增 高 也。 爲基,不封不樹。 漢獻帝建安末,魏武帝作終令曰:「古之葬者,必在瘠薄之地,其規西原上爲壽陵。因 漢禮 加。 其公卿大臣列將有功者,宜陪壽陵。 明器甚多,自是皆省矣。 及受禪,刻金璽,追加傳號。 , 周禮, 冢人掌公墓之地, 凡諸侯居左右以前, 卿大夫居後。 不敢開埏,乃爲石室,藏璽埏首,示陵中無金銀諸 其廣爲兆域,使足相容。」魏武 金珥珠玉銅鐵之物, 不得送。 以送終制衣 漢制 文帝遵奉, 亦謂之 服四

無樹 ·,無立寢殿,造園邑,通神道。 文帝黃初三年,又自作終制:「禮,國君卽位,爲椑,存不忘亡也。 夫葬者,藏也。 欲人之不能見也。 禮不墓祭,欲存亡之 壽陵因 Щ 為體,無封

不 黷也。 皇后及貴人以下,不隨王之國者,有終沒,皆葬澗西,前又已表其處矣。」此詔藏之

宗 廟,副在尙書、祕書三府,明帝亦遵奉之。 明帝性雖崇奢,然未遽營陵墓也。

晉宣帝豫自於首陽山爲土藏,不墳不樹,作顧命終制,斂以時服,不設明器。 文、景皆

景帝崩,喪事制度,又依宣帝故事。

謹

奉成命,無所加焉。

武 帝泰始 四年,文明王皇后崩,將合葬,開崇陽陵。使太尉司馬望奉祭,進皇帝蜜璽綬

於 便房神 坐。 魏氏 金璽,此又儉矣。

行 道,此其義也。 費,停之。」案一蔡謨說,以二瓦器盛死者之祭,繫於 外 重。 司 之。 奏 欲 今之凶門,是其 :移陵十里內居人,一切停之。」江左元 :「大行皇后陵所作凶門栢歷,門號顯陽端門。」詔 成 泰始二年,詔曰:「昔舜葬蒼梧,農不易畝;禹葬會稽,市不改肆。 薄 帝 帳, 咸康七年,杜后崩。 即古 范堅 吊幕之類也。」是時又詔曰: 遺象也。四禮,旣 又曰「凶門非古。 韶外官 五日一入臨,內官旦一入而已。 虞而 古有懸 、明崇儉,且百度草創, 作主。 「重壤之下,豈宜崇飾無用。 重,形似凶門。 (木表) 裹以葦席, [80]置於庭 今未葬,未 日一門如所處,八三四門相 有主,故以重當之。 後 山陵奉終,省約備 人出 過葬虞祭禮畢止。 之門外以 上惟祖考淸簡之旨, 中近南, 中唯潔掃而 表 歷,大爲煩 ₩禮 喪, 矣。 稱 俗 爲 名 遂 有

陵

已。」有司叉奏依舊選公卿以下六品子弟六十人爲挽郎。 韶叉停之。

孝武帝太元四年九月,皇后王氏崩。詔曰:「終事唯從儉速。」又詔:「遠近不得遣山陵

使。」有司奏選挽郎二十四人。詔停。

宋文帝元嘉十七年,元皇后崩,詔亦停選挽郎。

漢儀五供畢則上陵,歲歲以爲常。 魏則無定禮。 齊王在位九載,始一謁高平陵,而曹

爽誅。其後遂廢,終魏世。

遵奉。」於是施行。 道子命曰:「今雖權制釋服,至於朔望諸節,自應展情陵所,以一周爲斷。」於是至陵變服單 是遂止,以爲永制。至穆帝時,褚太后臨朝,又拜陵,帝幼故也。至孝武崩,驃騎將軍司馬 事,蓋由眷同友執,率情而舉,非洛京之舊也。成帝時,中宮亦年年拜陵,議者以爲非禮,於 峻 興,非晉舊典。 衣峽,煩瀆無準,非禮意也。至安帝元興元年,尚書左僕射桓謙奏曰:「百僚拜陵,起於中 平陵,然遂不敢謁高原陵。至惠帝復止也。逮江左初,元帝崩後,諸公始有謁陵辭陵之 晉宣帝遺詔:「子弟羣官,皆不得謁陵。」於是景、文遵旨。至武帝猶再謁崇陽陵, 積習生常,遂爲近法。 及義熙初,又復江左之舊。 尋武皇帝韶,乃不使人主諸王拜陵,豈唯百僚。 謂宜 一謁

宋 明帝又斷羣臣初拜謁陵,而辭如故。 自元嘉以來,每歲正月,輿駕必謁初寧陵,復漢

儀也。世祖、太宗亦每歲拜初寧、長寧陵。

述倫遺美,云「祗畏王典,不得爲銘,乃撰錄行事,就刊於墓之陰云爾」。此則碑禁尙嚴也。 不得厚葬,又禁立碑。魏高貴鄉公甘露二年,大將軍參軍太原王倫卒,倫兄俊作表德論,以 漢 以後,天下送死奢靡,多作石室石獸碑銘等物。 建安十年,魏武帝以天下雕弊,下令

祠 葬舊君顧榮,求立碑。」詔特聽立。自是後,禁又漸頹。大臣長吏,人皆私立。 此後復弛替。 部郎 禁斷之。 晉武帝咸寧四年,又詔曰:「此石獸碑表,旣私褒美,興長虛偽,傷財害人,莫大於此。 中裴松之又議禁斷,於是至今。 其犯者雖會赦令,皆當毀壞。」至元帝太興元年,有司奏:「故驃騎府主簿故恩營 義熙中,尚書

順帝昇明三年四月壬辰,御臨軒,遣使奉璽綬禪位於齊王,懸而不樂。

宋明帝泰始二年九月,有司奏:「皇太子所生陳貴妃禮秩旣同儲宮,未詳宮臣及朝臣並

志第五 禮二

體君,班秩視子爲序。 有敬 通音介於外,雖義可致虔,不應有牋表。」參詳休仁議爲允。 其東朝 不?妃主在內相見,又應何儀。]博士王慶緒議:「百僚內外禮敬貴妃,應與皇太子同。 臣 隸,理歸臣節。」太常丞虞愿等同慶緒。 母以子貴,經著明文。 內外致敬貴妃,誠如慶緒議。 尚書令建安王休仁議稱:「禮 天子姬嬪,不容 云,妾旣不得

詔可

之議 總,而班有貴賤。 典,有踰 子無服,旣不服他妾之子,豈容服君及女君餘親。 太后。」兼太常丞司馬燮之議:「禮,『妾服君之庶子及女君之黨』。 無服,太妃儀不應殊,故悉不服也。 親舉哀格當 云不居尊極,不容輕於諸侯。 案喪服傳,『妾服君之黨,得與女君同』。 爲允。 泰豫元年,後廢帝卽位, 東儲,尙不服朞,太妃豈應有異。 太妃於國親無服,故宜緣情爲諸王公主於至尊是朞服者反,其太妃王妃三夫人 同皇太后。爲有降異。又於本親春以下, 三夫人九嬪,位視公卿。 崇所生陳貴妃爲皇太妃。 謂本親朞以下,一無所服。 計本情舉哀,其禮不異。 若本親有惨,舉哀之儀,宜仰則太后。」參議 如此,皇太妃服宗與太后無異。 大夫猶有貴妾,而況天子。 況皇太后妃貴亞相極,禮絕羣后,崇輝盛 有司奏:「皇太妃位亞尊極,未詳國 當猶服與不了前曹郎王燮之議: 有慘自宜舉哀。 又禮,『諸侯絕朞』。 皆謂大夫士耳。 諸侯之妾爲 但太后旣以尊降 親疏二儀,準之 皇太妃雖 他妾之 妾名雖 以 燮

九嬪各舉哀。

之爲允。 也。 蒙榮,唯有諸王。 生。」太常丞庾蔚之議:「『母以子貴』,雖春秋明義,古今異制,因革不同。 子貴』。 「子不得爵父母,而春秋有『母以子貴』。 人之禮。 始封之身,所不得同。 檢無國子除太夫人先例,法又無科。下禮官議正。」太學博士孫豁之議:「春秋,『母以 宋孝武帝孝建三年八月戊子,有司奏:「雲杜國解稱國子檀和之所生親王,求除 王雖爲妾,是和之所生。 凡此皆朝恩曲降,非國之所求。子男妾母,未有前比。」祠部郎中朱膺之議以爲 詔可 旣是王者之嬪御,故宜見尊於蕃國。若功高勳重,列爲公侯,亦有拜太夫 若殊績重勳,恩所特錫,時或有之,不由司存。」所議參議,以蔚 案五等之例,

鄭伯許男同號夫人,

國子體例,

王合如 當謂傳國嗣君母,四三本先公嬪媵,所因藉有由故 自頃代以來,所生 國 太夫 所

若其未也,無容遠搜輕屬,承綱繼體,傳之有由。父在立子,允稱情典。」曹郎諸葛雅之議 例。」博士傅郁議:「禮記,微子立術,商禮斯行。仲子舍孫,姬典攸貶。 舊。今胙土之君在而世子卒,厥嗣未育,非捨孫之謂。[晉] 愚以爲次子有子,自宜紹爲世孫。 官議正。」博士孫武議:「案晉濟北侯荀勗長子連卒,以次子輯拜世子。 大明二年六月,有司奏:「凡侯伯子男世子喪,無嗣,求進次息爲世子。 先代成準,宜爲今 歷代遵循,靡替于 檢無其例,下禮

志

詔可。 長子卒,立次子,亦近代成例。依文採比,竊所允安。 今長子早卒,無嗣,進立次息以爲世子,取諸左氏,理 「案春秋傳云,『世子死,有母弟則立之,〔閏〕無則立長,年均擇賢,義均則卜』。 義無違。 謂宜開許,以爲永制。」參議爲允。 又孫武所據晉濟北侯荀勗 古之制也。

之母,崇號得從,子男於親,尊秩宜顯。故春秋之義,『母以子貴』。 子。 國子除太夫人例。下禮官議正。」太學博士司馬興之議:「案禮,下國卿大夫之妻,皆命天 以斯而推,則子男之母,不容獨異。」博士程彥議以爲:「五等雖差,而承家事等。 大明十二年十一月,[晉]有司奏:「興平國解稱國子袁愍孫母王氏,應除太夫人。 固知從子尊與國均也。 檢無

國統。于時旣無承繼,虔秀以次襲紹四記。虔嗣旣列廟饗,故自與世數而遷。豈容蒸嘗無 世及,春秋成義。 並爲應以銑爲正嗣。太常陸澄議立鍇。右丞徐爰議謂:「禮後大宗,以其不可乏祀。諸侯 虔嗣。今依例應拜世子,未詳應以銑爲世子。爲應立次子鍇。」太學博士王溫之、江長議, **彦參議,以興之議爲允。除王氏爲興平縣開國子太夫人。」詔可。** 大明四年九月,有司奏:「陳留國王曹虔秀長兄虔嗣早卒,「四万秀襲封之後,生子銑以繼 虔嗣承家傳爵,身爲國王,雖薨沒無子,猶列昭穆。立後之日,便應卽纂

闕,橫取他子爲嗣。爲人胤嗣,又應恭祀先父。案禮文,公子不得禰諸侯。虔嗣無緣降廟

內,旣非州郡縣部界,則不合依門外。其尙書令、二僕射所應分道,亦悉與中丞同。」 徒及公事,亦得與中丞分道與不?其准參舊儀,告報參詳所宜分道』。聽如臺所上,其六門 合分道。又尋六門則爲行馬之內,且禁衞非違,並由二衞及領軍,未詳京尹、建康令門內之 史、丹陽尹、建康令,並是京輦土地之主,或檢校非違,或赴救水火,事應神速,不宜稽駐,亦 旣無畫然定則,「四〕準承有疑。謂皇太子正議東儲,不宜與衆同例,中丞應與分道。揚州刺 道,應有舊科。 宋文帝元嘉十三年七月,有司奏:「御史中丞劉式之議,『每至出行,未知制與何官分 法唯稱中丞專道,傳詔荷信,詔喚衆官,應詔者行,得制令無分別他官之文,

輿隸取冰於深山窮谷涸陰冱寒之處,以納于凌陰。 務令周密,無泄其氣。 先以黑牡秬黍祭 秋、「兩己有臣妾喪,韶贈祕器。自立夏至立秋,不限稱數以周喪事。繕制夷盤,隨冰借給。「兩一司 夏祠用鑑盛冰,室一鑑,以禦溫氣蠅蚋。三御殿及太官膳羞,並以鑑供冰。自春分至立 司寒於凌室之北。四分仲春之月,春分之日,以黑羔秬黍祭司寒。啓冰室,先薦寢廟。二廟 孝武帝大明六年五月,韶立凌室藏冰。有司奏,季冬之月,冰壯之時,凌室長率山虞及

志第五

禮

凌室在樂游苑內,置長一人,保舉吏二人。

賤,與君同,不嫌也。」夫朱門洞啓,當陽之正色也。三公之與天子,禮秩相亞,故黃其閤,以 示謙不敢斥天子,蓋是漢來制也。 三公黃閤,前史無其義。 史臣按,禮記「士鞸與天子同,公侯大夫則異」。鄭玄注:「士 張超與陳公箋,「拜黃閤將有日月」是也。

|泰責蕃曰:「以階級言之,傍宜有敬;以類數推之,至閤宜省。」然後敬止在門,其來久矣。 蕃爲光祿勳,范滂爲主事,以公儀詣蕃,執板入閤,至坐,蕃不奪牓板,牓投板振衣 漢世朝臣見三公,並拜。丞、郎見八座,皆持板揖,事在漢儀及漢舊儀,然則並有敬 史臣按: 今朝士詣三公,尚書丞、郎詣令、僕射、尚書,並門外下車,履,度門閫 而去。 乃納 陳

校勘記

- 其萬民利害為 書 「民」各本並作「人」,據周禮秋官小行人職文改。
- 元嘉四年二月乙卯 「乙卯」原作「己卯」,據局本及本書文帝紀改。 按是年二月乙巳朔,十一

登城三戰及先大將家幷青泥關頭敗沒餘口 「家」各本並作「軍」,據文帝紀改。「靑泥」各本並

日

乙卯,是月無己卯。

作「貴泥」。 孫彪宋書考論云:「當作青泥」。 按孫說是,今改正。

- 明詳旨申勒 「勒」各本並作「勤」, 孫彪宋書考論 云:「勤當作勒 Ľ, 按孫 說是,今改正。
- 五 告報 聽 如 所上 各本並脱「告」字,據通典禮典補。 按下有「請臺告報」之語、蓋告報爲當時
- ハベン 右令日 下 司 徒 各本並脱「右」字、據通典禮典補。

文程式

用

- フャン 某宣攝 奉行 如故 事 各本並脱「奉」字、據通典禮典補。
- 年月朔 四 四陳琳燉吳將校部曲文亦作「年月朔日子」。 日子 三朝本、毛本作「年月朔日子」。北監本、殿本、局本作「年月朔日甲子」。 按文器
- ナ. ナ. 凵 年月日 前 後對易。 侍御史某甲受 此行各本並在「右令書板文準於詔事板文」一行之下,今據通典禮典
- 太史每歲上其年曆 「其」各本並作「某」,據晉書禮志、通典禮典改。
- 晉成帝咸和五年六月丁未 按是月丙寅朔、無丁未。
- 而改。 夫先王所以從時讀令者 「從」,晉書禮志 通典禮典作「順」,蓋沈約爲梁武帝父蕭順之諱
- 志 王者四時之服正云駕倉龍 第 五 校 勘 記 「云」字三朝本空白。 北監本、毛本、殿本、局本作「見」字、元魏 五

四三

七六作「云」字。今據元龜改。

拂不祥 續漢書禮儀志劉昭注引、通典禮典作「祓除不祥」。

三吾 劉楨魯都賦 「楨」各本並作「禎」。 按劉楨、字公榦、則「禎」當作「楨」、今改正。

「建光」各本並作「建元」,據元龜六〇改。

按漢安帝年號有「建光」,無「建元」。

[17] 故未皆得返情太素 各本並脫「太」字,據晉書禮志補。

建光

元年

主者具行備 「具」各本並作「奏」。 據晉書禮志、元龜二七改。 下文亦有「主者便具行備」語。

[1元] 率常以吉物奪之 各本並奪「物」字,據晉書禮志補。

[10] 黄門侍郎王準之議 各本並脫「王」字,據通典禮典補。

〇二〕 重嫌於無服 各本並脫「服」字、據晉書禮志補。

太孫 亦體君傳重 三朝本、北監本、毛本、殿本並脱「傳」字、今從局本。

晉孝武太元九年 「九年」各本並作「元年」。據錢氏考異說改。 錢大昕廿二史考異云:「太元

元年,當作太元九年。 字涉相似而譌。」按晉書康獻褚皇后傳,卒於太元九年。

崇德太后褚氏崩 「崇德」各本並作「崇憲」,據局本及晉書禮志、晉書康獻褚皇后傳改。

至 太學博士徐藻議 「徐藻」各本並作「徐恭」,據晉書禮志、晉書康獻褚皇后傳、通典禮典、元龜

五七五改。

文公服三年之喪 「文公」各本及南史、晉書禮志作「昭公」。 宋書徐廣傳作「僖公」。 通典 `禮典

作「文公」。 錢大昕廿二史考異云:「昭公,徐廣傅作僖公。然成風之薨,不在僖公之世 且安帝

於李后爲祖 母, 非僖公於 成風之比。 竊謂當是文公之譌也。」 按據錢氏考異之說, 則 **延典**

作

「文公」者是,今據改。

〔三〕 祥禪變除 各本並脫「祥」字、據通典禮典補

〔云〕哀情所極 「情」各本並作「喪」、據通典禮典改。

領儀 曹郞朱膺之議 各本並脱「儀」字,據元龜五 七六補。

〔10〕皇代考檢 「檢」各本並作「驗」,據通典禮典改。

釋素卽 吉以 爲 永 準 詔 可 各本並脱「爲 永準詔 可 五. 一字`據通典禮 }典

〔三〕不容撤樂以終服 各本並脱「以」字、據通典禮典補。

太傅長: 有義欣, 沙景王神主隨子南兗州刺史義欣鎭廣 無義興。 義欣元嘉三年爲南兗州刺史。 陵 今據長沙景王傳子義欣附傳改正 義 欣 各本並作 義 興。 按長沙王道憐子

此先君 餘尊之所厭者也 「厭」各本並作「廢」,今從局 本。

〔三〕旣失周春之義 「義」各本並作「議」,據通典禮典改

雖 則 佩 **騰未闕成德君父名正臣子不容服殤** 各本並作 「雖則佩觽未關成人得君父名也不容服

志

第

五

校

勘

記

殤」,文字舛譌不可通。今據通典禮典改正。

其使養之不命爲母子 各本 ·並作「其使養之命不爲母子」,今據儀禮喪服鄭玄注原文改正。

泰始四年尚書何楨奏 「楨」各本作「禎」。 按三國志魏志管寧傳注引文士傳:「楨字元榦,廬江

入晉爲尙書、光祿大夫。」當卽其人,則「禎」當作「楨」,今改正。 參見本書卷一四禮志 校

勘記第八、第十四、第二二條。

〔三〕門如所處 「所」各本並作「何」,據通典禮典改。

[80] 裹以葦席 各本並脫「裹」字,據通典禮典補。

[81] 是其遺象也 各本並脫「遺」字,據通典禮典補。

[四] 當謂傳國嗣君母 各本並脫「嗣」字,據元龜五七六補。

[5]] 非捨孫之謂 各本並脫「捨」字,據通典禮典補。

有母 弟則立之 「立之」各本作「弟」一字,據左傳襄公三十一 年原文改正

量 大明 大明十二年十一 四年,此十二年或是大明三年之誤。」 月 張森楷校勘記云: 大明 祇八年。 無十二年。 壉 Ė 條稱大明二年,下條稱

合合 有司 下文又出「曹虔季」,幷改「曹虔秀」。 奏陳留國王曹虔秀長兄虔嗣早卒 「曹虔秀」 'n 各本並作「曹虔季」,據本紀及通典禮典改。

<u>}</u>典改。

旣無畫然定則 「畫」各本並作「盡」,據通典禮典改。

四心 先以黑牡秬黍祭司寒於凌室之北 「秬黍」各本並作「稺黍」,據通典禮典改。

金品 自春 分至立秋 各本並脱「至」字,據通典禮典補。

呈 隨冰借給 「借」局本及通典禮典作「供」。

五 校 勘 記

志

第

宋書卷十六

志第六

禮三

漢。 馬遷著封禪書,班固備郊祀志,上紀皇王正祀,下錄郡國百神。 中興以後,其舊制誕章,粲然弘備。 國之大事,在祀與戎」。 自書契經典,咸崇其義,而聖人之德,莫大於嚴父者也。 自茲以降,又有異同。 故復撰次云爾。 司 馬彪又著祭祀志以續終 故司

壇。 禪帝位于魏。 魏相 漢獻帝延康元年十一月己丑,詔公卿告祠高廟。 國華歆跪受璽敍以進於王。 是時魏文帝繼王位,南巡在潁陰。 既受畢,降壇視燎,成禮 有司乃爲壇於潁陰之繁陽故城。 遣兼御史大夫張音奉皇帝璽綬策書, 而返。 未有祖配之事。 庚午,登

魏文帝黃初二年正月,郊祀天地明堂。 是時魏都洛京,而神祇兆域明堂靈臺,皆因漢

志第六 禮三

舊事。 四年七月,帝將東巡,以大軍當出,使太常以一特牛告祠南郊,自後以爲常。 及文帝

崩,太尉鍾繇告諡南郊,皆是有事於郊也。

郊禋之制具存,魏所損益可知也 明帝太和元年正月丁未,郊祀武皇帝以配天,宗祀文皇帝於明堂以配上帝。 是時二漢

祀 詔高 於虛壇,未詳所據也 邑祠 四年八月,帝東巡,過繁昌。 即位壇。 此雖前代已行之事,然爲壇以祀天,而壇非神也。 使執金吾臧霸行太尉事,以特牛祠受禪壇。 今無事於上帝, 而致 後漢紀,章帝

虞氏, 今祀圓丘, 以始祖帝舜配, 號圓丘曰皇皇帝天。 秦滅學之後,採摭殘缺,以備郊祀。 以 皇考高祖文皇帝於明堂,以配 廢無常,一彼一此,四百餘年,廢無禘禮。 帝舜配。 彰 神明,尊祀世統,以昭功德。 天郊所祭日皇天之神,以太祖 景初元年十月乙卯,始營洛陽南委粟山爲圓丘。 自正始以後,終魏世,不復郊祀。 上帝。」十二月壬子冬至,始祀皇皇帝天于圓丘,以始祖有虞 故先代之典旣著,則禘郊祖宗之制備也。 武皇帝配。 自甘泉、后土、確宮、五時神祇兆位, 古代之所更立者,遂有闕焉。 地郊所祭日 韶曰:「蓋帝王受命,莫不恭承天地, 方丘所祭曰皇皇后地, . 皇地之祇,以武宣皇后 多不經見, 曹氏世系,出自有 昔漢氏之初,承 以舜妃 配。 並以 伊氏 宗祀 興

漢饗 堅尊號爲吳始祖。』如此說,則權末年所郊,堅配天也。權卒後,三嗣主終吳世不郊祀,則權 闕,固非也。 主糾 位,明未郊也。 書郊祀志,匡衡奏徙甘泉河東郊於長安,言文王郊於酆。」權曰:「文王德性謙讓, 王伐尉,卽阼於鎬京,而郊其所也。 曰:「普天之下,莫非王土。 非中土,不復修設。 從。 拯世 臣曹丕,遂奪神器。 不享配帝之禮 於天,皇帝位虛,郊祀無主,休徵嘉瑞,前後雜沓,曆數在躬,不得不受。 駁郊祀,追貶匡衡,凡在見者,莫不慨然稱善也。」何承天曰:「案權建號繼天,而郊享有 謹擇元日,登壇柴燎,卽皇帝位。 一、奉辭行罰,舉足爲民。 國二十有四 孫 權初稱尊號於武昌,祭南郊告天。文曰:「皇帝臣孫權,敢用玄牡,昭告皇皇后帝 末年雖一南郊,而遂無北郊之禮。環氏吳紀:『權思崇嚴父配天之義,追上父 經傳無明文,由匡衡俗儒意說,非典籍正義,不可用也。」虞喜志林曰「吳 世 ,歷年四百三十有四,[1] 行氣 中年,一 丕子叡繼世作慝,竊名 羣臣奏議,宜修郊祀。 王者以天下爲家。 **奉臣將相** 文王未爲天子,立郊於酆,見何經典。」復奏曰:「伏見漢 州郡百城執事之人,咸以爲天意已去於漢,漢氏 唯爾 亂 有神饗之!左右有吳、永綏天極。」其後自 制。 昔周文、武郊於酆、鎬,非必中土。」權曰 數終,祿胙運盡,普天弛絕,率土分崩。 權生於 權 曰:「郊祀當於中土,今非其所。」重奏 東南, 遭値 期 運,承乾 權畏天命,敢不 秉戎, 處諸 武 院侯之 志在 以居 已終 敬

業不可以久替,四海不可以無主,率土式望,在備一人。備畏天之威,又懼漢邦將湮于地。 享。今曹操阻兵安忍,子丕載其凶逆,竊居神器。羣臣將士以爲社稷墮廢,備宜修之,嗣武 告皇天上帝、后土神祇。漢有天下,曆數無疆。曩者王莽篡盜,光武皇帝震怒致誅,社稷復 謹擇元日,與百僚登壇,受皇帝璽綬。修燔瘞,告類于大神。惟大神尚饗!祚于漢家,永綏 二祖,龔行天罰。」備惟否德,懼忝帝位,詢于庶民,外及蠻夷君長,僉曰天命不可以不答,祖 劉備 章武元年,卽皇帝位,設壇。「建安二十六年夏四月丙午,皇帝臣備,敢用玄牡,昭

章武二年十月,詔丞相諸葛亮營南北郊于成都。

于漢。 策書,禪帝位于晉。丙寅,晉設壇場于南郊,柴燎告類,未有祖配。其文曰:「皇帝臣炎,敢 揚、越,函夏興仁,八紘同軌,遐邇馳義,祥瑞屢臻,天人協應,無思不服。肆予憲章三后, 又以禪禹,邁德垂訓,多歷年載。暨漢德旣衰,太祖武皇帝撥亂濟民,扶翼劉氏,又用受禪 用玄牡,明告于皇皇后帝。魏帝稽協皇運,紹天明命,以命炎曰:『昔者唐堯禪位虞舜,虞舜 魏元帝咸熙二年十二月甲子,使持節侍中太保鄭沖、兼太尉司隸校尉李憙奉皇帝璽綬 粤在魏室,仍世多故,幾於顚墜,實賴有晉匡拯之德,用獲保厥肆祀,弘濟于艱難。

不可以曠主,炎虔奉皇運,畏天之威,敢不欽承休命,敬簡元辰,升壇受禪,告類上帝,以永 君長,僉曰:『皇天鑒下,求民之瘼,旣有成命,固非克讓所得距違。』天序不可以無統,人神 用集大命于茲。』炎惟德不嗣,辭不獲命。於是羣公卿士,百辟庶僚,黎獻陪隸,暨于百蠻

答民望,敷佑萬國。惟明德是饗。」

之。一如宣帝所用王肅議也。是月庚寅冬至,帝親祠圓丘於南郊。自是後,圓丘方澤不別 「古者丘郊不異,宜幷圓丘方澤於南北郊,更修治壇兆。其二至之祀,合於二郊。」帝又從 粉互,遂不時定,不得以時供饗神祀,配以祖考,日夕歎企,貶食忘安。其便郊祀。」時羣臣 坐。五郊改五精之號,皆同稱昊天上帝,各設一坐而已。北郊又除先后配祀。」帝悉從之。 又議:「五帝,卽天也,五氣時異,故殊其號。雖名有五,其實一神。明堂南郊,宜除五帝之 二月丁丑,郊祀宣皇帝以配天,宗祀文皇帝於明堂,以配上帝。是年十一月,有司又議奏: 泰始二年正月,詔曰:「有司前奏郊祀權用魏禮。朕不慮改作之難,今便爲永制。衆議

議除明堂五帝位,考之禮文正經不通。且詩序曰:『文、武之功,起於后稷。』故推以配天焉。 (周官云:『祀天旅上帝。』又曰:『祀地旅四望。』四望非地、則明上帝不得爲天也。□ 往者衆 太康十年十月,乃更詔曰:「孝經『郊祀后稷以配天,宗祀文王於明堂,以配上帝』。而

志

宣帝以神武創業,旣已配天,復以先帝配天,於義亦不安。 其復明堂及南郊五帝位。」

晉武帝太康三年正月,帝親郊祀。皇太子、皇弟、皇子悉侍祠,非前典也。

愍帝都長安,未及立郊廟而敗。

| 崧、太常華恒、中書侍郎庾亮皆同組議。 堂宗祀之禮。江左不立明堂,故闕焉。 辛卯、三帝親郊祀、饗配之禮、一依武帝始郊故事。 旋都洛邑乃修之。司徒荀組據漢獻帝居許,卽便立郊,自宜於此修奉。驃騎王導、僕射荀 元帝中興江南,太興元年,始更立郊兆。 事遂施行。按元帝紹命中興,依漢氏故事,宜享明 其制度皆太常賀循依據漢、晉之舊也。 初尚書令刁協、國子祭酒杜夷,議宜須

·舟山南立之。是月辛未,祀北郊,始以宣穆張皇后配地。魏氏故事,非晉舊也。 明帝太寧三年七月,始詔立北郊。未及建而帝崩,故成帝咸和八年正月,追述前旨,於

月。 北 是從和議。 別 郊之月,古無明文,或以夏至,或同用陽復。 立 及中興草創,百度從簡,合北郊於一丘。 康帝建元元年正月,將北郊,有疑議。太常顧和表曰「泰始中,合二至之祀於二郊。 北 郊,同用正月。 是月辛未,南郊。辛巳,北郊。帝皆親奉。 魏承後漢,正月祭天,以地配,而稱周禮,三王之郊,一用夏正。」於 漢光武正月辛未,始建北郊。此則與南郊同 憲章未備,權用斯禮,蓋時宜也。 至咸和中,

返。其明年應郊。朝議以爲宜依周禮,回宗伯攝職,三公行事。尚書左丞王訥之獨曰:至 受禪,用二月郊,元帝中興,以三月郊。今郊時未過,日望輿駕。無爲欲速而無據,使皇輿 庶人以上,莫不蒸嘗,嫡子居外,庶子執事,禮文炳然。未有不親受命而可祭天者。又武皇 議者又云今宜郊,故是承 制所得命三公行事。又郊天極尊,唯一而已,故非天子不祀也。 「旣殯郊祀,自是天子當陽,有君存焉,禀命而行,何所辨也。齋之與否,豈如今日之比乎。 安帝元興三年三月,宋高祖討桓玄走之。己卯,告義功于南郊。是年,帝蒙塵江陵未

旋返,更不得親奉。」遂從訥之議。

無一旅,仰憤時難,俯悼橫流,投袂一麾,則皇祚剋復。及危而能持,顚而能扶,姦宄具殲, 宰輔焉依,爲日已久。難棘隆安,禍成元興,遂至帝王遷播,宗祀湮滅。裕雖地非齊、晉,衆 |漢、魏,靡不以上哲格文祖,元勳陟帝位,故能大拯黔黎,垂訓無窮。||晉自東遷,四維弗樹, 歸,欽若景運,以命于裕。夫樹君司民,天下爲公,德充帝王,樂推攸集。越俶唐、虞,降暨 殊俗慕義,重譯來款,正朔所暨,咸服聲教。至乃三靈垂象,山川告祥,人神和協,歲月茲 僭偽必滅。誠否終必泰,興廢有期。 至於撥亂濟民,大造晉室,因藉時運,以尸其勞。 加以 璽紱,柴燎告類。策曰:「皇帝臣裕,敢用玄牡,昭告皇皇后帝。 晉帝以卜世告終,曆數有 **|晉恭帝||元熙||一年五月,遣使奉策,禪帝位于||宋。||永初元年六月丁卯,設壇南郊,受皇帝**

深永懷,祗懼若厲。敬簡元日,升壇受禪,告類上帝,用酬萬國之嘉望。 不可以暫曠。遂逼羣議,恭茲大禮。猥以寡德,託于兆民之上。雖仰畏天威,略是小節,顧 是以羣公卿士,億兆夷人,僉曰皇靈降鑒於上,晉朝款誠於下,天命不可以久淹,宸極 克隆天保,永祚于

|永初元年,皇太子拜告南北郊。

惟明靈是饗。」

|永初二年正月上辛,上親郊祀

文帝元嘉三年,車駕西征謝晦,幣告二郊。

發,醜徒冰消,質旣梟懸,義宣禽獲,二寇俱殄,並宜昭告。檢元嘉三年討謝晦之始,普告二 謀危宗社。質反之始,戒嚴之日,二郊廟社,皆已遍陳。其義宣爲逆,未經同告。輿駕將 議:「禮無不報。始旣遍告,今賊已禽,不應不同。」國子助教蘇瑋生議:「案王制,天子巡狩, 郊、太廟。賊旣平蕩,唯告太廟、太社,不告二郊。」禮官博議。太學博士徐宏、孫勃、陸澄 『歸,假于祖禰』。又曾子問:『諸侯適天子,告于祖,奠于禰,命祝史告于社稷宗廟山川。 告 侯將出,必以幣帛皮圭,告于祖禰。反必告至。』天子諸侯,雖事有小大,其禮略鈞,告出告 用牲幣,反亦如之。諸侯相見,反必告于祖禰,乃命祝史告至于前所告者。』又云:『天子諸 孝武帝孝建元年六月癸巳,八座奏:「劉義宣、臧質,干時犯順,滔天作戾,連結淮、岱,

蓋孝敬之心。旣以告歸爲義,本非獻捷之禮。今輿駕竟未出宮,無容有告至之文。若陳告 推例求意,不可動必徵文。天子反行告社,亦無成記,何故告郊,獨當致嫌。但出入必告, 告郊之辭。果立此義,彌所未達。夫禮記殘缺之書,本無備體,折簡敗字,多所闕略。正應 則宜告郊,不復容疑。元嘉三年,唯告廟社,未詳其義。 不行之禮,則爲未有前准。愚謂祝史致辭,以昭誠信。苟其義舛於禮,自可從實而闕。臣 至,理不得殊。鄭云:『出入禮同。』其義甚明。天子出征,類于上帝,推前所告者歸必告至, 或當以禮記唯云『歸假祖禰』,而無

等參議,以應告爲允,宜並用牲告南北二郊、太廟、太社,依舊公卿行事。」詔可。

宗伯 注 廟,送神又灌,議儀不同,於事有疑。輒下禮官詳正。」太學博士王祀之議:「案周禮,大宗伯 云:『王后不 禮 王保國,以吉禮事鬼神祇,禋祀昊天』。則今太常是也。以郊天,太常亞獻。又周禮外宗 南郊親奉,以太常亞獻。又廟祠行事之始,以酒灌地;送神則不灌。而郊初灌,同之於 }月 亞獻。」又議:「履時之思,情深於霜露,室戶之感,有懷於容聲。 執璋瓚 孝建二年正月庚寅,[K] 有司奏:「今月十五日南郊。 尋舊儀,廟祠至尊親奉,以太尉亞 令云:『三王有司馬,無太尉。太尉,秦官也。』蓋世代彌久,宗廟崇敬,攝后 與,則贊宗伯。』鄭玄云:『后不與祭,宗伯攝其事。』 又說云:『君執圭瓚祼尸,大 亞獻。』中代以來,后不廟祭,則應依 禮大宗伯攝亞獻也。 不知神之所在,求之不 而今以太尉亞獻。 事 重,故以

志

非謂 官志 宗伯 龙。 子。 爲 也。 天 葬 因 於茄釋,明在於留神,未得而殺。 以 失, 地 革 灌 た上 ‴; 則 詔可 大 周 郊祠 使掌典禮,以事 處。 無掌獻 云 事, 則宜 神 :『郊祀之事,太尉掌亞獻,光祿掌三獻。 漢儀 人先求 司 禮記 至尊不灌 鄭 亞獻,漢儀所行。 無灌。」通 案(周 事。 也。 日『祭求 諸陰』,『灌 禮 如儀 又賀循制太尉由 天官 <u>.</u> 神爲上, 關八座丞郎博士,並同膺之議。 志,漢亞獻之事,專由 而 『凡祭祀贊王祼將之事 ·諸陰陽之義 郊未 用 鬯。 愚謂郊祀禮 始有灌, 職總祭祀, 禮郊廟祭殊,故灌送有異。」太常丞朱膺之議:「案周禮 達於淵 東南道升壇,明此官必預郊祭。 也。 於禮未詳。 泉。 殷 重,宜 而昊天爲首。 人先求 上司,不由 旣灌,然後迎牲』。則周 同宗廟。 了。」鄭注 太常 淵儒注 諸陽 尚書令建平王宏重參議,謂膺之議爲 秩宗貴 每祭祀,先奏其禮儀及行事,掌贊天 今太常卽宗伯也。 云:『裸者,灌 。』『樂三 且太常旣掌贊天子,事 |義,炳然明 (官也。 闋然後迎牲 審。 古禮雖 也。 今宗廟 人先灌 闕送神之祼,將移祭 謂今之有灌 唯 又尋袁山松漢 由宗伯, 人道 太尉 也。 則殷 不容兼。 宗 此 亞 一獻,光 謂 廟 然 人後灌 有 廟 相承 世 灌, 有 叉

堂隆謂應更用 大明 年 後辛。 Ė 月丙 午朔, 晉時旣出遇雨,顧和亦云宜更告。[t]徐禪云:『晉武之世,或用丙,或 有司 奏:「今月六日 南 郊, 輿駕 親奉。 至 時 或 雨 魏世 値 雨,高

郊特性 譽配 圓 不一 爲 『曷用郊?用正月上辛。』哀元 注 郊, 用己, 得用辛 於二郊。 以斯明之, 二月下辛卜正月上辛。如不從,以正月下辛卜二月上辛。如不從,以二月下辛卜三月上辛。』 帝。』注 月丙 告 丘 則 一所謂 『三王之郊,一 之祭,以后稷 日。 先代成議。 或用庚。』使禮官議正幷詳。 也。 寅 日 周 日 禮 ...『受命于 . :『元日 、南郊受禪,斯則不得用辛也。 今日 三年十一 諦 則郊祭之禮,未有不用辛日者也。 今之郊饗,旣行夏時,雖得遷却,謂宜 有冬至 也。 雖 謂 有遷,而郊祀 配。 祈穀 禮傳所記,辛日有徵。 月庚寅冬至祠天,郊于圓 日圓 祖 上辛。 用夏正。 廟,作龜于 祀 取其所在,名之日郊。以形體言之,謂之圓丘。 丘之祭。 五精之帝,以 郊祭天也。』又養秋載郊有二,成十七年九月辛丑,郊。 不 年四月辛巳,郊。穀梁曰:『自正月至于三月,郊之時 用辛者,取其齋戒自新也。』又月令曰:『乃擇元日,祈穀于上 異,云 爾宮。』鄭玄注 月令孟春有祈穀于上帝 若得遷日,應更告廟與不。」博士王燮之議稱:「遇 后稷配 又泰始 愚謂不宜 郊特牲曰:『郊之用辛也,周之始郊日 丘 ,所謂 日:『 二年十一 晉氏或丙、或己、或庚,並有別 一个个 是猶 重告。」曹郎朱膺之議 受命, 郊 用辛 用 也。 月己卯,始幷圓丘方澤 圓 謂告退而 也。 丘之禮,非專 二祭異時, 鄭氏 徐禪 說,圓 卜也。」 所據,或爲未宜。 名雖有二,其實一祭。 其 「案先 丘 が穀 祀昊 神 則告義在郊, 不 議。 之祭, 儒 同。 天 以至 三至 Ŀ 論 也。 武 諸 公羊曰: 郊 故 帝以十 之祀合 儒云, 其 以十 鄭玄 叉案 叉 雨遷 非 議 不

次辛十二 官祠 燮之以受命作龜, 過,値 如徐 容遷郊。」 膚淺也。 議,或云三王各用其正郊天,此蓋曲學之辯,於禮 用夏正。 南 故因以首歲,不以冬日,皆用上辛,近代成典也。 晉武 计 郊,十 事。」 捨鄭 曹,考詳已備。 禪 雨遷日,於禮無違。 議 日、居然展齋、養牲在滌、無緣三月。 日北郊。』是爲北郊可不以辛也。」尚書何偃議:「鄭玄注禮記, 洞禮, 然用辛之說,莫不 詔 衆議不 也。 而 從諸儒, 可 江左以來,皆用正月,當以傳云三王之郊,各以其正,晉不改正朔,行夏之時, 凡國大事 同。 知告不在 何偃據禮, 是以郊用冬至日。既以至日,理無常辛。 參議:「宜依經,遇雨遷用後辛,不重告。 • 旣已告日,而以事 多用 ·必同。 日,學之密也。」右丞徐爱議以爲:「郊祀 不應重告, 正歲。 晉郊庚己,參差未見前徵。 左傳 愚情所同。 不從, 謂毛血告牷之後,雖有事 叉 八啓蟄 夫祭之禮,『過時不舉』。今在孟春,郊時未 無 **禋**祀 取。 而 郊。 尋告郊 重敬,謂宜更告。 固知穀梁三春皆可郊之月 則鄭之此說,誠有據矣。 剋辰, 若殺牲薦血之後值 然則晉代中原不用辛日郊, 愚謂宜從晉遷郊 用辛,公 於今宜改, 礙,便應有 引易說三王之郊 高堂隆云:『九 有 告事 司 礙 依 雨, 禮 遷 真 行 衆家 用 而 日 則 辛。 異 日

告雖備,弗獲親禮。 明 帝 泰 始二年十一月辛酉,[10]韶 今九服旣康,百祀咸秩,宜聿遵前典,郊謁上帝。」有司奏檢,未有先准 曰:「朕載新寶命,仍離 多難,戎車遄駕,經略 務 設,禋

伏惟泰始應符,神武英斷,王赫出討,戎戒淹時, 漢 祭。」尚書令建安王休仁等同爰議。 史官,考擇十一月嘉吉, 黄門侍郎徐爰議:「虞稱肆類,殷述昭告。 月,晉元禋以三月。 魏 以來,聿遵斯典。 有非常之慶,必有非常之典,不得拘以常祀,限以正月上辛。 高祖武皇帝克伐偽楚, 車駕親郊, 奉謁昊天上帝,高祖武皇帝配饗。 參議爲允。 蓋以創世成功,德盛業遠,開統肇基,必享上帝。 晉安帝尚在江陵,卽於京師告義功于郊兆。 韶 雖司奉弗虧,親謁尙闕。 可 其餘祔食,不關今 謹尋晉武郊以二 愚謂宜 下

年,第二郊與第三明堂,還復 革之宜,實 明堂同 前兼 享。 泰始六年正 曹郞虞愿 明堂配 日。 如 質文詳略, 疏數有分。 聖旨。 一帝,間 議:『郊祭宗祀,俱主天神, |月乙亥,ᠬ]]詔曰:「古禮王者每歲郊享,爰及明堂。 歲昭薦。 前虞愿議, 同歲。 詳辰酌衷,實允懋典。』綠諮參議 蓋是仰述而已, 自今可間二年一 愿謂自始郊明堂以後,宜各間二年。 而同 日殷薦,於義爲黷。 未顯後 郊,間 例。 歲 謹 一明堂。 並 尋自 同。 初郊間 明詔使圓 自晉以來,間年 曹郎 外可 以斯相推,長得異 王 詳議。」 三載, 延 丘報 秀 明 重議:『 功,三載 有 堂 司 間 郊, 奏 改

後廢帝元徽二年十月丁巳,有司奏郊祀明堂,還復同日,間年一 修。 歲。』通關

八座,同

延秀議。」

嶽 北 千 配 祖 風 八宿、文昌、北斗、三台、司命、軒轅、后土、太一、天一、太微、鈎陳、北極、雨師、雷、電、司空、 ず,自・ 伯、 五. 江 Щ 壇,地祇 兼 门白 左所立 配 百一十四神。 漢 此 老 天 文帝 2始也。 Щ 人六十二神也。 地 霍山 衆神,共在天郊 , 猶如漢西京關中小水, 皆有祭秩也。 ,則未以后配地也。 初祭地祇於渭陽,以高帝配,武帝立后土社祠於汾陰,亦以高 光武 、毉無閭山、蔣山、松江、會稽山、 中元年,建北郊,使司空馮魴告高廟,以薄后代呂后配 (建武中,不立北郊,故后地之祇,常配食天壇,山川羣望皆在營內,凡一 地郊則四十四神,五嶽、四望、四海、四瀆、五湖、五 也。 晉成 王莽作相,引周禮 帝立二郊,天郊則六十二神,五帝之佐、日 二郊所秩,官 錢唐江、先農凡四 享先妣 爲 配 北郊。 有其注 十四也。 夏至祭后土,以 地。 帝配。 帝之佐、沂山、 月 江 江南諸小山, 五星 左初,未立 漢氏 高后 以太太

唑 后宜配北郊。 協 天 天 郊 下 靈 人,自昔之所同。 以 祇 宋武 至於地 聖哲 ,有命自天,弘日 帝永初三年九月,司 嗣徽,道孚萬國。 派之配 蓋述懷以追孝,躋聖敬於無窮,對越兩儀,允洽幽顯者也。 計難禮 雖因革殊時,質文異世,所以本情篤敎,其揆 靜之勤,立蒸民之極, 無 (明文) 祭禮 · 空羨之、尚書令亮等奏曰:「臣聞崇德明祀,百王之令典;憲章 先代 **外廢**,思光 舊章 ·,每所因循,魏、晉故典,足爲 **鴻烈,饗帝** 帝遷明德, 嚴親,今實宜之。 光宅八表,太和 也。 伏惟高 明年孟春,有事於 這被, 然前式。 高祖 武 祖武皇 玄 皇帝 謂 化遐通。 武 宜配 一帝允 敬皇

禮典所重 晉武],中間以軍國多事,臨時有所妨廢,故每從奏可。 帝太康二年冬,有司奏:「三年正月立春祠, 時日尙寒, 自今方外事簡,唯此爲大,親奉 可有司行事。」詔曰:「郊祀

成帝祠南郊,遇雨。 侍中顧和啓「宜還。 更剋日。」詔可。 禋享,固常典也。」

漢明帝據月令有五郊迎氣服色之禮,因採元始中故事,兆五郊于洛陽,祭其帝與神,車

服各順方色。。魏、晉依之。江左以來,未遑修建。

職祭罔諐,氣令斯正,鴻名稱首,濟世飛聲。朕皇考太祖文皇帝功耀洞元,聖靈昭俗,內穆 百神薦祉。 之紀。匡飾墳序,引無題之外,旌延寶臣,盡盛德之範。 四門,仁濟羣品,外薄八荒,威憺殊俗,南腦勁越,西髓剛戎。 裁禮興稼穡之根,張樂協四氣 宋孝武大明五年四月庚子,詔曰:「昔文德在周,明堂崇祀,高烈惟漢,汝邑斯尊。所以 動協天度,下沿地德。 故精緯上靈,動殖下瑞,諸侯軌道,河濂海夷。 訓深劭農,政高刑厝。 萬物棣通, **朕仰**憑洪

志第

六

禮三

帝,太祖文皇帝配,未詳祭用幾牛。」太學博士司馬興之議:「案鄭玄注禮記大傳稱:『孝經郊 不容異。自郊徂宮,亦宜共日。禮記郊以特牲,詩稱明堂羊牛,吉蠲雖同,質文殊典。且郊 制無定文,經記參差,傳說乖舛。名儒通哲,各事所見,或以爲名異實同,或以爲名實皆異。 祀先靈,式配上帝,誠敬克展,幽顯咸秩。惟懷永遠, 咸慕崩心。」有司奏:「伏尋明堂辟雍, 烈,入子萬姓,皇天降祐,迄將一紀。思奉揚休德,永播無窮。 年正月,南郊還,世祖親奉明堂,祠祭五時之帝,以文皇帝配,是用鄭玄議也。官有其注。 量物商程,剋今秋繕立。」乃依傾議,但作大殿屋雕畫而已,無古三十六戶七十二牖之制。六 有燔柴、堂無禋燎、則鼎俎彝簋,一依廟禮。班行百司、搜材簡工、權置起部尚書、將作大匠, 數。依漢汶上圖儀,設五帝位,太祖文皇帝對饗。祭皇天上帝,雖爲差降,至於三載恭祀,理 國學之南,地實丙已,爽塏平暢,足以營建。其墻宇規範,宜擬則太廟,唯十有二間,以應朞 可爲殿,以崇嚴祀。其餘雜碎,一皆除之。參詳鄭玄之注,差有準據;裴頠之奏,竊謂可安。 裴頠,西都碩學,考詳前載,未能制定。以爲尊祖配天,其義明著,廟宇之制,理據未分,直 在國之陽,丙巳之地,三里之內。至於室宇堂个,戶牖達向,世代湮緬,難得該詳。晉侍中 自漢暨晉,莫之能辨。周書云,淸廟明堂路寢同制。鄭玄注禮,義生於斯。諸儒又云明堂 大明五年九月甲子,有司奏:「南郊祭用三牛。 廟四時祠六室用二牛。 明堂肇建,祠五 便可詳考姬典,經始明堂,宗

宗之稱,不足彰無窮之美,金石之音,未能播勳烈之盛。故明堂聿修,聖心所以昭玄極,汎 過郊祭廟祀。宜用二牛。」 配一,合用二牛。」祠部郎顏奐議:「祀之爲義,並五帝以爲言。 之實常一。五德之帝,迭有休王,各有所司,故有五室。 配宗廟,先儒所以得禮情。愚管所見,謂宜用六牛。」博士虞龢議:「祀帝之名雖五,而 祀后稷以配天,配靈威仰也。宗祀文王於明堂,以配上帝,配五帝也。』夫五帝司方,位 一,牲牢之用,理無差降。 太祖文皇帝躬成天地,則道兼覆載,左右羣生,則 宗祀所主,要隨其王而饗焉。主一 帝雖云五,牲牢之用,謂不應 化洽四 氣。 所生 殊功 祖、

告,不容有異。」守尚書令袁粲等並同延秀議 者,天之別名也。 並告太廟。 明帝泰始七年十月庚子,有司奏:「來年正月十八日,祠明堂。 未審今祀明堂,復告與不。」祠部郎王延秀議:「案鄭玄云:『郊者祭天之名,上帝 神無二主,故明堂異處,以避后稷。』謹尋郊宗二祀,旣名殊實同,至於應 尋舊南郊 與明堂 同日

革命受符,未有不蹈梁父,登泰山,刊無竟之名,紀天人之際者也。 七十二君,或從所繇於前,謹遺跡於後。 太史公曰:『主上有聖明而不宣布,有司之過也。』 魏明帝世,中護軍蔣濟奏曰:「夫帝王大禮,巡狩爲先;昭祖揚禰,封禪爲首。 故司 馬相 如謂 是以 有 文 以來 自古

志第

功有 禮, 准 掃 然則元功懿德,不刊山、梁之石,自己無以顯帝王之功,布生民不朽之觀也。 乎。 斯言,使吾汗出流足。 在不復淹,就當探其窟穴,無累於封禪之事也。此儀久廢,非倉卒所定。 千載之衰緒,口鬥繼百世之廢治。 唐、舜之美,譬猶人子對厥所生,譽他人之父。今<u>大魏振百王之弊亂,只是拯流遁之</u>艱危,接 非助我者也。 天報應,嘉瑞顯祥,以比往古,其優衍豐隆,無所取喩。 而 泗, 盡殘 實使高 卜年考時,昭告上帝,以副天下之望。臣待罪軍旅,不勝大願,冒死以聞。」詔曰:「聞 濟豈謂世 不洽,是以中間曠遠者,千有餘年,近數百載。 盗,蕩滌餘穢,未遑斯事。 周成當止岱嶽之禮也。 堂隆草封禪之儀。 無管仲,以吾有桓公登泰山之志乎。 公卿侍中、尚書、常侍省之而已。 自開闢以來, 封禪者七十餘君爾。 以天下未一,不欲便行大禮。 且昔歲破吳虜於江、漢,今茲屠蜀賊於隴右。 自武、文至于聖躬、所以參成天地之道、綱維人神之化,上 若爾,三苗堀强於江海,大舜當廢東巡之儀,徐夷跳梁於 勿復有所議,亦不須答詔也。」帝雖拒濟議, 其儀闕不可得記。』吾何德之修,敢庶茲 吾不敢欺天 至於歷世迄今,未發大禮。 會隆卒,故不行。 故太史公曰:『雖有受命之君,而 也。 濟之所言, 宜下公卿,廣纂其 語曰,當君而歎 其震蕩內潰, 華 則華矣, 雖志 在 濟

舒、日刊尚書劉寔、張華等奏曰:「聖德隆茂,光被四表,諸夏乂清,幽荒率從。 晉 帝平吳、混 一區宇。 太康元年九月庚寅,尚書令衞瓘、尚書左僕射 山濤、右僕射 神策廟算,席

茫茫、禹跡,今實過之,則天人之道已周,巍巍之功已著。宜有事梁父,修禮 禪梁父,發德號,明至尊,享天休,篤黎庶,勒千載之表,播流後之聲,俾百代之下,莫不興 魚爲美,咸曰休哉;然符瑞之應,備物之盛,未有若今之富者也。宜宣大典,禮中嶽,封泰山, 告,河圖、洛書之徵,不是過也。加以騶虞麟趾,衆瑞並臻。昔夏、殷以丕崇爲祥,周武以烏 雖黃軒之征,大禹遠略,周之奕世,何以尙今。若夫玄石素文,底號前載,象以姓表,言以事 黃帝以前,古傳昧略,唐、虞以來,典謨炳著。三王代興,體業繼襲,周道旣沒,秦氏承之,至 制。」瓘等又奏:「臣聞肇自生民,則有后辟,載祀之數,莫之能紀。立德濟世,揮揚仁風,以 盛德之事,所未議也。」瓘等又奏:「今東漸于海,西被流沙,大漠之陰,日南北戶,莫不通屬。 討,兵威暫加,數旬蕩定,覊其鯨鯢,赦其罪逆。 雲覆雨施,八方來同,聲敎所被,達于四極。 命踐阼,弘建大業,羣生仰流,唯獨江湖沅湘之表,凶桀負固,歷代不賓。 神謀獨斷,命將出 不失其緒。金德將升,世濟明聖,外平蜀漢,海內歸心,武功之盛,實由文德。至于陛下受 于漢、魏,而質文未復。大晉之德,始自重、黎,實佐顓頊,至于夏、商,世序天地,其在于周, 登封泰山者七十有四家,其諡號可知者,十有四焉。沈淪寂寞,曾無遺聲者,不可勝記。 卷吳越,孫晧稽顙,六合爲家,巍巍之功,格于天地。宜同古典,勒封東嶽,告三府太常爲儀 斯帝王之盛業,天人之至望也。」詔曰:「今逋寇雖殄,外則障塞有警,內則民黎未康,此 地祇、登封泰山、 自

蕩淸江 致誠 宜脩 弗應,推美不居,闕皇代之上儀,塞神祇之款望,使大晉之典謨,不同風於三、五。 之君,莫不仰答天心,俯協民志,登介丘,履梁父,未有辭焉者,蓋不可讓也。今陛下 是官也,不在其事。 雖盛德攸在,推而未居。夫三公職典天地,實掌民物,國之大事,取議於此。漢氏封禪,非 者,必有盛德之容,告成之典。無不可誣,有不可讓,自古道也。 可以勒 敢奉詔,請如前奏施行。」詔曰:「方當共弘治道,以康庶績。 息,斯股日夜之望。 百王,德無與二,茂績宏規,巍巍之業,固非臣等所能究論。 :此禮。[18]至於剋定歲月,須五府上議,然後奏聞。請寫詔及奏,如前下議。]詔曰:「雖 上帝,以答人神之願。乞如前奏。」詔曰:「今陰陽未和,政刑未當,百姓未得其所,豈 .表,皆臨事者之勞,何足以告成。 ·功告成邪!」瓘又奏:「臣聞處帝王之位者,必有曆運之期,天命之應,濟生民之大功 臣等前奏,蓋陳祖考之功,天命又應,陛下之德,合同四海,述古考今, 無所復下諸府矣。 勿復 方望羣后,思隆大化,以寧區夏,百姓獲乂,與之休 爲煩。」瓘等又奏:「臣聞唐、虞二代,濟世 且俟他年,無復紛紜 而聖旨勞謙,屢自抑損, 而明詔謙沖,屢辭其禮 也。 臣等誠不 時至 一弘功 勳

其高山」,皆載在方策。文王爲西伯,以服事殷,周公以魯蕃,列于諸侯,或享于岐山,[1+]或 君矣。舜、禹之有天下,巡狩四嶽,躬行其道。 易著『觀民省方』,禮有『升中于天』,詩頌『陟

太康元年冬,王公有司又奏:「自古聖明,光宅四海,封禪名山,著於史籍,作者七十四

以聞。 功岱嶽,登封告成,弘禮樂之制,正三雍之典,揚名萬世,以顯祖宗。是以不勝大願,敢昧死 幸以千載,得遭運會,親奉大化,目覩太平,至公之美,誰與爲讓。宜祖述先朝,憲章古昔,勒 吳、蜀鼎峙,兵興以來,近將百年。地險俗殊,民望絕塞,以爲分外,其日久矣。大業之隆,重 以 光四葉,不覊之寇,二世而平。非聰明神武,先天弗違,孰能巍巍其有成功若茲者歟!臣等 文皇帝受命造晉,蕩定蜀漢,陛下應期龍興,混壹六合,澤被羣生,威震無外。 有 至于今。 事泰山。 宋 請告太常具禮儀。」上復詔曰:「所議誠前烈之盛事也。方今未可以爾。 太祖在位長久,有意封禪。 况高祖宣皇帝肇開王業,海外有截,江北宗景皇帝濟以大功,輯寧區夏,太祖 徒以聖德,猶得爲其事。自是以來,功薄而僭其儀者,自己不可勝言,號諡不泯, 遣使履行泰山舊道,詔學士山謙之草封禪儀注。 昔漢氏失統, 便報絕之。」 其後索

虜南 寇,六州荒毁,其意乃息。

世綿 管,自 之主,莫不 絕,難 世 ,雖聿修前 無 祖 懷 大明元年十一月戊申,太宰江夏王義恭表曰「惟皇天崇稱大道,始行揖讓。 由斯 以 得 來 而 道也。 聞。丘、索著明者,尚有遺炳。故易 ,可傳而 緒,而跡淪言廢,蔑記於竹素者,焉可單書。 是以風化大洽,光熙于後。 不朽者,七十有四君。 罔仁厚而道滅,鮮義 稱先天 炎漢二帝,亦踵曩則, 弗違,後天奉 紹乾維,建徽 澆 時。 而 德宣,鍾律之先,曠 因百 號,流 蓋 陶 姓之心,聽輿 唐 風聲,被絲 姚 姒 迄于 商 姬

志

第

誠,遵先王之則,備萬乘,整法駕,修封泰山,瘞玉岱趾,延喬、松於東序,詔韓、岐於西廂,麾 憬塗之謁,抗驛絕祖之奏,彪炳雜沓,粤不可勝言。太平之應,茲焉富矣。宜其從天人之 籞,皆耀質離宮,植根蘭囿。 至夫霜毫玄文,素翮頳羽,泉河山嶽之瑞,草木金石之祥,方畿 豈與彼承業繼緒,拓復禹跡,車一其軌,書罔異文者,同年而議哉!今龍麟已至,鳳皇已儀, 沙外。太祖文皇帝體聖履仁,述業興禮,正樂頌,作象曆,明達通於神祇,玄澤被乎上下。 聞惟皇配極,惟帝祀天,故能上稽乾式,照臨黔首,協和穹昊,膺茲多福。高祖武皇帝明並 幽慶,聖后之冥休。 符,金玉顯瑞,異采騰於軫墟,紫煙藹於邦甸,錫冕兆九五之徵,文豹赴天曆之會。誠二祖之 宗伯,具茲典度。」詔曰:「太宰表如此。 昔之盛王,永保鴻名,常爲稱首,由斯道矣。 朕遭家 天闇,使啓關,謁紫宮,朝太一,奏鈞天,詠雲門,贊揚幽奧,超聲前古,豈不盛哉!伏願時命 比李已實、靈茅已茂、雕氣降雰於宮榭、珍露呈味於禁林、嘉禾積穗於殿甍、連理合幹於園 人鬼之表,慶煙應高牙之建,風耀符發迹之辰,親翦凶逆,躬清昏壒,天地革始,夫婦更造, 仁孝命世,如劉叡武英挺,遭運屯否,三才湮滅,迺龍飛五洲,鳳翔九江,身先八百之期,斷出 日月,光振八區,拯已溺之晉,濟橫流之世,撥亂寧民,應天受命,鴻徽洽于海表,威稜震乎 人之頌,龍駕帝服,鏤玉梁甫,昌言明稱,告成上靈。況大宋表祥唐虞,受終素德,山龍啓 道冠軒、堯,惠深亭毒,而猶執沖約,未言封禪之事,四海竊以恧焉。 臣

仰述 多難 先志, 入纂絕業,德薄勳淺,鑒寐崩愧。 拓清中字,禮祇謁神,朕將試哉。」 頃麟鳳表禎,茅禾兼瑞,雖符祥顯見,恧乎猶深,庶

四年四月辛亥,有司奏曰:

深默修文,淵幽馭世而已。諒以縢非虚奏,書匪妄埋,擊雨恕神,淳廕復樹,安得紫 明之業難崇,功基之迹易泯。自茲以降,訖于季末,莫不欲英弘徽位,詳固洪聲。 浸紛流,華液幽潤,規存永馭,思詳樹遠。 肅 綵,奏玉潤,鏤迹以燻今,鐫德以麗遠。 聽。 道。 祗,竹宮載竚,散火投郊,流星 爱洎 玄勳 臣 .聞崇號建極,必觀俗以樹敎;正位 · 姬、漢,風流尙存,遺芬餘榮,綿映紀緯。 上烈,融章未分,鳴光委緒,歇而罔藏。 一奔座。 寶緯初基,厭靈命曆,德振 而四望埋禋歌之禮,日觀 .居體,必採世以立言。 是以重代列聖,咸由 若其顯諡騰軌, 雖年絕世祀, 弛修封之容, 豈非 代革精華,可 則系綴聲采,徵 弛維,功 濟淪象,玄 得騰 豊 略聞 壇 神 金

篆素。 中 聖 區 Ŀ l,歇神還靈,頹天重耀,儲正凝位於兼明,袞嶽蕃華 太祖 韞籙蕃 重以 文皇帝以啓遘泰運,景望震凝,采樂調 班朝待典,飾令詳儀,纂綜淪蕪,搜騰委逸, 河,竚翔衡漢,金波掩照,華耀停明,運動 風,集禮宣度,祖宗相 時來,躍 奏玉郊宫, 於元列。 飛 風 學,澄 故 禋 以 注 注 玄 祥 识映, 軌 気海 映 一時, 昌 岱 基, 迹 景集天 重 繋發 開景 暉

志

第

六

禮三

校書之列,仰筆以飾辭,濟、代之蕃,獻邑以待禮。豈非神勰氣昌,物瑞雲照,蒲軒龜 榮露騰軒,蕭雲掩閣,鎬願孳萌,移華淵禁,山輿竚衡,雲鶇竦翼,海鰈泳流,江茅吐蔭。 源,故以波沸外關,雲蒸內澤。若其雪趾靑毳,玄文朱綵,日月郊甸,擇木弄音。重以 淵,雲皇王嶽,摛藻□漢,幷角卽音,栖翔禁籞,袞甲霜昳,翾舞川肆,榮泉流鏡,後昭河 廟,脉壤祥農,節至昕陽,川丘夙禮,綱威巡馳,表綏中甸,史流其詠,民挹其風。 羽族卉儀,懷音革狀,邊帛絕書,權光弛燭。天岱發靈,宗阿開寶,崇丘淪鼎,振采泗 涵迹視陰,振聲威響,歷代之渠,沈□望內,安侯之長,賢王入侍,殊生詭氣,奉俗還鄉, 軫,□泉淳芳。 於是

途清禁。於是績環珮,端玉藻,鳴鳳竚律,騰駕流文,間綵比象之容,昭明紀數之服。 徽焯天陣,容藻神行,翠蓋懷陰,羽華列照。乃詔聯事掌祭,賓客贊儀,金支宿縣,鏞石 色聲業,諏辰稽古,肅齊警列,儒僚展采,禮官相儀,懸蕤動音,洪鍾竦節,陽路整衞,正 之鄉,奠絕金之楛,肅靈重表,珍符兼貺。伏惟陛下謨詳淵載,衍屬休章,依徵聖靈,潤 **缺觀,幽瑞乖期,梁甫無盛德之容,介丘靡升聞之響。加窮泉之野,獻八代之駟,交木** 耀炎、昊,升文中岱,登牒天關,耀冠榮名,摛振聲號。而道謙稱首,禮以虛挹,將使玄祇 太宰江夏王臣義恭咀道遵英,抽奇麗古,該潤圖史,施詳閟載,表以功懋往初,德

潤響。 傳稱響。 成宮、臺冠丹光、壇浮素靄。 命五神以相列,闢九關以集靈,警衞兵而開雲,先雨祇以灑路。 然後辨年問老,陳詩觀俗,歸薦告神,奉遺淸廟。 爾乃臨中壇,備盛禮,天降祥錫,壽固皇根,谷動神音,山 光美之盛,彰乎萬古,淵祥 霞凝生闕,煙起

之烈,溢乎無窮。豈不盛歟

į

乾封。 文,辯明訓誥□□ 臣等生接昌辰,肅懋明世,束敎管聞,未足言道。且章志湮微,代往淪絕,拘採遺 懼弗軌屬上徽,煇當王則。]簉訪鄒、魯,草縢書堙玉之禮,具竦石繩金之儀,和芝潤瑛,鐫璽 謹奉儀注以聞。

韶曰:「天生神物,昔王稱愧,況在寡德,敢當鴻貺。今文軌未一,可停此奏。」

文帝之高祖處士、曾祖高皇、祖太皇帝共 明帝太和三年六月,又追尊高祖大長秋日高皇,夫人吳氏日高皇后,並在鄴廟廟所祠。 太王,丁夫人曰太王后。黄初元年十一月受禪,又追尊太王曰太皇帝,皇考武王曰武皇帝。 以 諸 殺廟 一侯禮立五廟也。後雖進爵爲王,無所改易。 漢獻帝建安十八年五月,以河北十郡封魏武帝爲魏公。是年七月,始建宗廟于鄴,自 四室也。 至明帝太和三年十一月、三沿客廟成,則以親盡遷處士主,置園邑,使 二廟。 考太祖武皇帝特一廟百世不毀,然 延康元年,文帝繼王位,七月,追奪皇祖爲 則所祠 則

志第

祧,其右擬明帝號曰烈祖,穆祧。三祖之廟,萬世不毀,其餘四廟,親盡迭遷,一如周后稷、 而已。 文、武廟祧之禮。孫盛魏氏春秋曰:「夫諡以表行,廟以存容,皆於旣歿然後著焉。 命,清定華夏,興制禮樂,宜爲魏烈祖。」更於太祖廟北爲二祧,其左爲文帝廟,號曰高祖,昭 皇帝肇建洪基,撥亂夷險,爲魏太祖。 人以豫凶違禮,魏之羣司,於是乎失正矣。」 **令丞奉薦。** 始要終,以示百世者也。 至景初元年六月,羣公有司始更奏定七廟之制,曰:「大魏三聖相承,以成帝業。 而使行太傅太常韓暨、行太廟宗正曹恪持節迎高皇以下神主共一廟,猶爲四室 未有當年而逆制祖宗,未終而豫自尊顯。 文皇帝繼天革命,應期受禪,爲魏高祖。 昔華樂以厚歛致譏,周 上集成大 所以原 武

德,昭孝敬也。稽之古制,宜依周禮,先妣別立寢廟。」奏可。以太和元年二月,立廟于鄴。 策告祠于陵。三公又奏曰:「自古周人始祖后稷,曰三又特立廟以祀姜嫄。今文昭皇后之於 以太牢告廟。至景初元年十二月己未,有司又奏文昭皇后立廟京師,曰己永傳享祀。 後嗣,聖德至化,豈有量哉。夫以皇家世妃之尊,神靈遷化,而無寢廟以承享祀,非以報顯 與祖廟同。 四月,洛邑初營宗廟,掘地得玉璽方一寸九分,其文曰:「天子羨思慈親。」 文帝甄后賜死,故不列廟。 廢鄴廟。 明帝卽位,有司奏請追諡曰文昭皇后,使司空王朗持節奉 明帝爲之改容。

魏文帝黃初二年六月,以洛京宗廟未成,乃祠武帝於建始殿,親執饋奠如家人禮。 何

承天曰:「案禮,將營宮室,宗廟爲先。 庶人無廟,故祭於寢。 帝者行之,非禮甚矣。」

省約。 及魏武帝葬高陵,有司依漢,立陵上祭殿。至文帝黃初三年,乃詔曰:「先帝躬履節儉,遺詔 後至今,陵寢遂絕。 厩,衣服藏府,以從先帝儉德之志。」及文帝自作終制,又曰:「壽陵無立寢殿,造園邑。」自 冠象生之具以薦新。 所爲也。 漢獻帝延康元年七月,魏文帝幸譙,親祠譙陵,此漢禮也。 子以述父爲孝,臣以繫事爲忠。古不墓祭,皆設於廟。高陵上殿屋皆毀壞,車馬還 說者以爲古前廟後寢,以象人君前有朝後有寢也。 秦始出寢起於墓側,漢因弗改。陵上稱寢殿,象生之具,古寢之意也。 廟以藏主,四時祭祀,寢有衣 漢氏諸陵皆有園寢者,承秦

材爲屋 初立, 權卒,子亮代立。明年正月,於宮東立權廟 後漢奉南頓故事,使太守祠也。 於鳥程 孫 追尊父和曰文皇帝。 權不立七廟,以父堅嘗爲長沙太守,長沙臨湘縣立堅廟而已。 ,未之前聞也。於建鄴立兄長沙桓王策廟於朱爵橋南。 立 陵 一寢,使縣令丞四時奉祠。 **皓先封烏程侯**,即改 堅廟 又見尊曰始祖 寶鼎元年,遂於烏程分置吳興郡,使太守執事。 日太祖 葬和 廟,旣不在宮南,又無昭穆之序。 廟,而不在京師。 於鳥程 西山,號 權疾,太子所 叉以 日 權旣不親祠,直是依 明陵,置園 民 **"禱,即** 人所發吳芮家 策廟也。 及孫晧 邑二百

志

六

奉問 官僚中軍步騎,以靈輿法駕迎神主於明陵,親引仁拜送於庭。比仁還,中吏手詔日夜相 有司尋又言宜立廟京邑。 比七日,三祭,倡伎晝夜娛樂。 神靈起居動止。 劉備章武元年四月,建尊號於成都。 巫覡言見和被服顏色如平日,晧悲喜,悉召公卿尚書詣閤下受賜。 寶鼎二年,遂更營建,號曰淸廟。 有司奏:「『祭不欲數,數則黷』,宜以禮斷情。」然後 是月,立宗廟,祫祭高祖已下。 遣守丞相孟仁、太常姚信等備 備紹世 而起,亦未 止 靈

皇帝,伯考景王爲景皇帝,考文王爲文皇帝,宣王妃張氏爲宣穆皇后,景王夫人羊氏爲景皇 是年八月,文帝崩,諡曰文王。武帝泰始元年十二月丙寅,受禪。丁卯,追尊皇祖宣王爲宣 辨繼何帝爲繭,亦無祖宗之號。 於是追祭征西將軍、豫章府君、潁川府君、京兆府君,與宣皇帝、景皇帝、文皇帝爲三昭三 虞。舍七廟之繁華,遵一宮之尊遠。 昔舜承堯禪,受終文祖,遂陟帝位,蓋三十載,月正元 日,〔三〕又格于文祖。 「上古淸廟一宮,尊遠神祇,逮至周室,制爲七廟,以辨宗祧。 二年正月,有司奏天子七廟,宜如禮營建。帝重其役,詔宜權立一廟。於是羣臣奏議... 魏元帝咸熙元年,增封晉文帝進爵爲王,追命舞陽宣文侯爲晉宣王,忠武侯爲晉景王。 此則虞氏不改唐廟,因仍舊宮。 劉禪面縛、北地王諶哭於昭烈之廟,此則備廟 可依有虞氏故事, 聖旨深弘,遠跡上世,敦崇唐、 即用魏廟。」奏可 別立 也。

曰:「主者前奏就魏舊廟,誠亦有準。 是時宣皇未升,太祖虛位,所以祠六世與景帝爲七廟,其禮則據王肅說也。七月,又詔 然於祗奉神明,情猶未安。宜更營造,崇正永制。」於

是改創宗廟。十一月,追尊景帝夫人夏侯氏爲景懷皇后。

興三年 是時 別立 崩 實 故 殤太子又稍廟,CIKD號爲陰室四殤。 懷帝初,又策諡 征 更改築於宣陽門內,窮壯極麗。 然坎位之制,猶如初爾。 廟成,帝率百官遷神主于新廟,自 廟,自近代以來,皆一廟七室,於禮無廢,於情爲敍,亦隨時之宜也。其便仍舊。」至十年,乃 、又遷豫章。 一西以下,車服導從,皆如帝者之儀。

擊虞之議也。

至世祖武皇帝崩,則遷征西,及惠帝 Ŧī. 、而惠 世 西京神主堙滅虜庭,江左建廟,皆更新造。 弘訓宮,不列於廟。 八年,行司因廟陷當改治。羣臣又議奏曰:「古者七廟異所,自宜如禮。」詔又曰:「古雖七 太康元年,靈壽公主修麗祔于太廟,周、漢未有其準。 ,蓋從刁協,以兄弟爲世數故也。于時百度草創,舊禮未備,三祖 將登愍帝之主,於是乃定更制,還復豫章、潁川二主于昭穆之位,以同 |懐 、愍三帝自從春秋尊尊之義,在廟不替也。 而惠帝世,愍懷太子、太子二子哀太孫臧、沖太孫尚並祔廟。元帝世,懷 元帝旣卽尊位,上繼武帝,於禮爲禰,如漢 尋以登懷帝之主,又遷潁川。 武帝楊后日武悼皇后,改葬峻陽陵側。 魏明帝則別立廟,晉又異魏也。 至元帝崩, 光武上繼元帝故事也。 則豫章復遷。 毁主,權居別室。太 位 惠帝 雖 七室,其 嗣武 然元帝 帝

志

第

十八間。棟高八丈四尺,堂基長三十九丈一尺,廣十丈一尺。堂集方石,庭以塼。 登降。咸安之初,簡文皇帝上繼元皇帝,世秩登進。於是潁川、京兆二主,復還昭穆之位。 儲,同謂之祧,如前三祖遷主之禮。故正室猶十一也。 饗世祖。 兇,以安宗廟。臣等雖隕首摧軀,猶生之年。」咸康七年五月,始作武悼皇后神主,祔于廟,配 立行廟於白石,告先帝先后曰:「逆臣蘇峻,傾覆社稷,毀棄三正,汙辱海內。臣亮等手刃戎 廟,故三遷主並還西儲,名之曰祧,以準遠廟。 后之廟。 如穆帝之世四祧故事。 是與太康異也。 駕,遷神主于行廟。 首,龔行天罰。 神位,猶在愍帝之下,故有坎室者十也。至明帝崩,而潁川又遷,猶十室也。 至簡文崩,潁川又遷。孝武皇帝太元十六年,改作太廟,殿正室十六間,東西儲各一間,合 二月,追尊簡文母會稽太妃鄭氏爲簡文皇帝宣太后,立廟太廟道西。及孝武崩,京兆又遷, 成帝崩而康帝承統,以兄弟一世,故不遷京兆,始十一室也。康帝崩,京兆遷入西 惟中宗元皇帝、肅祖明皇帝、明穆皇后之靈,降鑒有罪,剿絕其命,翦此羣 諸主旣入廟,設脯醢之奠。及新廟成,帝主還室,又設脯醢之奠。十九年 征西至京兆四主,及太子太孫,各用其位之儀服。四主不從帝者之儀, 安帝隆安四年,以孝武母簡文李太后、帝母宣德陳太后祔于宣鄭太 成帝咸和三年,蘇峻覆亂京都,溫嶠等入伐, 穆帝崩而哀帝、海西並爲兄弟,無所 于時續廣太 算備法

奉送神主還。丙子,「三丁百官拜迎于石頭。戊寅,入廟。安帝崩,未及稀,而天祿終焉 元 | 興三年三月,宗廟神主在||尋陽,已立新主于太廟,權告義事。四月,輔國將軍何無忌

妣 好為章皇太后,立廟西晉宣太后地。 孝武昭太后、明帝宣太后並祔章太后廟。 **晉之制,虛太祖之位也。廟殿亦不改構,又如晉初之因魏也。** 乃增祠七世右北平府君、六世相國掾府君爲七廟。永初初,追尊皇考處士爲孝穆皇帝,皇 祖 趙氏爲穆皇后。三年,孝懿蕭皇后崩,又祔廟。高祖崩,神主升廟,猶從昭穆之序,如魏 一武原府君、皇祖東安府君、皇考處士府君、武敬臧后,從諸侯五廟之禮也。旣 宋武帝初受晉命爲宋王,建宗廟於彭城,依魏、晉故事,立一廟。初祠高祖開封府君、 文帝元嘉初,追尊所生胡婕 即尊位,

禮 殷 常賀循 皇帝,宜準漢世祖故事,不親執觴爵。」又曰:「今上承繼武帝,而廟之昭穆,四 世有二 驃騎 ,不親執觴酌,而令有司行事,於情禮不安。 晉元帝太興三年正月乙卯,詔曰:「吾雖上繼世祖,然於懷、愍皇帝,皆北面稱臣。 今祠 博 祖 長 土傳純 文史溫 三宗,若拘七室,則當祭禰 嶠議"「凡言兄弟不相入廟,旣非禮文。 以爲惠、懷及愍宜別立廟。 而已。 推 然臣 此論之, 可依 一愚謂 :禮更處。」太常華恒議:「今聖上繼 廟室當以容主爲限、云三無拘常數。 且光武奮劍振起,不策名於孝平, 宜還復豫章、潁川,全 世 一而已。 祠 七廟之 前太 武

志

第

六

不以後尊,降廢前敬。昔魯僖上嗣莊公,以友于長幼而升之,爲逆。準之古義,明詔是也。」 及庶人。」於是帝從嶠議,悉施用之。孫盛晉春秋曰:「陽秋傳云,『臣子一例也』。雖繼君位, 從嶠議。 奉烝嘗,於經旣正,於情又安矣。太常恒欲還二府君以全七世,嶠謂是宜。」驃騎將軍王導 務神其事,日已以應九世之讖,又古不共廟,故別立焉。今上以策名而言,殊於光武之事,躬 騰又曰:「其非子者,可直言皇帝敢告某皇帝。又若以一帝爲一世,則不祭禰,反不

表議:「禮」『無廟者,爲壇以祭』。可別立室藏之,至殷稀,則祭于壇也。」輔國將軍譙王司馬 祭之日,征西東面,處宣皇之上。其後遷廟之主,藏於征西之祧,祭薦不絕。」護軍將軍馮懷 議:「四府君宜改築別室,若未展者,當入就太廟之室。 人莫敢卑其祖,文、武不先不宜。 殷 爲祧,疑亦非禮。今京光遷入,是爲四世遠祖,長在太祖之上。昔周室太祖世遠,故遷有所 君毀主,中興之初,權居天府,在廟門之西。咸康中,太常馮懷表續奉還於西儲夾室,謂之 始九五,而道以從暢,替人爵之尊,[10]篤天倫之道,所以成敎本而光百代也。」尚書郞徐禪 無忌等議:「諸儒謂太王王季遷主藏於文、武之祧,如此,府君遷主,宜在宣皇帝廟中。然今 歸。今晉廟宣皇爲主,而四祖居之,是屈祖就孫也。殷祫在上,是代太祖也。」領司徒蔡謨 無寢室,宜變通而改築。又殷祫太廟,征西東面。」尚書郎孫綽與無忌議同。曰:「太祖 穆帝永和二年七月,有司奏:「十月殷祭,京兆府君當遷祧室。昔征西、豫章、潁川三府 其後毁之主。「三」憑案古義無別前後之文也。馬不先鯀,則遷主居太祖之上,亦可無疑矣。」 盡則無緣下就子孫之列。」其後太常劉遐等同蔡謨議。 所,若依夏主之埋,則又非本廟之階。 不居舜上,不序昭穆。今四君號猶依本,非以功德致禮也。 祭,如先朝舊儀。」時陳留范宣兄子問此禮。宣答曰:「舜廟所祭,皆是庶人。其後世遠而毀, 墠。」又遺禪至會稽訪處士虞喜。 而無祭。」於是撫軍將軍會稽王司馬昱、尚書劉劭等奏:「四祖同居西祧,藏主石室, 議:「禮, 『去 祧 爲壇, 去壇爲墠,歲於則祭之』。 今四祖遷主, 可藏之石室。 兩階之間。 且神主本在太廟,若今別室而祭,則不如永藏。 喜答曰:「漢世韋玄成等以毀主瘞於園。 宜思其變,別築一室,親未盡則禘祫,處宣帝之上,親 博士張憑議。「或疑陳於太祖者,皆 又四君無追號之禮,益明 若依虞主之瘞,則猶藏子孫之 魏朝議者云 有禱則祭於壇 稀給乃 應毁 應埋

藏而 必咸盡。 **| 帝移十一帝主於洛邑,則毁主不設,理可推矣。宜從范宣之言,築別室以居四府君之主,永** 初,虚太祖之位,而緣情流遠,上及征西,故世盡則宜毀,而宣皇帝正太祖之位。 又漢光武 祠 猶 及四府君,情理爲允。」祠部郎臧燾議:「四府君之主,享祀禮廢,則亦神所不依。宜同虞 不祀也。」大司農徐廣議:「四府君嘗處廟室之首,歆率土之祭。若埋之幽壤,於情理未 安帝義熙九年四月,將殷祭。詔博議遷毀之禮。大司馬琅邪王司馬德文議:「泰始之 謂可遷藏西儲,以爲遠祧,而禘饗永絕也。」太尉諮議參軍袁豹議「仍舊無革。殷

志第

禮三

主之瘞埋矣。」時高祖輔晉,與大司馬議同。 須後殷祀行事改制。

祖,自非惟新之考,孰配上帝。」邈又曰:「明堂所配之神,積疑莫辨。按易,『殷薦上帝,以配 升者自下之名,不謂可降尊就卑也。太子太孫陰室四主,儲嗣之重,升祔皇祖所託之 授位,則親近必復。京兆府君於今六世,宜復立此室,則宣皇未在六世之上,須前世旣遷, 郊,誠非異學所可輕改也。謂仍舊爲安。武皇帝建廟,六世三昭三穆,宣皇帝創基之主,實 用四圭,故並言之。若上帝者是五帝,同己經文何不言祀天旅五帝,祀地旅四望乎。人帝之 祖考』。祖考同配,則上帝亦爲天,而嚴父之義顯。周禮,旅上帝者有故,告天與郊祀常禮同 廟、「三」世遠應遷,然後從食之孫,與之俱毀。明堂圓方之制,綱領已舉,不宜闕配帝之祀。 惟太祖,親則王考,四廟在上,未及遷世,故權虛東向之位也。兄弟相及,義非二世,故當今 乃太祖位定爾。 廟祀,世數未足,而欲太祖正位,則違事七之義矣。又禮曰『庶子王亦禘祖立廟』。蓋謂支胤 且王者以天下爲家,未必一邦,故周平、光武無廢於二京也。周公宗祀文王,漢明配以世 圓 又太祖虛位,明堂未建。 「丘郊祀,經典無二,宣皇帝嘗辨斯義。 晉孝武帝太元十二年五月壬戌,詔曰:「昔建太廟,每事從儉約,思與率土,致力備禮。 京兆遷毁,宜藏主於石室。雖禘給猶弗及。何者,傳稱毀主升合乎太祖, 郊祀,國之大事,而稽古之制闕然。便可詳議。」祠部郎徐邈議: 而檢以聖典,爰及中興,備加研極,以定南北二

故泰始、 矣。」東部郎王忱議:「明堂則天象地,儀觀之大,宜俟皇居反舊,然後修之。」驃騎將軍會稽 樂主於和,禮主於敬,故質文不同,音器亦殊。 太常孔汪議:「圖」「泰始開元,所以上祭四府君,誠以世數尚近,可得饗祠,非若殷、周先世, 知弘本順民乎。 與天帝,雖天人之通謂,然五方不可言上帝,諸侯不可言大君也。書無全證,而義容彼此, 王司馬道子、尚書令謝石意同忱議。 王迹所因也。向使京兆爾時在七世之外,自當不祭此四王。推此知旣毀之後,則殷禘 、太康二紀之間,興廢迭用矣。」侍中車胤議同。〔圖〕又曰:「明堂之制,旣其難詳。 九服咸寧,河朔無塵,然後明堂辟雍,可崇而修之。」中書令王珉意與胤同。 於是奉行一無所改。 旣茅茨廣廈,不一其度,何必守其形範,而不 所絕 且

則殷,無取於限三十月也。當是內臺常以限月成舊。』就如所言,有喪可殷。隆安之初,果 時烝嘗,以寄追遠之思,三年一諦,以習昭穆之序,義本各異。三年喪畢,則合食太祖,遇時 後,得以烝嘗,而無殷薦之比。太元二十一年十月應殷,烈宗以其年九月崩。至隆安三年, 年相承皆用冬夏,乾等旣伏應孟冬,回復追明孟秋非失。御史中丞范泰議:『今雖旣祔之 國家大吉,乃修殷事。又禮有喪則廢吉祭,祭新主於寢。今不設別寢,旣祔,祭於廟。故四國家大吉,乃修殷事。又禮有喪則廢吉祭,祭新主於寢。今不設別寢,旣祔,祭於廟。故四 月,皇輿旋軫。 晉安帝義熙二年六月,白衣領尚書左僕射孔安國啓云:「元興三年夏,應殷祠。昔年三 其年四月, 便應殷, 而太常博士徐乾等議云: 『應用孟秋。』臺尋校自太和四

六

記,是依禮,五年再殷。而泰所言,非眞難臣,乃以聖朝所用,遲速失中。 得親殷也。太常劉瑾云:『章后喪未一周,不應祭。』臣尋升平五年五月,穆皇帝崩,其年七 以喪而廢矣。月數少多,復遲速失中。至於應寢而修,意所未譬。」安國又啓:「范泰云:『今 限、「計〕則義熙三年冬又當殷,若更起端,則應用來年四月。領司徒王謐、丹陽尹孟昶議: 詔皆白衣領職。於是博士徐乾皆줲官。初元興 三 年 四 月,不 得 殷祠進用 十 月,若 計常 審是非,若臣所啓不允,如以即當責失奏彈,而諐墮稽停,遂非忘舊。請免緣、瑾官。」丁巳, 以隆安四年七月崩,陛下追述先旨,躬服重制,五年十月,殷。再周之內,不以廢事。今以 七月,葬,十月,殷。此在哀皇再周之內,庾夫人旣葬之後,二殷策文見在廟。又文皇太后 月,山陵,十月,殷。興寧三年二月,哀皇帝崩,太和元年五月,海西夫人庾氏薨,時爲皇后, 旣祔,遂祭於廟,故四時烝嘗。』如泰此言,殷與烝嘗,其本不同。旣祔之後,可親烝嘗而不 學博士徐乾議:「三年一祫,五年一禘,經傳記籍,不見補殷之文。」員外散騎侍郎領著作郎 無定日,考時致敬,且禮意尙簡。去年十月祠,雖於日有差,而情典允備,宜仍以爲正。」太 雖曰旋幸,理同受命。愚謂理運惟新,於是乎始。宜用四月。」中領軍謝混、太常劉瑾議:「殷 「有非常之慶,必有非常之禮。殷祭舊准不差,蓋施於經常爾。至於義熙之慶,經古莫二, 小君之哀,而泰更謂不得行大禮。臣尋永和十年至今五十餘載,用三十月輒殷,皆見於注 泰爲憲司,自應明

常三十月,則應用二年四月也。是追計辛未歲十月,未合六十月而再殷。〔長〕何邵甫注公羊 四月應殷,而禮官墮失,建用十月。本非正期,不應卽以失爲始也。宜以反初四月爲始。 之異,然追計之理同矣。愚謂從復常次者,以推歸正之道也。」左丞劉潤之等議:「太元元年 流,領會之節,遠因宗本也。昔年有故推遷,非其常度。寧康、太元前事可依。雖年有曠近 傳云,給從先君來,積數爲限。『自僖八年至文二年,知爲祫祭』。如此,履端居始,承源成 徐廣議。「尋先事,海西公太和六年十月,殷祠。」孝武皇帝寧康二年十月,殷祠。若依常去 前三十月,則應用四月也。于時蓋當有故,而遷在冬,但未詳其事。太元元年十月殷祠,依

獪服 日。 唯天地社稷,越紼行事』。且不禪卽祭,見譏蹇秋。 求之古禮,喪服未終,固無祼享之義。 漢 內。」下禮官議正。國子助教蘇瑋生議:「案禮,三年喪畢,然後給於太祖。又云『三年不祭, 參議,「計立依永初三年例,須再周之外殷祭。尋祭再周來二年三月,若以四月殷,則猶 (文以來,一從權制,宗廟朝聘, 莫不皆吉。 殷祠 稿素,未爲純吉,無容以祭。 宋孝武帝孝建元年十二月戊子,有司奏:「依舊今元年十月是殷祠之月。領曹郎范泰 禮旣弗殊,豈獨以心憂爲礙。」太學博士徐宏議:「三年之喪,雖從權制,再 謂來四月,未宜便殷,十月則允。」太常丞臣朱膺之議:「虞 雖祥禪空存,無綅編之變, **烝嘗薦祀,不異平** 周祥變, 在禪 自

當用三年十月。」尚書奏從王謐議,以元年十月爲始也。

₹禮 云 服,因言喪之紀制爾。 玄云:『禘以孟夏,祫以孟秋。』今相承用十月。如宏所上公羊之文,如爲有疑,亦以魯閔設 案王肅等言於魏朝云,今權宜存古禮,俟畢三年。舊說三年喪畢,遇禘則禘,遇祫則祫。鄭 則是皇宋開代成準。謂博士徐宏、太常丞朱膺之議用來年十月殷祠爲允。」詔 周景遠參議:「永初三年九月十日奏傅亮議:『權制卽吉,御世宜爾。宗廟大禮,宜依古典。』 配,哀未忘也。 心懼於難,務自尊成以厭其禍,凡二十二月而除喪,又不禫。』云又不禫,明禪內不得禘也。 一『中月 m 禪,是月也吉祭,猶未配。』謂二十七月旣禪祭,當四時之祭日,則未以其妃 推此 而言,未禪不得祭也。又春秋閔公二年,吉禘于莊公。鄭玄云『閔公 何必全許素冠可吉禘。縱公羊異說,官以禮爲正,亦求量宜。」郎中 可。

六年七月殷 國 時皆殷,不唯用冬夏也。晉義熙初,僕射孔安國啓議,自太和四年相 孟 又啓,永和十年至今五十餘年,用三十月輒殷祠。 秋 與不了頒軍長史周景遠議:「案禮記云:『天子祫禘祫嘗祫烝。』依 今若以來四月未得殷祠,遷用孟秋,於禮無違。」參議據禮有證,謂用孟**秋**爲允。 |宋殷祭皆卽吉乃行。|大明七年二月辛亥,有司奏:「四月應殷祠,若事 洞 ,是不專用冬夏。于時晉朝雖不從乾議,然乾據禮及咸康故 博士徐乾據禮難安國。 承殷祭,皆用冬夏。 如禮文,則 事,安國 中未得爲,得用 乾又引晉咸康 夏秋冬三 無以奪 韶可。 安

胙。 月殷祭,從太常丘夷等議,撤樂。 之義,去樂卒事。」是爲吉祭有廢樂也。故升平末行之。其後太常江逌表:「穆帝 升平五年十月己卯,殷祠,以穆帝崩後,不作樂。 晉武帝咸寧五年十一月己酉,弘訓羊太后崩,宗廟廢一時之祀,天地明堂去樂,且不上 **追尋詳今行漢制,無特祀之別。** 初永嘉中,散騎常侍江統 旣入廟吉禘,何疑於樂。」 山陵 議曰:「陽秋 之後十

戚矣。 變,量輕重而降屈。 若夫奏音之與寢聲,非有損益於機務,縱復回疑於兩端,固宜緣恩而從

至於諒闇奪服,慮政事之荒廢,是以乘權

通

以設

史臣曰:聞樂不怡,故申情於遏密。

宋世國有故,廟祠皆懸而不樂。

校勘記

歷年 四百三十有四 各本並脱「有四」二字,據三國志吳志孫權傳注引吳錄補。

 \sqcap 則明 上 帝 不得為 天也 「明」字下,各本並衍「堂」字,據元龜三二下删

〔三〕三月辛卯 按是月丁未朔〕無辛卯。

껃 朝 議 以 爲 宜依 周 禮 各 本並脱「宜」字,據晉書禮志、通典禮典 補

五 尙 書 左 丞 王 訥 之獨 日 「王訥之」各本並作「王納之」。 世說新語文學篇劉孝標注引王氏譜曰。

志第六 校勘記

「訥之字永言,琅邪人。 歷尚書左丞、御史中丞。」當卽其人。 按古人名字相應,訥之字永言,

是,今改正。

「K」 孝建二年正月庚寅 按是月癸巳朔、無庚寅。

[P] 顧和亦云宜更告 「更告」通典禮典作「更擇吉日」。

[八]而郊祀不異「祀」各本並作「禮」、據通典禮典改。

〔九〕郊祀用辛 「祀」各本並作「禮」,據通典禮典改。

(10) 明帝秦始二年十一月辛酉 按是月甲申朔,無辛酉。

秦始六年正月乙亥 「正月」各本並作「五月」,據明帝紀、元龜一九二改。

不刊山梁之石 「山梁」,局本及晉書禮志、元龜三五作「梁山」,譌。按「山梁」,謂泰山、梁父。

作「山梁」不誤。

今大魏振百王之弊亂 ·嘉靖本、北監本、毛本、殿本、局本作「前」,今據晉書禮志、元<u>魏三五改</u>。 「振」晉書禮志、元龜三五作「承」,沈約蓋爲齊諱改。「百」字,百衲本空

[18] 接千載之衰緒 各本並脫「緒」字,據晉書禮志補。

右僕射魏舒 各本並脫「右僕射」三字、據元龜三五補。 晉書魏舒傳,舒太康初爲右僕射。

宜脩此禮 「脩」各本並作「循」,據晉書禮志、元龜三五改。

- 「計」 或享于岐山 「享」各本作「亨」,據元龜三五
- 功薄 而 **僭其儀者** 「儀」各本作「義」,據元龜三五 改
- 二合 海外 有截 「外」各本並作「內」,據晉書禮志、元龜三五改。 按「海外有截」一語,見詩商頌長發。
- 仁孝命世 按上言文帝,此下言孝武帝,故有「龍飛五洲, 鳳翔 九江」之語。 則此 句上或 脱一陛

- 至明帝太和三年十一月 発重複。 通典禮典云「其年十一月」,是。 按上文有「明帝太和三年六月」,此又云「明帝太和三年十一月」,不
- 自古周人始祖后稷
- 「始」各本作「歸」,據三國志魏志文昭甄皇后傳裴注引魏書、元龜二九改。
- 補。 有司又奏文昭皇后立廟京師 各本並脱「立」字,據三國志魏志明帝紀、晉書禮志、通典禮典
- 月正元日 日 ,舜格於文祖 「月正」各本並作「正月」,據晉書禮志、通典禮典、 元龜二九改。 按書堯典 月正元
- 至 八年 各本作「六月」、晉書禮志、通典禮典作「六年」。 按晉書武帝紀,太廟之壞,在太康八年正
- 月,今改作「八年」。
- 丙子 懷帝殤太子又祔廟 前有「四月」,下有戊寅。 「祔」各本並作「被」,據晉書禮志改。 按元興三年四月戊午朔,是月無丙子、戊寅。五月丁巳朔,二十

志 第 六 校 勘 記

:.

日丙子,二十五日戊寅。疑丙子上脫「五月」二字。

然臣愚謂 廟室當以容主爲限 「容」各本並作「客」、據通典禮典改。

務神 其 事 「務」各本並作「豫」,據晉書禮志、元龜五七五改。

替人爵之尊 「替」各本並作「贊」,據晉書禮志、元龜五 七五 改。

〔三〕皆其後毁之主 各本並脫「之」字,據元龜五七五補。

升耐皇祖所託之廟 「託」各本並作「配」,據晉書禮志、元龜五七五改。

若上帝者是五帝 各本並脫「是」字,據晉書禮志、元龜五七五 補

侍中車 胤 議 同 各本並脫「同」字,據晉書禮志、元龜五七五 改

太常孔 汪 議 孔汪」各本並作「孔注」,據晉書孔愉傳子汪附傳改。 按孔汪,東晉孝武 帝世,爲

太常卿。

若臣所啓不允 「若」三朝本作「君」。 北監本、毛本、 殿本、 局本作「羣」。 通典禮典作「若」。

[引] 若計常限 各本並脫「若」字,據通典禮典補。

從通典

未合六十月 而再殷 「未」各本並作「來」,據通典禮典改。

領曹郎范泰參議 「范泰」通典禮典作「范義」。 按本書范泰傳、泰位侍中、左光祿大夫,死於元

嘉五年,此疑作范義爲是。

宋書卷十七

志第七

禮四

送,由於無廟,庶感降來格。 車駕至止,並弗奉迎。 禮曰,廟者貌也。 公已上獻,太祝送神于門,然後至尊還拜,百官贊拜,乃退。 豈是敬神之典。 朱文帝元嘉三年五月庚午,四以誅徐羡之等,讎恥已雪,幣告太廟。 元嘉六年七月,太學博士徐道娛上議曰:「伏見太廟烝嘗儀注,皇帝行事畢,出便坐,三 元嘉三年十二月甲寅,西征謝晦,告太廟、太社。 神靈所馮依也。 恐於禮有疑。 夫不迎而送,送而後辭,闇短之情,實用未達。 因心立意,非王者之禮也。 事亡如存,若常在也。 謹以議上。」 有司奏下禮官詳判。 晦平,車駕旋軫,又告。 儀禮雖: 旣不應有送神之文,自陳豆薦 謹尋淸廟之道,所以肅安神 太祝迎尸于門,此乃延 博士江邃議『在始不 按時人私祠,誠 戸之 皆迎 俎, 也。

志第七

醴

四

迎,明 門,拜,尸不顧。詩云:『鐘鼓送尸。』則送神之義,其來久矣。記曰:『迎牲而 後送,若合符契。」博士荀萬秋議:「古之事尸,與今之事神,其義一也。 子不忍違其親,又不忍遣神。是以祝史送神以成烝嘗之義。」博士賀道期議:「樂以迎來,哀 不出者,明君臣之義。』」邃等三人謂舊儀爲是,唯博士陳珉同道娛議。 也。尸在門外,則疑於臣,入廟中,則全於君。 在廟 祭統『迎牲而不迎尸』。詩云:『鐘鼓送尸。』鄭云:『尸, 也。 卒事 道娛、珉所據難從。今衆議不一,宜遵舊體」。 而送,節孝思也。 若不送而辭,是舍親也。 君在門外,則疑於君,入廟,則全於臣。 辭而後送,是遣神也。 神象也。』與今儀注不迎 部可。 周禮,尸出,送于廟 參詳「邃等議雖未 不 迎尸,別嫌 故孝 是故

也。 以仲月。』然則大祭四祀,其月各異。天子以孟月殷,仲月烝,諸侯孟月嘗,仲月祫也。春秋 則薦』。鄭注:『天子先祫然後時祭,諸侯先時祭然後祫。有田者旣祭又薦新。 給之禮,三年一,五年再。

公羊所謂五年再殷祭也。在四時之間,周禮所謂凡四時之間祀 盡,然皆依擬經禮。 月,『有事于武宮』。左傳曰:『禮也。』又周禮『仲冬享烝』。,月令『季秋嘗稻』。晉春烝曲沃, 八年秋七月,禘。文公二年八月,大事于太廟。 蓋歷歲節月無定,天子諸侯,先後弗同。禮稱『天子祫嘗,諸侯烝祫。 元嘉六年九月,太學博士徐道娛上議曰:「祠部下十月三日殷祠,十二日烝祀。 穀梁傳曰『著給嘗也。』昭公十五年二 有田 祭以首時,薦 則祭,無 謹按 禘 田

『祭不 齊 皆云 ۲ 十月嘗太公,此 未吉,豈容二事,推 「殊朔。 欲數,數 晉代 公則瀆』。 相 並孟仲區別不共之明文矣。 承,未 期 今隔 而 審其 往,理 旬 原。 頻享,恐於禮爲煩。 尤可 國 知 事之重,莫大乎祀。 尋殷烝祀 凡祭必先卜,日用丁巳, 自經 重,祭薦 緯 墳 愚管膚淺, 禮輕 誥, 都 無 輕 尚 竊 月 異月 如不 以 兩 惟 重 獻, 從,進卜遠 疑。 寧反同。 先儒舊說, 請詳 日 且

議。

寢

報

據 廟 不 剂 同 敬 祀 請 旣 重 元 嘉 一饗祀 殿 戒 聽 如元 中 七年四月乙丑,有司奏曰:「禮喪服 ,而 曹郎中 精 掖 所上。」 庭 明 有故。 領祠 雖聖: 詔 部謝元 可 一情罔 下太常依 極 議 一。必在 以為:『遵依 禮 詳 一親奉。 Ę 太學博 傳云:『有死於宮中者,則爲之三月不舉祭。』今 然苟 ₹禮 傳,使有 日 土江 有疑,則情以禮 邃、袁朗、徐道娛、陳珉 司 行 事,於義爲安。』輒 屈。 無所 稱 等議, 重參詳。 述,於義 參互 宗 有

牲 用 其 尋月令孟 無 雌 元嘉 用 種市買,由來 求 牝。 下 十年十二月癸酉, 春『 禮官詳 如 命祀 此,是春月不 正。 送雌。 Щ 林川澤,犧牲無用牝』。 | 勒太學: 竊 聞 用 太祝令徐閏 周景 雌 依 禮 爾 詳據 王時 ,秋冬無禁。 賓起 刺署:一典宗廟 博士 若如學議,春祠三牲以下, 見雄雞 徐道娛等議 雄雞 自 斷 社 斷 尾, 稷 其尾,日 自 稱:「案禮 祠祀薦五牲, 可 是春 孟 雞憚 月。」太常 春之月,『 便應 犧 牛羊豕 不祥。」 丞 時俱改,以 是月 雞 司 馬 並 一个何 操 也 用 雄 一,犧 以

志

第

七

禮

匹

從月令, 來久,義或有由 ?????不用牝者,蓋明在春必雄,秋冬可雌,非以山林同宗廟 何以偏在 ,誠非末學所能詳究。 一雞。」 重更勒太學議答。博士徐道娛等又議稱「凡宗祀牲牝不一,前惟 求詳 議 告報,如所稱令。」參詳閨所稱粗有證據,宜如 也。 四牲不改, 在雞偏異,相承

所上。

自今改

用

雄

雞

異廟 後, 昔第五皇子承統廬陵,備告七廟。」 參議以 爰議 嗣,宜告禰廟。」祠部朱膺之議以爲:「有事告廟,蓋國之常典。 禮 爲允,宜在皆告。」兼右丞殿中郎徐爰議以爲:「國之大事,必告祖禰。 以爲宜告。 無皇子出後告廟明文。 檢未有告廟先例, 孝武 ,故告不必同。 則於情未安。」太常丞庾亮之議、「案禮『大事則告祖禰, 帝孝 賀循云,古禮異廟,唯謁 建三年五 自漢明帝以來,乃共堂各室,魏、晉依之。 輒勒二學禮官議正,應告與不? 月丁巳,詔以第四皇子出紹江夏王太子叡爲後。 晉太康四年,封北海王寔紹廣漢殤王後,告于太廟。 一室是也。 爲允。 既皆共廟,而闕 詔可 告者爲告幾室。」太學博士傅休議: 今旣共堂,若獨告 **今皇子出紹**, 小事 於諸帝 則特告禰」。 皇子出嗣,不得謂小。 ,於情未 有司奏:「皇子出 事非常均。 一室,而 漢初帝各 今皇子 謂循言 愚 出 闕

陽,告廟臨軒。 大明元年六月已卯朔,詔以前太子步兵校 檢繼體爲舊,不告廟臨軒。」下禮官議正。 分尉祗 男歆紹 太學博士王燮之議。「南豐昔別開 南豐王 朝。 有司 奏「朗先嗣

城。 其 傳襲,不應告廟臨軒。」祠部郎朱膺之議:「南豐王嗣爵封已絕,聖恩垂矜,特詔繼茅土,復申 土宇,以紹營陽,義同始封,故有臨軒告廟之禮。今歆奉詔出嗣,則成繼體,先爵猶存,事是 祖 同 ,豈關太廟。 旣始啓建茅土,故宜臨軒告廟。 始封,爲之告廟臨軒。」殿中郎徐爰議:「營陽繼體皇基,身亡封絕,恩詔追封,錫以一 事非始封,不合臨軒。同博士王燮之議。」參詳,爰議爲允。 今歆繼後南豐,彼此俱爲列國,長沙、南豐,自應各告 詔可。

輿辭 之
変 宮 旣同宫,三月廢祭,於禮宜停。」二議不同。 存 孫 在 記 爲王父尸』。 廟親 體之哀,理不得異。 與戎』。皇太子有撫軍之道,而無專御之義,戎旣如之,祀亦宜然。 盛,長子 大明三年六月乙丑,有司奏:「來七月十五日,嘗祠太廟、章皇太后廟,輿駕親奉。 事 皇太子入住上宫,於事有疑。」下禮官議正。 不可 ·戎,太子合親祠與不? 且今月二十四日,第八皇女夭。 亂。 主器,出可守宗廟,以爲祭主,易黎明文。 又云,『祭有昭穆, 所以別父子』。 又云,『有故則使人』。 設令得祀,今猶無親奉之義。」博士郁議:[三]「案春秋,太子 准此二三,太子無奉祀之道。 尚書參議,宜以郁議爲 太子監國,雖不攝,至於宗廟,則昭 太學博士司馬興之議:「竊惟『國之大事, 監 國之重,居然 案禮『宮中有故,三月不舉 允 親祭。 案祭統,『夫祭之道, 又皇女夭札,則 詔 可 皇女夭札,時 奉社 穆實 而乘 實 稷 同

大明三年 月乙丑朔,有司奏:「四時廟祠,吉日已定,遇雨及舉哀,舊停親奉,以有

四大五

以疑。 禮。 濟,齋不可久,而王有他故,則使有司攝焉。晉泰始七年四月,世祖將親祠 天譴之變,廼可遷日。至於舉哀小故,不宜改辰。」衆議不同。參議,旣有理據,且晉氏遷郊, 廟敬 **猶遷,況散齋邪。」殿中郎殷淡議:「曾子問『日蝕太** 內,未及致齋,而有輕哀甚雨,日時展事 『孔子答曾子,當祭而日蝕太廟火, 駕夕牲。 與祭祀則攝位』。鄭君曰:『王有故,行其祭事也。』 者 則 司 前代司 爲之輕重耳。 1,明無遷移之文。 苟有司充事,謂不宜改日。」太常丞陸澄議:「案周禮宗伯之職,『若王不 使人,而君不失其儀。』鄭玄云:『君雖不親,祭禮無闕,君德不損。』愚以爲有故則必使人 行 晉世祖 重 事 空顧 愚謂散 ,郊禋禮 辛亥,雨。 先下使禮官博議,於禮爲得遷日與不。」博士江長議:「禮記祭統:『君之祭也,有故 和 有司 日蝕廟 · 啓,南郊車駕已出遇雨,宜遷日更郊,事見施 齋 一大,故廟焚日蝕, 行 而 有舉 事 有司行事。 ,顧司空之改郊月,旣不見其當時之宜,此不足爲准。 火,變之甚者,故乃牲至尙猶可廢。 哀若雨,可更遷日。 此雖非人故,蓋亦天硋也。 許 如牲至未殺,則廢』。 以可遷,輕哀微故, , 可 以延敬。 唯入致 廟火,牲未殺 臣以爲此謂在致齋,祭事 齊及日月逼 不愆義情,無傷 事不 然則祭非無可廢之道也。 推此 用。 求之古禮、未乖周制。 合改。 而降,)晚者,乃使 則 郊之與廟, 廢。 是以鼷 正典, 可以 縦 于太廟。 有故 理尋。 其敬 改擇 有司行 鼠 愚謂 食牛, 盡備,神不可 則使 , 令日, 可 日 事耳。 今散 均, 蝕 庚戌,車 **案禮記** 改卜非 人。 但權所 阿朝 至日 夫何 一个流流 叉

朱初遷祠,並有成准。 謂孟月散齋之中,遇雨及舉輕哀,宜擇吉更遷,無定限數。唯入致齋

及侵仲月節者,使有司行事。詔可。

降。 常丞 服,不容復異。祭統云『君有故使人可』者,謂於禮應祭,君不得齋,祭不可闕,故使臣下攝 亦不使公卿行事。」右丞徐爰議以爲:「禮,『總不祭』,蓋惟通議。大夫以尊貴降絕,及其有 妃旣未山坐,未從權制,則應依禮廢烝嘗。

至尊以大功之服,於禮不得親奉,非有故之謂, 前代,不得烝祠。」領軍長史周景遠議:「案禮『緦不祭』。大功廢祠,理不俟言。今皇太子故 意,非使有司。此無服之喪,尙以未葬爲廢,況皇太子妃及大功未祔者邪?上尋禮文,下准 平原公主薨,高堂隆議不應三月廢祠,而猶云殯葬之間,權廢事改吉,芬馥享祠。尋此語 於太子妃乎。」博士司馬興之議:「夫緦則不祭,禮之大經。卿卒不繹,春秋明義。 不謂君不應祭,有司行事也。 雖名號尊崇,粗可依准。 旣正服大功,愚謂不應祭。有故,三公行事,是得祭之辰,非今之比。卿卒猶不釋,況 |庚蔚之議:「禮所以有喪廢祭,由祭必有樂。 皇太子以元嫡之重,故主上服妃,不以尊 尋蔚之等議,指歸不殊,闕烝爲允。 大明五年十月甲寅,有司奏:「今月八日烝祠二廟,公卿行事。 有皇太子獻妃服。」前太 今太子妃至尊正服大功,非有故之比。 晉咸寧四年,景獻皇后崩,晉武帝伯母,宗廟 過卒哭祔廟,一依常典。」詔可 旣未 山坐,謂烝祠宜 廢 又尋魏代 一時之

狩之禮,四時異議,禮有損益,時代不同。今旣無復四方之祭,三殺之儀,曠廢來久,禽獲牲 先薦二廟,禮情俱允。 社主土神,司空土官,故祭社使司空行事。 太廟宜使上公。 參議蒐 常丞庾蔚之議:「龢所言是蒐狩不失其時,此禮久廢。今時龢表晏,講武敎人,又虔供乾豆, 以射、牲以鹿麑。太宰令謁者各一人、載獲車馳送陵廟。』然則春田薦廟、未有先准。」兼太 以享烝。 有所施。 設 物,面傷翦毛,未成禽不獻。太宰令謁者擇上殺奉送,先薦廟社二廟,依舊以太尉行事。」 **醢酒,公卿行事,及獻妃陰室,室長行事。」太學博士虞龢議:「檢周禮,四時講武獻牲,各** 大明 案漢祭祀志:『唯立秋之日,白郊事畢,始揚威武,名曰「貙劉」。乘輿入囿,躬執弩 七年二月丙辰,有司奏:「鑾輿巡蒐江左,講武校獵,獲肉先薦太廟、章太后廟,幷 振旅春蒐,則以祭社;
茂舍夏苗,則以享前;治兵秋獮,則以祀前;〔ē〕 大閱冬狩,則

泛稱:『禮,身有喪,則不爲吉祭。 廢尊也。』范宣難杜預、段暢,所以闕宗廟祭者,皆人理所奉,哀戚之情,同於生者。 通 則就吉。 。伏尋三年之制,自天子達。漢文愍秦餘之弊,於是制爲權典。魏、晉以來,卒哭而祔 明 (帝泰豫元年七月庚申,有司奏:「七月嘗祠,至尊諒闇之內,爲親奉與不?使下禮官 案禮記王制,『三年不祭,唯祭天地社稷,爲越紼而行事』。 **總麻之喪,於祖考有服者,則亦不祭,爲神不饗也。』尋宮** 鄭玄云:『唯不敢以卑

例 穆。 中 上。 有 則 故, 自 而 未 今必 丽 應 雖在 親 亦近 須 奉。 無服, 趸 代前 喪,然後 有 亦廢祭三月, 司 事 祗 也。 應,祭不爲曠。 禘 **哈,故知未祭之意** 伏惟 至尊孝越 有喪不祭。 仰思從敬,竊謂爲允。 姬文,情深 ,當似可思。 如或非若三年之內必宜親 明發,公服雖 起居注,晉武 臣等參議,甚 釋, 純 奉者, 有二喪,兩 哀 內 有 則 纏。 明 應 春之中 推 禘 序昭 訪 如 典 ,

所

詔

太后 太常 唯 執 世 庶 親 不 孝 祖 奉 母 親 宗 在 之 躬 武 丞 後 雖 者 爲伯 日, 一韓賁 奉 皇 我, 廢 祠 算統 親 丁,廼宜 顯宗、 帝 帝 父,功 應 非 猶 觴 議 元徽二年十月丙寅,有司奏:「至尊親祠太廟文皇帝太后之日,孝武皇帝及 執 正統, 上,卑者尊統下。 子 爵 烈宗、 傷爵。 議 祭 「晉景帝之於 有 列 其毁替。 孫 祖 而嘗 愜 止 肅 宗,奉祠 情 昭皇太后旣 祖 經 況 敬 並 北 伯 請 世 面,未詳 之日 且依舊,三公行事。」詔緬議 是 昭 父 孝武 祖 之庶 皇 晉帝 , 太后 親 肅祖 皇帝 謂 非禮 之伯, 母 應親 宜 君 之於 於至尊雖 親 母 愚謂 正,宜使 執爵 執 今朝明 之貴, 孝武 昭 與不 按 后 \equiv 昭皇太后 ,皆傍尊也 親 準, 見算 觴 . 二下禮 公行事。」 非 爵,可 正 而 統 爲 時, 初 官議。 於 允。 付 而 無 親親 博 有 之 主 而 祖 執觴 有 上, 士顏變等 與章、宣二 司 宗之號, 司 太學博 行 親 杓。 事 無 前 之 名 禮 列 今孝 四 士 左 一廟同 秩, 周 丞 人 于 武 司 愚 七 Щ 孫 饗閟宮 情 謂 緬 皇帝於至 Щ 廟 文 則 文。 議 議 主 疏 昭 愚 Ŀ 遠, 案 皇 親 兼 非

議 虔祀,事異前志。將由大君之宜,其職彌重,人極之貴,其數特中。 遠。宜長代崇芬,奕葉垂則。豈得降侔通倫,反遵常典。 宗之辯,舛於兼儒,迭毁之論,亂於羣學。章皇太后誕神啓聖,禮備中興,慶流胙胤,德光義 同義恭不毀。散騎侍郎王法施等二十七人議應毀。 安可以貴等帝王,祭從士庶,緣情訪制,顚越滋甚。 晉氏明規,咸留薦祀。遠考史策,近因闇見,未應毁之,於義爲長。所據公羊,祇足堅秉。 人。太傅江夏王義恭以爲:「經籍殘偽,訓傳異門,諒言之者罔一,故求之者尠究。 二,莫窮書旨。按禮記不代祭,爰及慈母,置辭令有所施。 爲允。 宋孝武 韶可。 帝孝建元年十月戊辰,有司奏章皇太后廟毁置之禮。 謂應同七廟,六代乃毀。」六百三十六人 領曹郎中周景遠重參議,義恭等不毀 夫議者成疑,實傍紀傳, 穀梁於孫止,別主立祭。 且漢代鴻風,遂登配祔, 二品官議者六百六十三 是以六 知 則親執 爽

邑,設廟祧壇墠而祭之,乃爲親疏多少之數。是故王立七廟,遠廟爲祧』。鄭云:『天子遷廟 主於祖廟而祭之,謂之祫。三年而夏禘,五年而秋祫,謂之五年再殷祭。』又『禘,大祭也』。 廟禘給,及徐邈答晉宣太后殷薦舊事,使禮官議正。」博士孫武議:「按禮記祭法,『置都立 之主,昭穆合藏於二祧之中,回於乃祭之。』王制曰:『祫禘。』鄭云:『祫,合也。 大明二年二月庚寅,有司奏:「皇代殷祭,無事於章后廟。 高堂隆議魏文思后依周姜嫄 合先君之

合食 后, 懼 與 廟。 高 位 序 今殷 別饗之例 於 祖 春秋文公二年,『大事于太廟』。 高」宝博 堂 四 於 昭 正 乖 難在合 雖 譬有 奥, 序 隆 時 祠 禮 祭法,『王下祭殤』。 穆之義。 並 守經 答 烝 衷。」 博 , 非 ,又未聞於昭穆之外別立 是合食太祖,而序昭穆。 不 魏 嘗不異,則非禘大祭之義,又無取於祫合食之文。 事 序 斯 就祭別宮之謂。 食,而祭典之重,於此爲大。 曰:『合族以食,序以昭穆。』祭統曰:『有事于太廟,則羣昭羣穆咸在,不 據古, 文 於尊者 於 其證 思后 士王燮 邈云:『陰室四殤,不同於就祭。』此亦其義也。 太 矣。 孫武爲詳。 廟 依姜嫄 可可 而 之之議 以及 愚謂 **猶均**禘 鄭玄云:『祭適殤於廟之奧,謂之陰厭。』 既:「按禘 廟稀給,又不辨 单。 今章太后廟,四時饗薦, 章皇太后 竊尋小廟之禮,肇自近魏,晉之所行,足爲前準。 於姜嫄,其意 一爲位。 故高 章太后既屈於上, 傳曰:『毀廟之主,陳于太祖;未 毀 廟 之主,皆升合食太 小船 堂 廟 大, 隆 夫 若徐邈議,今殷祠就別廟奉薦,則乖禘 7,亦宜 所謂 以孝饗親 禮 **船之義,而改給大饗,蓋有由** 如 無正 殷薦。」太常丞 此。 獨 以 文,求之情例, 不列正廟。 又徐邈 船 ,尊愛罔極,旣殷薦太祖,亦致盛 雖不於孫止,若太廟 故 而祭之也。 所引 孫緬 謂不宜與 喪服小記,『殤與無後,從祖 若迎主入太廟,旣 四殤 議 如 旣從祖食於廟奧, 有 以 不 是 為:「船祭之名, 可準。[六] 以魏 太 船, 而 然耳。 廟 禘 船,獨祭別宫, 就 之文思,晉之宣 同 而祭之, 推 殷 給大祭 高堂隆以祫 守文淺 不 失 葬 祭之 敢 是殤有 其 船 祀 以爲 及學, 合食 倫。」 配 之爲 義 於 耐 在 小 列

志

第

議。」詔曰:「章皇太后追尊極號,禮同七廟,豈容獨闕殷薦,隔茲盛祠。閟宮遙祫,旣行有周, 之。魏、晉二代,取則奉薦,名儒達禮,無相譏非,不諐不忘,率由舊章。愚意同王燮之、孫緬 愚謂章廟殷薦,推此可知。」祠部朱膺之議:「閟宮之祀,高堂隆、趙怡並云周人給,歲俱給祭 廟,而祭非合食。 而祭,有附情敬。徐邈引就祭四殤,以證別饗。孫武據殤祔於祖,謂廟有殤位。 且七廟同宮,始自後漢,禮之祭殤,各祔厥祖。 既豫祫,則必異廟而祭。 ,雖同

昭皇太后正位母儀,尊號允著,祔廟之禮,宜備彝則。母以子貴,事炳聖文,孝武之祀,旣百 今昭皇太后旣非所生,益無親奉之理。 周禮宗伯職云:『若王不與祭,則攝位。』然則宜使有 郞虞龢議以為:「春秋之義,庶母雖名同崇號,而實異正嫡。是以猶考別宮,而公子主其祀。 之於永安后,祭祀之日,不親執觴爵,使有司行事。」時太宗宣太后已祔章太后廟,長兼儀曹 代不毀,則昭后之祔,無緣有虧。愚謂神主應入章后廟。又宜依晉元皇帝之於愍帝,安帝 禮官詳議。」博士王略、太常丞虞愿議:「正名存義,有國之徽典,臣子一例,史傳之明文。今 邈議廟制,自是以來,著爲通典。今昭皇太后於至尊無親,上特制義服。〔刊] 祔廟之禮,宜下 魏、晉從饗,式範無替。 宜述附前典,以宣情敬。」 司行其禮事。又婦人無常秩,各以夫氏爲定,夫亡以子爲次。昭皇太后卽正位在前,宣太 明帝泰始二年正月,孝武昭太后崩。五月甲寅,有司奏:「晉太元中,始正太后尊號,徐

后 追尊在後,以從序而言,宜躋新禰于上。」參詳,蘇議爲允。 詔可。

武帝 拜。 容 帝 拜 久 則 事 母 按 居 親 《禮』過 1傍算 已前 烝 孝武 無 有 存 親 進 敬 觴 繼 進 通 至祭之日,猶進觴爵。 昭皇太后正號久定,登列廟祀,詳尋祝文,宜稱皇帝諱。 泰 嘗奉薦, 亦使有司 觴)謂宜 皇帝、昭皇太后,並無明文,下禮官議正。」太學博士劉緄議:「專晉元北面稱臣於愍 備 問 ,致虔之儀,理不容備。 爵及拜伏。 始 嗣 墓 之典, 爵拜伏。 二年六月丁丑,有司奏:「來七月嘗祀二廟,依舊車駕親奉。 則 故傍尊雖近, 弟姪弗祀。 愚謂 、軾、過 進拜,祝 語其尊卑,亦無相見之義。 孝武 其日親進章皇太后廟,經昭皇太后室過,前議旣使有司行事,謂 又昭皇太后室應拜,及祝文稱皇帝諱。 泥 順下。 文宜 、昭太后二室,並不復 行事。 稱皇帝諱。 今上旣纂祠文皇,於孝武室謂宜進拜而已,觴爵使 凡在神 孝武、昭后二室,牲薦宜闕。」太常丞虞愿議:「夫烝嘗之禮, 且兄弟不相爲後,著於魯史。以此而推,孝武之室,至尊無 一祇,尚或致恭,况昭太后母臨四海,至尊親 君道雖高,臣無祭典。 尋皇后廟見之禮,本修虔爲義,今於孝武,論 薦告。」參議 又皇后登御之初,昭后猶正位 以愿議爲允。 又皇后今月二十五日虔見於禰, 按晉景帝之於武帝,屬居伯父, 案禮,婦無見兄之典,昭后位 詔 孝武皇帝室,公至尊 可 在宫,敬謁之道, 曾北 有司行事。 其 不應進 面,兄 、嫂叔,

後廢帝元徽 二年十月壬寅, 有司奏昭太后廟毁置。 下禮官詳議。 太常丞韓賁議:「按

志

第

七

禮

四

室。 廟,埋毀殷主於北牆。 可 依 陳 年,下禮官辨正。 於義不當。 祖姑,則易牲而祔於女君可也。』始章太后於昭太后,論昭穆而言,則非妾祖姑,又非女君, 『妾祔於妾祖姑』,祔旣必告,毁不容異。應告章皇太后一室。按記云:『妾祔於妾祖姑,無妾 祭,稽之前代,未見其準。」都令史殷匪子議:「昭皇太后不係於祖宗,進退宜毀。議者云, 君母之尊,義發春秋,庶後饗薦無間。周典七廟承統,猶親盡則毀。況伯之所生,而無服代 遷毀事 代之成典。 不虛置,太后便應上下升之。 Ŧi. 列 於 古者大事必告,又云每事必告。禮,牲幣雜用。檢魏、晉以來,互有不同。元嘉十六 經 太祖,博士欲依虞主埋於廟兩階之間。按階間本以埋告幣埋虞主之所。 典議,以毀主祔於虞主,埋於廟之北牆,最爲可據。昭太后神主毀之埋之後,上室不 請廣 伏尋昭太后名位允極,昔初祔之始,自上祔於趙后,卽安于西廟,並皆幣告諸 今事雖不全凶,亦未近吉,故宜依舊,以幣徧告二廟。 又尋昭太后毀主,無義 《詳訪。」左僕射劉秉等七人同匪子。〔云〕左丞王諶重參議,謂:「以幣徧告二 太學博士殷靈祚議稱:『吉事用牲,凶事用幣。』自茲而後,吉凶爲判,已是 宣太后上室,仍設脯醢以安神,匪子議爲允。」詔可。 既升之頃,又應設脯醢以安神。 今禮官所議, 謬略未周。 昔虞喜云,

爲后,則股肱大臣,誅之無赦。其書之金策,[10]藏之宗廟,著于令典。」是後高貴、常道援 諸侯入奉大統,則當明爲人後之義。 敢爲佞邪,導諛君上,妄建非正之號,謂考爲皇,稱妣 致丁、傅焚如之禍。 自是之後,相踵行之。 其令公卿有司,深以前代爲誡。 後嗣萬一有由 議,遂尊恭皇,立廟京師,又寵蕃妾,使比長信,僭差無禮,人神弗佑,非罪師丹忠正之諫,用 得顧私親哉。漢宣繼昭帝,後加悼考以皇號,哀帝以外蕃援立,而董宏等稱引亡秦,或誤朝

不可。 禮典之義,子不敢以己爵加其父號。」帝又從之。二漢此典棄矣。 晉愍帝建興四年,司徒梁芬議追尊之禮,帝旣不從,而左僕射索綝等亦稱引魏制,以爲 故追贈吳王爲太保而已。元帝太興二年,有司言琅邪恭王宜稱皇考。 賀循議云

立,皆不外尊也。

魏 明帝有愛女日淑涉,三月而夭,帝痛之甚,追封諡爲平原懿公主,葬於南陵,立廟京

師。無前典,非禮也。

君,曰:應有主祭,而 。」太學博士臣徐宏議 宋孝武 帝孝建元年七月辛酉,有司奏:「東平沖王年稚無後,唯殤服五月。 雖臣不殤 國是追贈,又無其臣。 :「王旣無後,追贈無臣,殤服旣竟,靈便合毀。 未詳毀靈立廟,爲當它祔與不?輒下 記曰:『殤與無後者, 禮

志第七 禮四

從 沖王 祖 一則宜 耐 食。」 耐 諸祖之廟爲王者,應祔長沙景王廟。」詔可 又曰: 『士大夫不得해於諸侯, 해於祖之爲士大夫者。』 按諸侯不得해於天子。

徽緒,光啓大蕃,屬國爲祖。 不同,參議以爰議爲允。 獲 祭,不必唯子。江夏宣王太子,體自元宰,道戚之胤,遭時不幸,聖上矜悼,降出 可也。』注 夏之廟。 母妾母不世祭』。[1]]鄭玄注:『以其非正,故傳曰子祭孫止。』又云:『爲慈母後者,爲祖 前享江夏,又不從祭安陸,即事求情,愚以爲宜依祖母有爲後之義,謂合列祀于廟。」二議 大明 稱 宣王所生夫人,當應祠不。」太學博士傳郁議。「應廢祭。」右丞徐爰議:「按禮,『慈 四年丁巳、江三有司奏:「安陸國土雖建,而奠酹之所,未及營立,四時薦饗,故祔江 『緣爲慈母後之義,父妾無子,亦可命己庶子爲之後也。』考尋斯義,父母 韶可。 始王夫人載育明懿,則一國之正, 上無所厭, 哀敬得中。 皇愛, 旣 妾之 庶 嗣

未

承

母

朔望周忌,應還臨與不?祭之日,誰爲主。」太常丞庾蔚之議:「旣葬三日 諸王不得祖天子,宜祔從祖國廟,還居新廟之室。 三年服者,朞親服除,口吾而國尙存,便宜 而 靈筵猶存,自即朔望及朞忌,諸臣宜還臨哭,變服衣峽,使上卿主祭。 大明六年十月丙寅,有司奏:「故晉陵孝王子雲未有嗣,安廟後三日,國 立 廟,爲國之始祖。 未有嗣之前,四時饗薦,常使上卿主之。」 服除 之日, 國 王旣未 神主暫耐 臣 臣 從權 從權 有後, 食祖 制除釋, 制 除 叉無 釋。 廟。

左丞徐爰參議,以蔚之議爲允。詔可。

考彼別宮。今貴妃是秩,天之崇班,理應立此新廟。」左丞徐爰議:「宣貴妃旣加殊命,禮絕 侯七命。三公旣尊於列國諸侯,三妃亦貴於庶邦夫人。據春秋傳, 仲子非魯惠元嫡, 尚得 三夫人。』然則三妃卽三夫人也。后之有三妃,猶天子之有三公也。按周禮,三公八命,諸 五宮,考之古典,顯有成據。廟堂克構,宜選將作大匠。」參詳以爲《爰議爲允。詔可。 |大明七年正月庚子,有司奏:「故宣貴妃加殊禮,未詳應立廟與不。」太學博士虞龢議:

除之後也。新安王心喪之內,若遇時節,便應吉祭於廟,親奉亦在無嫌。 祔之爲言,以後亡 虞龢議:「春秋傳云:『祔而作主,烝嘗禘於廟。』嘗爲吉祭之名,大祥及禪,未得入廟,應在 若在大祥及禪中入廟者,遇四時便得祭不。[l+]新安王在心制中,得親奉祭不。」太學博士 者稍於先廟也。小記云:『諸侯不得稍於天子。』今貴妃爵視諸侯,居然不得稍於先后。 祥,心喪三年。未詳宣貴妃祔廟,應在何時。入廟之日,當先有祔,爲但入新廟而已。[15] : 祔,祔而作主,時之諸侯,皆禪終入廟。 宮,無所宜祔。 大明七年三月戊戌,有司奏:「新安王服宣貴妃齊衰春,十一月練,十三月編,十五月 且卒哭之後,益無祔理。」左丞徐爰議以:「禮有損益,古今異儀,雖云卒 且麻衣縓緣,革服於元嘉,苦紝變除,申情於皇 叉別

志第

禪除之後,宜親執奠爵之禮。若有故,三卿行事。貴妃上厭皇姑,下絕列國,無所應祔。」參 况宣貴妃誕育叡蕃,葬加殊禮,靈筵廬位,皆主之哲王,考宮創祀,不得關之朝廷。 謂

議,龢議大體與煖不異,宜以煖議爲允。詔可。

屬 族伯緦麻,則應祭三月。」曰司兼左丞徐爰議:「嗣王未立,將來承胤未知疏近。 豈宜空計服 庾蔚之議:「總不祭者,據主爲言也。 顏僧道議:「禮記云:『所祭者亡服則祭。』〔110〕今晉陵王於衡陽小功,宜依二國同廢。」太常丞 以王「有衡陽王服,今年內不祠。尋國未有嗣王,」三卿主祭。「己應同有服之例與不。」博士 ,以虧祭敬。」參議以爱議爲允。 大明七年十一月癸未,有司奏:「晉陵國刺:孝王廟依廬陵等國例,[15]一歲五祭。 詔可。 晉陵雖未有嗣,宜依有嗣致服,依闕祭之限。 衡陽爲 二國

之日? 宜 先暫耐廬陵孝獻王廟。 立 存繼 廟 作主,三卿主祭依舊。」通關博議,以爰議爲允。 大明八年正月壬辰,有司奏:「故齊敬王子羽將來立後,未詳便應作主立廟? 爲須 未立 [嗣。[三]皇子追贈,則爲始祖。臣不殤君,事著前準,豈容虛闕烝嘗,以俟 廟者,爲於何處祭祀。」游擊將軍徐爰議以爲:「國無後,於制除罷。 祭竟,神主卽還新廟。 未立後之前,常使國上卿主祭。 令便立廟。 廟成作主,依晉陵王近例, 有後。 始封之君, 謂宜 有後

其義。 穀梁傳曰:『天子親耕以供粢盛。』親耕,謂自報,自爲立社者,爲籍而報也。 地。 官社、無稷、故常二社一稷也。晉初仍魏,無所增損。至太康九年,改建宗廟,而社 廟俱徙。 子曰農,能殖百穀。 日之始也。「社所以神地之道。 | : 「王爲羣姓立社曰太社,王自爲立社曰王社。」故國有二社,而稷亦有二也。 漢、魏則有 故教民美報焉。[三]家主中霤而 禮云:「共工氏之霸九州,其子句龍曰后土,能平九土,故祀以爲社。」周以甲日祭之,用 天子尊事郊廟,故冕而躬耕。躬耕也者,Clind所以重孝享之粢盛,致殷薦於上帝也。 乃詔曰:「社實一神,其幷二社之祀。」「一四於是車騎司馬傅咸表曰:「祭法二社各有 其裔曰柱,佐顓頊爲稷官,主農事,周棄係之,法施於人,故祀以爲稷。 地載萬物,天垂象。 國主社,示本也。」故言報本反始。 取財於地,取法 於天。 烈山氏之有天下,其 國以人爲本,人 是以尊天而親 稷 」壇與

衆,王者通爲立社,故稱太社。若夫置社,其數不一,蓋以里所爲名。 太社,天子爲民而祀,「云故稱天子社。郊特牲曰:『天子太社,必受霜露風雨。』夫以羣姓之 是也。』景侯解祭法,則以置社爲人間之社矣。而別論復以太社爲人間之社,未曉此旨也。 立之於京師也』。景侯此論,據祭法『大夫以下,成羣立社,曰置社』。景侯解曰:『今之里社 亦謂春祈籍田,秋而報之也。其論太社,則曰『王者布下圻內,爲百姓立之,謂之太社,不自 以穀爲命,故又爲百姓立社而祈報焉。事異報殊,此社之所以有二也。王景侯之論 左氏傳盟于清丘之社 王祉,

志

是也。 學。」咸重表以爲:「如粲之論,景侯之解文以此壞。大雅云:『乃立冢土。』毛公解曰:『冢土, 知也。 稷。 明二。『國之大事,在祀與戎』。若有過而除之,不若過而存之。況存之有義,而除之無據 于新邑,唯一太牢,』不立二社之明義也。「言」按郊特牲曰:『社稷太牢。』必援一牢之文,以 太社也。』景侯解詩,卽用此說。禹貢『惟土五色』。景侯解曰:『王者取五色土爲太社,封 明社之無二,則稷無牲矣。說者則曰,舉社以明稷。苟可舉社以明稷,曰己何獨不可舉一以 所云祭凡小祀,則墨冕之屬也。 文正等。 四方諸侯。各割其方色土者覆四方也。』﹝元﹞如此,太社復爲立京都也。不知此論從何出而 口論除明文。如此,非但二社,當是思惟景侯之後解,亦未易除也。 二社者,稱景侯祭法不謂無二,則曰口傳無其文也。 周禮封人『掌設社壝』。無稷字。今帝社無稷,蓋出於此。 周禮,王祭稷則絺冕。此王社有稷之文也。封人設壝之無稷字,說者以爲略文,從可 自為 人間 謂宜仍舊立二社,而加立帝社之稷。」時成粲議稱:「景侯論太社不立京都,欲破鄭氏 說者窮此,因云墳籍但有五祀無七祀 《立七祀。』言自爲者,自爲而 之社,旣已不稱太矣。 景侯解大厲曰:『如周杜伯,鬼有所歸,乃不爲厲。』今云無 若復不立之京都,當安所立乎? 祭法又曰:『王爲羣姓立 祀也。 也。 爲羣姓者,爲羣姓而祀也。 。夫以景侯之明,擬議而後爲解,而欲以 按祭五祀,國之大祀,七者小祀。 然國主社稷,故經傳動稱社 前被敕,尚書召誥。『社 太社 與七祀,其 周禮

志第七 禮四

與解 與咸議同。[10]詔曰:「社實一神,而相襲二位,衆議不同, 乖 上違經記明文,下壞景侯之解。 臣雖 一頑蔽,少長學問,不能默已,謹復續 何必改作, 其便仍舊,〔三〕 上。」劉寔 如

魏制。」

以 右,而江左又然也。吳時宮東門雩門,疑吳社亦在宮東,與其廟同所也。宋仍舊,無所改作。 太社,保佑 神地道。 至元帝建武 萬邦。 明祀惟辰,〔三〕景福來造。」禮,左宗廟,右社稷。 元年,又依洛京立二社一稷。 其太社之祝曰:「地德普施,惠存 悠悠四海,咸賴嘉祥。」其帝社之祝曰:「坤德厚載,王畿是保。 歷代遵之,故洛京社稷在廟之 無疆。 乃建帝社 乃建

魏氏三祖皆親耕籍,此則先農無廢享也。 其禮無異聞, 宜從漢儀。 執事告祠以太牢

晉元、哀帝並欲籍田而不遂、三三儀注亦闕略。

事 四 質明 出 唑。 宋文帝元嘉二十一年春,親耕,乃立先農壇於籍田中阡西陌南。 以 陛 太牢告祠。 廣五尺,外加埓。 祭器用祭社稷器。 去阡陌各二十丈。 **祠畢,班餘胙於奉祠者。** 車駕未到, 司空、大司農率太祝令及衆執 舊典先農又常列於郊 高四尺,方二丈。

四八二

太康 壇 東 南帷宫之外,去帷宫十丈。 九年,楊皇后躬桑于西郊,祀先蠶。 漢 親桑東郊苑中。 蠶室祭蠶神曰:「苑窳婦人,寓氏公主。」祠用 皇后未到,太祝令質明以一太牢告祠。 壇高一丈,方二丈,爲四 田陛, 陛廣 謁者 少牢。 一人監 五 尺。 晉武 祠。畢, 在採桑 帝

徹

一饌,班餘胙於從桑及奉祠

者。

魏 文帝黃初二年六月庚子,初禮五嶽四瀆,咸秩羣祀,瘞沈珪璋。 六年七月,帝以舟軍

入淮 魏 九月 明 帝 太和 壬戌 四年八月,帝東巡,遣使者以特牛祠 ,遣使者沈璧于淮,禮 也 中嶽 禮

也。

魏 完 帝 咸熙 元年,帝行幸長安 ,遣使者以壁幣禮 華山 禮 也。

不作,而 嶽, 盡 在 天柱,在王略之內,舊臺選百石吏卒,以奉其職。 得 經 望于山 此 晉穆帝 記,所謂 大川 風 雨寒暑)|| 之祠。 升平中,何 有 ,編于羣神。 其 、舉之,莫敢廢也。 见 而 時。 E 琦 立之祀,〔圖可 論 降逮三代,年數 修 故 五. 日『因名山升中于天』。 嶽 祠曰:「唐、虞之制 及秦 以闕哉 漢都 雖殊, 西京,涇、渭長 自永嘉之亂,神州 Mi 中興之際,未有官守,廬江郡常遣大吏兼 其禮 ,天子五 所以 不易。 昭 水,雖 告神 載 Ŧi. 嶽 巡狩,省時之方,柴燎压 祇、饗報功德。 傾 木 視 覆、茲事 在 三公,四瀆 祀 典,以近 ·替矣。 視 是以 諸 咸陽,故 唯灊之 候,著 災 属

其廢 名,則 俎 宜 公私 修 豆 四 舊 牲 尙 奔蹙,「影」漸以滋繁。 . 時禱賽,春釋寒而冬請冰。 咸和迄今,已復墮替。 淫 牢 典。 唇之鬼,推其糜 一,祝嘏 崇明前典,將俟皇輿北旋, 嶽 瀆 文辭,舊章靡記。 之域,風 人費,則 教所被,來蘇之人,咸蒙德澤,而 良由頃 四民之蠹。〔三而 可 國家多難,日不 令 禮官作式,歸諸 稽古憲章,大釐制度。 Щ 暇給,草]]] 大 神 誠 計今非典之祠,可謂非一。 簡 ,更爲簡 建廢滯 神 祇 以達 其五嶽 禋 祀, 事 闕, 明德馨香, 禮俗 有未遑。 未之或 四瀆宜遵修之處,但 頹紊, 甄, 如 今元憝已殲, 斯而 巡 人 狩柴燎, 神 考其正 雜 其

、孽,可

依

俾邪

正不瀆。」不見省。

赤璋 例。 奠之日,又 諸妖 者 中葉,儀漏 也。 瀆,以 纁 令以兼太常持節奉使,牲用太牢,加以璋幣,器用陶匏, 又名山著珪幣之異,大冢有嘗禾之加。 宋 幣。 今皇 孝武帝大明七年六月丙辰,有司 質 典文。 用 粗 風 又鬯人之職,『凡山 、表誠,器尙 何器。」殿中郎丘景先 緬 法令、「是」先去其甚。 暢,輝祀 尋 姬典事繼宗伯,漢載持節侍祠 陶匏,籍 通嶽,愚謂宜使以 JII 以 四 茅席, 議:「修祀 方用 奏「韶奠祭霍山,未 近可 蜃』,則盛 太常持節,牲以太牢之具, 川嶽 Щ 依 海 準。 祠霍山 ,道光列代,<u>差</u>秩 • 酒 血祭 當以蠡杯,其餘器用,無所 Щ JI 埋沈 ,以太牢告玉 以兆, 審應奉使何官? 時不復用 ",經垂 宜爲壇域。」 (珪璋) 義昭 明範,酒脯牢 一,此準 羞 蜃, 用 酒 宜 剪 聯 參議景先 用 同 脯 記 册 何牲饌? 取 郊 時 具,悉 傳 說。 祀, 穀 ,其 但 以爵 議 業 按 禮 有 可 進 郊 以 矌

志

獻。凡肴饌種數,一依社祭爲允。詔可。

于社稷山川。 晉武帝咸寧二年春,久旱。四月丁巳,〔兲〕詔曰:「諸旱處廣加祈請。」五月庚午,始祈雨 六月戊子,獲澍雨。 此雩榮舊典也。

隳廢,舊居之廟,毁而不修,褒成之後,絕而莫繼,闕里不聞講頌之聲,四時不覩烝嘗之位, 命魯郡修舊廟,置百戶吏卒,以守衞之。」 斯豈所謂崇化報功,盛德百世必祀者哉!〔云〕其以議郎孔羨爲宗聖侯,邑百戶,奉孔子祀。 宗其文以述作,仰其聖以成謀。茲可謂命世大聖,億載之師表者也。以遭天下大亂,百祀 運,乃退考五代之禮,修素王之事,因魯史而制春秋,就太師而正雅、頌,俾千載之後,莫不 太康三年四月、十年二月、又如之。是後修之至今。 魏文帝黃初二年正月,詔曰:「昔仲尼資大聖之才,懷帝王之器,當衰周之末,無受命之

晉武帝泰始三年十一月,改封宗聖侯孔震爲奉聖亭侯。又詔太學及魯國四時備三牲以

祀孔子。

明帝太寧三年,韶給事奉聖亭侯孔亭四時祠孔子,祭宜如泰始故事。 亭五代孫繼之博

塞無度,常以祭直顧進,替慢不祀。宋文帝元嘉八年,有司奏奪爵。至十九年,又授孔隱之。 年,又以孔邁爲奉聖侯。 兄子熙先謀逆,又失爵。二十八年,更以孔惠雲爲奉聖侯。 後有重疾,失爵。 孝武大明一

魏齊王正始二年三月,帝講論語通,五年五月,講尚書通,七年十二月,講禮記通,四日

並使太常釋奠,以太牢祀孔子於辟雍,以顏淵配。

年七月,帝講孝經通,並釋奠如故事。 孔子,以顏淵配。成帝咸康元年,帝講詩通,穆帝升平元年三月,帝講孝經通,孝武寧康三 康三年,皇太子〕講論語通,四三元帝太興三年,皇太子講論語通,太子並親釋奠,以太牢祠 晉武帝泰始七年,皇太子講孝經通,咸寧三年,講詩通,太康三年,〔講禮記通,惠帝元

穆帝、孝武並權以中堂爲太學。

宋文帝元嘉二十二年四月,皇太子講孝經通,釋奠國子學,如晉故事

漢 東海恭王薨,明帝出幸津門亭發哀。魏時會喪及使者弔祭,用博士杜希議,皆去玄

冠,加以布巾。

志第七 禮四

魏武帝少時,漢太尉橋玄獨先禮異焉。 故建安中,遣使祠以太牢。

文帝黃初六年十二月,過梁郡,又以太牢祠之。

黄初二年正月,帝校獵至原陵,遣使者以太牢祠漢世祖

宋文帝元嘉二十五年四月丙辰,車駕行幸江寧,經司徒劉穆之墓,遣使致祭焉。

孝武帝大明三年二月戊申,行幸籍田,經左光祿大夫袁湛墓,遣使致祭。

大明 五 年九月庚午,四三車駕行幸,經司空殷景仁墓,遣使致祭。

大明七年十一月,南巡。 乙酉,遣使祭晉大司馬桓溫、征西將軍毛璩墓。〔日〕

於禪 賴。 今若盡從**人心**,則瀆而無典,建之京師,又逼宗廟。 此聖懷所以惟疑也。 已來,小善小德, 曰:[置] 昔周 而言事者或以爲可立於京師,乃從人意,皆不納。 劉禪景耀六年,詔爲丞相諸葛亮立廟於沔陽。 而烝嘗 止 一於私門,廟象闕 而圖 人懷邵伯之美,甘棠爲之不伐,越王思范蠡之功,鑄金以存其象。 .形立廟者多矣;況亮德範遐邇,勳蓋 而 莫立,百姓巷祭,戎夷野祀,非所以存德念功,述追在昔也。 先是所居各請立廟,不許,百姓遂私祭 步兵校尉習隆、中書侍郎向充等言 一季世,興王室之不壞,實斯 愚以爲宜因近其 自漢 人是 興

於是從之。何承天曰:「周禮:『凡有功者祭於大烝。』故後代遵之,以元勳配饗。 ,立之於沔陽,使屬所以時賜祭。凡其故臣欲奉祠者,皆限至廟。 斷其私祀,以崇正禮。」 充等會不

是式,「器」禪又從之,並非禮也。」

典 敢設非禮之祭,巫祝之言,皆以執左道論,著于令。」明帝青龍元年,又詔:「郡國 祀 目 帝爲濟南相,皆毁絕之。 及秉大政,普加除翦,世之淫祀遂絕。 者,勿祠 典。叔世衰亂,回引崇信巫史,至乃宮殿之內,戶牖之間,無不沃酹,甚矣其惑也。 先王制 漢時城陽國人以劉章有功於漢,爲之立祠。靑州諸郡,轉相放效,濟南尤盛。 禮,所以昭孝事祖,大則郊社,其次宗廟,三辰五行,名山川澤, 至文帝黃初五年十一月,詔 非此族也,不在 山川 自今其 不 至魏武 在 祀

敬而遠之,徒偸以求幸,妖妄相扇,舍正爲邪,故魏朝疾之。 報陰陽之功,而當幽明之道故也。 人者,必 而 無娘 晉武帝泰始元年十二月,詔:「昔聖帝明王,修五嶽、四瀆,名山川澤,各有定制。所以 詞,「鼠」是以其 有 其報,而妖淫之鬼,不亂其間。」二年正月,有司奏「春分祠厲殃及禳祠。」詔曰: 人敬愼幽冥,而淫祀 然以道莅天下者,其鬼不神,其神 不作。 末代信道不篤,僭禮 其按舊禮,具爲之制,使功著於 不傷 瀆 神,縱欲 人也。 故祝 祈請,曾 史薦 不

不在祀典、除之。」

Щ 國 一、大都督、中外諸軍事,加殊禮,鍾山王。 祠,所在山川,漸皆修復。明帝立九州廟於雞籠山,大聚羣神。 宋武帝永初二年,普禁淫祀。 由是蔣子文祠以下,普皆毁絕。 蘇侯驃騎大將軍。 四方諸神、咸加爵秩 蔣侯宋代稍加爵,位 孝武 孝建 初,更修起蔣 至相

郡縣多不奉行。 漢安帝元初四年,詔曰:「月令,『仲秋,養衰老,授几杖,行糜鬻』。方今八月案比之時, 雖有糜鬻,糠秕泥土相和半,不可飲食。」按此詔,漢時猶依月令施政事也。

校勘記

一〕宋文帝元嘉三年五月庚午 按是月己卯朔、無庚午。

博士郁 議 按時有博士傅郁、嚴可均全宋文收此議在傅郁名下。

則 以 祀前 「訪」各本並作「方」,據周禮夏官大司馬職文改。

29 昭 穆合藏於二桃之中 各本並作「昭穆合藏於祕中」,據禮記祭法鄭玄注原文訂正。

皆升合食太祖 「太祖 」各本並作「太廟」、據公羊傳原文訂正。

[六] 如有可準 各本並脱「可準」二字、據通典禮典補

[七] 上特制義服 「上」各本作「正」,據通典禮典改。

- [个] 孝武皇帝室 各本並脱「室」字,據通典禮典補。
- 左僕 射劉秉等七人同匪子 劉 秉」各本並作「劉康」,按時無左僕射名劉康者。蓋是劉秉之譌。

秉爲左僕射見長沙景王道憐傳孫秉附傳。

- 其書之金策 各本 並脫「之」字,據三國志魏志明帝紀、晉書禮志、元龜六二補
- [11] 雖臣不殤君 各本並脫「臣」字,據通典禮典補。
- [1三] 大明四年丁巳 有日無月,各本並同。
- 二言 慈母妾母不世 祭 「世」各本並作「代」,蓋唐人避諱所改,今據禮記喪服小記原文改正。
- 國臣從權 制除釋而 靈筵猶存 不釋 而」各本並作「而釋」。 孫彪宋書考論云: 「『而』字疑在『釋』

字下,屬下句。」按孫說是,今乙正。

- [1吾] 萶親服除 「除」字下各本並衍「之」字,據通典禮典删。
- [1六] 爲但入新廟而已 各本並脫「爲」字,據通典禮典改。
- [14] 遇四時便得祭不 各本並脫「得」字,據通典禮典補。
- 孝王 一廟依 廬陵等國例 「廬陵」下,各本並有「平王」二字,據通典 (禮典 删
- 二國以王 一有衡陽 王服今年內不祠尋國未有嗣王三卿主祭 各本 並脱「有衡陽 王」以下十六字,

據通典禮典補。

志第七 校勘記

所祭者亡服則祭 「則祭」各本並作「則不祭」。 按禮記會子問原文作「所祭於死者無服則祭」。

朱志蓋衍「不」字,今删去。

三二 則應祭三月 孫彬宋書考論云:「『則應祭三月』,又當云『不祭』,有『不』字。」

宜存繼 嗣 各本並作「實存承嗣」,據通典禮典改。

故教民美報焉

蓋唐人諱改。 據禮記郊特性原文改正。

各本並作「故敎人美報焉」。

其幷二社之祀 「祀」各本並作「禮」,據晉書禮志、通典禮典、元龜三二下及五七四改。

至 躬耕 也者 各本並脱「躬耕」二字、據晉書禮志補

三 太社天子爲民而 祀 「民」各本及通典禮典並作「人」,晉書禮志、元龜五七四作「百姓」。 蓋後人

爲 唐 諱所 改、沈約原文當作「民」。今復改回。

臣出 不立二社 之明義也 各本並脱「立」字,據通典禮典、元龜五七四 補。

苟可 舉 社 以 明 稷 此句各本脫去。 據晉書禮志、通典禮典、元龜 五七 四補。

(三元) 各割 其 方 色土 一者覆四 方也 「土」各本並作「王」、據通典禮典改。

劉 寔 與 咸 議同 各本 並脫「議」字、據晉書禮志 補

其 便 仍 舊 便 一各本 並作「使」,據晉書禮志、 ·通典 {禮 {典 改。

明祀惟辰 「祀」各本並作「祝」,據晉書禮志、元龜五七四改。

晉元哀帝並欲籍田而不遂 「晉元」各本作「晉武」,今從局本。據本書禮志一載,晉武帝曾親耕

籍 田、元帝、哀帝並欲籍田而 不遂。

而正立之祀 「祀」各本並作「禮」,據晉書禮志、元龜五七五改。

則四民之蠢 「四民」各本並作「四人」。 晉書禮志、通典禮典、元龜五七五作「百姓」。 蓋沈約本

作「四民」,後人以唐諱追改。今改回

公私奔蹙 「私」各本並作「以」、今從局本。

可粗依法令 「粗」百衲本作「伹」、嘉靖本、北監本、毛本、殿本、局本作「倶」。 通典禮典、元龜五

七五作「粗」。 按作「粗」是,今據改。

四月丁巳 按是月辛巳朔,無丁巳。

盛德百世必祀者哉 「百世」各本並作「百代」、蓋唐人避諱改追、非沈約原文。今據三國志魏志

文帝紀、 元龜四九改。

子荂嗣 「荂」三朝本、北監本、毛本、殿本作「莽」,局本作「荂」。按通典禮典作「孝」,注云:「翊

俱反」。 。 講 禮 記 通 當即「蓉」字之異文。今定作「荂」。 各本並脫「記」字,據晉書禮志補。

太康三年講 禮記通惠帝元康三年皇太子講 論語 通 各本脫「講禮記」以下十三字,據晉書禮

志

第

七

校

勘

記

}志 補

大明五年九月庚午 各本並脱「九月」二字。 '接孝武帝紀,大明五年九月丁卯,行經琅邪郡。

是庚午上脫「九月」二字,今補。是月甲寅朔,十四日丁卯,十七日庚午。

遣使祭晉大司馬桓溫征西將軍毛璩墓 各本並脱「大」字。據晉書桓溫傳補

「向充」各本並作「向允」,

據三國志蜀志諸葛亮傳裴

注引襄陽記、通典禮典、元龜五九六改。

步兵校尉習隆中書侍郎向充等言於禪曰

充等曾不是式 「充」各本並作「允」,據通典禮典、元龜五九六改。

【四七】 叔世衰亂 「世」各本並作「代」、據三國志魏志文帝紀改。

故祝史薦而無魏詞

各本並脱「祝」字、據晉書禮志、通典禮典、元龜 一五九補。

宋書卷十八

志第八

禮五

典, 令,辨定衆儀,徐廣車服注,略明事目,並行於今者也。 司馬彪輿服志詳之矣。 秦滅禮學,事多違古。 漢初崇簡,不存改作,車服之儀,多因秦舊。 魏代唯作指南車,其餘雖小有改易,日日不足相變。 故復敍列,以通數代典事 至明帝始乃修復先 晉立服制

在唐典。 輿,服牛乘馬,以利天下。 斗魁方杓曲攜龍角,爲帝車,曲其輈以便駕。 上古聖人見轉蓬,始爲輪,輪行可載,因爲輿。任重致遠,流運無極。 夏建旌旗,以表貴賤。 奚仲乃夏之車正,安得始造乎。系本之言非也。「車服以庸」,著 周有六職,百工居其一焉。 系本云:「奚仲始作車。」案庖羲畫八卦 一器而羣工致其巧,車最居多。 後代聖 而 人觀北 為大

志

祀,金路,建大旂以賓,象路,建大赤以朝,革路,建大白以戎,木路,建大麾以田。 明堂位日: 以象列宿。 有玉、金、象、革、木。五者之飾,備於考工記。 根車,殷人制爲大路。 [三]「鸞車,有虞氏之路也。 玉、金、象者,飾車諸末,因爲名也。 禮緯曰:「山車垂句。」句, 大路,殷路也。 輿方法地、蓋 曲也。 革者漆革,木者漆木也。 玉路, 乘路,周路也。」殷有山車之瑞,謂桑 言不揉治而 |圓象天,輻以象日月,二十八弓 自曲也。 周之五路,則 建大常以 黑色,夏

飛輪 龍,駕六黑馬,施十二鸞,金爲叉髦,插以翟尾。又加氂牛尾,大如斗,置左騑馬軛 軛,鸞雀立衡,虡文畫轅,翠羽蓋黃裏,所謂黃屋也。 謂乘殷之路者也。禮論輿駕議曰:「周則玉輅最尊,漢之金根,亦周之玉路 所尙也。 金根車,輪皆朱斑,重轂兩轄,飛幹。 轂外復有轂,施轄,其外復設轄,施銅貫其 五色安車、五色立車各五乘。 曰:「重輪貳轄,疏轂飛軨。」飛幹以赤油爲之,廣八寸,長三尺注地,[三] 左纛輿也。 也。 秦閱三代之車,獨取殷制。古曰桑根車,秦曰金根車也。 以金薄繆龍,四為輿倚較。 路 如周玉路之制。 建龍旂,駕四馬,施八鸞,餘如金根之制,猶周金路也。 應劭漢官鹵簿圖,乘輿大駕,則御鳳皇車,以金 較在箱上。 金華施橑末,建大常十二旒, 漢氏因秦之舊,亦爲乘輿,所 也。 繋兩 文虎伏軾,龍首銜 也。」漢制, 軸頭, 中。 根 爲 畫日 上,所謂 [四] 謂之 副。 東京賦 其車 月升 乘輿 又

前 乘。 各 ,試橋道。 如方色,所謂五時副車,俗謂爲「五帝車」也。江左則闕矣。 叉 有建 華蓋九重。 晉江左駕猶有之。 甘泉鹵簿者, 凡婦人車皆坐乘,故周禮王后有安車而王無也。 道車五乘,游車九乘,在乘輿車前。 白馬者,朱其鬣,安車者,坐 又有象車,最在 漢制乘與

乃有之。

侯駕五 而已。 天 夫之儀。 子亦駕六。 天子所御駕六,其餘副車皆駕四。 卿駕四,大夫三, 周禮 晉先蠶儀,皇后安車駕六,以兩轅安車駕五爲副。 ,四馬爲乘。 士二,庶人一。」楚平王駕白馬。 毛詩、「天子至大夫同駕四、士駕一」。袁盎諫漢文馳六飛。魏時 案書稱朽索御六馬。 梁惠王以安車駕三送淳于髡,大 逸禮王度記曰:「天子駕六,諸 江左以來,相承無六,駕四

赤族 出,五路各有所主,不俱出也。 載其 金路,建大青旂,十有二旒,駕玄馬四,羽葆蓋,以賓。 金根 ,十有二旒,以卽戎。 形段,並依擬玉路,漆樓畫,羽葆蓋,象飾 ,而赤漆嶙畫,玉飾諸末,建靑旂,十有二旒,駕玄馬 宋孝武大明三年,使尚書左丞荀萬秋造五路。 木路,建赤麾,以田。 大明中,始制五路俱出。 諸末,建立赤旂,十有 象、革駕玄,木駕赤,四馬。 禮圖,玉路,建赤旂,〇〇無蓋,改造依擬 象、革、木路、周官、輿服志、 四, 親耕籍田,乘三蓋車,一 施羽葆蓋, 二旒,以 以祀。 視 舊 朝。 有 卽 名芝車,又 大 ·禮 圖 以 革路,在 事 金 丁,法駕 根爲 並 示 建

志

名耕 根車、置耒 和於軾· 上。

戎 車 立 乘,夏日鉤車,殷日寅車,周日元戎。 建牙麾,邪注之,載金鼓羽幢,置甲弩於

軾

獵 車,輞幰,輪畫繆龍繞之。 一名蹋猪車。 魏文帝改曰蹋虎車。

王爲相, 焉。 回,未常移變。 車雖 說。 造。 鬼谷子云:「鄭人取玉,必 安帝義熙十三年,宋武帝平長安,始得此 回曲步驟,猶須人功正之。 回轉,所指不移。 漢末喪亂,其器不存。 指 明帝青龍 南車 命造之焉。 · 其始周公所作,以送荒外遠使。 中,令博士馬鈞更造之而車成。 晉代又有指南舟。 車成,使撫軍丹陽尹王僧虔、 大駕鹵簿,最先啓行。 載司 魏高堂隆、秦朗, 南,爲其不惑也。」至于秦、漢,其制 范陽人祖沖之,有 索虜拓跋燾使工人郭善明造指南車,彌年不就。 此車戎狄所制,機數不 車。 地域平漫、迷於東西、造立此車、使常知南北。 皆博聞之士,爭論於朝,云無指南車,記者虛 晉亂復亡。 其制如 巧思,常謂宜 御史中丞劉休試之。 鼓車,設木人 石虎使解飛,姚興使令狐生又造 更構 無聞。後漢張衡始復 精, 造。 於車上,舉手指南 其制甚 雖曰指南,多不審 宋順 帝昇 精, 明末,齊 百屈 扶風 人 創 千

馬岳又造,垂成,善明酖殺之。

記里車,未詳所由來,亦高祖定三秦所獲。制如指南,其上有鼓,車行一里,木人輒擊

槌。 大駕鹵簿,以次指南

亦得乘之乎? 輓り 一昔桀乘 或駕果下馬。 魏、晉御 輦 車 人車、豈此邪!然則輦夏后氏末代所造 周禮 小出,常乘馬,亦多乘輿車。 未知 王 |后五路之卑者也。 漢成帝欲與班婕妤同輦是也。 何代去其輪。 傅玄子曰:「夏曰余車,殷曰胡奴,周曰輜車。」輜車,即輦 后宮中從容所乘,非王車也。 輿車,今之小輿。 也。 後漢陰就外戚驕貴, 井丹譏陰就乘人,而不云僭上,豈貴臣 漢制乘輿御之, 亦輦。 井丹譏之日 或使人

也。

江左 公。 小平蓋,加 杠,餘則靑蓋杠云。 晉氏又有四望車,今制亦存。 御出,又載儲偫之物。 犢 軍,輧 通慢,如軺 車 之流 也。 車, 漢諸侯貧者乃乘之,其後 而駕 漢代賤軺車而貴輜輧 馬。 又漢制,唯賈人不得乘馬車, 又以雲母飾犢 車,謂之雲母車, 魏、晉賤輜輧而 轉見貴。 孫權云「車中八牛」,卽犢車 其餘皆乘之矣。 貴 臣下不 (軺車。 得乘,時以賜王 叉 有 追鋒 除吏赤蓋 車,去 也。

輜。 皇后法駕乘 |馬,左右騑。 湯禮 應劭漢官,明帝永平七年,光烈陰皇后葬,魂車,鸞路靑羽葢,駕駟馬,龍旂 王后亦有五路,重翟、厭翟、安車、翟車、輦車,凡五 重翟 羽葢金根車,駕靑交絡,〔4〕青帷裳,雲虡畫轅, 其非 **法駕則紫 罽輧車**。 按字林,輧車有衣蔽,無後轅。 也。 黄金塗 漢制, 五. 太皇太后、皇太后、 末, 其有後轅者謂之 葢 九旒, 爪 施 金華, 前 有

志

鳳皇車,大將軍妻參乘,太僕妻、御女騎夾轂,此前漢舊制也。

副。 馬爲副。 九嬪世婦軿車,駕二。宮人輜車,駕一。王妃、公侯特進夫人、封君阜交絡安車、行む 晉先蠶儀注,皇后乘油畫雲母安車,駕六騩馬。 公主油畫安車,駕三。三夫人青交絡安車,〔5〕駕三。皆以紫絳罽 輧 車,駕三爲 騩,淺黑色也。 油畫兩轅安車,駕五騩

漢制,貴人、公主、王妃、封君油輧皆駕二,右騑而已。

旒,畫降龍。 **櫖文畫轅,黃金塗五末。[10]皇子爲王,錫以此乘,故曰王靑蓋車。** 漢制,太子、皇子皆安車,朱斑輪,倚虎較,伏鹿軾,黑櫖文畫蕃,青蓋,金華施橑末,黑 皇孫乘綠蓋車、江山亦駕三。魏、晉之制,太子及諸王皆駕四。 皆左右騑駕,五旂,旂九

駕二,右騑。 旒,卿五旒,皆降龍。公卿中二千石二千石郊陵法駕出,皆大車立乘,駕四。 列侯安車,朱斑輪、倚鹿較、伏熊軾、黑蕃者謂之軒,阜繒蓋,駕二,右騑。 駕二,右騑。 晉元帝太興三年,太子釋奠。詔曰:「未有高車,可乘安車。」高車,即立乘車也。 晉令,王公之世子攝命治國者,自己安車,駕三,族七旒,其侯世子,五 他出乘安車。 其去位致仕,皆賜安車四馬。 中二千石皆阜蓋、朱蕃,銅五末, 王公旂八旒,侯七 後導從 大車, 公及

傳暢故事,三公安車,駕三。特進駕二。卿一。漢制,公、列侯、中二千石、二千石夫人

會廟 晉武帝太康四年,詔依漢故事,給九卿朝車駕及安車各一乘。 及蠶,各乘其夫之安車,右騑,加阜交絡,帷裳皆阜。曰即非公會,則乘漆布輜輧, 傅暢故事,尚書令軺車, 銅五

黑耳後戶。

僕射但後戶無耳。中書監令如僕射。

傍也。 置 整車騎,所謂護駕也。春秋上陵,尤省於小駕。直事尚書一人從,其餘令史以下皆從行,所 前,比於省中。每出警蹕淸道,建五旗。太僕奉駕條上鹵簿,尚書郞侍御史令史皆執注以督 駕,減損副車也。前驅有九斿雲罕,自己皮軒鸞旗,車皆大夫載之。鸞旗者,編羽旄列繁幢 侍中參乘。屬車三十六乘。凡屬車皆阜蓋赤裏。 甘泉用之。都洛陽,上原陵,又用之,大喪又用之。 古者諸侯貳車九乘,秦滅九國,兼其車服,故八十一乘也。漢遵弗改。漢都長安時,祠天於 謂先置也。 旄頭雲罕。 曰:「齊侯田獵單弋,百姓苦之。」單罕本施遊獵,遂爲行飾乎? 次言瓊鈒雲罕。 漢制,乘輿御大駕,公卿奉引,太僕御,曰巴大將軍 金鉦黃鉞,黃門鼓車,乘輿之後有屬車,尚書、御史載之。最後一車懸豹尾。 薛綜東京賦注以雲罕九斿爲旌旗別名,亦不辨其形。案魏命晉王建天子旌旗, 是知雲罕非旌旗也。 若罕爲旗,則岳不應頻句於九旗之下。 徐廣車服注以爲九族,於車九乘。 後漢祠天郊用法駕,祠宗廟用小駕。 法駕則河南尹、洛陽令奉引,奉車郞御, · 參乘,備千乘萬騎。 又以其物匹鈒戟,宜是今單網 潘岳籍田賦先敍五路九 雲罕疑是羅罕。 屬車八十一 豹尾以

灼然 「前有 彭推對曰:「秦國有奇怪,觸山截水,無不崩潰,唯畏旄頭,故虎士服之,則秦制也。」張華曰: 承天謂戰國並爭,師旅數出,懸烏之設,務察風祲,宜是秦矣。晉武嘗問侍臣:「旄頭何義? 叉云:「木牛,蓋取其負重而安穩也。」五旗纏竿,卽禮記德車結旌不盡飾也,戎事乃散之。 明 圓,因其象。 叉武車綏 彭 「有是言而事不經。臣謂壯士之怒,髮踊衝冠,義取於此。」擊虞決疑無所是非也。徐爰曰: 、張之說,各言意義,無所承據。 可 士師,則載 曉。 旌,垂舒之也。 爲得之。皮軒,以虎皮爲軒也。徐又引淮南子「軍正執豹皮以制正其衆。」禮記 又案周禮辨載法物,莫不詳究,然無相風、舉網、旄頭之屬,此非古制明矣。 星經,昴一 《虎皮」。乘輿豹尾,亦其義類乎? 五旗者,五色各一旗,以木牛承其下。 名旄頭,故使執之者冠皮毛之冠也。」 史臣案: 今結旌綏旌同, 而德車武車之所不建。 又木牛之義, 亦未 案天文畢昴之中謂之天街,故車駕以罼罕前引,畢方昴 何

輕車,古之戰車也。 輪輿洞朱,不巾不蓋,建矛戟幢麾,置弩於軾上,駕二。 射聲校尉

司馬東士載,以次屬車。

輿 臣 、相干者,蹕而止之也。 以 爲警者,警戒 渓渓 日:「出稱警,入稱蹕。」說者云,車駕出則應稱警,入則應稱蹕也,而今俱唱之。 史漢儀曰:「出稱警,入稱蹕。」說者云,車駕出則應稱警,入則應稱蹕也,而今俱唱之。 史 也。 蹕 者, 董巴、司馬彪云:「諸侯王遮迾出入,稱警設蹕。」 止行也。 今從乘輿而出者, 並警戒以備非常也。 從外而入乘

武 |剛車,有巾有蓋,在前爲先驅。 又在輕車之後爲殿也。 駕一。史記,衛青征匈奴,以

武剛車爲營是也。

自漢霍光、晉安平、齊王、賈充、王導、謝安、宋江夏王葬以殊禮者,皆大輅黃屋,載輼輬車。 身爲虎文,謂之布施馬。旣下,馬斥賣,車藏城北秘宮。今則馬不虎文,不斥賣,車則毀也。 采,析羽流蘇,前後雲氣畫帷裳,**櫖文畫曲蕃,長與車等**。 漢制,大行載輻輬車,四輪。其飾如金根,加施組連璧,交絡,四角金龍首銜璧,垂五 太僕御,駕六白駱馬,以黑藥灼其

晉令曰:「乘傳出使,遭喪以上,卽自表聞,聽得白服乘騾車,到副使攝事。」徐廣車服

注:「傳聞騾車者,犢車裝而馬車轅也。」又車無蓋者曰科車。 晉武帝時,護軍將軍羊琇乘羊車,司隸校尉劉毅奏彈之。

韶曰:「羊車雖無制, 猶非素

者所服。」江左來無禁也。

舊 有充庭之制,臨軒大會,陳乘輿車輦旌鼓於殿庭。 張衡東京賦云:「龍路充庭,鸞旗

拂霓。」晉江左廢絕。宋孝武大明中修復。

以作 衣裳, 上古寢處皮毛,未有制度。 爲 玄黃之服,以法乾坤上下之儀,觀鳥獸冠胡之形,制冠冕纓蕤之飾。 後代聖人見鳥獸毛羽及其文章與草木華采之色,因染絲綵 虞氏作

志

幘, 常所□□周之祭冕,繅采備飾,故夫子曰「服周之冕」,以盡美稱之。至秦以戰國卽天子位, **纘,采章彌文,夏后崇約,猶美黻冕。** 幘,五色紗裙,五梁進賢冠,遠遊冠,平上幘,武冠。其素服,白峽單衣。 山顏,黑介幘,絳紗裙,阜緣中衣。其拜陵,黑介幘,菚單衣。 赤皮蔽膝。蔽膝,古之韍也。 米、黼、黻之象,凡十二章也。 纓,口心衣阜上絳下,前三幅,後四幅,衣畫而裳繡,爲日、月、星辰、山、龍、華、蟲、藻、火、粉 明帝以公卿袞衣黼黻之文,擬於至尊,復損略之。晉以來無改更也。天子禮郊 滅去古制,郊祭之服,皆以袀玄。至漢明帝始採周官、禮記、尚書諸儒說,還備袞冕之服。魏 元嘉六年,奉朝請徐道娛表:「不應素幘。」詔門下詳議,帝執宜如舊。遂不改。 緗幘。晉哀帝初,博士曹弘之等儀:「立秋御讀令,不應緗幘。 則阜紗裙,絳緣中衣,至三絳袴袜,黑舃。 其臨軒亦袞冕也。 之始,嘉事之重者也。」「以太古布冠,齊則緇之。 二代,典制詳密,故弁師掌六冕,司服掌六服,設擬等差,各有其序。 平冕,今所謂平天冠也。[12] 阜表朱綠裏,廣七寸,長尺二寸,垂珠十二旒。 素帶廣四寸,朱裏,以朱緣裨飾其側。口也中衣以絳緣其領袖。 絳袴,絳襪,赤舃。未加元服者,[ll0]空頂介幘。其釋奠先聖, 咎繇陳謨,則稱五服五章。皆後王所不得異也。 夏曰毋追,殷曰章甫,周曰委貌,此皆三代 其朝服,通天冠,高九寸,金博 其雜服,有靑赤黃白緗黑色介 求改用素。」詔從之。 禮記冠義曰:「冠者禮 漢儀,立秋 廟,則黑介 以朱組 日 宋文帝 周監 獵 爲

與皮弁同制。 以下,九章也,卿衣華蟲以下,七章也。行鄉射禮,則公卿委貌冠,以阜絹爲之,形如覆杯, 上公、卿助祭於郊廟,自己皆平冕,王公八旒,卿七旒,以組爲纓, 進賢冠,前高七寸,後高三寸,長八寸,梁數隨貴賤,古之緇布冠也。 長七寸,高四寸。衣黑而裳素。其中衣以阜緣領袖。 色如其綬。 其執事之人皮弁,以鹿 文儒者之所服 王公衣山龍

皮爲之。

車服注 侍右貂。 也。 堅剛,百鍊不耗,蟬居高食潔,口在腋下,[三]貂內勁悍而外溫潤。」此因物生義,非 其實趙武靈王變胡,而秦滅趙,以其君冠賜侍臣,故秦、漢以來,侍臣有貂蟬也。 武冠、昔惠文冠、本趙服也、一名大冠。凡侍臣則加貂蟬。 稱其意曰:「北土寒凉,本以貂皮陾額,附施於冠,因遂變成首飾乎。」侍中左貂,常 應劭漢官曰:「說者以金取 徐廣 其 實

秦滅楚,以其君冠賜法官。 法冠,本楚服也。一名柱後,一名獬豸。說者云:「獬豸獸知曲直,以角觸不正者也。」

者 高 山冠,本齊服也。 名側注冠。秦滅齊,以其君冠賜謁者。 魏明帝以其形似通

天、遠遊,乃毀變之。

志 第

八

禮五

樊噲 冠,廣 九寸,制似平冕,殿門衞士服之。漢將樊噲常持鐵盾。 鴻門之會,項羽欲害

用者也。

漢王,乃裂裳以苞盾,戴入見羽。 漢承秦制,冠有十三種,魏、晉以來,不盡施用。 今志其施

幘者,古賤人不冠者之服也。 漢元帝額有壯髮,始引幘服之。 王莽頂禿,又加其屋也。

漢注曰:「冠進賢者宜長耳,今介幘也。 冠惠文者宜短耳,今平上幘也。[三]知時各隨所宜,

後遂因冠爲別。」介幘服文吏,平上服武官也。童子幘無屋者, 示未成人也。 又有納言幘

赤幘,對朝服,示威武也。 後收,又一重,方三寸。又有赤幘,騎吏、武吏、乘輿鼓吹所服。 宋乘輿鼓吹,黑幘武冠 救日蝕,文武官皆免冠,著

漢 制, 祀事五郊, 天子與執事所服各如方色; 百官不執事者, 自服常服以從。 常服,

衣也。

魏 秘書監秦靜曰「漢氏承秦,改六冕之制,俱玄冠絳衣而已。」晉名曰五時朝服, 有四

時朝服,又有朝服。

先儒 之制,未詳所起。近代車駕親戎中外戒嚴之服,無定色,冠黑帽,綴紫標。 弁服。」以韎韋爲弁,又以爲衣裳。 云:「韎,絳色。」今時伍伯衣。 凡兵事,總謂之戎。 尚書云:「一戎衣而天下定。」周禮:「革路以卽戎。」又曰:「兵 說者云,五霸兵戰,猶有綬紱、冠纓、漫胡,則戎服非袴褶 春秋左傳:「戎服將事。」又云:「晉郤至衣韎韋之跗。」注, 標以繒爲之,長四 事章

文武悉同。其畋獵巡幸,則唯從官戎服,帶鞶革,文官不下纓,武官脫冠。宋文帝元嘉中, 寸,廣一寸。腰有絡帶,以代鞶革。中官紫標,外官絳標。又有纂嚴戎服,而不綴標。 行留

巡幸蒐狩皆如之,救宫廟水火,亦如之。

漢制,太后入廟祭神服,紺上阜下,親蠶,靑上縹下,皆深衣。 深衣,卽單衣也。 首飾剪

氂幗。

衣,謂之禕衣。公主三夫人大手髻,七鎮,蔽髻。九嬪及公夫人五鎮。世婦三鎮。公主會 上下。自皇后至二千石命婦,皆以蠶衣爲朝服。 公特進列侯夫人、卿校世婦、二千石命婦年長者,紺繒幗。佐祭則阜絹上下。助蠶則靑絹 見,大手髻。其長公主得有步搖。公主封君以上皆帶綬,以采組爲繉帶,回己各如其綬色。 晉先蠶儀注,皇后十二奠,步搖,大手髻,衣純靑之衣,帶綬佩。今皇后謁廟服袿獨大 |漢制,皇后謁廟服,紺上阜下。 親蠶,靑上縹下。 首飾,假髻,步搖,八雀,九華,加以翡

黄色。 非兵器,敬非戰儀,於是解去佩韍,留其繫襚而已。曰為秦乃以采組連結於襚,轉相結受,謂 而 劉 . 玄組綬,公侯山玄玉而朱組綬,卿大夫水蒼玉而緇組綬,士佩瓀玟而縕組綬。」縕,赤 綬者,所貫佩相承受也。上下施**韍如蔽膝**,貴賤亦各有殊。五霸之後,戰兵不息,佩 向曰:「古者天子至于士,王后至于命婦,必佩玉,尊卑各有其制。」禮記曰:「天子佩

佩,粲所制也。皇后至命婦所佩,古制不存,今與外同制,秦組綬,仍又施之。 漢承用之。 至明帝始復制佩,而漢末又亡絕。 魏侍中王粲識其形,乃復造焉。 今之

白蛇。 又帶劍也。 漢制,自天子至于百官,無不佩刀。司馬彪志具有其制。 售不疑云:「劍者、君子武備。」張衡東京賦、「行黃組、腰干將。」然則自人君至士人、 自晉代以來,始以木劍代刃劍。 漢高祖爲泗水亭長,拔劍斬

麟 稱,又獨以玉,臣下莫得用。」漢制,皇帝黃赤綬,四采,黃、赤、縹、紺。 也。」漢注曰:「璽,印也。自秦以前,臣下皆以金玉爲印,龍虎紐,唯所好。 弟石虎死,胡亂,晉穆帝代,乃還天府。<u>虞喜志林曰:「傳國璽,自在六璽之外,天子凡七璽</u> 斬白蛇劍,晉惠帝武庫火燒之,今亡。晉懷帝沒胡,傳國璽沒於劉聰,後又屬石勒。 壽昌」。高祖佩之,後代名曰傳國璽。 於禮,士綬之色如此,後代變古也。吳無刻玉工,以金爲璽。孫晧造金璽六枚是也。又有 天子信璽。」此則漢遵秦也。初高祖入關,得秦始皇藍田玉璽,螭虎紐,文曰「受天之命,皇帝 鳳龜龍璽,駞馬鴨頭雜印,今代則闕也。 乘輿六璽,秦制也。 漢舊儀曰:「皇帝行璽,皇帝之璽,皇帝信璽,天子行璽,天子之璽, 與斬白蛇劍俱爲乘輿所寶。 傳國璽,魏、晉至今不廢。 皇后金璽,綬亦如之。 秦以來,以璽爲 及石勒

皇太子,金璽,龜紐,纁朱綬,四采,赤、黃、縹、紺。 給五時朝服,遠遊冠,亦有三梁進賢

冠。佩瑜玉。

諸王,金璽,龜紐,纁朱綬,四采,赤、黃、縹、紺。 給五時朝服,遠遊冠,亦有三梁進賢

冠。佩山玄玉。

服,武冠。 紺。綟,草名也,其色綠。 徒、司空,金章,紫綬。給五時朝服,進賢三梁冠。佩山玄玉。相國則綠綟綬,三采,綠、紫、 郡公,金章,玄朱綬。 佩山玄玉。 郡侯,金章,青朱綬。 大司馬、大將軍、太尉、凡將軍位從公者,金章,紫綬。給五時朝 給五時朝服,進賢三梁冠,佩山玄玉。太宰、太傅、太保、丞相、司 給五 一時朝服,進賢三梁冠。 佩水蒼玉

征虜、冠軍、輔國、龍驤將軍,金章,紫綬。給五時朝服,武冠。 驃騎、車騎將軍、凡諸將軍加大者,征、鎭、安、平、中軍、鎭軍、撫軍、前、左、右、後將軍, 佩水蒼玉。[三]

貴嬪、夫人、貴人,金章,文曰貴嬪、夫人、貴人之章。 紫綬。 佩于闐 玉。

淑妃、淑媛、淑儀、修華、修容、修儀、婕妤、容華、充華,銀印,文曰淑妃、淑媛、淑儀、修

靑綬。

佩五采瓊玉

皇太子妃,金璽,龜紐,纁朱綬。佩瑜玉。

華、修容、修儀、婕妤、容華、充華之印。

志第八 禮五

諸王太妃、妃、諸長公主、公主、封君、「云」金印、紫綬。 佩山玄玉

諸王世子,行己金印,紫綬。五時朝服,進賢兩梁冠。 佩 Щ [玄玉。

郡公侯太夫人、夫人、「圖〕銀印,靑綬。佩水蒼玉。

郡公侯世子,〔三〕銀印,靑綬。 給五時朝服,進賢兩梁冠。 佩水蒼玉。

侍中、散騎常侍及中常侍,給五時朝服,武冠。 貂蟬,侍中左,常侍右。[三]皆佩水蒼玉。

給五時朝服,納言幘,進賢兩梁冠。

佩水蒼玉

尙書令、僕射,銅印,墨綬。

尙書,給五時朝服,納言幘,進賢兩梁冠。佩水蒼玉。

中書監令、祕書監,銅印,墨綟綬。 給五時朝服,進賢兩梁冠。 佩水蒼玉。

光祿大夫、卿、尹、太子保、傅、大長秋、太子詹事,銀章, 青綬。 給五時朝服,進賢 (兩梁

冠。佩水蒼玉。

衛尉,則武冠。 衛尉,江左不置。 宋孝武孝建初始置,不檢晉服制,止以九卿皆文冠及

進賢兩梁冠,非舊也。

靑綬。

給五時朝服,武冠。

佩水蒼玉。

振威、奮威、揚威、廣威、建武、振武、奮武、揚武、廣武、左右積弩、强弩諸將軍、監軍, 司 隸校尉、武尉、左右衞、中堅、中壘、驍騎、游擊、前軍、左軍、右軍、後軍、 寧朔、 銀章, 建威、

領軍 ·、護軍、城門五營校尉、東南西北中郞將,銀印,靑綬。 給五時朝服,武冠。 佩水

蒼玉。

縣、鄉、亭侯,金印,紫綬。朝服,進賢三梁冠。

鷹揚、折衝、輕車、揚烈、威遠、寧遠、虎威、材官、伏波、凌江諸將軍,銀章,靑綬。 給五

時朝服、武冠。

水衡、典虞、牧官、典牧都尉、度支中郎將、校尉、都尉、 奮武護軍、安夷撫軍、護軍、軍州郡國都尉、奉車、駙馬、騎都尉、諸護軍將兵助郡都尉、 司鹽都尉、〔三〕材官校尉、王國中尉、

州刺史,銅印,墨綬。給絳朝服,進賢兩梁冠。

宜禾伊吾都尉、監淮南津都尉,銀印,青綬。

五時朝服、武冠。

御史中丞、都水使者,銅印,墨綬。給五時朝服,進賢兩梁冠。 佩水蒼玉。

謁者僕射,銅印,墨綬。 給四時朝服,高山冠。 佩水蒼玉

諸軍司馬,銀章,青綬。朝服,武冠。

給事中、黃門侍郎、散騎侍郎、太子中庶子、庶子,給五時朝服,武冠。

中書侍郎,給五時朝服,進賢一梁冠。

志第八 禮五

虎賁中郎將、羽林監,銅印,墨綬。 給四時朝服,武冠。 其在陛列及備鹵簿,鴟尾,絳紗

穀單衣。 **鴟鳥似雞,出上黨。** 爲鳥强猛,鬭不死不止。復著鶡尾。

北軍中候、殿中監、銅印、墨綬。給四時朝服、武冠。

護匈奴中郎將、護羌夷戎蠻越烏丸西域戊己校尉,銅印,靑綬。 朝服、武冠。

郡國太守、相、內史、銀章,青綬。朝服,進賢兩梁冠。 江左止單衣幘。 其加中二千石

者,依卿、尹。

牙門將,銀章,青綬。朝服,武冠。

騎都督、守,銀印,青綬。朝服,武冠。

尙書左右丞、祕書丞,銅印,黃綬。朝服,進賢一梁冠。

尙書秘書郎、太子中舍人、洗馬、舍人,朝服,進賢一梁冠。

黃沙治書侍御史,銀印,墨綬。 朝服,法冠。

侍御史,朝服,法冠。

關內、關中名號侯,金印,紫綬。朝服,進賢兩梁冠。

諸博士,給阜朝服,進賢兩梁冠。 佩水蒼玉

公府長史、諸卿尹丞、諸縣署令秩千石者、銅印、墨綬。朝服、進賢兩梁冠。江左公府

殊序。 章。 代有損益,何事棄盛宋之興法,追往晉之頹典。變改空煩,謂不宜革。」儉又上議曰:「自頃 傾百祀,韋舃不加,浩然惟舊。服爲定章,事成永則。其檢之所秉,會非古訓。靑素相因, 改尙沿物哉。夫邊貂假幸侍之首,賤幘登尊極之顏,一適時用,便隆後制。況朱裳以朝,緬 卑,則宜依公府玄衣之制。服章事重,禮儀所先,請臺詳服。」儀曹郎中沈俁之議曰:〔盡〕「制 **珪象德,損替因時,裁服象功,施用隨代。 車旗變於商、周,冠佩革於秦、漢,豈必殊代襲容,** 其署臺位者,悉宜著位之服,不在玄服之例。若署諸卿寺位兼府職者,雖三品,而卿寺爲 者職僚悉同降朝不領兵者。 載懷夕惕。 謹遵此制。 明文,積習成謬。 七,朝服,進賢一梁冠。晉官表注,亦與令同。而今長史、掾、屬,但著朱服而已,此則公違 長史無朝服,縣令止單衣幘。 :「春秋國語云:『貌者情之華,服者心之文。』巖廊盛禮,衣冠爲大。 若所上蒙允,**幷請班司徒**二府及諸儀同三府,通爲永準。又尋舊事,司徒公府領步兵 而自頃承用,每有乖違。 按晉令,公府長史,官品第六,銅印,墨綬,朝服,進賢兩梁冠。 其或有署臺位者,玄服爲疑。按於稱諸有兼官,皆從重官之例。 謂宜依舊制,長史兩梁冠,掾、屬一梁冠,並同備朝服。 主簿祭酒,中單韋爲並備,令史以下,唯著玄衣。 宋後廢帝元徽四年,司徒右長史王儉議公府長史應服朝服。 府職掌人,教四方是則。 臣居毗佐,志在當官,永言先典, 是故軍國異容, 中單章寫,率由舊 掾、屬,官品第 今府旣開公, 尋內官爲重, 內外

令違 叉議 後昆。 制,律 服章多闕,有違前準,近議依令文,被報不宜改革,又稱左丞劉議,『按令文,凡有朝服,今多 宜。 舊,臺據失以爲例,研詳符旨,良所未譬。 庭, 失,非所望於高議,申明舊典,何改革之可論。又左丞引令史之闕服,以爲鉉佐之明比。 旣革之餘 社 名位不同,禮 疑 長史、掾、屬,朱衣以就列。 文,庭廟闕典,或上降制書,下協朝議,何乃鉉府佐屬裳黻,稍改白虎之詔,斷宣室之疇 而 令條章,同規在昔。 用一 然則文存服損,非唯鉉佐,用捨旣久,卽爲舊章』。如下旨。 豈得因外府之乖謬,以爲盛宋之興典,用晉氏之律令,而謂其儀爲頹法哉。 遂改,今制 雲火從物,沿損異儀,帝樂五 又許令史之從省,咎達官之簡略。 文,臺據 舍,彌增其滯。 .數異等,令史從省,或有權宜,達官簡略,爲失彌重。 又主簿、祭酒,備服於王 永行 允 而 長用 之成典,良有期於無固,非所望於行迷。」參詳 若事有宜,必合懲改,則當上關詔書,下由朝議,縣諸日月,垂則 且佐非韋舄之職,吏本朝服之官, 也。 **筲異服殊,寧會矛盾之譬,討論疑制** 於是倫比,自成矛盾。 一殊,王禮三變,豈獨大宋造命,必咸仍於晉舊哉 當官 律苟可遵,固無辨於貴賤,規若必等,亦 而行,何强之有,制令昭然,守以無貳。」與之 此而可忍,孰不可安。 凡在班 伏尋皇宋受終,每因晉舊 並同 ,焉取强弱 列,罔不 儉,議 如 將引令以遵 逐寢 之辨。 何關 順違從 此蓋 府執 於 權 夫 前

諸軍長史、諸卿尹丞、獄丞、太子保傅詹事丞、郡國太守相內史、丞、長史、諸縣署令長

相、關谷長、王公侯諸署令、長、司理、治書、公主家僕,銅印,墨綬。 朝服,進賢一梁冠。江左

太子保傅卿尹詹事丞,阜朝服。 郡丞、縣令長,止單衣幘。

公車司馬、太史、太醫、太官、御府、內省令、太子諸署令、僕、門大夫、陵令,銅印,墨綬。

朝服,進賢一梁冠。

太子率更、家令、僕,銅印,墨綬。 給五時朝服,進賢兩梁冠。

黄門諸署令、僕、長,銅印,墨綬。 四時朝服,進賢一梁冠

黃門冗從僕射監、太子寺人監,銅印,墨綬。 給四時朝服,武冠。

司馬,銅印,墨綬。朝服,武冠。江左公府司馬無朝服,餘止單衣幘 公府司馬、諸軍城門五營校尉司馬、護匈奴中郎將護憲戎夷蠻越烏丸戊己校尉長史、

廷尉正、監、平,鲖印,墨綬。給阜零辟朝服,法冠。

北軍中候丞,銅印,黃綬。朝服,進賢一梁冠。 王郡公侯郎中令、大農,銅印,靑綬。朝服,進賢兩梁冠。

太子常從虎賁督、千人督、校督、司馬虎賁督、〔臺〕銅印,墨綬。 朝服,武冠。

殿中將軍,銀章,青綬。四時朝服,武冠。宋末不復給章綬。

水衡、典虞、牧官、典牧、材官、州郡國都尉、司馬,銅印,墨綬。 朝服、武冠。

志第八 禮五

諸謁者,朝服,高山冠。

門下中書通事舍人令史、門下主事令史,給四時朝服,武冠。

書監令僕省事史、秘書著作治書、主書、主璽、主譜令史、蘭臺殿中蘭臺謁者都水使者令史、 尚書典事、都水使者參事、散騎集書中書尚書令史、門下散騎中書尚書令史、錄尚書中

書令史,朝服,進賢一梁冠。江左凡令史無朝服。

節騎郎,朝服,武冠。其在陛列及備鹵簿,著鶡尾,絳紗穀單衣。

殿中中郎將校尉、都尉、黃門中郎將校尉、殿中太醫校尉、都尉,銀印,青綬。 四時朝

服,武冠。

關外侯,銀印,靑綬。朝服,進賢兩梁冠。

左右都候、閶闔司馬、城門候,銅印,墨綬。 朝服,武冠。

王郡公侯中尉,鲖印,墨綬。朝服,武冠。

部曲督護、司馬史、部曲將,銅印。 朝服,武冠。司馬史,假墨綬。

太中中散諫議大夫、議郎、郎中、舍人、朝服、進賢一梁冠。秩千石者、兩梁。

城門令史,朝服,武冠。江左凡令史無朝服。

諸門僕射佐史、東宮門吏,阜零辟朝服。僕射東宮門吏,卻非冠。佐史,進賢冠。

宮內游徼、亭長,阜零辟朝服,武冠。

太醫校尉、都尉、總章協律中郎將校尉、都尉,銀印,青綬。 朝服、武 冠。

小黃門,給四時朝服,武冠。

黄門謁者,給四時朝服,進賢一梁冠。 朝賀通謁時,著高山冠。

黄門諸署史,給四時朝服,武冠。

中黃門黃門諸署從官寺人,給四時科單衣,武冠。

殿中司馬、及守陵者、殿中太醫司馬,銅印,墨綬。 給四時朝服、武冠。

太醫司馬,銅印。朝服,武冠。

總章監鼓吹監司律司馬,銅印, 墨綬。 朝服。 鼓吹監總章協律司馬,武冠。 總章監司

律司馬,進賢一梁冠。

諸縣署丞、太子諸署丞、王公侯諸署及公主家丞,銅印,黃綬。 朝服,進賢一 一梁冠。

太醫丞,銅印。朝服,進賢一梁冠。

黃門稱憂、園监,同即,黃受。 合叫寺朔段,弐迁。 黃門諸署丞,銅印,黃綬。 給四時朝服,進賢一梁冠。

黄門稱長、園監,銅印,黃綬。 諸縣尉、關谷塞護道尉,銅印,黃綬。 給四時朝服 朝服,武冠。 、武冠。 江左止單衣幘

志第八 禮五

洛陽鄉有秩,至於銅印,靑綬。朝服,進賢一梁冠。

宣威將軍以下至裨將軍,銅印。 朝服,武冠。其以此官爲刺史、郡守、若萬人司馬虎賁

督以上、及司馬史者,皆假青綬。

平廣武猛中郎將、校尉、都尉、〔寻〕銀印。 朝服,武冠。 其以此官爲千人司馬虎賁督以

上、及司馬史者,皆假青綬。

別部司馬、軍假司馬、銀印。朝服、武冠。

圖像都匠行水中郎將、校尉、都尉,銀印,青綬。 朝服,武冠。 若非以工伎巧能特加此

官者,不加綬。 朝服,武冠。其長郎壯士,武弁冠。 羽林郎、羽林長郎、「三〇佩武猛都尉以上印者,假青綬。 在陛列及鹵簿,服絳穀單衣。 別部司馬以下,假墨

陛下甲僕射主事吏將騎、廷上五牛旗假使虎賁,在陛列及備鹵簿,服錦文衣,武冠,鶍

尾。陛長,假銅印,墨綬。旄頭。

羽林在陛列及備鹵簿,服絳科單衣,上著韋畫要襦。 假旄頭。

舉輦跡禽前驅由基强弩司馬、守陵虎賁,佩武猛都尉以上印者,假青綬。 別部司馬以

下,假墨綬。守陵虎賁,給絳科單衣,武冠。

殿中冗從虎賁、殿中虎賁、及守陵者持鈒戟冗從虎賁,佩武猛都尉以下印者,假青綬。

別部司馬以下,假墨綬。絳科單衣,至武武冠。

及備 食虎賁 鹵簿,五 持 ()佩武 推斧武騎虎賁、五騎傳詔虎賁、殿中羽林及守陵者太官尙食虎賁、稱飯宰人、諸宮尙 騎虎賁、服錦文衣、鷃尾。 猛都尉以上印者,假青綬。 宰人服離支衣 別 部司 馬 以下 ·,假墨 一綬。 給絳構,武 冠。 其在 陛 列

黄沙 朝服 故事 給絳構,武冠。 儀騶、虎賁常直 廊 黄門鼓吹、及釘官僕射、黄門鼓吹 大 下 誰士阜科單衣,樊噲冠。 守閣、謁 一殿黄雲龍門者、門下 南書門下虎賁羽林騶、蘭 者、錄事 威 儀翳、河隄謁者翳、諸官謁 衞士墨· 左右部虎賁羽林騶、 (史主事、諸官鼓吹、尙書廊下都坐門下守閣、 臺五 布構, 曹節 却敵冠。 藏 射 廊 者騶,絳構,武 給傳 凡此前衆 下守閣 事者諸導騶、 、威儀 職,江左多 冠。 發符翳、 門下 給其 不 備。又 衣 中書守閣 都 服, 水 殿中威 多闕 使者 自 如

之。 戊己校尉,皆不 諸假 諸 應給朝服佩玉, 印綬而 給 官不給鞶囊者,得自具作。 佩玉。 而不 其來朝會, 在京都者給朝服, 權時假給, 其但假印不假 非護烏丸羌 會罷輸還。 綬者,不 夷戎蠻諸校尉以 凡 應 朝 得 服 者,而 佩 上 官不給,聽 及 刺 史、 自具 西域

鞶,古制 也。 漢代著鞶囊者,側在腰間。 或謂之傍囊,或謂之綬囊。 然 則以 此囊盛綬

志第八 禮五

也。

或盛或散,

各有其時乎。

單衣一領。

簪導餉自副。 朝服一具,冠幘各一,絳緋袍、阜緣中單衣領袖各一領,革帶袷袴各一,舃、袜各一量, 四時朝服者,加絳絹黃緋靑緋阜緋袍單衣各一領,五時朝服者,加給白絹袍

領、黃豹、斑白蠅子、渠搜裘、步搖、八錢、蔽結、多服蟬、明中、欋白,又諸織成衣帽、錦帳、純 長七尺。 一銀器、雲母從廣一寸以上物者,皆爲禁物。 匹一尺,絹七尺五寸。給袴練一丈四尺,縑二丈。袜布三尺。單衣及褠袷帶,縑各一段, 諸受朝服、單衣七丈二尺、科單衣及構五丈二尺、中衣絹五丈、緣阜一丈八尺、領袖練 江左止給絹各有差。宋元嘉末,斷不復給,至今。山鹿、豽、柱豽、白豽、施毛狐白

得從故官之例。 幘、蒨、絳、金黃銀叉、鐶、鈴、鏑、鉺,履色無過純青。 諸去官及薨卒不祿物故,家人所服,皆 犀、瑇瑁、越疊、以銀飾器物、張帳、乘犢車,履色無過綠、靑、白。 奴婢衣食客,加不得服白 加不得服羅、紈、綺、穀,雜色眞文。騎士卒百工人,加不得服大絳紫襈、假結、眞珠璫珥、 服金奠、綾、錦、錦繡、七緣綺、貂豽裘、金叉鐶鉺、及以金校飾器物、張絳帳。第八品以下, 結、爵叉、假眞珠翡翠校飾纓佩、雜采衣、杯文綺、齊繡黼、鏡離、袿袍。 第六品以下,加不得 諸在官品令第二品以上,其非禁物,皆得服之。第三品以下,加不得服三奠以上、藏 諸王皆不得私作禁物,及罽碧校鞍,珠玉金銀錯刻鏤彫飾無用之物。

來 萌,知采椽不愜後代之心,不斷 重。 嘉 久矣。 .樹,其品非一,莫不植根深岨,致之未易。 是以上古聖王,采椽 漆牀 坐漆牀,居朱屋。 亦當是漢代舊儀,而 不斵, 史臣按左傳,丹桓宮之楹。 不爲將來之用,故加朱施漆,以傳厥後。 斵之則懼 漢儀不載。 刻桷彫楹,莫知其 藉地 尋所以必朱必漆者,其理 廣之資,因人多之力,則役苦費深,爲敝 何休注公羊,亦有朱屋以居。 、限也。 哲人縣鑑微遠, 有 散木凡材,皆可入 可言焉。 杜 夫珍 所從 漸 木 防 滋

殿屋之爲圓淵方井兼植荷華者,以厭火祥也。

用。

遠探

幽旨,將在斯乎。

伯子 代 頭復 以盛奏事 笏者 男卿 有 古者貴賤皆執笏,其有事則搢之於腰帶,所謂搢紳之士者, 白 有 筆,以紫皮裹之,名笏。 尹 事 ,負荷以行,未詳也。 及武官不簪。 則書之,故常簪筆, 加內侍位者,乃簪之。 朝服肩上有紫生袷囊,綴之朝服外,俗呼曰紫荷。 今之白筆, 是其遺象。 手板,則古笏矣。 三臺五省二品文官簪之。 搢笏 尙 書令 加 垂 一种带 、僕射、尚 也。 或云 書 王 紳 一公侯 手 垂 漢 板

以

幅巾為

雅。

是以袁紹、崔鈞之徒,雖爲將帥,皆著嫌巾。」

魏 文 彪 帝黃初三年,詔賜漢太尉楊彪几杖,待以客禮。 辭讓,不聽。 乃使服布單衣皮弁以見。 傅玄子 延請之日,使挾杖入朝。 日:「漢末王公名士,多委王服, 叉令著

貴賤。 板。 末妖賊以黃爲巾,時謂之「黃巾賊」。今國子太學生冠之,服單衣以爲朝服,執一卷經以代手 之爲善,因而弗改。」通以爲慶弔服。 居 魏 本施軍飾,非爲國容也。 武 士野人,皆服巾焉。 以天下凶荒,資財乏匱,擬古皮弁,裁縑帛以爲峽, 徐爰曰:「俗說峽本未有歧,荀文若巾之,行觸樹枝成歧,謂 市以葛爲之,形如峽,而橫著之,古尊卑共服 合乎簡易隨時之義,以色別其 也。 故漢

帝咸和 紗峽。 爲之。 其屋 徐爰曰:「帽名猶冠也。 後世 九年 然 則 云 士人宴居,皆著哈矣。 ·制,聽尙書八座丞郎 施幘於冠,因裁羅爲帽。 義取於蒙覆其首。 、門下三省侍郎乘車白帢低幘出 而江左時野人已著帽,士人亦往往而然,但其頂圓耳。後 自乘輿宴居,下至庶人無爵者,皆服之。」史臣案晉成 其本纚也。 古者有冠無幘,冠下有纚,以繒 入掖門。 叉二宮直官著烏

拜陵亦如之。 古者: 人君有朝服,有祭服,有宴服, 以單衣白裌爲弔服,修敬尊秩亦服之也。 有弔服。 **弔服皮弁疑衰,今以單衣黑幘爲宴會服,** 單衣,古之深衣也。 今單衣裁製與

深衣同,唯絹帶爲異。 深衣絹帽以居喪。單衣素帢以施吉。

又詔趙、樂安、燕王服散騎常侍之服。 晉武帝泰始三年,詔太宰安平王字服 侍中之服,賜大司馬義陽王望袞冕之服。 十年,賜彭城王袞冕之服

偽楚桓玄將篡,亦加安帝母弟太宰琅邪王袞冕服

快興以來,王公貴臣加侍中、散騎常侍,乃得服貂璫

也。

器服 愼假, 服制 强盛, 舒 胡 不得 冬不 伎不 宋孝武 雉 得 一裝飾,樂舞音容,通於王公,達于衆庶。 度,凡九條,表在義恭傳。上因諷有司更增廣條目。 九條之格,猶有未盡,謹共附益,凡二十四條。 剣、博 春秋明誠。 欲加減削。其年十月己未,大司馬江夏王義恭、驃騎大將軍竟陵王|誕表 跳登 得 尾。 綵 (孝建元年,丞相南郡王義宣,二年,雍州刺史武昌王渾,又有異圖。 劍 衣。 國殿,及夾侍國師傳令及油戟。 Щ 伎、緣大橦伎、 不得鹿 舞伎正冬著袿衣,不得莊 是以尙方所制,禁嚴漢律,諸侯竊服,雖親必罪。 盧形。 槊毦 升五案伎, 不得 孔雀白鷩。 自非正冬會奏舞曲,不得舞。 面蔽花。 上下無辨,民志靡一。〔四〕今表之所陳,實允禮 公主王妃傳令,不得朱服。 夾轂隊不得絳襖。平 聽事 正冬會不得鐸舞、 不得南向坐,施帳幷幡。 奏曰:「車服以庸,虞書茂典,名器 自頃以來,下僭彌盛 杯 乘 諸妃主 輿不得 柈 誕馬 舞。 不得 不得著袞帶。 重 世祖嫌侯王 改革諸王車 長 蕃 杠。 蹻伎、透 過二匹。 國官正 鄣扇

志

第

簿。 幢,軺車不在其限。 平乘舫皆平兩頭作露平形,不得擬像龍舟,悉不得朱油。 信幡,非臺省官悉用絳。 得過銀銅 不合稱臣,正宜上下官敬而已。 五花及豎筍形。若先有器物者,悉輸送臺臧。 無舉糾,並臨時議罪。」詔可。 諸王子繼體爲王者,婚葬吉凶,^[2]悉依諸國公侯之禮,不得同皇弟皇子。 為裝。自己諸王女封縣主、諸王子孫襲封王王之妃及封侯者夫人行,自己並不 郡縣內史相及封內官長,於其封君, 旣非在三, 罷官則不復追敬, 諸鎭常行,車前後不得過六隊,白直夾轂,不在其 書到後二十日期,若有竊玩犯禁者,及統司 車 帳鑄不得作 輿不 限。 得油 ·得鹵

車前五 百者,卿行旅從,五百人爲一旅。 漢氏一統,故去其人,留其名也。

蓋,登殿宜依廟齋以夾御,侍中、常侍夾扶上殿,及應爲王公興,又夾扶,畢,還本位。』求詳 議。」曹郎中徐爰參議:「宜如省所稱,以爲永准。」詔可。 乘輿法

國,三十六乘無所准,並不出經典。自邕、廣傳說,又是從官所乘,非帝者副車正數。江左 檢晉江左逮至于今,乘輿出行,副車相承五乘。」尚書令建平王宏參議:「八十一乘,義兼九 車服,故王者大駕屬車八十一 孝建三年五月壬戌,有司奏:「案漢胡廣、蔡邕並云古者諸侯貳車九乘,秦滅六國,兼其 乘。 尚書、御史乘之。 最後一車, 懸豹尾。 法駕則三十六乘。

五乘,儉不中禮。 案周官云:『上公九命,貳車九乘。 侯伯七命, 車七乘。 子男五命, 車五

乘。』然則帝王十二乘。」詔可。

通關 議:「周禮,后六服五路之數,悉與王同,則副車之制,不應獨異。 又記云:『古者后立六宮、 七大夫、八十一元士,以聽天下之外治。』鄭注云:『后象王立六宮而居之,亦正寢一,燕寢 五。』推所立每與王同,禮無降亦明矣。皇太后旣禮均至極,彌不應殊。謂並應同十二乘。」 三夫人、九嬪、二十七世婦、八十一御妻,以聽天下之內治。』『天子立六官、三公、九卿、二十 爲允。 大明元年九月丁未朔,有司奏:「未有皇太后出行副車定數,下禮官議正。」博士王燮之 詔可。

同冕』, 降千畝邪? 青紗袍。 遵二禮以爲定儀。」詔可。 駕籍田,宜冠冕,璪十二旒,朱紘,黑介幘,衣靑紗袍。 大明 尊故 侍中陪乘,奉車郎秉轡。』案漢輿服志曰:『通天冠,乘輿常服也。』若斯豈可以常服 四年正月戊辰,尚書左丞荀萬秋奏:「籍田儀注,『皇帝冠通天冠,朱紘,青介幘,衣 也。 禮記曰:『昔者天子爲籍千畝,冕而朱紘,躬秉耒耜。』鄭玄注周官司服曰:『六服 時服雖變,冕制不改。又潘岳 籍田賦云:『常伯陪乘,太僕秉轡。』推此,輿 常伯陪乘,太僕秉轡。宜改儀注,一

明四年正 |月己卯,有司奏:「南郊親奉儀注,皇帝初著平天冠,火龍黼黻之服。 還,變

改金根車爲玉路。」詔可

謂宜 通天冠,絳紗袍。 同郊還,亦變著通天冠,絳紗袍。 廟祠親奉,舊儀,皇帝初服與郊不異,而還變著黑介幘,單衣卽事, 又舊儀乘金根車。 今五路旣備,依禮玉路以祀,亦宜 乖體

御。 **輦輪御軺衣書等車爲副。** 序。今改祠廟爲法駕鹵簿,其軍幢多少,臨時配之。至尊乘玉路,以金路象路革路木路小 記,大駕上陵,北郊。周禮宗廟於昊天有降,宜以大駕郊祀,法駕祠廟, 儀服,二駕不異。拜陵,御服單衣幘,百官陪從,朱衣而已,亦謂之小駕,名實乖舛。 法駕,侍中參乘,奉車郞御』。晉氏江左,大駕未立,故郊祀用法駕,宗廟以小駕。 大明六年八月壬戌,有司奏:「漢儀注 [四]『大駕鹵簿,公卿奉引,大將軍參乘,太僕卿 其餘並如常儀。」詔可。 小駕上陵,如爲從 考尋前 至於

大明七年二月甲寅、輿駕巡南豫、兗二州,冕服,御玉路,辭二廟。 改服通天冠,御木

路,建大麾,備春蒐之典。

生而 自晉武過江,禮儀疏舛,王公以下,車服卑雜,唯有東宮,禮秩崇異,上次辰極,下絕侯王。 賜 .姓諸侯,象及革木,以賜異姓侯伯,在朝卿士,亦準斯禮。 按如此制,則東宮應乘金路。 貴者也。 明帝泰始四年五月甲戌,尚書令建安王休仁參議:「天子之子,與士齒讓,達於辟雍,無 旣命而尊,禮同上公。周制五等,車服相涉,公降王者,一等而已。王以金路

右前 宜降天子二等,驂駕四馬,乘象輅,降龍碧旂九葉。進不斥尊,退不逼下,沿古酌時,於禮爲 逮于大明,始備五輅。金玉二制,並類金根,造次瞻覩,殆無差別。若錫之東儲,於禮嫌重, 非所以崇峻陛級,表示等威。且春秋之義,降下以兩,臣子之義,宜從謙約。謂東宮車服, 衷。」詔可。 而皇太子乘石山安車,義不見經,事無所出。禮所謂金、玉路者,正以金玉飾輅諸末耳。 後,同以漆畫。 秦改周輅,制爲金根,通以金薄,周匝四面。漢、魏、二晉,因循莫改。

定五路,酌古代今,修成六服,沿時變禮。所施之事,各有條敍。便可付外,載之典章。朕 **祀太廟,元正大會諸侯。又以飾冠冕四綵繅,紫衣紅裳,乘象輅,小會宴饗,餞送諸侯,**臨軒 以大冕純玉繅,玄衣黄裳,乘玉輅,郊祀天,宗祀明堂。又以法冕五綵繅,玄衣絳裳,乘金路, 衣裳,乘木輅,耕稼,饗國子。又以通天冠,朱紗袍,爲聽政之服。」 會王公。又以繡冕三綵繅,朱衣裳,乘革路,征伐不賓,講武校獵。又以紘冕二綵繅,曰以声 泰始四年八月甲寅,四四部曰:「車服之飾,象數是遵。故盛皇留範,列聖垂制。朕近改

也。』伏尋古之上公,尙得服袞以朝。皇太子以儲副之尊,率土瞻仰。 丘 |仲起議:「案周禮,公自袞冕以下。鄭注:『袞冕以至卿大夫之玄冕,皆其朝聘天子之服 泰始六年正月戊辰,有司奏:「被敕皇太子正冬朝賀,「閏7]合著袞冕九章衣不。」儀曹郎 愚謂宜式遵盛典,服袞

五二六

冕 還備古章。自魏、晉以來,宗廟行禮之外,不欲令臣下服袞冕,故位公者,每加侍官。 子承乾作副,禮絕羣后,宜遵聖王之盛典,革近代之陋制。 九旒以朝賀。」兼左丞陸澄議:「服冕以朝,實著經典。 秦除六冕之制,至漢明帝始與諸儒 臣等參議,依禮, 皇太子元正朝 今皇太

後 廢帝卽位,尊所生陳貴妃爲皇太妃,輿服一如晉孝武太妃故事。 唯省五牛旗及 賀,應服袞冕九章衣。以仲起議爲允。撰載儀注。」詔可。

赤族。

校勘記

其餘 雖 小有改易 「小」百衲本作「馬」。 弘治本、北監本、毛本、殿本、局本作「累」。 按百衲本前

當 行 與 有一司 前 行『小』字互易。」 小彪輿服志詳之矣」語。 今從張說改正 張元 濟校勘記云:「按『小』字當與次行『馬』字互易; 『 馬

明堂位 日 位」各本並作「記」,據禮記明堂位篇名改。 按下引文,皆禮記明堂位篇文。

[]] 長三尺注地 各本並脱「三尺」二字,據晉書輿服志補。

[B] 繫兩軸頭 各本並脫「兩」字,據晉書輿服志補

Œ 以金薄繆龍 「以」各本並作「金」、據初學記二五引改。

ベレ 玉路建赤旂 「玉」字、百衲本空白。弘治本、北監本、毛本、殿本、局本及通典禮典並作「金」。

萬國之賓,與宋志之玉路以祀,金路以賓正合。今改補「玉」字。又「建」字,各本並作「通」。 按下有「玉飾諸末」語,則此不當是「金路」,當是「玉路」。晉書輿服志云,玉路以祀天,金路以會 張

元濟校勘記云:「通爲建字之誤。」按張校是,今據改。

-駕靑交絡 「絡」各本並作「路」,據通典禮典改。

「ペ」 三夫人青交絡安車 王妃公侯特進夫人封君阜交絡安車 「絡」各本並作「路」,據通典禮典改。 「絡」各本並作「路」,據通典禮典改。

八九

(101) 黄金塗五末 各本並脱「黄」字、據續漢書輿服志、晉書輿服志改。

皇孫乘綠蓋車 各本並脫「蓋」字,據晉書輿服志補。

(三) 王公之世子攝命治國者 「世子」各本並作「太子」,據通典禮典改。下「其侯世子」,各本亦作

「太子」,亦據通典改。

[1]] 加阜交絡帷裳皆阜 「絡」各本並作「路」,據通典禮典改。 又各本並脫「皆阜」二字,據通典禮

<

太僕御 各本並脱「御」字、據續漢書輿服志補。

二吾 前 驅有九斿雲罕 「斿」各本作「游」。 續漢書輿服志作「斿」,是。 東京賦「雲罕九斿」。 顏師古

志 第 八 校 勘 記

又有「薛綜東京賦注以雲罕九游爲旌旗別名」、「徐廣連服注以爲九游,游車九乘」。 謬 证俗云:「斿者,旌旗之斿,字從从,訓與旒同。 桓二年,臧哀伯云鞶厲斿纓是也。」按下文 凡「游」字並

應作「斿」,今並改正。

[1六] 嘉事之重者也 各本並脫「嘉」字,據禮記冠義原文補。

二世 今所謂平天冠也 「天」字,三朝本空白。 北監本、毛本、殿本、局本作「頂」。 通典禮典作「天」。

按作「天」是,今據改。

以朱 組爲纓 各本並脫「朱」字,據晉書輿服志、通典禮典補

[1元] 以朱緣裨飾其側 「緣」各本並作「綠」,據通典禮典改。

 \leq 未加 元服 者 各本並脫「加」字)據晉書輿服志、通典禮典補

絳緣 中 衣 各本並脫「緣」字,據晉書輿服志、通典禮典補。 按下 有「阜緣中衣」,可證此脱「緣

字。

上公 卿 助祭於郊廟 「助」各本並作「初」、據通典禮典改。

蟬居高 食潔口在腋 下 「口」各本作「目」,據續漢書輿服 志劉昭注引應劭漢官改。「食」漢官作

飲」。

今平上幘也 「上」各本並作「中」,據晉書輿服志改。 下文有「平上服武官」。

- 至吾 以采組爲緄帶 各本並脱「組」字)據續漢書輿服志、晉書輿服志、通典禮典補
- 留其 、繋襚 而已 「繋襚」, 初學記二六、 御覽六八二引董巴志作「絲綫 續漢書輿服志作 繋

璲」。劉昭注引徐廣曰:「今名璲爲縌」。按繫襚不譌。

- 〔日〕佩水蒼玉 各本並脱「佩」字,據通典禮典補。
- 諸王太妃妃諸長公主公主封君 各本不疊「妃」字,據晉書輿服志補
- 二元 諸王世子 各本並作「諸王太子」、通典禮典作「諸王嗣子」、蓋沈約本作「諸王世子」、後人避唐

諱追改。今改回。

- 郡公侯太夫人夫人 各本不疊「夫人」二字,據晉書輿服志補。
- 郡公侯世子 「世子」各本並作「太子」,通典禮典作「嗣子」。 蓋沈約本作「世子」,後人避唐諱

追改。今改回。

- 謂 貂蟬侍中左常侍右 貂 插異左右也。」按孫說是。 各本並作「貂蟬侍中左右常侍」。孫彪宋書考論云:「疑作侍中左,常侍右, 今乙正。
- 司鹽都尉 各 本 並 作「司 監都尉」。 按通典職官典晉官品有「司鹽都尉」。「司監都尉」當是「司

鹽都尉」之誤,今改正。

儀曹郎 中沈俁之議 日 「儀曹」各本並作「議曹」,按百官志有「儀曹」, 無「議曹」。 嚴可均全宋

志第八 校勘記

文:「沈俁之、元徽中、爲儀曹郎中。」今改正。

() 音 太子常從虎賁督千人督校督司馬虎賁督 各本並脫「千人」二字、據通典禮典補。

洛陽鄉有秩 各本作「洛陽卿有秩十」,據通典禮典删「十」字)「卿」改爲「鄕」。

二世 平廣武猛中郎將校尉都尉 各本並脫「校」字,據通典禮典補。

若非以工伎巧能特加此官者不加綬羽林郎羽林長郎 各本並脫「不加綬羽林郎」六字,據通典

禮典補。

絳科單衣 據本志前後交例,「絳科單衣」上當脫「給」字。

民志靡 「民」各本並作「人」、蓋後人避唐諱追改、今據江夏王義恭傳改回。

刀不 得過銀 銅爲裝 各本並脫「銀」字,據江夏王義恭傳補。

武帝孝建二年胡三省注並不疊「王」字,是。 諸王女封縣主諸王子孫襲封王王之妃及封侯者夫人行 按此皆言縣主、襲封王之妃、列侯妻不得用鹵簿、不 「襲封王王之妃」, 義恭傳及通鑑宋孝

[四] 婚葬吉凶 「葬」各本作「姻」,據江夏王義恭傳改。

當疊「王」字。

漢儀注 魏、晉人引漢舊儀,亦稱漢儀注。「漢注儀」當是「漢儀注」之誤。今訂正。 各本並譌「漢注儀」。 按後漢衛宏撰漢舊儀,隋書經籍志著錄四卷。 漢舊儀本有注,故

品公 又以紘冕二綵繅 「紘」各本並作「宏」,通典禮典作「紘」,今正作「紘」。「繅」各本作「繒」。 孫彪

朱書考論云:「繒當爲繅。」按孫說是,今改正。

洪典改。

【中国】 被敕皇太子正冬朝賀 各本並脫「冬」字,據通典禮典補。 又「賀」字各本並作「駕」,據通典禮

志 第 八

校 勘 記

宋書卷十九

志第九

樂一

作昭容樂、禮容樂。昭容生於武德,禮容生於文始、五行也。漢初又有嘉至樂,叔孫通因秦 也。 樂人制宗廟迎神之樂也。 行之舞。周又有房中之樂,秦改曰壽人。其聲,楚聲也,漢高好之,孝惠改曰安世。高祖又 六代之樂,至秦唯餘韶、武而已。始皇改周舞曰五行,漢高祖改韶舞曰文始,以示不相襲 缺,又爲鄭衞所亂。 又造武德舞,舞人悉執干戚,以象天下樂已行武以除亂也。故高祖廟奏武德、文始、五 及秦焚典籍,樂經用亡。漢興,樂家有制氏,但能記其鏗鏘鼓舞,而不能言其義。 易曰:「先王作樂崇德,殷薦之上帝,以配祖考。」自黃帝至于三代,名稱不同。 魏文侯雖好古、然猶昏睡於古樂。於是淫聲熾而雅音廢矣。 文帝又自造四時舞,以明天下之安和。蓋樂先王之樂者,明有法 周衰凋 周存

志第九

樂

也, 樂已所自作者, 明有制也。 孝景采武德舞作昭德舞,薦之太宗之廟。 孝宣采昭德舞爲

盛德舞,薦之世宗之廟。 漢諸帝奏文始、四時、五行之舞焉。

不相殊。其內史中丞王定傳之,以授常山王禹。禹,成帝時爲謁者,數言其義,獻記二十四 武帝時,河間獻王與毛生等共采周官及諸子言樂事者,以著樂記,獻八佾之舞,與制氏

卷。劉向校書,得二十三篇,然竟不用也。

承文始、五行、武德爲大武之舞。」又制舞哥一章,薦之光武之廟。 至明帝初,東平憲王蒼總定公卿之議,曰:「宗廟宜各奏樂,不應相襲,所以明功德也

也。 舞師馮肅、服養曉知先代諸舞,變悉總領之。遠考經籍,近采故事,魏復先代古樂,自變始 爲軍謀祭酒,使創定雅樂。時又有鄧靜、尹商,善訓雅樂,〔1〕哥師尹胡能哥宗廟郊祀之曲, 漢末大亂,衆樂淪缺。魏武平荆州,獲杜夔,善八音,嘗爲漢雅樂郎,尤悉樂事,於是以 而左延年等,妙善鄭聲,惟變好古存正焉。

舞日大韶舞,五行舞日大武舞。其衆哥詩,多卽前代之舊,唯魏國初建,使王粲改作登哥及 日武頌樂,昭容樂日昭業樂,雲翹舞日鳳翔舞,育命舞日靈應舞,武德舞日武頌舞,文始 文帝黃初二年,改漢巴渝舞日昭武舞,改宗廟安世樂日正世樂,嘉至樂日迎靈樂,武德

安世、巴渝詩而已。

黃帝雲門以下,至於周大武,皆太廟舞名也。 不可以一物名。武皇帝廟樂未稱,其議定廟樂及舞,舞者所執,綴兆之制,聲哥之詩,務令 明帝太和初,詔曰:「禮樂之作,所以類物表庸而不忘其本者也。 **。然則其所司之官,皆曰太樂,所以總領諸物,** 凡音樂以舞爲主,自

樂官自如故爲太樂。」太樂,漢舊名,後漢依讖改太予樂官,至是改復舊。

虞幾二千年,韶箾、南、籥、武、象之樂,風聲遺烈,皆可得而論也。由斯言之,禮樂之事,弗可 也。 新者,禮樂之謂也。故先王殷薦上帝,以配祖考,蓋當其時而制之矣。周之末世,上去唐、 其光煇,習詠其風聲者也。自漢高祖、文帝各逮其時,而爲武德、四時之舞,上考前代制作 象事。於文,文武爲斌,**兼秉文武,聖德所以章明也。臣等謹制樂舞名章斌之舞。**昔簫韶 起也。高祖文皇帝樂,宜曰咸熙之舞。咸,皆也。熙,興也。言應受命之運,天下由之皆興 以已。今太祖武皇帝樂,宜曰武始之樂。武,神武也。武,又跡也。言神武之始,又王跡所 之郊廟,而鬼神享其和;用之朝廷,則君臣樂其度。使四海之內,徧知至德之盛,而光煇日 之宜,以當今成業之美,播揚弘烈,莫盛於章斌焉。樂志曰:『鐘磬干戚,所以祭先王之廟,又 九奏,親於虞帝之庭,武、象、大武,亦振於文、武之阼。 特以顯其德教,著其成功,天下被服 至於羣臣述德論功,建定烈祖之稱,而未制樂舞,非所以昭德紀功。夫哥以詠德,舞以 於是公卿奏曰:「臣聞德盛而化隆者,則樂舞足以象其形容,音聲足以發其哥詠。 故薦

許 平 古 賈 所 之明文 (之問 也。 制 以 制章斌之樂。 獻 事 日『周 也。 酬 神 言大魏三世 酳 訓 民 酢 今有事 道 也。 之道,關於萬世,其義益 四達,禮樂交通。』傳云:『魯有 三請,乃許之。 於天地宗廟,則 在宗廟之中,君臣莫不致敬,族長之中,長幼無不從和。』 同 功,以至隆 平也。 此三舞宜並以爲薦享,及臨朝大享,亦宜 明。 於名爲美,於義爲當。」尚書奏:「宜 又臣等思惟,三舞宜有總名,可名大鈞之樂。鈞, 禘樂,賓祭用之。』 此皆祭禮大享, 如所上。」帝初不 舞之。然後 故仲尼答賓 通 用盛樂 乃合

袴, 服。 絳合幅袴,絳絑,黑韋鞮。 可。 白布秣 史臣案,武始、咸熙二舞,冠制不同,而云章斌與武始、咸熙同服,不知 奏於朝庭,則武始舞者,武冠,赤介幘,生絳袍單衣,絳領袖,阜領袖中衣,虎文 於是尚書又奏:「祀圓丘以下,武始舞者,平冕,黑介幘,玄衣裳,白領袖, ,黑韋鞮。 咸熙舞者,進賢冠,黑介幘,生黃袍單衣,白合幅袴, 咸熙舞者,冠委貌,其餘服 如 前。 章斌 舞者,與武始、咸熙舞者同 其餘 服 何 絳領袖中 冠 服 也? 如 前 畫 合幅 奏

安世 安世之名曰正始之樂。 一樂,猶周房中之樂也。 侍中繆襲又奏「安世哥本漢時哥名。 襲後又依哥省讀漢安世哥詠,亦說『高張四縣,神來燕享, 自 魏國 是以往昔議者,以房中哥后妃之德,所以風 初建,故侍中王粲所作登哥安世詩,專以思詠 今詩哥非往時之文,行 則宜變改。案周禮 泛天下, 嘉薦令儀, 神靈及 正夫婦, 說 永受厥 注云: 宜 神 改

福。 娛神,登堂哥先祖功德,下堂哥詠燕享,無事哥后妃之化也。 |世哥曰享神哥。」奏可。案文帝已改安世爲正始,而襲至是又改安世爲享神,未詳其義。 無有二一頭后妃風化天下之言。今思惟往者謂房,只爲后妃之歌者,恐失其意。 自宜依其事以名其樂哥,改安 方祭祀

解所造安世詩,今亡。

樂器音均,宜如襲議。」奏可。 具樂。」尙書奏曰:「禮,婦人繼夫之爵,同牢配食者,樂不異文。 昭皇后今雖別廟,至於宮縣 襲叉奏曰:「文昭皇后廟,置四縣之樂,當銘顯其均奏次第,依太祖廟之名,號曰昭廟之

等咸同肅議。奏可 爲盡用宮縣之樂也。天地之性貴質者,蓋謂其器之不文爾,不謂庶物當復滅之也。禮,天 子宮縣,舞八佾。今祀圓丘方澤,宜以天子制,設宮縣之樂,八佾之舞。」衞臻、繆襲、左延年 而 不知弘也。漢武帝東巡封禪還,祠太一于甘泉,祭后土于汾陰,皆盡用其樂。言盡用者, 散騎常侍王肅議曰:「王者各以其禮制事天地,今說者據周官單文爲經國大體,懼其局

矣。周禮賓客皆作備樂。左傳:『王子頹享五大夫,樂及徧舞。』六代之樂也。然則一會之 日,具作六代樂矣。天地宗廟,事之大者,賓客燕會,比之爲細。王制曰:『庶羞不踰牲,燕 肅又議曰:「說者以爲周家祀天,唯舞雲門,祭地,唯舞咸池,宗廟,唯舞大武,似失其義

九

皆 大鈞之舞。」 有司 者,明古今夷、夏之樂,皆主之於宗廟,而後播及其餘 則 則 四夷之樂者,美德廣之所及也。高皇帝、太皇帝、太祖 衣 吹 不 帥 時 踰 mi 其 哥之,四 以 祭服 屬 而 致 作 而 之,至 司可 舞之,大享亦如 鬼 神 燕亦 、以和 以燕樂而踰天地宗廟之樂乎。周官。『以六律、六呂、五聲、八音、六舞大合 奏。「宜 於六舞獨 如之。』四夷之樂,乃入宗廟,先代之典, 邦國,以諧萬民,以安賓客,以說遠人。』 如 肅議。」奏可。 之。』韎,東夷之樂也。 分擘而 用之,所以不厭 庸私 造宗廟詩頌十二篇,不被哥。 人心 又: 、高祖 也。 也。 **鞮 樓 氏 掌 四** 夫作先王樂者,貴能 、文昭廟,皆宜兼用 又周官:『韎 獨不 夫六律、 ·得用。 夷 之樂 六呂、五 師 大享及燕日 與其 掌 晉武帝泰始二 敎 先代 包而 、聲哥, 聲、 及 用之,納 武始 八音, 祭祀 祭祀 如 Z

皓,冬哥玄冥,並舞育命之舞;季夏哥朱明, 有 北 年,改制郊廟哥,其樂舞亦仍舊也。 廟 鹿鳴 心心根 食 郊 及 舉承元氣一曲,加惟天之命、天之曆數二曲, 漢 祀 承元氣 明堂, 武 合前六曲,以爲宗廟 平隴、蜀、增廣 二曲。 並奏樂如南郊。 三年,自作詩 《郊祀,高皇帝配食,樂奏靑陽、朱明、西皓、玄冥,雲翹、育命之舞。 食舉。加宗 迎 時氣 四篇, $\dot{\overline{E}}$ 廟食舉重來、上陵二曲,合八曲 郊 兼舞二舞。 曰思齊皇姚,二曰六騏驎,三曰 春哥青陽,夏哥朱明,並舞雲翹之舞,秋哥西 合七曲爲殿中御食飯舉。 章帝元和二年,宗廟樂,故 爲上陵 又漢太樂食舉 竭肅 食舉。 雍 事 ず,食舉 減 几

荀勗 十三曲 后行禮,東箱雅樂郞作者是也。今謂之行禮曲,姑洗箱所奏。 文王,後改曰洋洋,詠明帝。 日應鳴,後改日於赫,詠武帝。二日翳虞,後改曰巍巍,詠文帝。 1明星, 、傅玄並 ·一曰鹿鳴,二曰重來,三曰初造,四曰俠安,五曰歸來,六曰遠期,七曰有所思,八 九日淸涼,十日涉大海,十一日大置酒,十二日承元氣,十三日海淡淡。 爲哥辭。 魏時以遠期、承元氣、海淡淡三曲多不通利,省之。 魏雅樂四曲: 騶虞、伐檀、文王並左延年改其聲。 按應鳴本以宴樂爲體,無當 三曰伐檀,後省除。 正旦大會,太尉奉璧, 魏氏及晉 四

樂事,使郭瓊、宋識等造正德、大豫之舞,而勗及傅玄、張華又各造此舞哥詩。 哥,皆爲四言,唯王公上壽酒一篇爲三言 用,率非凡近所能改。 用,其文句長短不齊,未皆合古。 四言,或五言,與古詩不類。」以問司律中郎將陳頎 舊,有由 於朝享,往時之失也。 上壽酒食舉樂哥詩。 晉武 然 泰始五年,尚書奏使太僕傅玄、中書監荀勗、黃門侍郎張華各造正旦行禮及王 也。 是以一皆因就,不敢有所改易。」荀勗則曰:「魏氏哥詩,或二言,或三言,或 韶又使中書郎成公綏亦作。 二代三京,襲而不變,雖詩章詞異,興廢隨時,至其韻逗曲折,皆繫於 蓋以依詠弦節,本有因循,而識樂知音,足以制聲,度曲 五言,此則華、勗所明異旨也。 ,順曰:「被之金石,未必皆當。」故處造 張華表曰:「按魏上壽食舉詩及漢氏 九年, 荀勗 勗作新律笛 逐 典 所 法 施 公

志

九

十二枚,散騎常侍阮咸譏新律聲高,高近哀思,不合中和。」勗以其異己,出咸爲始平相。

晉又改魏昭武舞日宣武舞,羽籥舞日宣文舞。

咸寧元年,詔定祖宗之號,而廟樂同用正德、大豫之舞。

哥, 常詠 鳩集遺逸,至 折, 代之禮 五聲,詠之於哥詞,陳之於舞列,宮縣在下,琴瑟在堂,八音迭奏,雅樂並作,登哥下管,各有 食舉之樂, 周周 又無識者, 至 |江左初立宗廟,尙書下太常祭祀所用樂名,太常賀循答云:「魏氏增損漢樂,以爲 ,未審大晉樂名所以爲異。 人之舊也。 而尚未有金石也 猶有未備。 則於今難以意言。」于時以無雅樂器及伶人,省太樂幷鼓吹令。 自漢氏以來,依放此禮,自造新詩而 明帝太寧末,又詔阮字等增益之。 遭離喪亂,舊典不存,然此諸樂,皆和之以鍾律,文之以 已。 舊京荒廢, 成帝咸和中,乃復置太樂官, 今旣散亡,音韻曲 是後頗 得登

戎虜,及胡亡,鄴下樂人,頗有來者。 侍郎藩修定金石,以施郊 又獲樂工楊蜀等,閑練舊樂,於是四箱金石始備焉。 廷修雅樂,亮尋薨。 初,荀勗旣以新律造二舞,又更修正鍾磬,事未竟而勗薨。 庾翼、桓溫專事軍旅,樂器在庫, 廟。 尋值喪亂,遺聲舊制 謝尙時爲尙書僕射,因之以具鍾磬。 ,莫有記者。 遂至朽壞焉。 庾亮為 惠帝元康三年,詔其子黃門 晉氏 荆 之亂也,樂 州,與謝尚 太元中,破苻堅, 共 人悉沒 爲 朝

宋文帝元嘉九年,太樂令鍾宗之更調金石。十四年,治書令史奚縱又改之。語在律曆

晉世曹毗、王珣等亦增造宗廟哥詩、然郊祀遂不設樂。

者習哥。」然則吳朝非無樂官,善哥者乃能以哥辭被絲管,寧容止以神絃爲廟樂而已乎? 廟,雲翹承□」,機不容虛設此言。又韋昭孫休世上鼓吹鐃哥十二曲表曰:「當付樂官善哥 哥可知矣。」承天曰:「或云今之神絃,孫氏以爲宗廟登哥也。」 史臣案陸機孫權誄「肆夏在 何承天曰:「世咸傳吳朝無雅樂。 案孫皓迎父喪明陵,唯云倡伎畫夜不息,則無金石登

誦習。 撰立新哥。黃門侍郎王韶之所撰哥辭七首,並合施用。」詔可。十二月,有司又奏:「依舊正 旦設樂,參詳屬三省改太樂諸哥舞詩。黃門侍郎王韶之立三十二章,合用敎試,日近,宜逆 宋武帝永初元年七月,有司奏:「皇朝肇建,廟祀應設雅樂,太常鄭鮮之等八十八人各 輒申攝施行。」 詔可。 又改正德舞曰前舞,大豫舞曰後舞。

廟舞猶闕 人立議同,未及列奏,值軍興事寢。二十二年,南郊,始設登哥,詔御史中丞顏延之造哥詩, 元嘉十八年九月,有司奏:「二郊宜奏登哥。」又議宗廟舞事,錄尚書江夏王義恭等十二

故湯曰:『雷出 孝建二年九月甲午,有司奏:「前殿中曹郎荀萬秋議:按禮,祭天地有樂者,爲降神也。 地奮豫。 先王以作樂崇德,殷薦之上帝,以配祖考。』周官曰:『作樂於圜丘之

志

未嘗不執古御今,同規合矩。方茲休明在辰,文物大備,禮儀遺逸,罔不具舉,而況出祇降 此周道也。』至於溱奏五行,魏舞咸熙,皆以用享。爰逮晉氏,泰始之初,傅玄作晉郊廟哥詩 以爲疑。祭統曰:『夫祭有三重焉,獻之屬莫重於祼,「尽」聲莫重於升哥,舞莫重於武宿夜, 神,輟樂於郊祭,昭德舞功,有闕於廟享。謂郊廟宜設備樂。」 今廟祠登哥雖奏,而象舞未陳,懼闕備禮。夫聖王經世,異代同風,雖損益或殊,降殺迭運, 乃奏大簇,哥應鍾,舞咸池,以祀地祇。』由斯而言,以樂祭天地,其來尙矣。今郊享闕樂,竊 上,天神皆降。作樂於方澤之中,地祗皆出。』又曰:『乃奏黃鍾,哥大呂,舞雲門,以祀天神。 三十二篇。元康中,荀藩受詔成父勗業,金石四縣,用之郊廟。是則相承郊廟有樂之證也。

及宋不更名,直爲前後二舞,依據昔代,義舛事乖。今宜釐改權稱,以凱容爲韶舞,宣烈爲武 韶,漢改文始,周樂大武,秦革五行。眷夫祖有功而宗有德,故漢高祖廟樂稱武德,太宗廟樂韶,漢改文始,周樂大武,秦革五行。眷夫祖有功而宗有德,故漢高祖廟樂稱武德,太宗廟樂 業富前王,風通振古,「や」朝儀國章,並循先代。自後晉東遷,日不暇給,雖大典略備,遺闕尙 宏議以爲、「聖王之德雖同,創制之禮或異,樂不相沿,禮無因襲。自寶命開基,皇符在運, 日昭德。魏制武始舞武廟,制咸熙舞文廟。則祖宗之廟,別有樂名。晉氏之樂,正德、大豫, 至於樂號廟禮,未該往正。今帝德再昌,大孝御宇,宜討定禮本,以昭來葉。尋舜樂稱 於是使內外博議。驃騎大將軍竟陵王誕等五十一人並同萬秋議。尚書左僕射建平王 則有送迎明矣。卽周肆夏之名,備迎送之樂。古以尸象神,故儀禮祝有迎尸送尸,近代雖 娛。』詩云:『三后在〕天。』〔六〕又詩云:『神保適歸。』注曰:『歸於天地也。』此並言神有去來, 之來,送往而哀,哀其享否不可知也。』尚書〔曰『祖考來格』。漢書安世房中歌曰:『神來宴 · 永至等樂,各有義況,宜仍舊不改。爰及東晉,< < > 太祝唯送神而不迎神。近議者或云廟以居 神升降無常,何必恒安所處?故祭義云:『樂以迎來,哀以送往。』鄭注云:『迎來而樂,樂親 神,恒如在也,不應有迎送之事,意以爲並乖其衷。立廟居靈,四時致享,以申孝思之情。夫 **佾者,佾則干在其中,明婦人無武事也。 郊祀之樂,無復別名,仍同宗廟而已。 尋諸漢志,** 主,樂無餘名。章皇太后廟,依諸儒議,唯奏文樂。何休、杜預、范甯注『初獻六羽』,並不言 祖宗廟樂,總以德爲名。若廟非不毁,則樂無別稱,猶漢高、文、武,咸有嘉號,惠、景二

樂,蓋生周易、周官,歷代著議,莫不援准。夫『掃地而祭,器用陶匏』,唯質與誠,以章天德, 物 文物之備,理固不然。 周官曰:『國有故,則旅上帝及四望。』又曰:『四圭有邸,以祀天旅上 無尸,豈可闕迎送之禮?又傅玄有迎神送神哥辭,明江左不迎,非舊典也。」 有損益。至於禮失道譽,稱習忘反,中興釐運,視聽所革,先代繆章,宜見刊正。郊之有 兩圭有邸,以祀地旅四望。』四望非地,則知上帝非天。孝經云:『郊祀后稷以配天,宗 散騎常侍、丹陽尹建城縣開國侯顏竣議以爲:「德業殊稱,則干羽異容,時無沿制,故

志

外,六代四夷之舞,金石絲竹之樂,宜備奏宗廟。 庶足以光表世烈,悅被後昆。 祀 殿 其語。正德、大豫,禮容具存,宜殊其徽號,飾而用之。以正德爲宣化之舞,大豫爲興和 乎有晉,雖時或更制,大抵相因,爲不襲名號而已。 至之祀,又非天地。考之衆經,郊祀有樂,未見明證。 祀 文王 (共所, 舞蹈之容, 不得廟有別制。 天神』。 「於明堂,以配上帝。』則豫之作樂,非郊天也。大司樂職,『奏黃鍾,哥大呂,舞雲門,以 鄭注:『天神,五帝及日月星辰也。』王者以夏正月祀其所受命之帝於南郊,則二 前漢祖宗,廟處各異,主名旣革,舞號亦殊。今七廟合食,庭 後漢東平王蒼已議之矣。 愚謂蒼、肅、祗議,合於典禮,適於當今。」 。今樂曲淪滅,知音世希,改作之事,臣聞 宗廟之禮,事炳載籍。 又王肅、韓祗以王者德廣無 爱自漢元,迄 之舞,

『嚴父莫大於配天』,故云『郊祀后稷以 或謂 帝猶天益明也。不欲使二天文同,故變上帝爾。憑禮祀天之言再見,故鄭注以前天神爲五 帝』,以知 上 作樂,非爲祭天也。 一帝。』春秋傳曰:『告昊天上帝。』凡上帝之言,無非天 上帝 左僕射建平王宏又議:「竣據周禮、孝經,天與上帝,連文重出,故謂 ,或謂昊天上帝,不得以天有數稱,便謂上帝非天。 .禮天,旅上帝,同是祭天。 言禮天者,謂常祀 按易稱『先王以作樂崇德,殷薦之上帝,以配祖考』。 配天,宗祀文王於明堂,以配上帝』。 也, 旅上帝者, 人也。 天尊不可以一 徐邈推周禮 有故 上帝非天,則易之 『國有故,則旅上 稱,故或謂昊天, 尚書云:『肆類于 而祭也。 旣天爲議,則 孝經 稱 Ŀ

樂,豈復是異廟邪?」 繼作。至於祖宗樂舞,何猶不可迭奏。苟所詠者殊,雖復共庭,亦非嫌也。魏三祖各有舞 『掃地而祭,器用陶匏。』旨明所用質素,無害以樂降神。萬秋謂郊宜有樂,事有典據。竣又 適時之變也。後漢從儉,故諸祖共廟,猶以異室存別廟之禮。[10]晉氏以來,登哥誦美,諸室 用始祖之舞。 云『東平王蒼以爲前漢諸祖別廟,是以祖宗之廟可得各有舞樂。至於給祭始祖之廟,則專 帝,後冬至所祭爲昊天。竣叉云『二至之祀,又非天地』。未知天地竟應以何時致享?記云: 故謂後漢諸祖,共廟同庭,雖有祖宗,不宜入別舞』。此誠一家之意,而未統

凱容、宣烈之舞。終獻,奏永安。送神奏肆夏。」詔可。 送神,奏肆夏。祠廟迎神,奏肆夏。皇帝入廟門,奏_{秋至。} 衆議並同宏:「祠南郊迎神,奏肆夏。皇帝初登壇,奏登哥。初獻,奏凱容、宣烈之舞。 皇帝詣東壁,奏登哥。初獻,奏

哥,不及三公行事。」左僕射建平王宏重參議:「公卿行事,亦宜奏登哥。」 孝建二年十月辛未,有司又奏:「郊廟舞樂,皇帝親奉,初登壇及入廟詣東壁,並奏登

殿,弦管在下,今元會,登哥人亦上殿,弦管在下。」並詔可。 有司又奏:「元會及二廟齋祠,登哥依舊並於殿庭設作。 尋廟祠,依新儀注,登哥人上

文帝章太后廟未有樂章,孝武大明中使尚書左丞殷淡造新哥,明帝又自造昭太后宣太

后哥詩。

相 嗽水,作霧翳日,畢,又化成黃龍,長八九丈,出水遊戲,炫燿日光。 去數丈,兩倡女對舞,行於繩上,相逢切肩而不傾 後漢正月旦,天子臨德陽殿受朝賀,舍利從西方來,戲於殿前,激水化成比目魚, 以兩大絲繩繫兩柱頭, 跳躍

魏晉訖江左,猶有夏育扛鼎、巨象行乳、神龜抃舞、背負靈岳、 桂樹白雪、 畫地成川之

樂焉。

設禮外之觀,逆行連倒,頭足入筥之屬,皮膚外剝,肝心內摧。 禮,弦哥鍾鼓金石之作備矣。 淫,上享宗廟,下訓黎民,體五行之正音,協八風以陶氣。以宮聲正方而好義,角聲堅齊而率 於盛運,功德頌聲,永著于來葉。 地,反兩儀之順,傷彝倫之大。 民,而不惻愴。 日禀五斗。方掃 晉成帝咸康七年,散騎侍郎顧臻表曰:「臣聞聖王制樂,贊揚治道,養以仁義,防其邪 神州,經略中甸,若此之事,不可示遠。宜下太常,纂備雅樂,簫韶 加以四海朝覲,言觀帝庭,耳聆雅頌之聲,目覩威儀之序,足以蹋天,頭以履 故通神至化,有率舞之感,移風改俗,致和樂之極。末世之伎, 方今夷狄對岸,外御爲急,兵食七升,忘身赴難,過泰之戲, 此乃詩所以『燕及皇天,克昌厥後』者也。 敦彼行葦,猶謂勿踐,矧伊生 雜伎而傷人者, 九成 ?,惟新

察。」於是除高絙、紫鹿、跂行、鼈食及齊王捲衣、笮兒等樂。「二」又減其禀。 皆宜除之。流簡儉之德,邁康哉之詠,淸風旣行,民應如草,此之謂也。 愚管之誠,唯垂 其後復高經、紫

涯焉。

諸侯旣降二列,又一列輒減二人,(三三近降太半,非唯八音不具,於兩義亦乖,杜氏之謬可見 則鄭應納晉二六,晉應賜絳一六也。自天子至士,其文物典章,尊卑差級,莫不以兩。未有 鄭伯納晉悼公女樂二八,晉以一八賜魏絳,此樂以八人爲列之證也。若如議者,唯天子八, 王不復舞佾,其總章舞伎,卽古之女樂也。殿庭八八,諸王則應六八,理例坦然。又春秋, 人為列,自己自天子至士,降殺以兩,兩者,減其二列爾。 預以為一列又減二人,至士止餘四人為列,自己自天子至士,降殺以兩,兩者,減其二列爾。 預以為一列又減二人,至士止餘四 諸王伎十四種,其舞伎三十六人。」太常傅隆以為:「未詳此人數所由。 唯杜預注左傳佾 人,豈復成樂。按服虔注傳云:『天子八八,諸侯六八,大夫四八,士二八。』其義甚允。今諸 云諸侯六六三十六人,常以爲非。夫舞者所以節八音者也,八音克諧,然後成樂,故必以八 朱文帝元嘉十三年,司徒彭城王義康於東府正會,依舊給伎。 國典事大,宜令詳正。」事不施行。 總章工馮大列:「相承給

反,故聖人以五聲和其性,以八音節其流,而謂之樂,故能移風易俗,平心正體焉。 手之舞之,足之蹈之,然則舞又哥之次也。詠哥舞蹈,所以宣其喜心,喜而無節,則流淫莫 不學而能,不知所以然而然者也。怒則爭鬭,喜則詠哥,夫哥者,固樂之始也。詠哥不足,乃 民之生,莫有知其始也。含靈抱智,以生天地之間。夫喜怒哀樂之情,好得惡失之性,

後析橑,斧破斷其足。 孔甲曰:「嗚呼! 有命矣。」乃作破斧之哥,始爲東音。 周昭王南征, 殞於漢中,王右辛餘靡長且多力,振王北濟,周公乃封之西翟,徙宅西河,追思故處作哥,始 是良日也,必大吉。」或曰:「不勝之子,必有殃。」后乃取以歸,曰「以爲余子,誰敢殃之。」 作哥,始爲南音。夏后孔甲田於東陽費山,天大風晦冥,迷入民室,主人方乳,或曰:「后來 爲西音。此蓋四方之哥也。 五色,北飛不反。二女作哥,始爲北晉。禹省南土,嵞山之女令其妾候禹於嵞山之陽,女乃 昔有娀氏有二女,居九成之臺,天帝使燕夜往,二女覆以玉筐,旣而發視之,燕遺二卵,

歸。 者,東之齊,至雍門,匱糧,乃鬻哥假食,旣而去,餘響繞梁,三日不絕。左右謂其人不去也。 衰雅缺,而妖淫靡漫之聲起。周衰,有秦青者,善謳,而薜談學謳於秦青,未窮靑之伎而辭 **青餞之於郊,乃撫節悲歌,聲震林木,響遏行雲。 薛談遂留不去,以卒其業。** 黃帝、帝堯之世,王化下洽,民樂無事,故因擊壤之歡,慶雲之瑞,民因以作哥。 其後風 又有韓娥

|娥還,復爲曼聲長哥,一里老幼,喜躍抃舞,不能自禁, 忘向之悲也。 乃厚賂遣之。 善哥,齊之右地,亦傳其業。前漢有虞公者,善哥,能令梁上塵起。若斯之類,並徒哥也。 之人善哥哭,效韓娥之遺聲。衞人王豹處淇川,善謳,河西之民皆化之。齊人綿駒居高唐, 過逆旅,逆旅人辱之,韓娥因曼聲哀哭,一里老幼,悲愁垂涕相對,三日不食。遽而追之,韓 故雍門

爾雅曰:「徒哥曰謠。」

凡樂章古詞,今之存者,並漢世街陌謠謳,江南可采蓮、烏生、十五、白頭吟之屬是

也。日四吳哥雜曲,並出江東,晉、宋以來,稍有增廣。

豫章時,豫章僑人庾僧度家亦有鬼哥子夜。日五殷允爲豫章,亦是太元中,則子夜是此時以 子夜哥者,有女子名子夜,造此聲。晉孝武太元中,琅邪王軻之家有鬼哥子夜。殷允爲

前人也。

鳳將雛哥者,舊曲也。 應璩百一詩云:「爲作陌上桑,反言鳳將雛。」然則鳳將雛其來久

矣,將由譌變以至於此乎?

前溪哥者,晉車騎將軍沈充所制。口引

阿子及歡聞哥者,晉穆帝升平初,哥畢輒呼「阿子!汝聞不。」語在五行志。
[11]後人演

其聲,以爲二曲。

五五〇

靈易哥者,晉中書令王珉與嫂婢有情,愛好甚篤,嫂捶撻婢過苦,婢素善哥,而珉好捉團扇哥者,晉中書令王珉與嫂婢有情,愛好甚篤,嫂捶撻婢過苦,婢素善哥,而珉好捉

白團扇,故制此哥。

妻,高祖長女也,呼旿至閤下,自問斂送之事,每問,輒歎息曰「丁督護」」其聲哀切,後人因 督 護哥者,彭城內史徐逵之爲魯軌所殺,宋高祖使府內直督護丁旿收斂殯埋之。 逵之

其聲,廣其曲焉。

懊憹哥者, 晉隆安初,民間譌謠之曲。 語在五行志。 宋少帝更制新哥,太祖常謂之中

三、朝山。

六變諸曲,皆因事制哥。

長史變者,司徒左長史王廢臨敗所制。

讀曲哥者,民間 爲彭城王義康所作也。 其哥云「死罪劉領軍,誤殺劉第四」是也。

凡 此諸 曲 ,始皆徒哥,旣而被之弦管。 又有因弦管金石,造哥以被之,魏世 三調 哥詞

類是也。

正

|德爲先,但多詠祭祀見事及其祥瑞而已。

商周雅頌之體闕焉。

多 因前代,與時 古者天子聽政,使公卿大夫獻詩, 耆艾修之, 而後王斟酌焉。 事旣不 相應,且無以垂示後昆。 漢武帝雖頗造新哥, 秦、漢闕采詩之官,哥詠 然不以光揚祖考、崇述

「漢靈帝西園故事、江江有李堅者,能鞞舞。遭亂,西隨段煨。先帝聞其舊有技,召之。堅旣 鞞舞,未詳所起,然漢代已施於燕享矣。傳毅、張衡所賦,皆其事也。曹植鞞舞哥序曰:

中廢,兼古曲多謬誤,異代之文,未必相襲,故依前曲改作新哥五篇,不敢充之黃門,近以成 下國之陋樂焉。」晉鞞舞哥亦五篇,又鐸舞哥一篇,幡舞哥一篇,鼓舞伎六曲,並陳於元會。

今幡、鼓哥詞猶存,舞並闕。 鞞舞,即今之鞞扇舞也。

之。」此則漢世唯有槃舞,而晉加之以杯,反覆之也。 槃起長袖。」皆以七槃爲舞也。搜神記云:「晉太康中,天下爲晉世寧舞,矜手以接杯槃反覆 而 縱躡。」王粲七釋云:「七槃陳於廣庭。」近世文士顏延之云:「遞間關於槃扇。」鮑昭云:「七 又云晉初有杯槃舞、公莫舞。史臣按:杯槃,今之齊世寧也。日也張衡舞賦云:「歷七槃

「公莫。」古人相呼曰「公」,云莫害漢王也。今之用巾,蓋像項伯衣袖之遺式。按琴操有公 莫渡河曲,然則其聲所從來已久。俗云項伯,非也。 公莫舞,今之巾舞也。相傳云項莊劍舞,項伯以袖隔之,使不得害漢高祖。且語莊云:

曰:「自到江南,見白符舞,或言白鳬鳩舞,云有此來數十年。 左 初,又有拂舞。 舊云拂舞,吳舞。 檢其哥,非吳詞也。 察其詞旨,乃是吳人患孫皓虐 皆陳於殿庭。 揚泓拂舞序

志

九

政,思屬晉也。

又有白紵舞,按舞詞有巾袍之言,紵本吳地所出,宜是吳舞也。 晉俳歌又云:「皎皎白

緒,節節爲雙。」吳晉呼緒爲紵,疑白紵卽白緒。

髀舞故二八,桓玄將卽眞,太樂遣衆伎,尚書殿中郎袁明子啓增滿八佾,相承不復革。

宋明帝自改舞曲哥詞,幷詔近臣虞龢並作。

州刺史沈攸之又造西烏飛哥曲,並列於樂官。 又有西、傖、羌、胡諸雜舞。 隨王 |誕在襄陽,造襄陽樂,南平穆王爲豫州,造壽陽樂,荆 哥詞多淫哇不典正

舞,不譏舞也。 前 世樂飲,酒酣,必起自舞。詩云「屢舞僊僊」是也。宴樂必舞,但不宜屢爾。 漢武帝樂飲,長沙定王舞又是也。魏、晉已來,尤重以舞相屬,所屬者代起 譏在屢

舞,猶若飲酒以杯相屬也。謝安舞以屬桓嗣是也。近世以來,此風絕矣。

明節。 不妄啓,曲豈徒奏。 於心而木石感,鏗鏘奏而國俗移。 言之,幷論三調哥曰:「臣聞風、雅之作,由來尙矣。 孝武大明中,以鞞、拂、雜舞合之鍾石,施於殿庭。 今帝道四達,禮樂交通,誠非寡陋所敢裁酌。伏以三古缺聞,六代潛響,舞詠與日 哥倡旣設,休戚已徵,清濁是均,山琴自應。 故鄭相出郊,辯聲知戚,延陵入聘,觀樂知 。大者繫乎興衰,其次者著於率舞。 順帝昇明二年,尚書令王僧虔 斯乃天 地之靈和 風。 升降之 是則音 上表 在

勸 未 理 則 若 稱 斯 於 人 諒 爲 月 理 無 八之 譬 故 尙 以 謂 用 偕 辨 衣 風 斯 金 如 所 謠 也 冠 不 鍾 凐 以 雅 凱 或 則 流 舞 可 縣 俗 器 靡 以 迭 舊 容 精 可 已諧 干 以 方 夫 之,可 也 憓 相 務在 安。 樂 袿 之 靈 戚]]] 去 今 感 開 前 服 制 與 禮 塵 震 不 曉, 大 事 人 噍危 叉 典 旣 風 不 社 靜 明 祇 樂 絕 八今之 欲 殊 八 雲 訓 亡, 畿 凡 於 佾 不 中 有 廢 俱 化 所 中 自 斯 墜 曲 攸 不 清商 罷 爲 同 滅。 動 革 潰 , 卽 律 序 Ó 於 , 體 顧 波恬 災 翔泳。 ·, 反 以 漏 别 律 地 亦 而 異 , 追 宮縣 長幼 立 本 實 異 紀 情 故 悉 戒,三三哀 餘 海 哥 還 , 變 由 臣 羽 操 外 使 合和 頃自 流宕 推 鍾 不 . 昔 籥 源 聽 銅 ٠, 補 而 今校 9 可 撃拊 **¾雅** 改 雀 已 拾。 長 金籥 庶 {鞞 以 以 無 制 {頌 懷 思 調 口 稍 古 共 涯 哥 {拂 得 靡 , 曲 驰韻 羽 跂 聞 復 以 磬 所 漫, 撫 魏 全 未 佾 皎 零落 踵 節 相 實 遺 者 氏 然 知 數雖 諧 猶 故 器 異 羽 止 祿 可 在 所 , 詔 諠 在 應 佾未凝, 世 而 於 厚 祖 兹 十 知 極 一樂官. 會, 醜 日 太 齊 ٠, , 别 數 季氏 , 辰 之製 藝 息 驩 風 排 宴, ō 年 慮 叉 流 僧 敏 斥 間 哥 臣 具 乖 獲 正俗 , 此 不 虔 者 咎 可 典正 日 以 , 以 誚 雅 鍾 則 亡者 位 徴 關 表 懷 盛 副 爲 體 移 然 朝 優, 如 不 於 9 將 肆 宜. 鍾 京 矣。 風 殊, 崇 將 享 此 廛 在 將 命 利 長 半。 克諧 里 於 洛 配 良在 來 典 儿 夫 以 而 夫 煩 , 此 成 知 司 相 縣 鍾 動 欣 鍾 風 淫 自 女 音 茲 高 所 縣之器 之, 畏 務 味 頃 鼓 樂, 部 今 日 奏 並 之 或 家 江 勤 旣 士 總 則 用 韻 譏 課 陳 有 競 左 以 刨 昔 謹 人 等差, 聖 新 彌 習 哥 義 以 舊 獨 依 阮 {雅 思 竊 世 哇, 重 沿 雅 爲 佾 雅 自 緝 所

清識,王度昭奇,樂緒增修,異世同功矣。 便可付外遵詳。」

樂器凡八音:日金,日石,日土,日革,日絲,日木,日匏,日竹。

八音一曰金。金,鍾也,鎛也,錞也,鐲也,鐃也,鐸也。

剽。 剽音瓢。 鍾者,世本云:「黃帝工人睡所造。」爾雅云大鍾曰鏞,書曰「笙鏞以間」是也。 小者曰棧。 棧音醆,晉江左初所得棧鍾是也。縣鍾磬者曰筍虡,橫曰筍,從 中者曰

日虡。 蔡邕 日:「寫鳥獸之形,大聲有力者以爲鍾虡,清聲無力者以爲磬虡,擊其所縣,知由

其虡鳴焉。」

鎛 如 鍾 而大。 史臣案:前代有大鍾,若周之無射,非一,皆謂之鍾,鎛之言,近代無

聞焉。

錞,錞于也。 圜如碓頭,大上小下,今民間猶時有其器。 **周禮,「以金錞和鼓」。**

鐲,鉦也。 形 如 小鍾,軍行鳴之,以爲鼓節。 周禮,「以金鐲節鼓」。

鐃,如鈴 m 無舌,有柄,執而鳴之。 周禮,「以金鐃止鼓」。 漢鼓吹曲 日鐃哥。

鐸,大鈴也。周禮,「以金鐸通鼓」。

八音二日石。石,磬也。 世本云叔所造,不知叔何代人。 爾雅曰:「形似犂錧,以玉爲

之。」大日馨。馨音囂。

其時人乎?燒土爲之,大如鵝卵,銳上平底,形似稱錘,六孔。爾雅云,大者曰器,器音叫。 八音三曰土。土,塤也。世本云,暴新公所造,自三亦不知何代人也。周畿內有暴國,豈

「小者如鷄子」。

鼜,周禮音戚,今世音切豉反。長六尺六寸者曰晉鼓,金奏則鼓之。應鼓在大鼓側,詩云 靈靴。 即鞉類也。 長八尺者曰鼖鼓,以鼓軍事。長丈二尺者曰鼛鼓,凡守備及役事則鼓之。今世謂之下鼜。 誰所造。」以桴擊之曰鼓,以手搖之曰鞉。鼓及鞉之八面者曰雷鼓、雷鞉。六面者曰靈鼓、 「應朄懸鼓」是也。〔回〕小鼓有柄曰鞀。大鞀謂之鞞。,乃令「仲夏修鞀、鞞」是也。然則鞀、鞞 八晉四曰革。革,鼓也,鞉也,節也。大曰鼓,小曰朄。又曰應。 四面者曰路鼓、路鞉。周禮:「以雷鼓祀天神、江三以靈鼓鼓社祭,以路鼓鼓鬼享。」鼓 又有鼉鼓焉。 應砂風俗通日:「不知

節,不知誰所造。傅玄節賦云:「黃鍾唱哥,九韶興舞。 口非節不詠,手非節不拊。」此

則所從來亦遠矣。

八音五日絲。絲,琴、瑟也,筑也,筝也,琵琶、空侯也。

琴,馬融笛賦云:「宓羲造琴。」世本云:「神農所造。」爾雅「大琴曰離」,二十絃。今無其

齊桓曰號鍾,楚莊曰繞梁,相如曰燋尾,伯喈曰綠綺,事出傳玄琴賦。世云燋尾是伯喈

琴,伯喈傳亦云爾。以傅氏言之,則非伯喈也。

瑟,馬融笛賦云:「神農造瑟。」世本,「宓羲所造」。爾雅云:「瑟二十七絃者曰灑。」今無

其器。

筑,不知誰所造。史籍唯云高漸離善擊筑。

筝,秦聲也。傅玄筝賦序曰:「世以爲蒙恬所造。今觀其體合法度,節究哀樂,乃仁智

之器,豈亡國之臣所能關思哉。」風俗通則曰:「筑身而瑟絃。不知誰所改作也。」

上之樂。欲從方俗語,故名曰琵琶,取其易傳於外國也。」風俗通云:「以手琵琶,因以爲 琵琶,傅玄琵琶賦曰:「漢遣烏孫公主嫁昆彌,念其行道思慕,故使工人裁箏、筑,爲馬

名。」杜摯云:「長城之役,弦鼗而鼓之。」並未詳孰實。 其器不列四廂。

空侯,初名坎侯。漢武帝賽滅南越,祠太一后土用樂,令樂人侯暉依琴作坎侯,言其坎

坎應節奏也。侯者,因工人姓爾。後言空,音訛也。 古施郊廟雅樂,近世來專用於**楚聲**。宋

孝武帝大明中,吳興沈懷遠被徙廣州,造繞梁,其器與空侯相似,懷遠後亡,其器亦

八晉六曰木。木,柷也,敔也。並不知誰所造。 樂記曰:「聖人作爲椌、楊、塤、篪。」所

起亦遠矣。

柷如漆筩,方二尺四寸,深尺八寸,中有椎柄,連底挏之,令左右擊。

敔,狀如伏虎,只一門上有二十七銀鋙。以竹長尺名曰籈,」、」、」、」」」<

八音七曰匏。匏,笙也,竽也。

巢。」漢章帝時,零陵文學奚景於舜祠得笙,白玉管。後世易之以竹乎。 中之簀,女媧所造也。詩傳云:「吹笙則簧鼓矣。」蓋笙中之簧也。爾雅曰:「笙十九簧者曰 左傍。十九簣至十三簧曰笙。其它皆相似也。竽今亡。「大笙謂之巢,小者謂之和」。其笙 笙,隨所造,不知何代人。 列管匏內,施簧管端。 宮管在中央, 三十六簧曰竽,宮管在

八音八曰竹。竹,律也,呂也,簫也,管也,篪也,籥也,笛也。律呂在律曆志。曰記

筊。」
筊音爻。凡簫一名籟。前世有洞簫,其器今亡。
蔡邕曰:「簫,編竹有底。」
然則邕時無 簫,世本云:「舜所造。」爾雅曰:「編二十三管,長尺四寸者曰管,「云十六管長尺二寸者

洞簫矣。

篎音妙。古者以玉爲管,舜時西王母獻白玉琯是也。 管,爾雅曰:「長尺,圍寸,倂漆之,有底。」大者曰簥。 **月**令:「均琴、瑟、管、簫。」 <u>蔡邕</u>章句 簥音驕。 中者曰篞。 小者曰篎

篪,世本云:「暴新公所造。」「思]舊志云,一日管。史臣案:非也。雖不知暴新公何代人,

曰:「管者,形長尺,圍寸,有孔無底。」其器今亡。

第九 樂一

志

器也

產。

中者曰仲。

小者曰

約。

箹 音握。

尺四 而 非舜 寸 前 圍 人 三寸, 明 矣。 曰沂。」 舜時西王母獻管,則是已有其器,新公安得造篪乎? 沂音銀。 一名翹。「小者尺二寸」。今有胡篪, 出於胡吹, 爾雅曰:「篪,

詩所云「左手執籥,右手秉翟」者也。 籥 ,不知誰所造。 周禮有籥師,掌敎國子秋冬吹籥。今凱容、宣烈舞所執羽籥是也。蓋 爾雅云:「籥如笛,三孔而短小。」廣雅云,七孔。大者曰

所造。 笛 ,案馬融長笛賦,此器起近世,出於羌中,京房備其五音。 風俗通則曰:「丘仲造笛,武帝時人。」其後更有羌笛爾。三說不同,未詳孰實 又稱丘仲工其事,不言仲

曰:「師有功則愷樂。」」左傳曰,晉文公勝楚,「振旅,凱而入」。司馬法曰:「得意則愷樂愷哥。」 「車駕住,吹小箛,發,吹大箛。」 箛卽筤也。 又有胡笳。 筤、杜摯笳賦云:「李伯陽入西戎所造。」漢舊注曰:「箛,號曰吹鞭。」晉先蠶儀注:[lo] 鼓吹,蓋短簫鐃哥。 蔡邕曰:「軍樂也,黃帝岐伯所作,以揚德建武,勸士諷敵也。」馬官 漢舊筝笛錄有其曲,不記所出本末。

不云鼓吹。 樂之名也。 而漢世有黃門鼓吹。 然則短簫鐃哥, 此時未名鼓吹矣。 漢享宴食舉樂十三曲,與魏世鼓吹長簫同。 應劭漢鹵簿圖,唯 有騎執箛。 長簫短簫,伎 **箛即笳**,

孟嘗君,「鼓吹于不測之淵」。說者云,鼓自一物,吹自竽、籟之屬,非簫、鼓合奏,別

雍

門周

說

賞。」 焉。 世給 {錄 此 此 爲其占之曰:「君不得生鼓吹,當得死鼓吹爾。」 則列 並 又應是今之鼓吹。魏、晉世,又假諸將帥及牙門曲蓋鼓吹,斯則其時謂之鼓吹矣。 尚射破的,便以其副鼓吹給之。 謝尚爲江夏太守,詣安西將 鼓 云,絲竹合作,執節者哥。 吹 於殿庭者爲鼓吹,今之從行鼓吹爲騎吹,二曲異也。 甚輕,牙門督將五校,悉有鼓吹。 又建初錄云,務成、黃爵、玄雲、遠期,皆騎吹曲, 軍庾翼於武昌咨事 今則甚重矣。 晉江左初,臨川太守謝摛 摘擊杜弢戰沒,追贈 翼 (與尚射、日:「卿若破的、當 又孫權觀魏武 每 長水校尉,葬給鼓 寢,輒夢 軍,作鼓 聞鼓 非鼓 以鼓吹相 吹 吹。 魏 而 吹 曲。 還, 吹 有

並 無。 角,書記 史臣按 所不載。 一爾雅,籟自是簫之一 或云出羌胡,以驚中國 名耳。 競云:「坎其擊缶。」毛傳曰:「盎謂之缶。」 馬。 或云出吳越。舊志云:「古樂有籟、缶。」今

以 和之。 築城相杵者,出自梁孝王。 後世 謂此聲爲雖陽曲,至今傳之。 孝王築睢陽城,方十二里,造倡聲,以小鼓爲節,築者下杵

於上世,越古今而無儷,何但變、牙同契哉!」案此說,則自茲以後,皆孫、朱等之遺則也。 筝,朱生 、晉之世,有孫氏善弘舊曲, 善琵琶,尤發新聲。 傅玄著書曰:「人若欽所聞 宋識善擊節倡和, 陳左善清哥, 而忽所見, 不亦惑乎 列和 善吹笛, '! 設 郝索善 此六人生 彈

校勘記

- 善訓雅樂 「訓」元龜五六五同。三國志魏志杜夔傳作「詠」,通典樂典作「調
- 今詩哥非往時之文 「時」各本並作「詩」,據元龜五六五改。
- 周官以六律六呂五聲八音六舞大合樂 「六呂」, 周禮春官大司樂職文作 「六同」。 按六同 卽

六呂,謂陰聲大呂、應鍾、南呂、函鍾、小呂、夾鍾。 故沈約變其文。

- 四 祭祀則吹而哥之 「吹」各本並作「次」,據周禮春官鞮鞻氏職文改。
- **Ŧ**ī. 鳩集遺逸 「集」各本並作「習」,據晉書樂志、通典樂典、元龜五六六改。
- 獻之屬莫重於祼 各本並脫「之」字,據禮記祭統原文及元龜五六六補
- 〔十〕風通振古 「通」近龜五六六作「動」。
- 〔八〕爰及東晉 「爰」各本並作「宋」,據元龜五六六改。
- 九九 尚書曰祖考來格漢書安世房中歌曰神來宴娛詩云三后在天 天」五字。 北監本、殿本作「尙書曰祖考來格」七字。今據通典樂典訂補 三朝本、毛本、局本作「尚書有神
- **猶以異室存別廟之禮** 「廟」各本並作「室」,據通典樂典改。
- 於是除高組紫鹿跂行鼈食及齊王捲衣笮兒等樂 五七五並同朱書。 南齊書樂志作「笮鼠」。沈濤銅熨斗齋隨筆云:「案笮兒」南齊書樂志作笮鼠) 「笮兒」,晉書樂志、通典樂典、元龜一五九、

則 見乃鼠字之譌。」

故必以八人爲列 「八人」各本並作「八八」、據通典樂典、元龜五六六改。「列」各本並作「例」、

據元龜 五六六改。

叉一 列輒減二人 各本並脱「一」字、據通典樂典補。

江南可采蓮烏生十五白頭吟之屬是也 「烏生十五」各本並作「烏生十五子」。按樂府詩集二六

引永嘉伎錄,相和有十五曲,六曰十五,十二曰爲生。 蓋烏生與十五,自是二曲。 烏生古辭云:

「烏生八九子。」宋書樂志以烏生、十五二曲駢連書之,後人又誤加「子」字,合「烏生十五子」爲

曲。今訂正。

二 き 豫章僑 人庾僧度家亦有鬼歌子夜 「庾僧度」通典樂典、樂府詩集四四作「庾僧虔」。

二合 晉車騎將 軍沈充所制 「沈充」各本並作「沈玩」。據晉書樂志、通典樂典 改。

語在 五行志 通典樂典此句上多「叉歌歡聞不」五字。按上云 「阿子及歡聞歌者」 云云、則 此不

當但及「阿子汝聞不」,應有「又歌歡聞 不」五字,文意始 足。

漢靈帝西園故 事 「故事」局本及晉書樂志、 通典樂典、樂府詩集五三、曹植集、 御覽五七四引

並作「鼓吹」。

今之齊世寧也 志 第 九 校 勘 記 按齊改宋世寧曰齊世昌,則此當作宋世寧。 或因沈約此書成於齊世、故改朱世 五六

寧稱齊世寧。

實 由銅雀 「由」各本並作「猶」,據南齊書王僧虔傳、通鑑改。

[II] 同災異戒 各本並作「同靈畢戒」,據元龜五六五改。

 \subseteq 暴新公所造 各本並脫「公」字,據世本及通典樂典補。 按暴新公世本、通典並作暴辛公。

以雷鼓祀天神 **凋禮地官鼓人職文原文作「以雷鼓鼓** 神祇」。

詩云應朄懸鼓是也 按今詩周頌有瞽作「應田懸鼓」。 鄭玄注云:「田當作朄。朄,小鼓,在大鼓

旁,應鞞之屬也。聲轉字誤,變而爲田。」

[三五] 敌狀如伏虎 各本並脫「伏」字、據通典樂典補。

以竹長尺名曰籈 「籈」各本並作「止」、據爾雅釋樂改。 爾雅釋樂云:「所以鼓柷謂之止,所以鼓

敔謂之 、。」

二艺 律呂在律曆志 宋書律曆志爲「律志」、「曆志」,上已糾正其失,今並改正。 「律曆志」各本並作「律呂志」。 按宋書有「律曆志」,無「律呂志」,後人曾誤分

長尺四寸者日管 各本並脫「長」字,又「篙」字各本省文作「言」,今並據通典樂典及爾雅釋樂

注文補正。

二型 **篪世本云暴新公所造** 「篪」各本並作「箎」。 按說文竹部、「篪、管樂也。 從竹虒聲」。 集韻有

已久,今並下箎字,悉改正。又按世本,蘇成公造篪。暴新公爲造塤者,與造篪無關。

[IIO] 晉先蠶儀注 各本並脫「儀」字,據通典樂典補。

宋書卷二十

志第十

樂一

|蔡邕論敍|漢樂曰:一日郊廟神靈,二日天子享宴,三日大射辟雍,四日短簫鐃歌。

晉郊祀歌五篇

傅玄造

天命有晉,穆穆明明。 我其夙夜、祗事上靈。 常于時假,迄用有成。 於薦玄牡,進夕其

性。崇德作樂,神祇是聽。

右祠天地五郊夕牲歌一篇。

宣文烝哉,日靖四方。 永言保之,夙夜匪康。 光天之命,上帝是皇。 嘉樂殷薦,靈祚景

祥。神祇降假,享福無疆、

志第十 樂二

五六六

右祠 天地五郊迎送神歌一篇。

天祚有晉,其命惟新。 受終于魏,奄有兆民。 燕及皇天,懷柔百神。 不顯遺烈,之德之

純。 享其玄牡、式用肇禋。 神祇來格,福祿是臻。

時邁其猶,昊天子之。 祐享有晉,兆民戴之。 畏天之威,敬授民時。 不顯不承,於猶釋

思。 皇極斯建,庶績咸熙。 庶幾夙夜,惟晉之祺。

禮紀。 宣文惟后,克配彼天。 作民之極,莫匪資始。 撫寧四海,保有康年。 克昌厥後,永言保之。 於乎緝熙, 肆用靖民。 爱立典制, 爱修

右饗天地五郊歌三篇。

前所作天地郊明堂歌五篇

傅玄造

皇。 祗事上皇,百祿是臻。 皇矣有晉,時邁其德。 巍巍祖考,克配彼天。 受終于天,光濟萬 國。 嘉牲匪歆, 萬國旣光,神定厥祥。 德馨惟饗。 虔于郊祀, 祗事上 受天之祚, 神和

右天地郊明堂夕牲歌。

章。 神祇嘉饗,祖考是皇。 於赫大晉,膺天景祥。 克昌厥後、保祚無疆。 二帝邁德,宣茲 重光。 我皇受命,奄有萬方。 郊祀配享,禮樂孔

右天地郊明堂降神歌。

芳。 形。 心 烹牷 神之 曠 整 泰 無 壇,祀 牲 坐, 方, 亭 쩳 同 皇神。 主 以清。 歡 觴。 娛。 精 澤 神 神之來,光景照。 說饗, 氣感, 雲翔,化風 百 歆 靈 於禮祀。 賓。 舒。 聽 蘊朱火,燎芳薪。 嘉樂奏, 祐大晉, 無聞 視 文中聲。 無 降繁祉。 兆。 神 紫 八音諧, 之至, 、煙游, 祚京邑, 行四海。 神 舉歆歆。 冠青雲。 是聽。 咸潔 靈爽 神之體, 保天年, 協 齋 動 並 靡 余 芬 象

右天郊饗神歌。

地

紀

形象。 敎 冥冥 敷 整 泰 溢 物 祇 潛 咸享 之至 九壌 折,「以埃皇祇。 泰 幽 格格 、祇 洞洞 舉 ·欣欣。 天庭。 忽荒。 是 娛。 保 祇 齋 舞 衆神威、羣靈儀。 萬 旣 象德,歌 之出,薆若 潔 壽 侍者 延 成文。 億 有。 鹶 肅 靈 祇 玉 陰祀設,吉禮施。 觴 之坐,同 無遠,天下 進 咸 穆 歡 穆。 豫。 母。 饗嘉 澤 祇 夜將極 之來, 雨 慶 施 一,時 歆 遺 化 德 光景。 ·未移。 雲 馨。 布。 照若 樂 祚 祗 有晉 八 之體 存, 變, , 終 無 聲

右地郊饗神歌。

融。 經 率 始 敬 明堂,享 職 萬 祀 方來祭。 匪 懈 常 於皇 于 一烈考, 時假、保祚 光 配 永 上 世 帝。 赫赫 《上帝》 旣 高旣崇。 聖考是配, 明 德

五六七

右 明 堂饗神歌

宋 南 郊雅 樂 、登歌

顏 延之 造

字。 序。 夤 有 亘 牷 威 地 在 稱 寶 滌 皇 命 有潔 ,嚴恭帝 磬 作主。 在組 祖 月竁 表海 以 薦 來賓 炳岱,系 王 夷, 以答 日 際 唐 青楚。 神 奉 士。 靈鑑濬 開 元 省 正,禮交樂舉。 文,民屬叡武。 六典聯 奄受敷錫,宅中拓 事 九 官

列

右 天 地郊夕牲歌

神。 陳。 陟 月 維 御 配 聖饗帝 按 在 節 京 一是驅 、降德 維孝饗親。 扶輪 在 民。 奔精 遙 皇乎備矣, 興 遠 照夜 駕 高燎 燿 有 事 燿 煬 Ŀ 振 春。 晨。 振 禮 陰 明 行宗祀 浮爍 が 敬達 ,沈禜深 郊 淪。 禋。 告成 金枝 中樹之 大報 ,受釐元 廣樂四

右 天 地 郊迎 送神歌

躬。 吉。 0 飾紫 營泰 具 明 煇 陳 器 夜 畤 壇 定天 備 華 坎 晢 列 禮 容。 室。 衷。 日 祼 形 中 思 既始 舞 星 心叡,謀筮從。 綴 兆 一六宗 被被 獻 又終。 歌 秩 鍾 煙薌 望帝 乾宇 建表 慈,設 晏, 閽 鬯, 聳 地 報淸穹。 神 郊宮。 显 蹕 謐 靈 大 田 饗宋德, 之來, 孝 燭 置, 昭 祭 權 辰 祚王功, 光 禮 火 溢 供。 通。 潔 牲 曆 休 粢 日 元 命永 酌 旬, 展, 娛 律首 盛 自 福

履

充。

右天地饗神歌。

宋明堂歌 謝莊

地 紐 經,乾 樞 回。 華蓋 動,紫微 開。 旌蔽日,車若 雲。 駕六氣, 乘絪縕。 **瞱帝京**, 煇天

風。 邑。 聖祖 懋粢盛,潔牲牷。 降,五靈集。 構瑤 百禮肅、羣司 1. 飛 珠 簾。 皇德遠,大孝昌。 漢拂幌, 月棲 檐。 貫九幽, 舞綴暢, 洞三光。 鍾 石 融。 神之安, 駐 飛景, 鬱行

變。景福至,萬字歡。

右迎神歌詩。依漢郊祀迎神,三言,四句一轉韻。

雍臺辨朔,澤宮練辰。 潔 火夕照, 明 水朝陳。 六瑚賁室,八羽華庭。 昭事先聖,懷濡上

靈。肆夏式敬,升歌發德。永固鴻基,以綏萬國。

右登歌詞。

舊四言。

維 天爲大,維聖祖是則。 辰居萬宇,綴旒下國。 內靈八輔,外光四瀛。 蒿宮仰蓋,日館

靈。 我將我享,維孟之春。以孝以敬,以立我烝民。

希旌。

複殿留景,重檐結風。

刮楹接緯,達嚮承

虹

設業設處,

在王庭。

肇 禮 祀 ,

克配乎

右歌太祖文皇帝詞。

依周頌體。

參映夕,駟照晨。 靈乘震,司青春。 雁將向,桐始蕤。 柔風舞,暄光遲。 萌動達,萬品

志第十 樂二

五七〇

新。潤無際,澤無垠。

右歌青帝詞。

三言,依木數。

龍精 初見大火中。 朱光北至圭景同。 帝位在雞實司衡。 水雨方降木槿榮。 庶物盛長

咸殷阜。恩覃四溟被九有。

右歌赤帝辭。

七言,依火數。

履建宅中宇。 司繩 御四方。 裁化遍寒燠。 布政周炎涼。 景麗條可結。 霜明冰可折。

凱 風 扇朱辰。 白雲流素節。 分至乘結晷。 啓閉集恒度。 帝運緝萬有。 皇靈澄國 步。

右歌黃帝辭。

五言,依土數。

百川 如鏡,天地爽且明。 雲沖氣舉,德盛在素精。 木葉初下,洞庭始揚波。 夜光徹地,

飜霜 照懸河。 庶類收成,歲功行欲寧。 浹地奉渥,罄宇承秋靈。

右歌白帝辭。

九言、依金數。

光。 飭國典,閉關梁。 歲旣晏, 日方馳。 四節 靈乘坎,德司規。 遍,萬物 殿。 玄雲合,晦鳥路。 福 九域,祚 八鄉。 **晨晷促**, 白雲繁, 亘天涯。 夕漏延。 雷在 太陰極, 地, 微陽 時未

宣。鵲將巢,冰已解。氣濡水,風動泉。

右歌黑帝辭。

六言,依水數。

梁。 萬里照,四字香。 蘊禮容,餘樂度。 神之車, 靈方留,景欲暮。 歸淸都。 開九重,肅五達。 **琁庭寂**, 玉殿虛。 鳳參差,龍已秣。 睿化凝,孝風熾。 雲旣動,河旣 顧靈 心,結

皇思。

右送神歌辭。 漢郊祀送神, 亦三言。

右天郊饗神歌。

魏兪兒舞歌四篇魏國初建所用,後於太祖廟並作之。

王粲造

漢初建國家,匡九州。 蠻荆震服, 五刃三革休。 安不忘備武樂修。 宴我賓師,敬用御

蒸庶德,莫不咸歡柔。

右矛兪新福歌。

天,永樂無憂。子孫受百福,常與松喬遊。

材官選士,劍弩錯陳。 應桴蹈節,俯仰若神。 綏我武烈, 篤我淳仁。 自東自西,莫不

來賓。

右弩兪新福歌。

我功旣定,庶士咸綏。 樂陳我廣庭,式宴賓與師。 昭文德,宣武威。 平九有, 撫民黎。

荷天寵,延壽尸。千載莫我違。

右安臺新福歌曲。

志 第

+

五七二

神武 用師士素厲。 仁恩廣覆,猛節橫逝。 自古立功,莫我弘大。 桓桓征四國, 爱及海

裔。 漢國保長慶,垂祚延萬世。

右行辭新福歌 曲 傅玄造

晉宣武舞歌四篇

惟聖皇篇 矛兪第一

惟聖皇,德巍巍,光四海。 禮樂猶形影,文武爲表裏。 乃作巴兪, 肆舞士。 劍弩齊列,

戈矛爲之始。 進退疾鷹鷂,龍戰而豹起。 如亂不可亂,動作順其理,離合有統紀。

短兵篇 劍兪第二

劍爲短兵,其勢險危。 疾踰飛電,回旋應規。 武節齊聲,或合或離。 電發星騖,若景若

差。 兵法攸象,軍容是儀。

軍鎭篇 弩兪第三

弩為遠兵軍之鎭,其發有機。 體難動,往必速,重而 不遲。 銳精分轉,射遠中微。 . 答 介

之樂,壹何奇!變多姿。退若激,進若飛。 五聲協,八音諧。 宣武象,讚天威。

窮武篇

安臺行亂第四

窮武者喪,何但敗北。 柔弱亡戰,國家亦廢。 秦始徐偃,旣已作戒前世。 先王鑒其機,

修文整武藝。文武足相濟,然後得光大。 亂日 高則亢,滿則盈。 亢必危,盈必傾。

去

危傾,守以平。沖則久,濁能淸。混文武,順天經。

晉宣文舞歌二篇

傅玄造

羽籥舞歌

所患。黃帝始征伐,萬品造其端。 羲皇之初,天地開元。 網罟禽獸,羣黎以安。 軍駕無常居,是日 神農教耕,創業誠難。 軒轅 軒轅旣勤止,堯舜匪荒寧。 民得粒食,澹然無 夏

走馬,降瑞祥。 聖皇,道化彰。 禹治水,湯武又用兵。 揚仄陋,簡忠良。 澂四海,清三光。 孰能保安逸,坐致太平。聖皇邁乾乾,天下興頌聲,穆穆且明明。 萬機理,庶事康。 百祿是荷,眉壽無疆。 潛龍升,儀鳳翔。 風雨時, 物繁昌。

却

惟

羽鐸舞歌

月 地境,化 兼 倫 《往古。 代征。 得其序,衆生樂聖君。三統繼五行,然後有質文。皇王殊運代,治亂亦繽紛。伊大晉,德 昔在渾成時,兩儀尙未分。 充天字。 越犧農,邈舜禹。參天地,陵三五。 隨 時 變化,庶物乃成。 聖 一明臨朝,元凱作輔,普天同樂胥。 陽升垂淸景,陰降興浮雲。中和含氛氳,萬物各異羣。人 聖皇繼天,光濟羣生。 禮唐周,樂韶武。 浩浩元氣, 遐哉太清。 化之以道,萬國 豈唯簫韶,六代具舉。 成寧。 五行流邁,日 受茲介福 延

志

第

于億齡。

晉宗廟歌十一篇

傅玄造

我夕我牲,猗歟敬止。 嘉豢孔時,供茲享祀。 神鑒厥誠,博碩斯歆。 祖考降饗,以虞孝

孫之心。

右祠廟夕牲歌。

嗚呼悠哉 ! 日鑒在茲。 以時享祀,神明降之。 神明斯降, 旣祐饗之。 祚我無疆,

祜。赫赫太上,巍巍聖祖。明明烈考,丕承繼序。

右祠廟迎送神歌。

經始宗廟,神明戾止。 申錫無疆, 祗承享祀。 假哉皇祖,綏予孫子。 燕及後昆, 錫茲

繁祉。

右祠征西將軍登歌。

嘉樂肆庭,薦祀在堂。 皇皇宗廟, 乃祖先皇。 濟濟辟公, 相予烝嘗。 享祀不忒, 降福

穰穰。

右祠豫章府君登歌。

於邈先后,實司于天。 顯矣皇祖, 帝祉肇臻。 本支克昌,資始開元。 惠我無疆, 享祚

永年。

右祠潁川府君登歌。

於惟會皇,顯顯令德。 高明清亮, 匪競柔克。 保乂命祜, 基命惟則。 篤生聖祖, 光濟

四國。

右祠京兆府君登歌。

於鑠皇祖,聖德欽明。 勤施四方,夙夜敬止。 三 載敷文敎,載揚武烈。 匡定社稷,龔行

天罰。經始大業,造創帝基。畏天之命,于時保之。

右祠宣皇帝登歌。

執競景皇,克明克哲。 旁作穆穆,惟祗惟畏。 纂宣之緒,耆定厥功。 登此儁义,糾彼羣

凶。業業在位,帝旣勤止。維天之命,於穆不已。

右祠景皇帝登歌。

於皇時晉,允文文皇。 聰明叡智,聖敬神武。 萬機莫綜,皇斯淸之。 虎兕放命,皇斯

平之。柔遠能邇,簡授英賢。創業垂統,勳格皇天。

右祠文皇帝登歌。

曰晉是常,享祀時序。 宗廟致敬,禮樂具舉。 惟其來祭,普天率土。 **犧樽旣奠**,清酤旣

志第十 樂二

五七六

載。 亦有 和羹,薦羞 斯備。 蒸蒸永慕,感時興思。 登歌奏舞,神樂其 和。 祖考來格,祐 我邦

敷天之下,罔不休嘉。

胥樂兮。 樂兮。 神胥樂兮。 肅 肅 肅 肅 肅 在位,濟濟臣工。 肅 在位,臣工濟濟。 在位,有來雍雍。 四海來格,禮儀有容。 小大咸 穆穆 敬,上下有禮。 天子,相惟辟公。 鍾鼓振,管絃理。 理管絃,振 禮 有儀, 、鼓鍾。 樂有 舞開元,歌永始。 則。 舞 象德,歌 舞象 功, 詠 歌詠德。 功。 神胥 輔

右祠 廟饗神歌二篇。

晉江左宗廟歌十三篇

曹毗 造十一首

王珣 造二首

歌 高 祖宣皇帝

曹毗造

一、德協 靈 符。 應運 撥亂,釐整天 衢。 勳格宇宙,化動八區。 肅以典刑,陶以玄

珠。

神石

吐

瑞,

靈芝自敷。

肇基天命,道均唐虞。

於赫高

祖

歌世宗景皇帝

齊斧。 景皇承 亹亹神算,赫赫王旅。 運, 纂隆洪緒。 皇維 鯨鯢旣平,功冠帝宇。 重抗, 天暉 再舉。 蠢矣二寇,擾我揚楚。 乃整元戎,

歌 太祖 文皇帝

太祖 齊聖,王猷誕融。 仁 敎 四塞,天基累崇。 皇室多難,嚴淸紫宮。 威厲秋霜,惠過

風。平蜀夷楚,以文以戎。奄有參墟,聲流無窮。

歌世祖武皇帝

於穆 武皇, 允襲欽 明。 應期登禪,龍飛紫庭。 百揆時序,聽 斷 以 情。 殊 域旣 賓 偽吳

平。晨流甘露,宵映朗星。野有擊壤,路垂頌聲。

歌中宗元皇帝

運 屯 百六, 天羅 解貫。 元皇勃 興, 網籠江漢。 仰 齊 七 政, 俯平禍 亂。 化若 1風行, 澤

猶

雨散。淪光更耀,金煇復煥。德冠千載,蔚有餘粲。

歌肅祖明皇帝

明 明 肅 祖 闡 弘 帝 祚。 英 風 夙 發 清暉 載 路。 姦逆縱 忒,罔式皇度。 躬振 朱旗,遂豁

步。宏猷淵塞,高羅雲布。品物咸寧,洪基永固。

歌顯宗成皇帝

清波。 於 連 休顯宗,道澤玄播。 理 映阜,鳴鳳棲柯。 式宣德音, 同規放勛,義蓋山河。 暢 物 以 和。 邁德蹈仁,匪禮 一弗過 [三]。 [三]。 敷 以 純 風

以

歌康皇帝

志第十 樂二

十

康皇 仰嗣 洪德。 爲 而 不 宰,雅音四塞。 閑邪 以誠 鎭 物 以默 0 威 靜 圓

邦 或

歌 孝宗穆皇帝

孝宗 夙哲 ,休音允臧。 如彼 晨離 燥景 扶桑。 垂訓 華幄 广流潤 八荒。

幽贊玄妙,爱該典

章。 西平僭蜀,北靜舊疆。 高猷遠暢,朝有遺芳。

歌哀皇帝

於穆哀皇,聖心虛遠。 雅好玄古,大庭是踐。 道尙無爲,治存易簡。

化若

風行

偃。 雖曰登遐,徽音彌闡。 **愔愔雲韶,盡美盡善。**

歌太宗簡文皇帝

王珣造

皇矣簡文,於昭于天。 靈明若神,周 淡 如淵。 沖應其來,實與其遷。

娓娓

心化,日用不

易而有親,簡而 可 傳。 觀流彌遠,求本愈玄。

歌 烈宗孝武皇帝

王珣造

天鑑 有晉,欽哉烈宗。 同規文考,玄默 允龔。 威而不猛,約而能通。 神鉦一 震,九域來

同。 四 時祠祀歌 道積淮海,雅頌 自東。 造 氣陶淳露,化協時雍。

曹毗

肅 理管絃,有來斯和。 肅淸廟,巍巍聖功。 萬國來賓,禮儀有容。 說功德,吐淸歌。 神 斯樂兮。 鍾鼓振,金石熙。 洋洋玄化,潤被九壤。 宣兆祚,武開基。 民無不 神斯

道無不往。 禮有儀,樂有式。 詠 九功, 永無極。 神斯樂兮。

宋宗廟登歌八篇

王韶之造

綿 綿 退緒,昭明載融。 漢德未遠,堯有遺風。 於穆皇祖,永世克隆。 本枝惟慶,貽厥

靡窮。

右祠北平府君登歌。

乃 立清廟 清廟 肅肅。 乃備禮容,禮容穆穆。 顯允皇祖,昭是嗣服。 錫茲繁祉,聿懷

多福。

右祠相國掾府君登歌。

四 縣 旣序, 簫管既 舉。 堂 獻六瑚,庭舞八羽。 先王 一有典, 克 漣 皇祖。 丕顯洪烈,永介

休祜。

右祠開封府君登歌。

鍾 鼓 喤喤 威 儀 將 將。 溫 恭禮樂, 敬享曾皇。 邁德垂仁,係軌重 光。 天命純嘏, 惠我

無疆。

志第十 樂一

睿 卷 __ +

右 祠 武原府君登歌。

鑠 矣皇祖, 帝度其心。 永言配命, 播茲徽音。 思我茂猷, 如玉如金。 駿奔在陛, 是鑑

是歆。

右祠東安府君登歌。

烝哉孝皇, 齊聖廣淵。 發祥誕慶, 景祚自天。 德敷金石, 道被管弦。 有命旣集, 徽 風

永宣。

右祠孝皇帝登歌

惟天有命,眷求上哲。 赫矣聖武,撫運桓撥。 功並敷土,道均 汝墳。 止戈日武,經緯稱

文。 鳥龍失紀,雲火代名。 受終改物,作我宋京。 至道惟王, 大業有劭。 降德兆民, 升歌

淸廟。

右祠高祖武皇帝登歌。

誠。 奕奕寢廟,奉璋在庭。 神之格思,介以 休禎。 笙籥旣列,犧 濟濟羣辟,永觀厥 象旣 成。 盈 黍稷匪芳,明祀惟馨。 樂具禮充,潔羞薦

右祠 七廟享神登歌。 弁以歌 章太后篇。

祖孝武皇帝歌 謝莊造

世

甍。 字。 肅肅清 刊定四海 帝錫 二祖,長世多祜。 廟, ,肇構神京。 徽徽閟宫。 復禮輯樂,散馬墮城。 於穆叡考,襲聖承矩。 舞蹈象德,笙磬陳風。 澤牣 玄極 黍稷非盛,明德惟崇。 一弛馭,乾紐墜緒。 九有,化浮 八瀛。 闢我皇維,締我宋 慶雲承掖 神其歆 止 ,甘露 降 飛 福

宣皇太后廟歌

無窮

祥 月輝, 毓德軒光。 嗣徽嬀汭,思媚周姜。 母臨萬字, 訓藹紫房。 朱絃玉籥,

瓊芳。

晉四箱樂歌三首

傅玄造

穆濟濟。其二煌煌三辰,實麗于天。 皇,萬邦惟則。其四 天鑒有晉,世祚聖皇。時齊七政,朝此萬方。其一 君后是象,威儀 孔虔。其三 鍾鼓斯震,九賓備禮。 率禮. 無愆,莫匪邁德。 正位 在朝, 儀 刑 穆 聖

右天整四章,章四句。正旦大會行禮歌。

於赫 明明, 聖德龍興。 朝獻酒 ,萬壽是膺。 敷佑四方, 如日之升。 自天降祚, 元吉

有徵。

右於赫一章,八句。上壽酒歌。

志第十 樂二

以間。 簡,其大不禦。 風化潛興,如雲如雨。其十如雲之覆,如雨之潤。聲敎所暨,無思不順。其十一 祐,下民所安。其四 天祐聖皇,萬邦來賀。 且平。其十三 教以化之,樂以和之。 **廙廙作宗,光宅天下。其六惟敬朝饗,爰奏食舉。** 之績。其二丕顯宣文,先知稼穡。 天命大晉,載育羣生。 琴瑟齊列,亦有篪塤。其八喤喤鼓鍾,鎗鎗磬管。八音克諧,載夷載簡。其九 和而養之,時惟邕熙。其十二禮愼其儀,樂節其聲。 於穆上德,隨時化成。其一自祖配命,皇皇后辟。繼天創業,宣文 克恭克儉,足敎足食。其三旣敎食之,弘濟艱難。 ` 雖安勿安,乾乾匪暇。其五乃正丘郊,乃定冢社 盡禮供御,嘉樂有序。其七樹羽設業,笙鏞 於鑠皇繇,旣和 旣夷旣 上帝是

右天命十三章,章四句。食舉東西箱歌。

晉正德大豫二舞歌二篇

傅玄造

天命有晉,光濟萬國。 穆穆聖皇,文武惟則。 在天斯正,在地成德。 載韜政刑,載崇禮

教。 我敷玄化,臻于中道。

右正德舞歌。

於鑠皇晉,配天受命。 熙帝之光,世德惟聖。 嘉樂大豫,保祐萬姓。 淵兮不竭,沖而用

之。先天弗違,虔奉天時。

右大豫舞歌。

晉 四箱樂歌十七篇

荀勗造

正旦大會行禮歌四篇

於皇元首,羣生資始。 履端大享, 敬御繁祉。 肆覲羣后,

爱及卿士。

欽順則元,

允也

天子。

於皇一 章,八句。當於蘇。

明天子,臨下有赫。 四表宅心, 惠浹荒貊。 柔遠能邇, 孔淑不逆。 來格祁祁, 邦家

是若。

明

明明一 章,八句。當巍巍

光光邦國,天篤其祜。 **丕顯哲命**, 顧柔三祖。 世德作求,奄有九土。 思我皇度, 彝倫

攸序。

(非國 章,八句。當洋洋。

惟祖惟宗,高朗緝熙。 對越在天, 駿惠在茲。 聿求厥成,我皇崇之。式固其猶, 往敬

用治。

祖宗 章,八句。當應鳴

志 第 + 樂二

正旦大會王公上壽酒歌一篇

踐元辰,延顯融。 獻羽觴,耐令終。 我皇壽而隆,我皇茂而嵩。 本枝奮百世,休祚鍾

聖躬。

踐元辰一章,八句。當羽觴行。

食舉樂東西箱歌十二篇

煌煌七燿,重明交暢。 我有嘉賓,是應是貺。 邦政旣圖, 接以大饗。人之好我, 式遵

德讓。

煌煌一章,八句。當應鳴。

胥子陪僚,憲茲度楷。 賓之初筵,藹藹濟濟。 觀頤養正,降福孔偕。 旣朝乃宴,以洽百禮。 頒以位敍,或廷或陛。 登儐台叟,亦有兄

賓之初筵一章,十二句。當於穆。

昔我三后,大業是維。今我聖皇,焜燿前暉。 奕世重規,明照九畿。 思輯用光,時罔有

違。陟禹之跡,莫不來威。天被顯祿,福履是綏。

三后一章,十二句。當昭昭。

赫矣太祖,克廣明德。廓開宇宙,正世立則。 變化不經,民無瑕慝。 創業垂統,兆我

赫矣 章,八句。當華華。

文伯考, 時惟帝景。 夷險平亂,威而不猛。 御衡不迷, 皇塗煥炳。 七德咸宣,

惟永。

烈文一章,八句。當朝宴。

猗 歟盛歟,先皇聖文。 則天作学,大哉爲君。 愼徽五典,帝載是懃。 文武發揮,茂建嘉

勳。 修己濟治, 民用寧殷。 懷遠燭幽,玄教氛氳。 善世不伐,服事參分。 德博化隆,

無垠

{猗 章,十六句。當盛德。

隆 化洋洋,帝命溥將。 登我晉道,越惟聖皇。 龍飛革運,臨燾八荒。 叡哲欽明, 配蹤虞

封 建厥福 ,駿發其祥。 朝習吉,終然 允臧。 其臧惟何,總彼 萬 方。 元侯 列 辟 四 嶽

光。貢賢 (納計、獻璧奉璋。保) 祐 命之, 申 錫 無疆

時見世享,率茲有常。

旅揖在庭,嘉客在堂。

宋

衞

旣臻

陳留

Щ 陽

我

有 賓

《使,觀

國

隆化 章,二十八句。當綏邁邦

振鷺 于飛 鴻漸其翼。 京邑穆穆,四方是式。 無競惟 王綱允敕。 君子來朝, 言觀

志 第 + 樂

其極。

振鷺一章,八句。當朝朝。

位。 九族旣睦,庶邦順比。 翼翼大君,民之攸暨。 信理 開元布憲, 天工,惠康不匱。 四海 鱗萃。 協 將遠不仁,訓 時正 統, 殊 塗 以淳粹。 同 致。 厚德載 幽 明 有 物, 倫 俊 靈 义在 心 隆

遂。 我后宴喜,令聞不墜。

貴。

敷奏讜言,納以

無諱。

樹之典象, 誨之義類。

上

一教如

風、下

應如卉。

一人有慶,羣萌

翼翼一章,二十六句。當順天。

旣宴旣喜,翕是萬邦。 禮儀卒度,物有 其容。 哲哲庭燎, 喤喤鼓鍾。 笙磬詠德,萬舞象

功。八音克諧,俗易化從。其和如樂,庶品時邕。

既宴一章,十二句。當陟沃庭。

是賓。 玄齒文身。 **爱造草昧,應乾順民。** 時邕份份,六合同塵。 肅愼 率職, 我皇撫之,景命惟 楛矢來陳。 往我祖宣,威靜殊鄰。 靈瑞告符,休徵饗震。 新。 韓濊進樂,四均協清鈞。 首定荆楚,遂平燕秦。 天地: 弗違,以和 西旅獻獒,扶南效珍。 神人。 娓娓文皇,邁德流 旣戡庸蜀,吳會 蠻裔重譯,

時爲一章,二十六句。當參兩儀。

愔 悟嘉會,有聞無聲。 清酤旣奠,籩豆旣馨。 禮充樂備,簫韶九成。 愷樂飲酒,酣而不

率土歡豫,邦國以寧。 王猷允塞,萬載無傾。

嘉會一章,十二句。

晉正 德大豫二舞歌二篇章

荀勗

蹤。 上 敷美盡善,允協時邕。 人文垂則,盛德有容。 化如風,民應如草。 煥炳其章,光乎萬邦。 聲以依詠,舞以象功。 萬邦洋洋,承我晉道。 干戚發揮,節以笙鏞。 羽籥雲會,翊宣令 配天作享,元 命 有

穆穆斌斌,形于綴兆。

文武旁作,慶流四表。

無競維烈,

永世

右正德舞歌。CKI

烈雲布。 之。〔t〕重光累曜,欽明文思。 豫 順以動,大哉惟時。 文教旁通,篤以淳素。 時邁其仁,世載邕熙。 **迄用有成,惟晉之祺。** 玄化洽暢,被之暇豫。 兆我區夏,宣文是基。 穆穆聖皇, 作樂崇德,同美韶濩。 受命旣固。 大業惟新,我皇隆 品 濬邈幽遐,式 物 咸 寧,

右 大豫舞歌。 遵王度。

晉四箱 樂歌 十六篇

志

第

十

樂

張華造

稱元慶,奉壽觴。 后皇延遐祚,安樂撫萬方。

右王公上壽詩一章。

明明在上,丕顯厥繇。翼翼三壽,蕃后惟休。羣生漸德,六合承流。

三正元辰,朝慶鱗萃。|華夏奉職貢,八荒覲殊類。 **黻冕充廣庭,鳴玉盈朝位。** 濟濟朝

位,言觀其光。 儀序旣以時,禮文渙以彰。 思皇享多祜,嘉樂永無央。

九賓在庭,臚讚旣通。 升瑞奠贄,乃侯乃公。穆穆天尊,隆禮動容。 履端承元吉,介福

御萬邦。

明。 懷柔百神,輯祥禎。 朝享,上下咸雍。 崇多儀,繁禮容。 潛龍躍,雕虎仁。 舞盛德,歌九功。揚芳烈,播休蹤。 儀鳳鳥,屆游麟。 枯蠹榮,竭泉流。菌芝茂,枳 皇化洽,洞幽

棘柔。 和氣應,休徵滋。 協靈符,彰帝期。 綏宇宙,萬國和。 昊天成命,賚皇家,賚皇家。

世資聖哲,三后在天,啓鴻烈。啓鴻烈,隆王基。率土謳吟,欣戴于時。恒文示象,代

氣著期。

泰始開元,龍升在位。 四隩同風,燮寧殊類。 五韙來備, 嘉生以遂。

凝庶績,臻太康。 申繁祉,胤無疆。本枝百世,繼緒不忘。 繼緒不忘,休有烈光。

配命,惟晉之祥。

明 統 世,篤皇仁。 廣 大配天地, 順動若陶鈞。 玄化參自然, 至德 通 神明。 清風 暢

極 流澤被無垠

猷。 心,斵彫 大明 於 皇時晉,奕 反素樸。 重耀,鑑 六 世 反素樸,懷庶方。 幽 齊聖。 聲教 惟天降嘏, 洋溢,惠 干 戚舞 滂流。 神祇保定。 階 庭, 惠滂流 疏狄 弘濟 移風俗。 說遐荒。 區 夏, 允集大命。 多 扶南假 士盈朝 重譯, 賢 有 命旣 俊 肅愼 比 屋。 集, 襲 敦 世 帝

清。 協 朝 億 元 兆 H 賓 同 歡 王 樂。 庭。 承宸 建 皇 極 極 一,統 當 盛 天 位 明。 運 衍 陰 和 「樂,式 陽 樂,竭祗 御 六 誠。 刑 氣 殷 仰 嘉 羣 生, 惠, 懷德馨。 成 性 類 游淳 王 道 浹, 風, 治 泳 淑 功

成。

倫

序,俗

化

清。

虔

明

祀

派

靈

崇禮

儀

雲覆

111

施

德

洽

無

疆。

旁作穆穆,仁化

翔

寧。六合寧,承聖明。王 慶元吉,宴三朝。 澤洽,道 播 金 石 登隆。 詠 冷 簫 綏 函 奏 夏 {九 夏 總華戎。 舞 雲韶 齊德教 邁德 音, 混 殊 流英聲。 風 o 混 殊 八 風 紘 康萬 國

崇夷簡,尚敦德。 弘王 一度,表 遐 則

右 食 舉 東西箱 樂詩 + 章

於 赫 皇祖, 迪 哲 齊聖。 經緯· 大業, 基天之命。 克開 洪緒, 誕篤 一天慶。 旁濟彝倫 仰

政_o

五九〇

烈烈景皇,克明克聰,靜封略,定勳功。 允文烈考,濬哲應期。 **参德天地**, 比功四時。 成民立政、儀刑萬邦。 大享以正, 庶績咸熙。 式固崇軌,光紹 肇啓晉字, 前 蹤 遂登

皇基。

明 明 我后,玄德通神。 受終正位, 協應天人。 容民厚下, 育物流仁。 躋我王道, 暉光

日新。

右雅樂正旦大會行禮詩四章

晉正德 大豫 舞歌二

張華造

IE 德 舞歌詩

日皇上天,玄鑒惟光。 神器周回,五德代章。 皇道惟淸,禮樂斯經。 祚命于晉, 世有哲王。 弘濟區 金石 在縣,萬舞 夏,甄 陶萬 在

庭。 象 容 表 慶, 協律被聲。 **軼武超濩**, 取節六英。 同進退讓,化漸無形。 太和宣洽,通

幽 冥。 方。

大明

垂

曜,旁燭

無疆。

蚩蚩庶類,風德永康。

大豫舞 歌詩

璿 璣。 惟 天之命 羣生屬命, 奄有庶邦。 符 運 有 歸。 赫赫大晉,三后重暉。 愼徽五典,玄敎遐通。 繼明紹世,[公] 萬 一方同軌,率土咸雍。 光撫 九圍。我皇紹期,遂在 爱制大豫,宣德

舞功。 淳化旣穆,王道協隆。 仁及草木,惠加昆蟲。 億兆夷人,說仰皇風。 丕顯大業,永世

彌崇。

晉四箱歌十六篇

成公綏造

上壽酒,樂未央。大晉應天慶,皇帝永無疆

右詩一章,王公上壽酒所用。

穆穆天子,光臨萬國。 多士盈朝,莫匪俊德。 流化罔極,王猷允塞。 嘉會置酒,嘉賓充

庭。 羽旄燿辰極,鍾鼓振泰淸。 百辟朝三朝,彧彧明儀刑。 濟濟鏘鏘,玉振金聲。[元]

羣后戾止,有來雍雍。

獻酬納贄、崇此禮

咸攸 同。

禮樂具,宴嘉賓。眉壽祚聖皇,景福惟日新。

容。 豐肴萬俎,旨酒千鍾。 嘉樂盡樂宴,福祿

樂哉!天下安寧。 道化行,風俗淸。 簫韶作,詠九成。 年豐穰, 世泰平。 至治哉!

無窮。 元首聰明,股肱忠。澍豐澤,揚淸風。

嘉瑞出、靈應彰。 麒麟見,鳳皇翔。醴泉涌,流中唐。 嘉禾生,穗盈箱。 降繁祉, 祚聖

承天位,統萬國。 受命應期,授聖德。 四世重光,宣開洪業,景克昌,文欽明,德彌彰。

肇啓晉邦,流祚無疆

泰始建元,鳳皇龍興。 龍興伊何,享祚萬乘。 奄有八荒,化育黎蒸。 圖書煥炳,金石有

第

五九二

徵 德光 道熙隆。 被四 表, 格皇 穹。 奕奕萬嗣,明 明顯融。 高 朗令終。 保茲永祚,

比崇。

聖皇 君四海,順人應天期。 三葉合重光, 泰始開洪 基。 明燿參日月, 功化侔四時。

宙清且泰,黎庶咸雍熙。善哉雍熙。

宣,芬芳播來胤。 惟 四海同風,興至仁。 天降命,翼仁祐聖。 播來胤,垂後昆。 濟民育物,擬陶鈞。 於穆三皇,載德彌 盛。 擬陶鈞,垂惠潤。 總齊璿璣,光統七政。 皇皇羣賢,峨峨英儁。 百揆時序,化若神

清廟何穆穆,皇極闢 四門。 皇極闢四門,萬機無不綜。 娓娓翼翼, 樂不及荒, 饑不遑

食。大禮旣行,樂無極。

覽八 邁洪化,振靈威。 登崑崙,上增城。 極,游天庭。 懷萬 順天地,和陰 乘飛龍,升泰淸。 方,納 九 陽。 夷。 序 冠日月,佩五 朝閶闔、宴紫微。 四氣,燿三光。 星。 揚 張帝網, 虹蜺, 建彗旌。 IE. 皇綱。 播仁風, 披慶雲, 蔭繁 流惠

五. 旗、羅 鍾 虡。 列 四縣,奏韶武。 鏗金石,揚旌羽。 縱八佾,巴渝舞。 詠雅頌, 和律

呂。于胥樂,樂聖主。

化蕩蕩,清風泄。 總英雄,御俊傑。 開宇宙,掃四裔。光緝熙,美聖哲。超百代,揚休

烈,流景祚,顯萬世。

皇皇顯 祖, 翼世 佐 時。 寧濟六合, 受命應期。 神武 鷹揚, 大化咸熙。 廓 開 皇 衢, 用成

帝基。

光 光景皇, 無競維烈。 匡時拯俗, 休功蓋世。 宇宙旣康, 九域 有截。 天命降鑑, 啓祚

明哲。

穆穆 烈考, 克明克儁。 實天生德, 誕膺靈運。 肇建帝業, 開國 有晉。 載德奕世, 垂 慶

洪胤。

明 明 (聖帝, 龍飛在天。 與靈合契, 通德幽 玄。 仰化淸雲, 俯育重淵。 受靈之祐,

斯年。

右雅樂正旦大會行禮詩十五章。

朱四箱樂歌五篇

王韶之造

於鑠我皇,禮仁包元。 齊明日月, 比量乾坤。 陶甄 百王, 稽則黃軒。 **計**謨定命,

辰告

四蕃。

將 將蕃后, 翼翼羣僚。 盛服待晨, 明發來朝。 饗以八珍, 樂以九韶。 仰祗 一天顏, 厥猷

礼昭。

志

第

+

樂

五九四

法章旣設, 初筵長舒。 濟濟列辟, 端委皇除。 飲和無盈, 威儀有餘。 溫恭在位, 敬終

如初。

九功旣歌, 六代惟時。 被德在樂,宣道以詩。 穆矣太和,品物咸熙。 慶積自遠, 告成

在茲。

右肆夏樂歌四章。 客入,於四箱振作於鑠曲。 皇帝當陽,四箱振作將將曲。 皇帝入變服,四箱振作於

鑠、將將二曲。又黃鍾、太簇二箱作法章、九功二曲。

大哉皇宋,長發其祥。 纂系在漢,統源伊唐。 德之克明, 休有烈光。 配天作極,辰居

四方。

皇矣我后, 聖德通靈。 有命自天, 誕授休禎。 龍飛紫極,造我宋京。 光宅宇宙,赫赫

明明。

右大會行禮歌二章。始洗箱作。

獻壽爵,慶聖皇。靈祚窮二儀,休明等三光。

右王公上壽歌一章。黃鍾箱作。

明明大宋,緝熙皇道。則天垂化,光定天保。 天保旣定,肆覲萬方。 禮繁樂富,穆穆

皇皇。

沔 彼流水, 朝宗天池。 洋洋貢職, 抑抑威儀。 旣習威儀, 亦閑禮容。 人有則,

萬邦。

烝 哉 我皇,固天誕聖。 履端惟始, 對越休慶。 如天斯久, 如日斯盛。 介茲景福, 永固

駿命。

右殿前登歌三章,別有金石。

充皇庭。 晨 羲 載燿,萬物咸覩。 多士盈九位,俯仰觀玉 嘉慶三朝,禮樂備舉。 聲。 恂恂俯仰,載爛其煇。 元正肇始,典章暉明。 鼓鍾震天區,禮容塞皇闈。 萬方畢來賀, 思

樂窮休慶,福履同所歸。

五 玉 一旣獻,三帛是薦。 爾公爾侯,鳴玉華殿。 皇皇聖后,降禮南 面 元首納嘉禮,萬邦

同 歡 願。 體 至 休哉! 和 ,威陰陽。 君臣 一嘉燕。 德無 不柔,繁休祥。 建五 旗,列 四 縣。 瑞徽壁,應嘉 樂有文,禮無倦。 鍾 o 舞 靈鳳, 融皇 一風,窮 躍 潛 龍。 變。 景

星見,甘

懷 荒 裔,綏齊民。 荷天祐,靡不賓。 靡不賓, 長 世 弘盛 昭明有融, 繁嘉慶。 繁嘉慶, 露墜。

木連理,禾

同穗。

玄化洽,仁澤敷。

極禎

湯,第一

靈

符。

熙帝載。 合氣 成和、[10]蒼生欣戴。 三靈協瑞,惟 新 皇代。

王 道 四達,流仁布德。 窮理詠乾元, 垂訓順帝則。 靈化侔四時, 幽誠通玄 默。 德澤被

志第十 樂二

Ŧi.

九六

八紘,乾寧軌萬國。

皇猷緝,咸熙泰。 禮儀煥帝庭,要荒服遐外。 被髮襲纓冕,左袵回衿帶。 天覆 地載,流

澤汪濊。聲敎布濩,德光大。

開 元辰,畢來王。 奉貢 職,朝后皇。 鳴珩佩,觀典章。 樂王 一度, 說徽芳。 陶盛化, 游 太

康。丕昭明,永克昌。

惟永初 ,德丕顯。 齊七政,敷五典。 彝倫序,洪化闡。 王澤流, 太平始。 樹聲 敎, 明皇

紀。和靈祇,恭明祀。衍景祚,膺嘉祉。

禮 有容, 樂有儀。 金石陳, 牙羽施。 邁武 漢漢 均咸池。 歌南風, 舞德稱。 文武 煥 頌

聲興。

王道純,德彌淑。 寧八表,康九服。 道禮讓,移風俗。 移風俗, 永克融。 歌盛美, 告成

功。三三詠徽烈,邈無窮。

右食舉歌十章。 黄鍾、太簇二箱更作。 黄鍾作晨羲、體至和、王道、開元辰、 禮有容 Ŧī. 曲。 太簇作五玉、

懷荒裔、皇猷緝、惟永初、王道純五曲。

宋前舞後舞歌二篇

王韶之造

於赫景明,天監是臨。 樂來伊陽,禮作惟陰。 歌自德富,舞由功深。 庭列宫縣,陛羅瑟

乾。 儀 翻籥繁會,笙磬諧音。 刑六合,化穆自然。 簫韶雖古,九成 如彼雲漢,爲章于天。 在 令。 道志 熙熙萬類, 和聲,德音 陶 和當 孔宣。 年。 光我帝基 撃轅中韶 協 靈配 永 世

右前舞歌一章。晉正德之舞,蕤賓箱作。

不言之化,品物咸德。 假樂聖后,實天誕德。 告成于天,銘勳是勒。 積美自中,王猷 四 塞。 翼翼厥猶,娓娓 龍 飛在天,儀刑 其仁。 萬 國。 順 欽 命 明 創 惟 制 神 因 臨 朝 定 淵 和

彌新。 神。 海 外有截, 九圍無塵。 冕旒司契,垂拱臨民。 乃舞大豫,欽若天人。 純嘏孔休。 萬載

右後舞歌一章。 晉大豫之舞,蕤賓箱作。

·廟樂舞歌詞雜歌悉同用太廟詞,唯三后別撰。

章

殷淡造

賓出入奏肅成樂歌詞二章

構 周 張。 彝承 助寶 孝典,恭事嚴聖。 奠軒,酎珍充庭。 浹天奉費, 罄壤齊慶。 璆縣凝會,涓朱竚聲。[1三先期選禮,肅若有承。 司 儀 具序,羽容夙彰。 **芬枝颺烈,**[三黼 祗對 靈祉

呈慶昭膺。

尊 事 威儀,暉容昭敍。 迅恭神明,梁盛牲俎。 肅肅嚴宮,藹藹崇基。 皇靈降祉,百祇具

志

五九八

司。 戒誠 《望夜, 端列承 朝。 依微昭旦, 物色輕霄。自門鴻慶遐鬯, 嘉薦令芳。 翊帝明德, 永

祚流光。

牲出入奏引牲樂歌詞

維 誠 潔饗,維孝奠靈。 敬芬黍稷,敬滌犧牲。 騂繭在豢,載溢載豐。 以承宗祀,以 肅

衷。蕭芳四舉,華火周傳。神監孔昭,嘉是柔牷。

薦豆呈毛血奏嘉薦樂歌詞

服 事 晨 惟 暉 神。 肇 **種戒祀**, 聖 加 籩 靈 戾 再 禮容咸 御、兼 止 翊 我皇 俎 舉。 重 則。 薦。 六典飾文, 上綏 節 動 四 軒 字,下洋萬 九司昭序。 越 一聲流 金 國。 縣。 牲柔旣昭, 奕 永言孝饗,孝饗有容。 変閥 幄, 犧 剛旣陳。三三恭滌惟清, 娓 娓 嚴 闡 儐僚贊列 潔 誠 夕鑑 端 敬 肅

肅雍雍。

右夕牲歌詞。

迎神奏韶夏樂歌詞

凊。 閟 金枝委樹, 宮黝黝,復殿 翠鐙竚縣 微 微。 璿除 **渟波澄宿,華漢浮天。** 肅 炤,釭璧彤 煇。 黼帝 恭事既夙,虔心有慕。 神凝,玉 一堂嚴 馨。 圜 仰降皇靈, 火 夕 燿 方 俯寧 水 朝

休祚。

皇帝入廟北門奏永至樂歌詞

皇明鬯矣,孝容以昭。 變華羽迾,拂漢涵滈。 申申嘉夜、翊翊休朝。 行金景送,步玉風

韶。師承祀則,肅對禋祧。

太祝祼地奏登歌樂詞二章

帝容承祀,練時涓日。 九重徹關,四靈賓室。 肅倡函音,庶旄委佾。 休靈告饗,嘉薦尙

芬。玉瑚飾列,桂簋昭陳。具司選禮,翼翼振振。

裸 崇 祀 典 , 酎 恭 孝 時。 禮 無 爽物,信靡 媿 詞。 精華孚鬯,誠監昭通。 升歌翊節,下管調

風。皇心履變,敬明尊親。大哉孝德,至矣交神。

章皇太后神室奏章德凱容之樂舞歌詞

[瑞浚靈,表彰嬪聖。 翊載徽文,敷光崇慶。 上緯纏祥, 中維飾詠。 永屬煇猷, 聯昌

景命。

幽

昭皇太后神室奏昭德凱容之樂舞歌詞

明帝造

靈 |纏象,纘儀緯風。 膺華丹燿,登瑞紫穹。 訓 形霄字, 武彰宸宮。 騰芬金會, 寫德

聲容。

表

宣皇太后神室奏宣德凱容之樂舞歌詞

志

第

+

樂

明帝造

五九九

六〇〇

天 樞 疑 燿 ,地紐儷煇。 聯光騰世, 炳慶翔機。 薰藹中字, 景纏上微。 玉 頌鏤德, 金籥

傳徽。

皇帝還東壁受福酒奏嘉時之樂舞詞

禮 薦 洽,福時昌。 皇聖膺嘉祐,帝業凝休祥。 居極 乘景運,宅德瑞中王。 澄明臨四

精 華延 八 鄉。 洞海周 聲惠,徹宇麗乾光。 靈慶纏世祉,鴻烈永 無疆

送神奏昭夏之樂舞歌詞二章

大孝備、盛 禮豐。 神安留,嘉樂充。 旋駕聳,汎青穹。延八虛,闢四空。藹流景,肅 行風。

昭 融 教, 緝風度。 戀皇靈,結深慕。 解羽縣, 輟華樹。 背璿除,端玉輅。 流注濊,慶

國步。

皇帝詣便殿奏休成之樂歌詞

釃 醴 具 登 一嘉俎 成薦。 饗洽誠陳,禮周樂編。 祝詞罷祼,序容輟 縣。 蹕動端 庭, 變回 嚴

音。 大 誠 達孝, 底 心肅 感。 追憑皇鑒,思承淵 範 神錫 懋祉 , 四四 緯昭 明。 仰福 帝徽, 俯 齊

庶生。

神

儀

駐景

華

+漢亭虛

八

靈案衞

三祇

解

途。

翠蓋

燿澄

,畢奕凝宸。

玉

鐮

息

節

金

輅

懷

整泰折 「泰折」,三朝本同,弘治本、北監本、毛本、殿本作「泰行」,局本作「泰壇」。 按泰折卽

地壇,三朝本是。

於鑠皇祖聖德欽明勤施四方夙夜敬止 沈濤銅熨斗齋隨筆云: 魏、 晉音韻,與唐韻不同,而

'明』『止』二字,決無相協之理。 蓋『勤施四方』『夙夜敬止』二語,傳寫誤倒,本以『方』『明』二字

爲韻耳。」

/\ ≥ ∪ 匪禮弗過 「禮」各本並作「神」,據晉書樂志、樂府詩集八改。

四 韓濊進樂 「樂」各本並作「藥」,據晉書樂志、樂府詩集一三改。 按下有「均協清鈞」語) 則作

「樂」是。

万五山 晉正德大豫二舞歌二篇 「二篇」各本作「一篇」。 按下正德舞歌一篇,大豫舞歌 一篇,實二篇,

今改正。

[六] 右正德舞歌 各本並脫「右」字,據前後文例補。

[4] 我皇隆之 「隆」各本並作「降」,據樂府詩集五二改。

繼明紹世 「紹」各本並作「昭」,據晉書樂志、樂府詩集五二改。

九九山 玉 振 金 聲 各本並作「金振玉聲」。 張森楷校勘記云:「孟子作玉振金聲,此誤倒。」今改正。

志第十 校勘記

- 合氣成和 南齊書樂志作「含氣感和」。樂府詩集一四作「含氣咸和」。
- 告成功 「告」各本及樂府詩集一四並作「造」,據南齊書樂志改。
- (二) 芬枝颺烈 「芬」各本並作「分」,據南齊書樂志改。
- 涓朱竚聲 「涓」南齊書樂志作「埍」。樂府詩集八作「琄」。
- [12] 物色輕霄 「霄」各本並作「宵」,據南齊書樂志改。
- (1五) 犧剛旣陳 「犧」各本並作「彘」,據南齊書樂志改。

宋書卷二十一

志第十一

樂三

但歌四曲,出自漢世。 無弦節,作伎,最先一人倡,三人和。 魏武帝尤好之。時有宋容

譁者,淸徹好聲,善倡此曲,當時特妙。 自晉以來,不復傳,遂絕。

相和,漢舊歌也。絲竹更相和,執節者歌。本一部,魏明帝分爲二,更遞夜宿。本十七

曲,朱生、宋識、列和等復合之爲十三曲。

相和和

駕 六 龍

氣出倡

武帝詞

到泰山。 駕六龍乘風而行,行四海外。路下之八邦,歷登高山,臨谿谷,乘雲而行,行四海外,東 仙人玉女,下來翺游,驂駕六龍,飲玉漿,河水盡,不東流。 解愁腹,飲玉漿。 奉持

車,驂駕白鹿,上到天之門,來賜神之藥。跪受之,敬神齊。當如此,道自來。 道,出窈入冥。常當專之,心恬憺無所惕欲,閉門坐自守,天與期氣。願得神之人,乘駕雲 王心正興,其氣百道至,傳告無窮。閉其口,但當愛氣,壽萬年。 行,東到蓬萊山 .。上至天之門。 玉闕下, [1] 引見得入, 赤松相對, 四面顧望, 視正焜煌。 東到海,與天連。 神仙之 開

時,仙道多駕煙,乘雲駕龍,鬱何蓩蓩。遨游八極,乃到崐崘之山,西王母側。 琴,何誾誾,酒與歌戲。今日相樂誠爲樂,玉女起,起儛移數時。 華陰山,自以爲大,高百丈,浮雲爲之蓋。仙人欲來,出隨風,列之雨。吹我洞簫鼓瑟 鼓吹一何嘈嘈,從西北來 神仙金止玉

廂,客滿堂。主人當行觴,坐者長壽遽何央。長樂甫始宜孫子,常願主人增年,與天相守。 游君山,甚爲真,確磈砟硌,爾自爲神。乃到王母臺,金階玉爲堂,芝草生殿旁。東西

厥初生 精列

武帝

詞

以墳丘。 駕,思想崐崘居。思想崐崘居,見期於迂怪,志意在蓬萊。 厥初生,造化之陶物,莫不有終期。 會稽以墳丘,陶陶誰能度,君子以弗憂。 莫不有終期,聖賢不能免,何爲懷此憂。 年之暮,奈何,過時時來微。 志意在蓬萊,周孔聖徂落,會稽 願螭龍之

江南可採蓮

(江)南

古詞

江 南 可採蓮,蓮葉何田田 魚戲蓮葉間,魚戲蓮葉東, 魚戲蓮葉西, 魚戲蓮葉南, 魚戲

蓮 葉 北。

選 {Щ 武帝詞

地 }間 天地間,人爲貴。立君牧民,爲之軌則。 車轍馬迹, 經緯四極。 組陟幽明,黎庶繁息。

於鑠賢聖,總統邦域,封建五爵,井田刑獄。 有燔丹書,無普赦贖。 皐陶 浦刑,何有失 **、職。嗟**

伯夷 ,欲以厲俗。侈惡之大,儉爲恭德。 許由推讓,豈有訟曲。 兼愛尙同,疏者爲戚。

舜漆食器,畔者十國,不及唐堯,採椽

不斷。

世

歎

哉後世,改制易律,勞民爲君,役賦其力。

(東)

東光平

古詞

東 光 乎! 倉梧何 不乎! 倉梧多腐粟,無益諸軍糧。 諸軍游蕩子,蚤行 多悲傷。

登山 [有遠望

登

山

而遠望,谿谷多所有。

楩

柟千餘尺, 衆草之盛茂。

華葉燿人目,五色難可紀。

雉

文帝

詞

十五

雊 Щ 雞 嗚 虎虎 嘯谷風 起。 號羆 當 我道,狂 顧動牙齒。

}惟 漢 二十二世

薤露

武 帝

虹 爲貫日,己亦先受 惟 漢二十二世,所任誠不 殃。 賊臣 一持國 良。 柄, 沐 猴 殺主滅宇京。 而 冠帶,智小 而 蕩覆帝 謀强。 基業, **猶豫不敢斷**,因狩 宗廟 以 燔 喪。 ,執君王 播 越 西 岩白

志 第 十 樂 \equiv

移,號泣而且行。瞻彼洛城郭,微子爲哀傷。

武帝詞

利 使 人爭,嗣還自相戕。 關 東 有 義士,興兵討羣凶。 淮南弟稱號, 初期會孟津,乃心在咸陽。 刻璽於北方。 鎧甲生蟣蝨,萬姓以死亡。 軍合力不齊,躊躇 而 雁行。 白骨露於 勢

野,千里無雞鳴。生民百遺一,念之絕人腸。

對酒歌太平時

(對)

武帝詞

年耕 對酒 有 九年儲, 歌,太平時,東不呼門。 倉穀滿盈, 斑白不負戴。 王者賢 (且明,宰相股肱皆忠良, 咸禮讓, 民無所爭訟。 雨澤如 此,五穀用成。 郤走馬以糞其 土 田。 爵公

私 ,囹圄空虚,冬節不斷人。 耄耋皆得以壽終,恩德廣及草木昆 蟲。

侯伯子男,咸愛其民,以黜

陟幽明,

子養

有若父與兄。

犯禮

法,

輕重隨其刑。

路無拾遺之

雞鳴高樹顚

羅

古詞

君門,璧玉 雞 鳴高 爲 樹顚,狗吠深宮中。蕩子 軒闌堂。 上有雙尊酒,作 '何所之,天下方太平。刑法非有貸,柔協正 使 邯鄲倡。 劉 玉 碧青甓,後 田 郭 門王。 含後 亂名。黃金爲 有方池,

中鄓。 池 中雙鴛 五. 日一 鴦。 時來,觀者滿道傍。 鴛鴦七十二, 羅列 自 黃金絡馬頭,頻頻何煌煌。 成行。 嗚聲 何啾啾, 聞我殿東箱。 桃生露井上,李樹生桃傍,蟲 兄弟 四 五 人,皆爲侍

來齧桃根,李樹代桃僵。樹木身相代,兄弟還相忘!

烏<u></u> 烏<u></u> 上八九子 烏<u></u>

古詞

持强 得白 在南 鯉 魚 鹿 山巖 鳥 彈,兩丸出入烏東西。 口 脯 生八九子,端坐秦氏桂樹間。 哺。 石間。 唶我人民生各各有壽 **惜我黃鵠摩天極 惜我人民安知鳥子處,蹊徑窈窕安從通。** 情我一丸卽發中鳥身,鳥死魂魄飛揚上天。 命,死生 高飛,後宮尙復得烹煮之。 唶我秦氏,家有游遨蕩子,工用睢陽强蘇合彈。 一何須 復 道前後。 白鹿 鯉魚乃在洛水 乃在上林 श्च 深淵 西苑中,射工尚 母生鳥子 中,釣 鉤 時, 尙 左 復 得 乃

平陵東 平陵

古詞

不陵東,松栢桐,不知何人劫義 公。 劫義公在高堂下,交錢百萬 兩走馬。 兩走馬,亦誠

難,顧見追吏心中惻。 心 中 惻 · 血 出 漉, 歸告我家賣黃犢。

棄故鄉亦在瑟調東西門行

陌上桑

文帝詞

棄故鄉,離室宅,遠從軍旅萬里客。 披荆棘,求阡 陌, 側足獨窘步,路局笮。 虎豹嘷

霑枕席。伴旅單,稍稍日零落,惆悵竊自憐,相痛惜。

志

第十

樂

=

雞驚,禽

失羣,鳴相索。

登南山

奈

何蹈槃石

, 樹

木叢生鬱差錯。

寢

蒿草,蔭松栢,涕泣

雨

面

陌上桑

楚詞鈔

六〇八

後來。 搜,思念公子徒以憂。 貍,辛夷車駕結桂旗。[lī]被石蘭,帶杜衡,折芳拔荃遺所思。處幽室,終不見,天路險艱獨 今有人,山之阿,被服薜荔帶女蘿。旣含睇,又宜笑,子戀慕予善窈窕。 表獨立,山之上,雲何容容而在下。 **杳冥冥,羌晝晦,東風飄颻神靈雨。風瑟瑟,木搜** 乘赤豹,從文

駕虹蜺 陌上桑

武帝詞

門,受要秘道愛精神。食芝英,飲醴泉,柱杖桂枝佩秋蘭。絕人事,游渾元,若疾風游歘飄門,受要秘道愛精神。食芝英,飲醴泉,柱杖桂枝佩秋蘭。絕人事,游渾元,若疾風游歘飄 駕虹蜺,乘赤雲,登彼九疑歷玉門。濟天漢,至崐崘,見西王母,謁東君。 交赤松,及羡

飄。景未移,行數千,壽如南山不忘愆。

清商三調歌詩 荀勗撰

荀勗撰舊詞施用者

平調

短歌行

武帝詞六解

齊桓之功,爲霸之首,九合諸侯,一匡天下。一匡天下,不以兵車。正而不譎,其德傳稱。三解 繫。一解後見赦原,賜之斧鉞,得使征伐。爲仲尼所稱,達及德行,猶奉事殷,論敍其美。二解 周 **西伯昌,懷此聖德,參分天下,而有其二。修奉貢獻,臣節不墜。 崇侯讒之,是以拘**

孔子所歎,幷稱夷吾,民受其恩。賜與廟胙,命無下拜。小白不敢爾,天威在顏咫尺。四解

者尊,八方聞之,名亞齊桓。 晉文亦霸,躬奉天王。 受賜珪瓚、秬鬯,肜弓、盧弓、矢千,虎賁三百人。五解威服諸侯,師之 河陽之會,詐稱周王,是以其名紛葩。六解

秋風 **(燕)** |行 文帝詞·

七解

慊慊 思 秋 風 歸戀故鄉,君何淹留寄它方。三解 蕭瑟天氣凉, 草木搖落露爲霜。一解 賤妾榮榮守空房,憂來思君不敢忘。四解 羣燕辭歸鵠南翔,[三] 念君客游多思腸。二解 不覺淚下

牽牛織女遙相望,爾獨 何辜限 河梁。七解

霑衣

一裳,援瑟鳴弦發清商。五解

短歌微吟不能長,明月皎皎照我牀。

六解

星漢西流夜未央,

仰瞻

涕

短歌行

文帝 詞 六解

灰,莫我能 連連。二解 仰 瞻帷幕,俯察几筵。 知 呦 。四解 呦游鹿,街草鳴魔 人亦 有言,憂令人老。 其物如故, 翩 翩 飛 其 嗟我白髮, 鳥,挾子巢棲。三解 人不存。一解 生一 神靈倏忽,棄我遐遷。 何早。五解 我 獨 孤 祭,懷此 長吟永歎, 百離 靡瞻 懷 我聖考。 靡恃,泣 憂心孔

別品

日仁者壽,胡

不是保。六解

燕歌 }行

> 文帝 詞 六解

雨 面 毁 别 形 H 顔 何 易會 誰能 日 懐憂 難 一, 山 獨不 川悠遠路漫漫。一 ·歎。 三解 耿耿伏枕不能眠,披衣出戶步 解 鬱 陶 思君未 敢言,寄書浮雲往不還。二解 東西。四解 展詩清歌 聊自 涕零

志

卷 _ +

樂往哀來摧心肝。 悲風淸厲秋氣寒,羅惟徐動經秦軒。五解 仰戴星月觀雲間,飛鳥晨

鳴,聲氣可憐,留連顧懷不自存。六解

短歌行 武帝詞六解

從中來,不可斷絕。四解 有「杜康」。二解 青青子衿,悠悠我心。 對酒當歌,人生幾何!譬如朝露,去日苦多。一解 呦呦鹿鳴,食野之苹。 但爲君故,沈吟至今。三解 我有嘉賓,鼓瑟吹笙。五解 **慨當以慷,憂思難忘。** 明明 如月,何時 山不厭高,水不厭 以何解 可 掇。 愁, 唯 憂

清調

深。

周公吐哺,天下歸心。六解

秋胡行 武帝詞

眞人。 志,我居崐崘山。三解 欲,來到此間。歌以言志,有何三老公。二解 在我傍。 之上,彈五弦之琴,作爲淸角韻,意中述煩。 歌以言志,晨上散關山。一解 **晨上散關山,此道當何難** 道深有可得。 有何三老公,卒來在我傍。 名山歷觀,遨游八極。 去去不可追,長恨相牽攀。 !晨上散關 員揜被裘,似非恒人。 山,此道當何難!牛頓不起,車墮谷間。 我居崐崘山,所謂者眞人。我居崐崘山,所謂者 枕石漱流飲泉。 去去不可追,長恨相牽攀。夜夜安得寐, 謂卿云何,困苦以自怨,徨徨所 沈吟不決,遂上升天。 有何三老公,卒來 歌以言 坐槃石

本...是 惆 悵 二上三散 以自憐。 = 關 正 = 山 =, 而 不譎 此二 辭 道 = 當二 賦依因。 何 = 難 經傳所過,西來所傳。 有 |何|三| 老二公二, 卒 || 來 || 在 || 傍 歌以言志, 去去不可 我二居 二我二崐 追。 四 解。 二輪 叉 1=

山 = , 所 謂 眞 人二,去二 不二可二 追=,長= 相 = 牵= 攀

武 詞六解

飢 絕, 霏 瑟 。 五 中 , 北 霏 北 解 道 = 上太三 擔 正 延 風 頸 = 囊 裴 行三山三 聲 長 一行 回 = 歎 正 四解 息,遠行多所 = 取 , 悲 迷 艱 薪 = 惑 0 = 哉 熊 , 斧 失 羆 何 _ 懷 冰冰 對 徑 。三解 我蹲,虎豹 巍 = 路 持 = =, 巍 我 作 心何 = 暝 = 夾 糜 羊腸坂 無 /道啼 佛 0 所 鬱 悲彼東山 (詩屈) = , 解 宿 思 谿 = 車輪 棲三。 一欲= 谷 詩,悠悠使 少 爲 _ 行 之摧。一 人三民 行 = 東 日 我哀 以 解 歸 遠 9 雪 = 樹 0 人馬 水深 木 落 何 同 蕭 橋 何 時 梁

|登 **秋** 胡 {行 武 帝

詞

五

解

{源

之 俱。 率 何 短 士, 長 思 願 得 久 = 登 莫 ! 神 世言 非 二解 藥,萬 泰一 王 L伯陽. 臣。 明 華 歲 = ,殊不知老,赤松 爲期。 明 Щ = <u>.</u> 義爲名, 神 歌以言志,願登 = 月 人 禮樂爲榮。 光 = 共 = 何一 王喬,亦 = 遠 = 所 泰 游 歌以言志, 明明日月光 云 華 不三光 得 Ш 0 道。 經 歷 解 = 崐崘 得之未聞,庶 昭』。二儀 天 == Щ, 地 = 到 何 蓬 合 = 。三解 聖化 以 長 壽 = 考。 う貴 久 飄 四 =, 人 颻 者獨 一 時 歌以言志 八 極, = 人不。 更 道 與 居居 逝 神 萬 天 人

國

地

殊不 爲蚩 再來。 畫 歌以言志 夜三 愛時進趣,將以惠誰。 以『成『歲』。 ,四時更逝 去。 大人先天, 四解 氾氾放逸,亦同何爲。 戚 而天弗違。 戚 "欲 "何 "念 " 不戚 年往 ,歡『笑『意』所』之』。盛壯智惠 歌以言志,戚戚欲何念? 一,世憂不治。 存亡有命, 五. 慮之

上謁 董桃行 古詞五解

小復 相 仙 敎 紛 % — 。四解 敕 保 守 凡 前 解 吾 行玉堂,未心懷流還。 吏受言,采取 欲上謁從 服 百鳥集,來如煙。 五 爾神藥,無不歡喜。 高山, 神藥若木端。 山頭危嶮大難。 Щ 獸紛綸,麟辟邪其端。 傳教出門來,門外人何求? 陛下長生老壽,四面肅肅稽首 白兔長跪擣藥蝦蟆丸,奉上陛下一玉柈,服此 遙望五嶽端,黃金爲闕,班璘。 **鵾雞聲鳴,但見山獸援戲相拘攀。**二解 所言欲從聖道,求一 ,天神擁護左右, 但見芝草, 葉落紛 得 陛 命延。 藥可 下長 與 得 三解 卽

蒲生 塘上行 武帝詞 [5] 五

離 蒲 = 解 生 念 我 君一 池= 去三我 中 _ , == 其 時 葉 = , 何 獨 離 愁常苦悲。 離 傍能 行儀 想見 (義) 君顏色, 莫能 縷自 感結 知。 傷 心脾。 衆口 鑠 黄 金, 今悉夜 使君 夜 愁 生

别

寐。二解 與 前 。三解 莫 倍 恩 者 苦 括 ,蹶船常苦沒。 二用 = 豪 = 賢 = 故『,棄捐 素所愛,莫 用 教君安息定, 魚 肉 貴,棄捐 愼莫致倉卒。 葱 與 薤 莫用 麻枲賤, 念與君 一共離 棄捐菅

別,亦當 何 時共 、坐復 相 對 四解 出一亦 = 復 愁二,入亦復苦愁。 邊地多悲風, 樹木何蕭

蕭。 今日 樂相樂,延年壽千 秋 五 解

悠悠悠 苦寒行 明帝

詞 五解

壘 處",皇"祖"之"所"營"。屋室若平昔,棟宇無邪傾 悠 | 悠 | 發 | 洛 | 都二, 丼"我"征"東"行"。征行彌二旬, 八。二解 屯吹龍陂城 奈何我"皇"祖 0 解 『,潛』德 顧觀故

隱 "聖"形"。 雖沒而不朽,書貴垂休名。三解 光光我『皇』 祖 **",軒"燿"同"其"榮"。** 遺

雖有吳"燭"寇",春"秋"足"燿"兵"。

徒悲我皇祖,不永享

百齡。 賦詩以寫懷,伏軾淚霑纓。五解

瑟調

化

布四海,八表以肅清。四解

善哉行

> 文帝詞 五解

朝 日樂相樂,酣飲不知醉。 悲弦激新聲,長笛吐清氣。一解 弦歌感人腸,四坐皆歡說

慊慊下白屋,吐握不可失。 寥寥高堂上,涼風入我室。二解 衆賓飽滿歸,主人苦不悉。四解 持滿如不盈,有德者能卒。 比翼翔雲漢,羅者安所羈。 君子多苦心,所愁不但 __。三解 沖靜

得自然 ,榮華何足爲。五解

善哉行

上山

文帝詞六解

志 第 + 樂 Ξ

袭。 何 樂,歲月其 壘 載馳 壘 一。二解 Щ 載驅,聊以忘憂。六解 采薇,薄莫苦饑。 高 馳。四解 山有崖,林木有支。 **湯湯川流,中有行舟。** 溪谷多 |風,霜露沾衣。| 解 憂來無方,人莫之知。三解 隨波轉薄,有似客游。五解 野雉羣雊,猿猴 人生若寄,多憂何爲。 相追。 策我良馬,被我輕 還望故 鄉, 今我

善哉行

文帝詞五解

飛鳥翻翔舞,悲鳴集北林。 有客從南來,爲我彈淸琴。二解 朝游高臺觀,夕宴華池陰。 樂極哀情來,憀亮摧肝心。四解 五音紛繁會,拊者激微吟。 清角豈不妙,德薄所不任。 淫魚乘波聽,踴躍自浮沈。三解 齊倡發東舞,秦筝奏西音。 大哉

善哉行 武帝詞七解 子野言,弭弦且自禁。五解

髮文身。二解 杜伯,累我聖賢。四解 與世沈德,未必思命。六解 古公亶甫,積德垂仁。 伯夷叔齊,古之遺賢。讓國不用,餓殂首山。三解智哉山甫,相彼宣王。 齊桓之霸,賴得仲父。後任豎刁,蟲流出戶。五解 思弘一道,哲王於豳。一解 仲尼之世,王國爲君。 隨制飲酒,揚波使官。 太伯仲雍,王德之仁。行施百世,斷 晏子平仲,積德兼 何 用

武帝詞六解

我 雖 願 懷 於 自 介 天窮, 僧 身薄 志 琅邪 是 祜 時 傾 其 夙賤罹 側 能 左。 與。二解 孤苦。 雖 欲竭忠誠 守窮者貧賤, 旣 無三徙教,不聞 ,欣公歸 惋 其楚 歎 淚 過庭語。一解 如 四解 雨。 快 泣涕於 人日 其 爲歎,抱情不 窮 、悲夫, 如抽 裂, 乞活安能 自 得 以 敍 思所: 覩 顯 \equiv 怙 解

我徂 善哉行 明帝詞八解

天

敎

人

誰

知

莫

不

緒

五

解

我

願

何

時隨,此歎

亦

難

處。

今我

將

何

照

於光耀

",釋

銜

不

如

雨

。六解

惟 士。 羆 鎭 軍 如 惟 奔寇 虎 我 咸 。二解 撫。 徂 同 我 震懼,莫敢當 斯 征 反 發 武 旆 ,伐彼蠻 砲 。四解 言歸,告入 若雷 兼塗星邁, 一,吐 房。 御 。六解 氣 皇 練 成 祖 師簡 雨。 虎 亮茲 八解 臣 卒, 旄 列 爱正 將 行 旍 指 佛 阻。 麾, 其旅。一 鬱 行 充 進 行 怒。 退 H 解 應 遠, 淮 短。三解 輕 舟 泗 西背京 竟 肅 清 JIJ, 百 奮 許 初 馬 0 揚 齊 鴻 五. 微 解 轡, 依 所。 浦。 游 御 弗 七 由 解 淹 桓 造父。 桓 旬, 運 一德燿 猛 遂 毅 屆 休 威 揚 休 如

亦赫
善善善善

善善善

善一

一一

一一<

路 綿 綿 赫 ______ 赫 大 解 魏 采 于 王 旄 師 蔽 徂 H , 征。 旗 旒 冒 翳 暑討 天。 亂 淫 5 振 魚 燿 瀺 灂 威 靈 游 戲 解 深 淵 汎 。三解 舟 黄 河 唯 塘泊 隨 波 潺 從 湲。 如 流 通 渠 不 為單 回 越 , 握 行

%H 善善善 古詞六解

揚

楚。

心

惆

悵,

歌

采薇

心

綿

綿,

在

淮

肥

願

君速捷蚤

旋

歸

0

四

解

第十一 樂三

志

大一六

藥一丸。二解 在門,饑不及餐。四解 來日 大難,口燥唇乾。 自惜袖短,內手知寒。 歡日尙少, 戚日苦多。 今日相樂,皆當喜歡。一解 慚無靈輒,以報趙宣。 三解 以何忘憂,彈筝酒歌。五解 經歷名山,芝草翻翻。 月沒參橫,北斗闌干。 淮南八公,要道不 仙 人王喬。奉 親交

大曲

煩。

參駕六龍,游戲雲端。六解

東門行

古詞四解

今時淸廉,難犯敎言,君復自愛莫爲非。三解 今時淸廉,難犯敎言,君復自愛莫爲非。 女牽衣啼。它家但願富貴,賤妾與君共餔糜。二解 出東門,不顧歸,來入門,悵欲悲。 盎中無斗儲,還視桁上無縣衣。一解 共餔糜,上用倉浪天故, 下為黃口 拔劍出門去,兒 行』 小兒。

吾去爲遲,平愼行,望吾歸。四解

西山 折楊柳行

文帝詞四解

稱七百,悠悠安可原。老聃適西戎,于今竟不還。王喬假虚詞,赤松垂空言。三解 服藥四五日,身體生羽翼。輕舉乘浮雲,倏忽行萬億。流覽觀四海,芒芒非所識。二解 僞,愚夫好妄傳。追念往古事,憒憒千萬端。百家多迂怪,聖道我所觀。 西山一何高,高高殊無極。上有兩仙僮,不飲亦不食。與我一丸藥,光耀有五色。一解 四解 達人識眞 彭祖

古詞三解

敷。 千人,皆言夫壻殊。三解。前有豔詞曲,後有趨。 三十侍中郎,四十專城居。 為人潔白皙,鬑鬑頗有須。 盈盈公府步,冉冉府中趨。 坐中數 從驪駒。 羅敷。一解 爲籠 下擔捋 何愚! 羅敷年幾何。二十尙不足,十五頗有餘。使君謝羅敷,寧可共載不。羅敷前置詞,使 係,桂枝爲籠鉤。 日 類須。 出東南隅,照我秦氏樓。 青絲繫馬尾,黃金絡馬頭。腰中鹿盧劍,可直千萬餘。十五府小史,二十朝大夫, 使君從南來,五馬立峙躇。 使君自有婦,羅敷自有夫。三解 東方千餘騎,夫壻居上頭。何用識夫壻? 白馬 少年見羅敷,脫帽著峭頭。耕者忘其犂,鋤者忘其鋤。 頭上倭墮髻,耳中明月珠。 秦氏有好女,自名爲羅敷。羅敷喜蠶桑,采桑城南隅。青絲 使君遣吏往, 問是誰家姝。 秦氏有好女, 自名爲羅 糊綺爲下帬,紫綺爲上襦。行者見羅敷, 來歸相怒怨,但坐觀

西門行 古詞六解

當復待來茲。二解飲醇酒,炙肥牛。請呼心所歡,可用解愁憂。三解 期 一。五解 出 畫短而夜長,何不秉燭游。四解 自□非□仙□人□王□子□喬□¬計 西門,步念之。今日不作樂,當待何時。一解 夫為樂,為樂當及時。 人壽非金石,年命安可期,貪財愛惜費,但爲後世嗤。六解。 人生不 | 會 | 壽 | 一本「燭游」後「行去之,如 滿百, 何能坐愁怫鬱, 命 常懷千歲 難言與

六一七

六一八

雲除,弊車羸馬爲自推」,無「自非」以下四十八字。

(無)(無) 折楊柳行

古詞 四解

指鹿用為馬,胡亥以喪軀。二解 夫差臨命絕,乃云負子胥。 禍及號,二國俱爲墟。三解 三夫成市虎,慈母投杼趨。 默默施行違,厥罰隨事來。末喜殺龍逢,桀放於鳴條。一解祖伊言不用,紂頭縣 **卞和之刖足,接予歸草廬。四解** 戎王納女樂,以亡其由余。

湿桃 煌煌京洛行

文帝詞五解

千金,東蹈滄海。五解 健,伏尸何劣。四解 嗟彼郭生,古之雅人,智矣燕昭,可謂得臣。 車裂固當。賢矣陳軫,忠而有謀,楚懷不從,禍卒不救。三解 有子房。大憤不收,褒衣無帶,多言寡誠,祇令事敗。二解 夭天園桃,無子空長。

虚美難假,偏輪不行。

一解 淮陰五刑,鳥得弓藏。 蘇秦之說,六國以亡。傾側賣主, 禍夫吳起,智小謀大,西河何 峩峩仲連,齊之高士,北辭 保身全名,獨

豔歌何嘗一日飛鶴行

古詞四解

知,憂來生別離。躇躊顧羣侶,淚下不自知。四解 念與君離別,氣結不能言。各各重自愛, 反顧,六里一裴回。三解 吾欲銜汝去,口噤不能開,吾欲負汝去,毛羽何摧頹。三解 飛來雙白鵠,乃從西北來。十十五五,羅列成行。一解 妻卒被病,行不能相隨。 樂哉新相 五里一

道遠 歸 還難。 妾當守空房,閉門下重關。 若生當相見,亡者會黃泉。 今日樂相樂,延年萬

歲期。「念與」下爲趨曲,前有豔。

%石 步出夏門行 武帝詞四解

茂。 惆 悵 秋 我東海。 雲行 風 蕭瑟, 雨步 了超越越 雲行」至此爲豔。 洪濤湧起。 九江之阜,臨觀異同。 日月之行, 若出其中; 東臨碣石,以觀滄海。 心意懷游豫,不知當復何從。 星漢粲爛,若出其裏。 水何淡淡,山島竦峙 。樹木叢生,百草 經過至我碣石, 幸甚 至哉 • 歌 以 豐 1D

詠志。 觀滄海一解

[月二解 窟 棲。 孟 冬十月,北 錢餺停置,農收積場。 風 談回。 天氣肅淸,繁霜霏霏。 逆旅整設、「も」 以通賈商。 鵾雞晨鳴,鴻雁南飛,鷙鳥潛藏,〔K〕 幸甚至哉 • 歌以詠志 熊羆

蹈。 鄉 隱 土不同,河朔隆寒。 者 貧, 勇俠 輕非。 流凘浮漂,舟船行 多悲。 難。 錐不 入地,豐賴深奧。 1 水竭 不 流,冰堅可

盈 神 縮 龜 之期,不但 雖 壽,猶 有 在天,養怡 竟時,騰 心常歎怨, 蛇 之福 乘霧 可可 , 終爲 戚戚 得永 土 年。 灰。 幸甚 驥 幸甚至哉 老伏 至哉 櫪 , 歌 志 以以詠 在 歌 以 Ŧ 志 詠 里 志 ; 烈 士 神龜 一幕年, {河 發 雖 壽四解 壯)(寒

何嘗 豔歌何嘗行

志

第

+

樂

Ξ

古詞五解

道與卿共別離。 兒居世,各當努力,蹙迫日暮,殊不久留。五解 官爵,鞍馬馺馺,往來王侯長者遊。三解 何嘗快獨無憂。 但當飲醇酒,炙肥牛。一解 長兄爲二千石,中兄被貂裘。二解 約身奉事君,禮節不可虧。 但當在王侯殿上,快獨摴蒲六博,對坐彈 上慚滄浪之天,下顧黃口小兒。 少小相觸抵,寒苦常相隨,忿恚安足諍,吾中 奈何復老心皇 碁。四解 小弟雖 男 無

置酒野田黄雀行空候引亦用此曲。

皇,獨悲誰能知。「少小」下爲趨曲,前爲豔

東阿王詞四解

陽阿奏奇舞,京洛出名謳。樂飲過三爵,緩帶傾庶羞,主稱千金壽,賓奉萬年酬。三解 日,光景馳西流。生存華屋處,零落歸山丘。先民誰不死,知命復何憂!四解 不可忘,薄終義所尤。謙謙君子德,磬折欲何求。盛時不再來,百年忽我遒。三解 置酒高殿上,親交從我游。 中廚辦豐膳,烹羊宰肥牛。秦筝何慷慨,齊瑟和且柔。一解 **驚風飄白** 久 要

為樂 滿歌行

古詞四解〇〇

闐心,誰當我知。一解 戚戚多思慮,耿耿不寧。禍福無形,唯念古人,遜位躬耕。 遂我所願, 北斗闌干。 以茲自寧。 爲樂未幾時,遭世險巇,逢此百離,伶丁荼毒,愁懣難支。遙望辰極,天曉月移。 自鄙山棲,守此一榮。二解莫秋冽風起。西蹈滄海,心不能安。攬衣起瞻夜, 星漢照我,去去自無它。奉事二親,勞心可言。三解 窮達天所爲,智者不愁,多

舞,不樂何須!善哉照觀 頤。「飲酒」下爲趨 如鑿石見火,居世竟能幾時?但當歡樂自娛, 爲少憂。 安貧樂正道,師彼莊周。 日月,日 月馳驅。 遺名者貴,子熙同巇。 轗 盡 軻 世 心 一間,何 極所熙怡。 有何 往者二賢,名垂千 無 安善養君德性, ! 貪財惜費 一,此 秋。四解 百年保此 何 飲酒 愚 • 期 歌 命

步出夏門行一日隴西行

明帝詞二解

沖,華不 雌、雌獨愁棲。 潺,落葉翩 起,悲彼秋蟬,變形易色, 稱 「朝游」上爲豔。 傳。 步 出夏門,東登首陽山。 林鍾受謝,節改時遷。 再繁,古來之說,嗟哉一言。 翩,孤禽失羣,悲鳴其間。 蹙迫 夜失羣侶,悲鳴裴回。 日莫, 烏鵲南 隨風 嗟哉夷叔,仲尼稱賢。 東西。 日月不居,誰得 飛。 繞樹三匝, 善哉殊復善, 乃眷 蹙迫」下爲趨 芃芃荆棘,葛生 西顧 八存。 何枝可 雲霧 悲鳴在 君子退讓, 一綿綿。 相連, 善哉 依。 其 殊復善, 丹霞蔽 卒 間 感彼風 二解 逢 小人爭先; 風 日, 雨, 人,惆悵自憐。 弦歌樂情 朝 樹折 游 采 清冷, 虹帶 惟斯二子,于今 枝 · · · 摧 天。 日 解 莫嗟歸 弱 月盈則 雄 商 來驚 水潺 風 夕

王者布大化 櫂歌行 明

帝

詞

五.

解

儛 王 者布 于 戚 大化, 有苗服從嬀。二解 配 乾 稽后祇。 蠢爾吳獨虜, 馮江棲山阻。 陽育則陰殺, 晷景應 度移 • ---哀哀王士民,瞻仰靡依怙 解 文德 以時振,武功伐不 隨

志第十一 樂三

皇上悼愍斯,宿昔奮天怒。 拂白日,旗幟紛設張。五解 將抗旄與鉞,燿威於彼方。 發我許昌宮,列舟于長浦。四解 伐罪以弔民,清我東南疆。 翌日乘波揚,棹歌悲且涼。 「將抗」下爲

洛陽行 雁門太守行

古詞八解

爲君 部居職,不敢行恩。清身苦體,夙夜勞勤。 具,料民富貧,移惡子姓名,五篇著里端。三解 買繩禮竿。五解 少年,加笞決罪,詣馬市論。四解 作祠,安陽亭西。 孝 從溫補洛陽令,治行致賢,擁護百姓,子養萬民。二解 和帝在時,洛陽令王君,本自益州廣漢民,少行宦,學通五經論。一解 賢哉賢哉!我縣王君。 欲令後世,莫不稱傳。八解 無妄發賦,念在理寃,敕吏正 臣吏衣冠,奉事皇帝。 治有能名,遠近所聞。七解天年不遂,蚤就奄昏。 傷殺人,比伍同罪對門。 外行猛政,內懷慈仁。 一獄,不得苛煩。 功曹主簿,皆得其人。六解 禁鎦矛八尺,捕輕薄 明知法令,歷世 財用錢三十, 文武備

與櫂歌同調

古詞五解

樵相推與,無親爲誰驕? 今日斗酒會,明旦溝水頭。蹀踥御溝上,溝水 睛 如山上雲,日於若雲間 三解 淒淒重淒淒,嫁娶亦不啼,願得一心人,白頭不相離。四解[10] 月。 聞君 有 兩意,故來相 東西流。二解 決絕。一解 平生共城中,何嘗斗酒 郭東 亦有樵,郭西亦有樵。兩

對樂,延年萬歲期。五解[二]一本云:詞曰上有「紫羅咄咄奈何」。 竹竿何嫋嫋,魚尾何離簁,男兒欲相知,何用錢刀爲? 鹼如五馬噉萁,川上高士嬉。 今日相

楚調怨詩

· 東阿王詞 上朝

北風行蕭蕭,烈烈入吾耳。 竟此曲,此曲悲且長。今日樂相樂,別後莫相忘! 東北風,吹我入君懷。五解 夫行踰十載,賤妾常獨棲。二解 念君過於渴,思君劇於饑。君爲高山柏,妾爲濁 明月照高樓,流光正裴回。 君懷常不開,賤妾當何依。 心中念故人,淚墮不能止。四解 上有愁思婦,悲歎有餘哀。一解 七解 恩情中道絕,流止任東西。六解 沈浮各異路,會合當何諧? 借問歎者誰?自云客子妻。 水泥。二三三解 願作 我欲

校勘記

- (一) 玉闕下 「玉闕」三朝本作「王闕」, 北監本、毛本、殿本、局本作「玉關」,並譌。 樂府詩集二六作
- 「玉闕」,是。今據改。
- 辛夷車駕結桂旗 「辛夷」各本並作「新夷」,據楚辭九歌 山鬼原文改。
- 羣 燕 辭 歸 鵠 南 翔 「鵠」樂府詩集三二同。文選二七、玉臺新詠、藝文類聚一二作「雁

志第十一 校勘記

長二相二牽二攀二 如本段讀法, 石鼓文凡重字皆作二畫, 去不可追,長恨相牽攀」, 自「晨上散關山」至「長恨相牽攀」 各本作「長二相二牽二攀二」,局本作「長二長二相二牽二攀二」。 蓋其濫觴。 則此疑亦當作「長恨相牽攀」。 此篇每一字之下作二畫者, 前後八句, 又按古人凡重字,下一字可 通段複一遍, 其讀法猶若音樂中 之複 又非每句或每字一 按上文作「去 作二 奏。

니 포 니 武帝詞 玉臺新詠、藝文類聚四一 謂甄后所作。

複也

八六 鷙鳥 潛藏 「鷙」各本並作「蟄」,據本書樂志四、樂府詩集三七改。

フセン 逆旅整設 「整」各本並作「正」,據本書樂志四、晉書樂志、樂府詩集三七、五四改。

古詞四解 行」三字下,今亦移古詞後。 各本並脫「古詞」二字,據前後文例及樂府詩集四三補。「四解」二字,舊在上「滿歌

漢四一作「皚」,綖覽一二作「皓」。

八九山

晴如山

上雲

「雲」局本、玉臺新詠、御覽一二、樂府詩集四一作「雪」。「晴」玉臺新詠、樂府詩

四解 各本並脫去,據樂府詩集四一 補。

五解 各本並脫去,據樂府詩集四一 補

君爲高山柏妾爲濁水泥 文選二三、玉臺新詠、藝文類聚三二作「君若清路塵,妾若濁水泥」。

宋書卷二十

樂四

志第十

| 選素無所五篇:

四方皇

殿前生桂樹

樂久長

章和二年中

志第

+=

樂四

六二五

太和有聖帝

魏曆長

天生烝民

爲君旣不易

聖皇篇 當章 當章

當章和二年中

庭。 龍旗垂九旒,羽蓋參斑輪。 吹簫笳聲。 節衛,副使隨經營。 懷苦辛。 位任至重,舊章咸率由。 憲,不得顧恩私。 車輪爲裴回,四馬躊躇鳴。 聖皇應曆數,正康帝道休。 何以爲贈賜,傾府竭實珍。 祖道魏東門,淚下霑冠纓。 諸王當就國,璽綬何纍縗。 貴戚並出送,夾道交輜輧。 侍臣省文奏, 陛下體仁慈。沈吟有愛戀, 不忍聽可之。, 迫有官典 諸王自計念,無功荷厚德。 路人尚酸鼻,何况骨肉情。 九州咸賓服,威德洞八幽。 文錢百億萬,采帛若煙雲。乘輿服御物,錦羅與金銀。 扳蓋因內顧, 俛仰慕同生。 便時舍外殿,宮省寂無人。 車服齊整設,鞾曄燿天精。 思一效筋力,糜軀以報國。 三公奏諸公,不得久淹留。蕃 行行將日莫, 何時還闕 主上增顧念,皇母 武騎衞前後,鼓 鴻臚擁

靈芝篇

當殿前生桂樹

成禮 其名。 黄髮盡 母,自傷蚤孤熒,刻木當嚴親,朝夕致三牲。暴子見陵悔,犯罪以亡形,丈人爲 所興,念之令人老。 天 靈 於 田隴, 讓,百姓家肅虔。 國至德,神女爲秉機。 靈 芝生 其年。 董永遭家貧,父老 烝烝不違仁。 玉地、朱草被洛濱。 陛 下三萬歲,慈 退詠南風詩、灑淚滿 庠序 伯瑜年七十,采衣以娛親,慈母笞不 財無遺。 歲月不安居, 不失儀,孝悌處中田。 母亦復然。 樂華相晃燿,光采瞱若神。古時有虞舜,父母 舉假 禕抱。 以供養, 鳥乎我皇考! 傭作 戶有會閱子,比屋皆仁賢。 亂 致 日: 生我旣 計肥。 聖皇 1已晚, 痛, 歔欷涕沾 君 責家 四 海,德教 塡門至,不 棄我 何 朝 巾 期 髫齔. 泣 頑 蚤 夕宣。 Ú 知 且囂。 無天齒 ,発戾全 何 蓼莪 蘭 用 萬 小 歸 失 國 誰

大魏篇 當漢吉昌

尊列 乘輿,芝蓋 及陽遂,輔 長 廣庭。 魏 考,羣臣 應靈符,天祿方甫始。 儲 翼 樹 樂飲 禮 九華。 我 如 拜賀 聖皇。 江 過 海,積 白虎 咸 說喜。 衆吉咸集會, 善若陵山 戲 西除,舍利 顏暴己形。 積善有: 聖德致泰和,神明爲驅使。 区 餘慶, 皇嗣繁且熾, 從辟邪。 邪 式宴 姦 榮祿 惡 示 並 達禮 騏 滅 固 驎 Ę 孫子列曾玄。 天常 , 躡 君 黄鵠 足舞。鳳 臣 歌 衆善塡 鹿鳴。 游 左右宜供養,中 殿 凰 羣臣 前, 門 拊 樂 至, 翼 神鼎 . 咸稱萬 人 歌 臣 舞 周 子 鼙 豐年 蒙 殿宜 四 鼓, 阿 福 大置酒,玉 百官 陛下長樂 ō 皇子。 祥 玉 馬 雷 無 抃 充 患

志

第

六二八

壽年 下臨 1 御酒停未飲, 軒笑,左右咸歡康。 貴戚跪東廂。 杯來一 何遲,羣僚以次行。 侍人承顏色,奉進金玉觴。 賞賜累千億,百官並富昌 此酒亦眞酒, 福祿當聖皇。

當關東有賢女日

軀。 羡 赦書,白刃幾在頸。 起,禱祝祭名川。 |子南渡||河,津東廢舟船。 至無與俱。 太平,禮樂風俗移。 歸娉爲夫人,榮寵超後先。 知罪諐。 囚燕市,三繁霜爲夏零。 漢文感其義,肉刑法用除。 精微爛金石,至心動神明。 妾願以身代」,至誠感蒼天。國君高其義,其父用赦原。 **緹縈痛父言,荷擔西上書。** 備禮饗神祇,爲君求福先。 俱上列仙籍,去死獨就生。 刑錯民無枉,怨女復何爲。 執法將加刑, 辯女解父命,何況健少年。 關東有賢女,自字蘇來卿。 其父得以免,辨義在 **把妻哭死夫,梁山爲之傾。** 女娟擁權前。「妾父聞君來,將涉不測淵。 槃桓北闕下,泣淚何漣如。 不勝釂祀誠,至令犯罰艱。 太倉令有罪,遠徵當就拘。 聖皇長壽考,景福常來儀。 列圖。 黄初 壯年報父仇,身沒垂功名。 子丹西質秦, 多男亦 發和氣, 河激奏中流,簡子知其賢。 何爲, 乞得幷姊弟, 沒身贖父 明堂德教施。 君必欲 烏白馬角生。 一女足成居。 自悲居無男,禍 加誅,乞使 畏懼 女休逢 風 波 鄒

孟冬篇

當狡兎

孟冬十月,陰氣厲淸。 武官誠田、講旅統兵。 元龜襲吉,元光著明。 蚩尤蹕路。風弭雨

觴 死 趨 獲。 爵 禽 三,鍾 韓 乘輿 慶忌 積 獲 夷 車 盧 Ш 如 撃位 宋鵲 塡谷 、啓行 孟 京 旣 流 盈, 賁 無餘 学是才 7.平林 ,蹈谷超 M. 日 成 鳴 側 冷溝渠。 幽 騁 滌 樂終。 絕 足。 軋。 巒。 藪。 網 .縱麟慶,弛罩出鳳雛。 明詔 張 噬 張 虎賁采騎,飛象 罷 羅 目 不 役 盡 萬 大勞賜, 決眥,髮怒穿 解 里,盡 緤,牽麋 徒,大饗離宮。 其 太官供 掎 飛 珥 冠 鶍。 鹿 走。 有 魏氏 霍翟 收功在羽校,威靈振鬼區。 頓 鍾 無。 熊 鼓 | 扼虎 鏗鏘 發機 狡 走 亂 兎 馬 日 分蹴 で、養 湯揚 簫 行 酒 聖皇 基 管 豹 白 醴 嘈喝 搏 撫 跳 一臨飛 弦 翰 貙 驅 車布 萬騎 軒 都 獵 氣 有 以 盧尋高, 肉魚。 齊鑣 青 論 餘 勢, 骸, 功 **デ**チ 校 長歡樂, 負象 搜索 掩 鳴鼓舉 八獵徒 乘等 以 修 TÍTI 猴

晉鼙舞歌五篇

永

世

合

天

洪

{鼙 舞 ※歌, 當魏曲 明明魏皇帝 一古曲 關東有賢 女。

潛 並 體 堯 佐 無 禪 帝 宣 命 爲。 升 天 位 文 伊呂 路 創 聰明 ,虞舜惟恭己。 洪業,盛德在 升王 備 配 物 日 臣 立 月 成器 崩 神 恭已 芷 聖 泰 變 登 参 始 通 朝 正 兩 極 肆 南 聖 儀 其數。 ·, 下 皇 面 一道化 雖 應 無 有三 靈 失宿 符, 百事以時敍, 與 区 、時移 民。 受 類 命 聲發 籍言. 君 大 几 響 赦 萬 無所 海 自 盪 機 に應う表 萌 施。 有 萬 漸 常 或 度。 象 何 立 文敎被黃支。 所樂, 天 景 訓 則 來 之以 地 附。 上有 體 克讓 虓 無爲。 明天子。 象 虎 美 從 納之以 覊 則 稷 制 地, 契

志

纖介, 忠恕。 今去情與故。 奉下 仰清風 ,海外同歡慕。 象天則地,化雲布。 象天則地,化雲布。 濟濟大朝士, 夙夜綜萬機。 昔日貴雕飾, 今尙儉與素。 萬機無廢理 明明降 昔日多

疇咨。 聖德應期運,天地不能違。 臣譬列星景, 君配朝日暉。 仰之彌已高,猶天不可階。 事業並通濟, 功烈何巍巍。 將復御龍氏,鳳皇在庭棲。 五帝繼三皇,三王 世所歸

鼙舞歌,當魏曲太和有聖帝,古曲章和二年中

隆舜臣堯,積德踰太王。 聖祖受天命,應期輔魏皇。 孟度阻窮險,造亂天一隅。 入則綜萬機,出則征四方。 神兵出不意,奉命致天誅。 朝廷無遺理,方表寧且 赦善戮有 康。 道

寇邊疆。 我皇邁神武,秉鉞鎭癯凉。 亮乃畏天威,未戰先仆僵。 盈虛自然運,時變固多難。

罪,元惡宗爲虛。

威風震勁蜀,武烈慴强吳。

諸葛不知命,肆逆亂天常。

擁徒十餘萬,數來

東征陵海表,萬里梟賊淵。 受遺齊七政,曹爽又滔天。 羣凶受誅殛,百祿咸來臻。 黄華應

福始,王凌爲禍先。

景皇帝

鼙舞歌,當魏曲魏曆長,古曲樂<u>久</u>長。

咸伏辜,威風震萬里。平衡綜萬機,萬機無不理。召陵桓不君,內外何紛紛,衆小便成羣。 玄、 內則 張與 本, 三 凶稱 逆, 亂帝紀。 景皇帝,聰明命世生,盛德參天地。帝王道,四創 從天行誅,窮其姦宄。 基旣已難,繼世亦未易。 遏將御其漸,潛謀不 得起,罪人 外則 夏侯

懼 奇兵誠難御,廟勝實難支。 和 蒙 不安。 未 昧态心,治亂不分。 幾間 神武 羽檄首尾至,變起東南蕃。 (御六軍, 我皇秉鉞征 叡聖獨斷,濟武常以文。 兩軍不期遇,敵退計無施。 0 儉欽起壽春, 儉飲爲長蛇,外則馮吳蠻。 從天惟廢立,掃霓披浮雲。 前鋒據項城。至出其不意,並 虎騎惟武進,大戰沙陽陂。欽乃亡 萬國紛騷擾,戚 雲霓旣已闢 縱奇兵。 戚天下 清

鼙舞歌,當魏曲天生烝民,古曲

魂走,奔虜若雲披。

天恩赦有罪,東土放鯨鯢。

亡秦 不懷 文旣 致討,委國稽服。 儉 欽,罔 壞諸侯,序胙 ,逆命斯亡。 顯,武又章。 赫 或 赫大晉,於穆文皇。 正 不肅虔。 封 界。 莘莘文武 吳 不二世。 化感海外,海外來賓。 恩弘六合,兼濟萬方。 仁配春 人放命,馮海阻 日,威踰秋霜。 佐 歷代不能復, 蕩蕩巍巍,道邁陶唐。 ,千秋遘嘉會。 江。 飛書告論,響應來同。 獻其聲樂,並稱妾臣。 內舉元凱,朝政以綱。 忽踰 濟濟多士,同茲蘭芳。 洪業 五 四方皇。 百 溢 世稱三皇五帝,及今重其光。 歲。 品 內,仁風 我皇邁 聖德, 翔海 外簡虎臣,時惟鷹揚。 唐虞 先王 西蜀猾夏,僭號 外。 至治,四凶滔天。 一建萬 應期創 國,九服爲蕃衞 典制 方域。 九德克明, 靡

明君篇 鼙舞歌, 當魏 曲 爲君旣不易,古曲 一殿前 生桂樹

明君 御 四 海 ,聽鑑盡 物 情。 顧望有譴罰,竭忠身必榮。 蘭茝 田荒 野,萬里升紫庭。

志

第

+

樂

四

蘭桂摧 在 邪 爲 信,羣下執異端。 身患。 穢 綱 正 堂階 不 衆星拱 爲 ·並存,譬若胡與秦。 薪 清流豈 掃 截不 北辰。 邪臣多端 不潔,飛塵濁 裑 正 直 生。 設令遭闍 罹 變, 譖潤,姦臣 能否莫相蒙, 秦胡有合時,邪正各異津。 用 其源。 主, 心何委曲。 斥退爲凡民。 育其 歧路令人迷,未遠勝不還。 百官 權 便辟從情指 正 雖欲盡忠誠,結舌不敢言。 其名。 雖薄供時用, 恭己 忠臣遇 動隨 愼有爲, 君所欲。 明君,乾乾惟 白茅猶可珍。 忠臣 有爲 . 立君朝,正色不顧身。 偷安樂目前, 無不成。 結舌亦 日新。 冰霜晝夜結, 何憚,盡忠 闇君不自 羣目統 不問

右五篇鼙舞歌行。

淸

與濁

積偽罔時主,

養交以持祿。

言行恒相違,

難壓甚谿谷。

昧死射乾沒,

覺露則

滅

鐸 舞 歌 詩 二 篇

聖人制禮樂篇「弘

邪武 音 黄運 邪 偶 昔 道 皇 邪 近 文武 尊 吾 來 帝武邪武 治路 邪 聖 皇 萬 彌 邪 邪 八 彌 音音 含善 善道 應節 及 合用 來義 明 誰吾時吾 邪 邪 金 武 邪 日 邪尊邪 邪 善道 行 鳥 許 帝道 及 應節 來 明 義 邪 合用 邪 金 銜 來治 邪 善草 帝 酒期義 邪 路 供 萬 近帝 國 邪 邪 吾 武 同 治 武 咄 邪 路 等 邪 萬 邪 邪 酒 邪 鳥 期 聖 義 近帝 赫 邪

善草 供 國吾 咄等邪鳥 近帝邪武邪 近帝武武邪邪 下音足木 上爲鼓義邪 應衆義

邪 樂 邪 邪 延否 已邪烏已禮 祥 咄等邪 鳥 素女有絕其聖烏烏武邪

雲門篇 鐸舞歌行,當魏太和時。

黃雲門,唐咸池],虞韶舞,夏夏殷濩。[t]列代有五,振鐸鳴金,近大武。 時奏宮商,雜之以徵 清歌發倡,形爲

主。 [公擊和 下壓衆目,上從鍾鼓。 八音,協律呂。 樂以 身不虛動,手不徒舉。 移 風,與德禮相輔,安有失其所。 應節合度,周其敍。

右二篇鐸舞歌行。

拂舞歌詩五篇

白鳩篇

翩 翩 白 鳩,再飛再鳴。 懷我君德,來集君 庭。 白雀 .呈瑞,素羽明鮮。 翔庭舞翼,以應

軀。 乾。 策我 交交鳴鳩 良 駟 ,或丹或黄。 習我 驅 馳。 樂我 與 君 君 周 旋, 惠 樂道 振 羽 亡飢 來 翔 (元) 東壁 我 心虚 餘 光,魚 **二静,我** 在 志 江 霑濡 湖。 惠 彈 而 琴鼓瑟,聊 不費,敬 我 以 微

自娛。陵雲登臺,浮游太淸。扳龍附鳳,日望身輕。

濟濟篇

暢 飛 暢 舞, 氣流芳。 追念三五大綺黃。 去失有, 時可行。 去來 同時此未 央。 時冉冉,

志第十二 樂四

六三四

近 桑榆 但 當 飲酒爲歡娛。 衰老逝,有 何 期。 多 憂耿 耿内懷 思。 淵池廣,魚獨 希。 願 得黄

獨祿篇

浦衆所

依

恩威

人,世

一無比。

悲歌具舞無極

散。 眞。 刀鳴削 翩翩 獨 禄 浮苹。 獨祿,水深泥濁。 中, 得風遙輕。 倚牀無施。 我 泥 **父**冤不報, 濁尙 心 何 合, 可,水深 與之同 欲活何爲。 殺我。 幷。 空牀低帷,誰 雍雍雙雁,游戲 猛虎班班, 游戲 知 無 田 Щ 畔。 人。 間 夜衣 我欲 虎欲囓人,不避 錦 射雁,念子 繡 誰 別 偽 孤

碣石篇

豪賢。

起。 東臨碣石,以觀滄海。 日月之行,若出其中。 星漢粲爛,若出 水何澹澹, 山島: 其 竦峙。 裏。 幸甚至哉! 樹木叢生,百草豐茂。 歌以詠志 秋風 蕭瑟,洪波湧 觀 滄 {海

棲。 錢鎛停置,農收積場。 孟冬十月,北風裴 回。 逆旅整設,以通 天氣肅清,繁霜 賈 霏霏。 商。 幸甚 **鵾鷄晨鳴,雁過南飛。** 至哉!歌以詠志 鷙鳥潛藏,熊羆 冬十月 窟

蹈。 鄕 士隱者貧,勇俠輕非。 土不同,河朔隆寒。 心常歎怨,戚戚多悲。 流澌浮漂,舟船 行難。 幸甚至哉!歌以詠志 錐 不入地,豐籟深奧, 水竭不流,冰堅 土不 间 可

神龜雖壽,猶有竟時,騰蛇乘霧,終爲土灰。

老驥伏櫪, 志在千里; 烈士莫年, 壯心不

淮南王篇

鄉, 年。 入故里。 少年窈窕何能賢?揚聲悲歌音絕天。 淮 南王,自言尊,百尺高樓與天連。 徘徊故鄉,苦身不已。[10] 繁舞寄聲無不泰,徘徊桑梓遊天外。 後園鑿井銀作牀、金瓶素綆汲寒漿。 我欲度河河無梁, 願化雙黃鵠, 還故鄉。 汲寒漿 飲飲 還故 少

右五篇拂舞行。[]]

杯樂舞歌詩一篇

兒。 翩 聽 亦舞 舉坐翻覆壽萬 樽酒甘,絲竹清,願令諸君醉復醒。 晉世寧, 此槃左右 四海平,普天安樂永大寧。 年。 輕。 天與 自 相 當 日,終與一,左回右轉不相 合坐歡樂人命長。 醉復醒,時合同,四坐歡樂皆言工。 四海安,天下歡, 人命長,當結友,千秋萬歲皆老壽。 失。 樂治興隆舞杯槃。 筝笛悲,酒舞疲, 心中慷慨 絲竹音, 舞杯槃, 何翩 可不 可 健

右杯槃舞歌行。

巾舞歌詩一篇

·嬰轉去 吾 不 見 吾哺 公莫時吾何嬰公來嬰姥時吾哺聲何為茂時為來嬰當思吾明月之上轉起吾何嬰 聲 何 爲 上轉南來嬰當去吾城上羊下食草吾何嬰下來吾食草吾哺聲汝 何三

志

時 時 排 何 水 度 年 意 零意 意 針 母 吾 四 何 噫 州 何 何 縮 案子 何 零 弩 洛 邪 何 吾 來 相 心 哺 四 以邪 遙來 嬰吾 哺推 誰 海 吾 當 吾 使君 嬰弩 相 求 何 亦老吾平平門淫涕 嬰海 來 兒 嬰推 心 去時使來嬰去時 母 哺 何 何 來嬰 聲 意 非 零邪 復 母 海 何 相 吾 錢 頭 何 巾 來 復 健 下 ·吾何 母 嬰 車 意 步 何 輪 哺 四 何 意 吾思君去 零 誰 海 嬰何來嬰涕 當 吾 何 何 零 吾 哺 邪 聲 子 求 相 以 熇 時意何零子以邪 兒 哺 邪 下吾哺聲昔結吾 頭 母 西 巾 馬 相 何 吾哺 相 頭 哺 轉 吾 香 聲 來 輪 來嬰吾 嬰頭 三針 吾 思君去時思來嬰吾去 來 嬰轉 一發交 洛道 巾 馬客來嬰吾當 母 吾治五 母 何 何 時還弩 何 吾 吾 復 丈 使 來推 度汲 君 行 心 意 去 吾

右公莫巾舞歌行。

日紵舞歌詩三篇

誠 輕雲色如 無方。 高 舉 銀。 如推 兩 手白鵠翔。 袍以 若引留且 光軀 行。 輕軀 巾拂塵。 徐 宋世方昌 起何 制以爲袍餘作巾。 洋洋。 樂未 央。 疑停 舞以 善善 |睞容儀 盡 四 神安可 坐歡樂胡可 光。 志。 宛若 愛之遺 陳。 龍 轉 清歌徐舞降祇 乍 低 誰 昂。 贈 佳 人。 隨 世 質 神 而 如如 變

右一篇。

如 電 過。 雙袂 齊 樂時每少苦日多。 舉鸞鳳 翔。 羅 裾 幸及良辰曜春花。 飄 颻 昭 儀 光。 趨步 齊倡獻舞趙女歌。 生姿進流芳。 鳴弦淸歌 羲和馳景逝不停。 及三 陽。 人 生 春露 世 間

未晞嚴霜零。 百草凋索花落英。 蟋蟀吟牖寒蟬鳴。百年之命忽若傾。 蚤知迅速秉燭行 東東

造扶桑游紫庭。西至崐崘戲會城。

右一篇。

繞 鳳梁。 陽 春白日風花香。 如矜若思凝且翔。 趨步明玉舞瑤璫。 轉盻遺精豔煇光。 聲發金石媚笙簧。 將流將引雙雁翔。 羅桂徐轉紅袖揚。 歡來何晚意何長。 清歌流響 明君

右一篇。白經舊新合三篇。

御

世永歌倡。

宋泰始歌舞曲詞

皇業頌歌自燒至楚元王、高祖,世世載聖德。明帝造

善傳 上業,祚福 皇業沿德建,帝運資勳融。 啓英聖。 衰數隨金祿,登曆昌水命。二三維宋 胤唐重盛軌, **冑楚載休風。** 垂光烈,世美流舞咏。 **堯帝兆深祥,元王衍遐慶。** 積

聖祖頌

德被仁祉,留化洽民 聖祖 惟高德,積勳代晉曆。 靈。 孝 建締孝業, 永建享鴻基,萬古盛音册。 允協天 人謀。 宇內齊政軌, 叡文績宸 宙 表燭威流。 馭,廣運崇帝聲。 鍾管騰 列 衍

坐,彝銘賁重猷。

志第十二 樂四

書 卷 __ 十

明君 1大雅 虞龢

造

明君應乾數,撥亂紐頹 基。 民慶來蘇日, 國頌薰風詩。 天步或暫難, 列蕃扇迷慝。 廟

勝敷 九伐,自己神謨洞七德。 文教洗昏俗,武誼淸祲埏。 英勳冠帝則,萬壽永衍

{通 國 {風 明帝

造

開實業, 資賢昌。 謨明盛, 弼諧光。 烈武惟略, 景王 勳。 南康 華容, 變政文。 猛 績

著,有左軍。 三王到氏,文武贊。 丞相 作 輔, 屬 伊 旦。 沈柳宗侯, 皆殄 亂。 泰始開 運,超百

司徒驃騎,勳德康。 江安謀效,殷誠彰。 劉沈承規,功名揚。 慶歸我后,祚無疆。日司

天符頌 明帝 造

玉。

符革運, 世誕英皇。 在館神炫, 旣壯龍驤。 **六鍾集表**, 四緯駢光。 於穆配天, 永休

厥 祥。

明帝 造

明德頌

明 德孚教, 幽符麗紀。 山鼎見奇, 醴液涵祉。 **鹓雛燿儀**, 騶虞游 趾。 福延億祚,

萬祀

(帝) ?頌

帝圖疑遠, 瑞美昭宣。 濟流月鏡,鹿毳霜鮮。 甘露降和,花雪表年。 孝德載衍, 芳風

永傳。

龍躍大雅

龍躍式符,玉燿蕃宮。 歲淹豫野,璽屬嬪中。 江波澈映,石柏開文。 觀航 宋業允大, 花蘂,樓凝景 靈瑞

雲。 白鳥三獲, 甘液再呈。 嘉穟表沃, 連理協成。 **德**充動物, 道積通神。

方臻。

淮祥 }風

淮 一样應一 賢彦生。 翼贊 中興,致太平。

宋世 大雅 虞龢造

宋世寧,在泰始。 醉酒 飽德喜。 萬國朝,上壽酒。 帝同 天,惟長久。

治兵大雅 明帝造

王 命治兵, 有征無戰。 巾拂以淨, 醜類革面。 王儀振旅, 載戢在辰。 中虚· 巾拂, 四表

静塵。

白紵篇大雅

明帝造

雲舒,簫韶協音神鳳來。 在心曰志發言詩,聲成于文被管絲。 拊擊和節詠在初, 手舞足蹈 章曲乍畢情有餘。 欣泰時,移 風易俗王化基。 文同軌壹道德行, 琴角揮韻白 國靖民和

志 第 +樂 四

朱 卷二十二

禮樂成。 煇蕙麝豐,淑姿委體允帝衷。 四縣庭響美勳英,八列陛倡貴人聲。 舞飾麗華樂容工,羅裳皎日袂隨 風。 金翠列

漢鼓吹鐃歌十八曲

朱鷺曲

朱鷺,魚以烏路訾邪。 鷺何食,食茄下。 不之食,不以吐,將以問誅一作諫者。

思悲翁曲

思悲翁、唐思、奪我美人侵以遇、悲翁也、但我思。 蓬首一作蕞狗,逐狡兎,食交君,梟子

 $\overline{\mathcal{H}}_{o}$ 梟母六,拉沓高飛莫安宿。

艾如張曲

艾而張羅,夷於何。 行成之,四時和。 山出黃雀亦有羅,雀以高飛柰雀何? 爲此倚欲,

誰肯碳室。

上之回曲

上之回,所中益。 夏將至,行將北。 以承甘泉宮,寒暑德。 游石關,望諸國,月支臣,倒

奴服。 令從百官疾驅馳,千秋萬歲樂無極。

擁離趾中,可築室,何用葺之蕙用蘭。 擁離趾中。

戰城南曲

逃 ? 穫君何食? 水深激激,蒲葦冥冥。 戰城南,死郭北,野死不葬烏可食。 願爲忠臣安可得。思子良臣,良臣誠可 梟騎戰鬭死,駑馬裴回 爲我謂烏,且爲客豪,野死諒不葬,腐肉安能去子 鳴。 思,朝行出攻,莫不夜歸。 梁築室,何以南? 梁何北? 禾黍而

巫山高曲

回 回 ,臨水遠望。 巫山高,高以大,淮水深,難以逝。 泣下霑衣,遠道之人心思歸。 我欲東歸,害梁不爲。 謂之何? 我集無高, 曳水何梁。 湯湯

上陵曲

水,光澤何蔚蔚。 爲君權,黃金錯其間。 上陵何美美,下津風以寒。 芝爲車,龍爲馬。 滄海之雀赤翅鴻,白雁隨,山林乍開乍合,曾不知日月明。 問客從何來,言從水中央。 覽遨游,四海外。 甘露初二年,芝生銅池中,仙人下來 桂樹爲君船,青絲爲君笮,木蘭 醴泉之

將進酒曲

飲,延壽千萬歲。

志第十二 樂四

六四二

將進酒,乘太白。 辨加哉,詩審搏。 放故歌, 心所作。 同陰氣,詩悉索。 使禹良工, 觀

者苦。

君馬黃歌

君馬黃,臣馬蒼,三馬同逐臣馬良。易之有騩蔡有赭,美人歸以南,駕車馳馬。 美人傷

我心!佳人歸以北、駕車馳馬。佳人安終極!

芳樹曲

芳樹,日月君亂,如於風。 芳樹不上無心。 溫而鵠,三而爲行。 臨
蘭
池
, 心中懷我悵。

心不可匡,目不可顧,妬人之子愁殺人。君有它心,樂不可禁。 王將何似? 如孫如魚乎?

悲矣!

有所思曲

有所思,乃在大海南。 何用問遺君,雙珠瑇瑁簪,用玉紹繚之。聞君有它心,拉雜摧

燒之!摧燒之,當風揚其灰。從今以往,勿復相思!相思與君絕。 雞鳴狗吠,兄嫂當知之。

妃呼狶!秋風肅肅晨風颸,東方須臾高知之。

維子曲

雉子,班如此,之于雉梁,無以吾翁孺。雉子,知得雉子高飛止,黃鵠蜚之以千里,日太

王可 思。 雄來蜚從雌,視子趨 雉。 雉子 車 大駕馬滕,被王送行所中,堯芊蜚從 王 孫行。

聖人出曲

護不道,美人哉,宜天子。 聖人出,陰陽和。 美人出, **免甘星筮樂甫始,美人子,含** 游九河。 佳 一人來, 騑離 哉何。 四 海 駕六飛龍四時和。 君之臣 明

上邪曲

上邪,我欲 與君相知。 長命無絕衰。 Щ 無陵,江水爲竭,冬雷 震震夏 雨 雪, 天地 力

敢與君絕。

臨高

臺曲

臨高

臺

以軒,下有清水清且寒。

江有香草目以

蘭,

黄鵠

高

飛離哉翻。

關

弓射

鵠,

令我

主壽萬年。收中吾。

遠如期曲

心 虞 遠如 心大佳,萬 (期, 盆 如壽,處天左側,大樂,萬歲 人還來,謁者引, 鄉殿陳,累世未嘗聞之。 與天 無 極。 雅樂陳,佳哉紛, 增壽萬年亦 誠 單 哉 于自 歸 動

石留曲

石 留 凉 陽 凉 石 水流為 沙錫以微河爲香向始蘇冷將風陽北逝肯無敢 與于楊 心邪懷蘭 志

金安薄北方開留離蘭

魏鼓吹曲十二篇

繆襲造

漢第一曲朱鷺,今第一曲初之平,江北言魏也。

濟九州,九州寧。 閹宦熾,羣雄爭。 初之平,義兵征。 神武奮,金鼓鳴。邁武德,揚洪名。 邊韓起,亂金城。 創武功,武功成。越五帝,邈三王。 中國擾,無紀經。 赫武皇,起旗旌。 漢室微,社稷傾。 興禮樂,定紀綱。 皇道失,桓與 麾天下,天下 普日月,

右初之严曲凡三十句,句三字。

暉光。

漢第二曲思悲翁,今第二曲戰滎陽,言曹公也。

驚,勢不集,衆幾傾。 戰滎陽, 汴水陂。 戎士憤怒, 貫甲馳。 白日沒,時晦冥,顧中年,心屛營。 陳未成,退徐榮,二萬騎,塹壘平。 同盟疑,計無成,賴我武皇,萬 戎馬傷,六軍

國寧。

右戰滎陽曲凡二十句,其十八句句三字,二句句四字。

漢第三曲艾如張,今第三曲獲呂布,言曹公東圍臨淮,生擒呂布也。

獲呂布,戮陳宮。 芟夷鯨鯢,驅騁羣雄。囊括天下,運掌中。

六四四

右獲呂布曲凡六句,其三句句三字,三句句四字。

漢第四曲上之回,今第四曲克官渡,言曹公與袁紹戰,破之於官渡也。

戰不利,士卒傷。今日不勝,後何望!土山地道,不可當。卒勝大捷,震冀方。 克紹官渡,由白馬。僵屍流血,被原野。賊衆如犬羊,王師尙寡。 沙塠傍,風飛揚。 屠城破邑,

神武遂章

右克官渡曲凡十八句,其八句句三字,一句句五字,九句句四字。

漢第五曲翁離,今第五曲舊邦,言曹公勝袁紹於官渡,還譙收藏士卒死亡也。

舊邦蕭條,心傷悲。孤魂翩翩,當何依。游士戀故,涕如摧。兵起事大,令願違。 博求

親戚,在者誰。 立廟置後,魂來歸。

右舊邦曲凡十二句,其六句句三字,六句句四字。

漢第六曲戰城南,今第六曲定武功,言曹公初破鄴,武功之定,始乎此也。

定武功,濟黃河。河水湯湯,旦莫有橫流波。袁氏欲衰,兄弟尋干戈。決漳水,水流滂

君臣奔北。 嗟城中如流魚,誰能復顧室家!計窮慮盡,求來連和。和不時,心中憂戚。賊衆內潰,

拔鄴城,奄有魏國。王業艱難,覽觀古今,可爲長歎。

右定武功曲凡二十一句,其五句句三字,三句句六字,十二句句四字,一句五字。

志

六四六

漢第七曲巫山高,今第七曲屠柳城,言曹公越北塞,歷白檀,破三郡烏桓於柳城 也。

屠柳城 ,功誠難。越度隴塞,路漫漫。 北踰岡平、〇〇但聞悲風正酸。 蹋頓授首, 遂登

白狼山。神武熱海外,永無北顧患。

右屠柳城曲凡十句,其三句句三字,三句句四字,三句句五字,一句六字。

漢第八曲上陵,今第八曲平南荆,言曹公南平荆州也。

爲大魏臣。 軍廬新野, 南荆何遼遼,江漢濁不淸。 金鼓震天庭。 大魏臣,向風思自新。 劉子面縛至,武皇許其成。 **菁茅**久不貢,王師赫南征。 思自新,齊功古人。 許與其 在昔虞與唐, 成, 劉琮據襄陽,賊備屯樊城。 撫其民。 大魏得與均。 陶陶江 漢 多選忠 間 普

義 土,爲喉脣。天下一定,萬世無 風 塵。

漢第 九曲將進酒,今第九曲平關中,言曹公征馬超,定關 中 也。

右平南荆曲凡二十四句,其十七句句五字,四句句三字,三句句四字。

平關中,路向潼。 濟濁水,立高墉。 鬭韓馬, 離羣 凶 選驍騎, 縱兩翼,虜崩潰,級

萬億。

右巫關中曲凡十句,句三字。

漢第十曲有所思,今第十曲應帝期,言曹文帝以聖德受命,應運期也。

鳴高 ,日月爲重光。 岡。 應帝期,於昭我文皇,曆數承天序,龍飛自許昌。 考圖定篇籍,功配上古羲皇。 河洛吐符瑞,草木挺嘉祥。 羲皇無遺文,仁聖相因循。 麒麟步郊野,黃龍游津梁。 聰明昭四表,恩德動遐方。 期運三千歲,一生聖明 白虎依 山林,鳳凰 星辰為垂

君。 **堯授舜萬國,萬國皆附親。** 四門爲穆穆,敎化常如神。大魏興盛,與之爲鄰。

右應帝期曲凡二十六句,其一句三字,二句四字,二十二句句五字,一句六字。

漢第十一曲芳樹,今第十一曲邕熙,言魏氏臨其國,君臣邕穆,庶績咸熙也。

名倡。 邕熙,君臣合德,天下治。隆帝道,獲瑞寶,頌聲並作,洋洋浩浩。 歌聲一何紆餘,雜笙簧。 八音諧,有紀綱。子孫永建萬國,壽考樂無央。 吉日 臨高堂,置酒列

右邕熙曲凡十五句,其六句句三字,三句句四字,一句二字,三句句五字,二句句

六字。

漢第十二曲上邪,今第十二曲太和,言魏明帝繼體承統,太和改元,德澤流布。

惟太和元年,皇帝踐阼,聖且仁,德澤爲流布。 災蝗一時爲絕息,上天時雨露。 五穀溢

田疇,四民相率遵軌度。 右太和曲凡十三句,其二句句三字,五句句五字,三句句四字,三句句七字。 事務澂清,天下獄訟察以情。元首明,魏家如 此,那得 不太平?

層鼓吹歌曲二十二篇

傅玄作

書 卷 十

靈之祥 古朱鷺行

靈之祥,言宜皇帝之佐魏, **猶虞舜之事堯也。** 既有石瑞之徵,又能用武以誅孟度之逆

命也。二五

唐。 贊武文,建帝綱。 靈之祥,石瑞章。 孟氏叛,據南疆。 旌金德,出西方。 追有扈,亂五常。 天命降,授宣皇。 吳寇勁, 應期運, 蜀虜强。 時龍驤。 交誓盟, 繼大舜, 連遐 佐陶

荒。 宣赫怒,奮鷹揚。 震乾威, 燿電光。 陵九天, 陷石城。 梟逆命, 拯有生。 萬國安, 几

海寧。

古思悲翁行

宣受命,言宣皇帝禦諸葛亮,養威重,運神兵,亮震怖而 死。

宣受命,應天機。 風雲時動,神龍飛。 禦葛亮,鎭雍凉。 邊境安, 民夷康。 務節事, 勤

定傾。 覽英雄,保持盈。 淵穆穆,赫明明。 沖而泰,天之經。 養威重,運神兵。 亮乃震死,

天下寧。

征遼東

古艾而張行行

征遼東,言宣皇帝陵大海之表,討滅公孫淵而梟其首也

征遼東,敵失據。 威靈邁日域,淵旣授首,羣逆破膽,咸震怖。 朔北響應, 海表景附。

武功赫赫,德雲布。

宣輔政
古上之回行

宣輔政,言宣皇帝聖道深遠,撥亂反正,網羅文武之才,以定二儀之序也。

安上治民,化風移。 宣皇輔政,自己聖烈深。 肇創帝基,洪業垂。 撥亂反正,從天心。 於鑠明明,時赫戲。 網羅文武才,愼厥所生。 功濟萬世, 定二儀。 所生賢,遺敎施, 定二儀,

雲澤雨施,海外風馳。

時運多難回

古擁離行

時運,言宣皇帝致討吳方,有征無戰也。

時運多難,道教痡。 天地變化, 有盈虚。 蠢爾吳蠻,虎視江湖。 我皇赫斯, 致天誅

有征無戰,弭其圖。天威橫被,震東隅。

!景龍飛

古戰城南行

景龍飛,言景帝克明威教,賞從夷逆,祚隆無疆,崇此洪基也

景龍飛,御天威。聰鑑玄察,曰司動與神明協機。 從之者顯,逆之者滅夷。 文教敷,武

聖德潛斷,先天弗違。

弗違祥,享世永長。

猛以致

寬,道化光。 赫明明,祚隆無疆。 帝績惟期,有命旣集,崇此洪基。

普被四海,萬邦望風,莫不來綏。

十二樂四

志第

六五〇

平玉衡 古巫山高行

也。

平玉衡,糾姦回。萬國殊風,四海乖。 禮賢養士,羈御英雄思心齊。 纂戎洪業, 崇皇

階。品物咸亨,聖敬日躋。聰鑑盡下情,明明綜天機。

文皇統百揆

古上陵行

百揆,言文皇帝始統百揆,用人有序,以敷泰平之化也。

文皇統百揆,繼天理萬方。武將鎭四宇,英佐盈朝堂。謀言協秋蘭,淸風發其芳。 洪

澤所漸潤,礫石爲珪璋。 大道侔五帝,盛德踰三王。 咸光大,上參天與地,至化無內外。

內外,六合並康义。並康义,遘茲嘉會。在昔羲與農,大晉德斯邁。 鎭征及諸州,爲蕃衞。

功濟四海,洪烈流萬世。

古將進酒行

因時運

因時運,言文皇帝因時運變,聖謀潛施,解長蛇之交,離羣桀之黨,以武濟文,審其大

計,以邁其德也。

因時運,聖策施。 長蛇交解,羣桀離。 勢窮奔吳,虎騎厲。 惟武進,審大計。 時邁其

德,清一世。

從庸獨,言文皇帝既平萬乘之蜀,封建萬國,復五等之爵也。

惟庸蜀,僭號天一隅。 劉備逆帝命,禪亮承其餘。 擁衆數十萬, 關隙乘我虛 驛騎進

謀衆士夫。爪牙應指授,腹心獻良圖。 羽檄,天下不遑居。 姜維屢寇邊,隴上爲荒墟。 良圖協成文,大興百萬軍。 文皇愍斯民,歷世受罪辜。 雷鼓震地起, 猛勢陵浮 外謨蕃屛臣,內

逋虜畏天誅,面縛造壘門。 萬里同風教,逆命稱妾臣。 光建五等,紀綱天人。

天序 古芳樹行

(天)字,言聖皇應曆受禪,弘濟大化,用人各盡其才也。

天序,應曆受禪,承靈祜。 御羣龍,勒螭虎。弘濟大化,英儁作輔。 明明統萬機,赫赫

鎭四方。 **答繇稷契之疇,協蘭芳。** 禮王臣,覆兆民。 化之如天與地,誰敢愛其身。

大晉承運期

古上邪行

大晉承運期,言聖皇應錄受圖,化象神明也。

大晉承運期,德隆聖皇。 時清晏,白日垂光。 應籙圖,陟帝位,繼天正玉衡,化行象神

明。 至哉道隆虞與唐。元首敷洪化,百僚股肱並忠良,民大康。隆隆赫赫,福祚盈無疆

金靈運

志

第十二

四

古君馬黃行

六五二

靈運、言聖皇踐阼,致敬宗廟,而孝道施於天下也。

徴。 登大麓,御萬 金靈運,天符發。 乘。 皇之輔,若虓虎。 聖徵見,參日月。 惟我皇,體 爪牙奮,莫之禦。 神聖。 皇之佐, 受魏禪, 贊淸化。 應天命。 百事 皇之興, 理, 萬邦 靈有

觴。 神欽饗,成說康。 神祇應、嘉瑞章。 宴孫子,祐無疆。 恭享祀、薦先皇。 樂時奏,磬管鏘。 大孝烝烝,德教被萬方。 鼓淵淵, 鍾喤喤。 **奠**尊俎, 實玉

於穆我皇

古雉子行

於穆,言聖皇受命,德合神明也。

於穆我皇,盛德聖且明。 受禪君世,光濟羣 生。 普天率土,莫不來庭。 顒顒六合內,望

羣英。 風 仰泰清。萬國雍雍,興頌聲。 夙夜乾乾,萬機是經。 雖治興,匪荒寧。 大化洽,地平而天成。七政齊,玉衡惟平。 謙道光,沖不盈。 天地合德,日月同 峨峨佐命,濟濟 樂。 赫

赫煌煌、耀幽冥。 三光克從,於顯天垂景星。 龍鳳臻,甘露宵零。 肅神祇,祗上靈。 萬物欣

戴,自天效其成。

古聖

仲春振旅

古聖人出行

仲春,言大晉申文武之教,田獵以時也。

仲春振旅,大致民,武教於時日新。 師執提,工執鼓,坐作從,節有序,盛矣允文允武

蒐田表薦,申法誓,遂圍禁,獻社祭,允矣時明國制。 文武並用,禮之經,列車如戰,大敎明,

古今誰能去兵。大晉繼天,濟羣生。

夏苗田 古臨高臺行

苗田,言大晉田狩從時,爲苗除害也。

夏苗田,運將徂,軍國異容,文武殊。乃命羣吏,選車徒,辯其名號,贊契書。 王軍啓八

陳敝車。 獻禽享祠,烝烝配有虞。 惟大晉,德參兩儀,化雲敷。

門,行同上帝居。時路建大麾,雲旗翳紫虛。百官象其事,疾則疾,徐則徐。

回衡旋軫,罷

仲秋獮田

古遠期行

(
一
秋
,
言
大
晉
雖
有
文
德
,
不
廢
武
事
,
從
時
以
殺
伐
也
。

仲秋獮田,金德常剛。涼風淸且厲,凝露結爲霜。 白虎司辰,蒼隼時鷹揚。 鷹揚猶周

赫大晉德,芬烈陵三五,敷化以文,雖治不廢武。 尚父,從天以殺伐。 春秋時敍,雷霆震威燿,進退由鉦鼓。 光宅四海、永享天之祜。 致禽祀前,羽毛之用充軍府。

赫

從天道

古石留行

從天道,言仲冬大閱,用武修文,大晉之德配天也。

從天道,握神契。三時亦講武事,冬大閱。鳴鐲振鼓鐸,旌旗象虹霓。 文制其中,武不

志第十二 樂四

六五四

窮武,動軍誓衆,禮成而義舉。 陵靑雲。 解圍三面,殺不殄羣。 三驅以崇仁,進止不失其序。 偃旌麾,班六軍。 獻享烝,修典文。嘉大晉,德配天。 兵卒練,將如虎。 惟虓虎,氣 禄報

唐堯 古務成行古曲亡

功,爵俟賢。饗燕樂,受茲百祿,嘉萬年。

:唐堯,言聖皇陟帝位,德化光四表也。

表,行門群氣見其徵。 禹統百揆,元凱以次升。 唐堯咨務成,謙謙德所興。 興王坐俟旦,亡主恬自矜。 禪讓 應天曆,睿聖世相承。 **積漸終光大,履霜致堅冰。** 致遠由近始,覆簣成山陵。 我皇陟帝位, 神明道自然,河海猶可凝。 平衡正準繩。 披圖按先籍, 德化四 舜

1雲 古玄雲行古曲亡

有其證靈液。白色

玄雲,言聖皇用人,各盡其材也。

渭濱,遂載呂望歸。 馨世所稀。 親遊方國,自己流光溢天外。鶴鳴在後園,清音隨風邁。成湯隆顯命,伊擊來如飛。 玄雲起山嶽,祥氣萬里會。 我皇敍羣才,洪烈何巍巍。桓桓征四表,濟濟理萬機。神化咸無方,髦才盈帝 符合如影響,先天天弗違。輟耕綜地綱,解褐衿天維。 龍飛何蜿蜿,鳳翔何翽翽。昔在唐虞朝,時見靑雲際。今 元功配二主,芬 周文獵

丕顯惟昧旦,日新孔所咨。 茂哉聖明德,日月同光輝

古黃鹤行古曲亡

伯益,言赤烏衡書,有周 以與,今聖皇受命,神雀來也。

雀 應清化 伯益佐舜禹,職掌 ,翔集何翩翩。 山與川。 和鳴棲庭樹,徘徊雲日間。 德侔十六相,思心入無間。 夏桀爲無道,密網施山阿。 智理周萬物,下知衆鳥言。 酷祝 振 纖

統 網,當柰黃雀何。 羽羣。 赤鳥銜書至,天命瑞周文。 殷湯崇天德,去其三面羅。 神雀今來遊,爲我受命君。 逍遙羣飛來,鳴聲乃復和。 嘉祥致天和,膏澤降青雲。 朱雀作南宿 ', 鳳皇

蘭 風 發芳氣, 、闔世同其芬。

古釣竿行漢鐃歌二十二無釣竿。

釣竿,言聖皇德配堯、舜,又有呂望之佐以濟大功致太平也。

釣竿何冉冉,甘餌芳且鮮。

鰏

川運

思

心,微

編沈

九淵。

太公寶此術,乃在靈祕篇。

變隨: 不 ′,兩儀 ·足幷。 物 移 出渾成。 ′ 精妙貫 天 人初幷時,昧昧何茫茫。 未 玉衡 然。 正 三辰,造化 游魚驚著釣, 賦 日月 之學形。 潛龍 有徵兆, 飛戾天。 退願 輔 文象與二皇。 聖 戾天安所至, 君,與 神 合其 蚩尤亂 撫翼翔太清。 靈。 享天祥。 生民, 我 君 弘 黄帝 遠略,天 率土蒙祐, 太清 用 兵征 何 人

萬

方。

逮夏

禹

而

德衰,

三代不及虞與唐。

我皇聖德配堯舜,

受禪卽阼

六五六

靡 不肅,庶事 庶事康,穆穆明明。 荷百祿、保無極、永泰平。

吳鼓吹曲十二篇

韋昭造

炎精缺者,言漢室衰,武烈皇帝奮迅猛志,念在匡救, 然而王迹始乎此也。 漢曲有朱鷺, 此

篇當之。第一。

將來。 覊。 威。 宛潁平, 南土綏。 鳴雷鼓,抗電麾。 炎精缺,漢道微。 皇綱弛,政德違。 神武章,渥澤施。 撫乾衡,鎭地機。 厲虎旅, 騁熊羆。 衆姦熾,民罔依。 金聲震,仁風馳。 赫武烈,越龍飛。 發神聽,吐英奇。 顯高門,啓皇基。 陟天衢,燿靈 張角破,邊韓 統罔極,垂

右炎精缺曲凡三十句,句三字。

漢之季者,武烈皇帝悼漢之微,痛卓之亂,興兵奮擊,功蓋海內也。 漢曲有思悲翁, 此篇當

之。第二。

白刃。 漢之季,董卓亂。 輕騎發,介士奮。 桓桓武烈,應時運。 醜虜震,使衆散。 劫漢主,遷西館。 義兵興、雲旗建。 厲六師,羅八陳。 雄豪怒, 元惡僨。 飛鳴鏑,接 赫赫皇祖,

右漢之季曲凡二十句,其十八句句三字,二句句四字。

功名聞。

機武師者,言大皇帝卒武烈之業而奮征也。 漢曲有艾如張,此篇當之。第三。

據武師,斬黃祖。 肅夷凶族,革平西夏。 炎炎大烈,震天下。

右攄武師曲凡六句,其三句句三字,三句句四字。

烏林者,言曹操旣破荆州,從流東下,欲來爭鋒。大皇帝命將周瑜逆擊之於烏林而破走也。

漢曲有上之回,此篇當之。第四。

車十萬,揚風聲。 曹操北伐,拔柳城。乘勝席卷,遂南征。劉氏不睦,八郡震驚。曰以衆旣降,操屠荆。舟 議者狐疑,慮無成。賴我大皇,發聖明。虎臣雄烈,周與程。 破操烏林,

右伐烏林曲凡十八句,其十句句四字,八句句三字。

顯章功名。

秋風者,言大皇帝說以使民,民忘其死。漢曲有擁離,此篇當之。第五。

披介胄,慷慨懷悲傷。 秋風揚沙塵,寒露霑衣裳。角弓持弦急,鳩鳥化爲鷹。 辭親向長路,安知存與亡。 窮達固有分,志士思立功。 邊垂飛羽檄,寇賊侵界疆。跨馬 邀之戰場,身

逸獲高賞,身沒有遺封。

右秋風曲凡十五句,其十四句句五字,一句四字。

克皖城者,言曹操志圖幷兼,而令朱光爲廬江太守。 上親征光,破之於院城也。 漢曲有戰

六五八

城南,此篇當之。第六。

克滅皖城,遏寇賊。 惡此凶孽,阻姦慝。 王師赫征,衆傾覆。 除穢去暴,戢兵革。

就農,邊境息。誅君弔臣,昭至德。

右克皖城曲凡十二句,其六句句三字,六句句四字。

關背德者,言蜀將關羽背棄吳德,心懷不軌。 大皇帝引師浮江而禽之也。 漢曲有巫山高,

此篇當之。第七。

巍巍吳聖主,叡德與玄通。與玄通,親任呂蒙。泛舟洪氾池,泝涉長江。神武一何桓桓! 關背德,作鴟張。 割我邑城,圖不祥。 稱兵北伐,圍樊襄陽。嗟臂大於股,將受其殃。

聲烈正與風翔。 歷撫江安城,「三一大據野邦。虜羽授首,百蠻咸來同,盛哉無比隆

通荆門者,言大皇帝與蜀交好齊盟,中有關羽自失之愆,戎蠻樂亂,生變作患,蜀疑其眩,吳 右關背德曲凡二十一句,其八句句四字,二句句六字,七句句五字,四句句三字。

惡其詐,乃大治兵,終復初好也。漢曲有上陵,此篇當之。第八。

微 整封疆。 中情疑,讒夫亂其間。大皇赫斯怒,虎臣勇氣震。 荆門限巫山,高峻與雲連。蠻夷阻其險,歷世懷不賓。漢王據蜀郡,崇好結和親。 整封疆,闡揚威武容。功赫戲,洪烈炳章。 蕩滌幽藪,討不恭。 邈矣帝皇世,聖吳同厥風。荒裔望清 觀兵揚炎燿,厲鋒 那

化,化恢弘。煌煌大吳,延祚永未央。

右通荆門曲凡二十四句,其十七句句五字,四句句三字,三句句四字。

章洪德者,言大皇帝章其大德,而遠方來附也。漢曲有將進酒,此篇當之。第九。

章洪德,邁威神。 感殊風,懷遠鄰。 平南裔,齊海濱。 越裳貢,扶南臣。 珍貨充庭,所

見日新。

右章洪德曲凡十句,其八句句三字,二句句四字。

從曆數者,言大皇帝從錄圖之符,而建大號也。漢曲有有所思,此篇當之。第十。

及昆蟲,浩蕩越前代。三光顯精燿,陰陽稱至治。肉角步郊畛,鳳凰棲靈囿。神龜游沼池, 從曆數,於穆我皇帝。聖哲受之天,神明表奇異。建號創皇基,聰叡協神思。德澤浸

圖讖摹文字。黃龍覿鱗,符祥日月記。覽往以察今,我皇多噲事。上欽昊天象,下副萬姓

光被彌蒼生,家戶蒙惠賚。風敎肅以平,頌聲章嘉喜。大吳興隆,綽有餘裕。

右從曆數曲凡二十六句,其一句句三字,三句句四字,二十二句句五字,

六字。

承天命者,言上以聖德踐位,道化至盛也。[日]漢曲有芳樹,此篇當之。第十一。

承天命,於昭聖德。 三精垂象,符靈表德。 巨石立,九穗植。 龍金其鱗,烏赤其色。 輿

志第

十

樂四

思自盡,惟心與力。家國治,王道直。思我帝皇,壽萬億。長保天祿,祚無極。 放遠讒與慝。 人歌,億夫歎息。 舉賢才,親近有德。 超龍升,襲帝服。 均田疇,茂稼穑。 躬淳懿,體玄默。夙興臨朝,勞謙日昃。易簡以崇仁, 審法令,定品式。考功能,明黜陟。人

右承天命曲凡三十四句,其十九句句三字,二句句五字,十三句句四字。

<u>| 弦</u>化者,言上修文訓武,則天而行,仁澤流洽,天下喜樂也。| 漢曲有上邪,此篇當之。第

宴樂,激發弦歌揚妙新。修文籌廟勝,須時備駕巡洛津。康哉泰,四海歡忻,越與三五鄰。 玄化象以天,陛下聖眞。 右玄化曲凡十三句,其五句句五字,二句句三字,三句句四字,三句句七字。 張皇綱,率道以安民。惠澤宣流而雲布,上下睦親。 君臣酣

今鼓吹鐃歌詞樂人以音聲相傳,訓詁不可復解。

大竭夜鳥自云何來堂吾來聲鳥奚姑悟姑尊盧聖子黃尊來餭淸嬰鳥白日爲隨來郭吾微

令吾

伯遼夜鳥若國何來日忠雨鳥奚如悟姑尊盧面道康尊錄龍永烏赫赫福胙夜音微令吾 詩則夜烏道祿何來黑洛道烏奚悟如尊爾尊盧起黃華烏伯遼爲國 應龍夜烏由道何來直子爲烏奚如悟姑尊盧雞子聽烏虎行爲來明吾微令吾 日忠雨令吾

右四解,上邪曲。

幾令吾幾令諸韓亂發正令吾

幾令吾諸韓從聽心令吾若里洛何來韓微令吾

尊盧忌盧文盧子路子路為路雞如文盧炯 烏諸胙微 令吾

幾令諸韓或公隨令吾

幾令吾幾諸或言隨令吾黑洛何來諸韓微令吾

尊盧安成隨來免路路子為吾路奚如文盧炯烏諸胙微令吾

右九解,晚芝曲。[三0]漢曲有遠期,疑是。

幾令吾呼曆舍居執來隨咄武子邪令鳥銜針相 風 其右 其 右

幾令吾呼羣議破葫執來隨吾咄武子邪令烏今烏今澁 入海 相 風 及後

幾令吾呼無公赫吾執來隨吾咄武子邪令烏無公赫吾婮立諸布始布

右三解,艾如張曲。〔三〕

鼓吹鐃歌十五篇

何承天義熙中私造

朱路篇

朱路揚 和鸞,翠蓋燿金華。 玄牡飾樊纓,流旌拂飛霞。 雄戟闢曠塗,班劍翼高車。

軍且莫喧,聽我奏鐃歌。 塵,渟瀾發微波。 逸韻騰天路,頹響結城阿。 清鞞驚短簫,朗鼓節鳴笳。 仁聲被 八表,威震振 人心惟愷豫,茲音亮且和。 九遐。 嗟嗟介冑士 輕風 一,勗哉 起紅

思悲公篇

念皇家。

雍離篇 集,萬國康。 志申。 思悲公,懷袞衣。 營都新邑,從斯民。 萬國康, **猶弗已**。 東國何悲,公西歸。 從斯民,德惟明。 握髮吐餐,下羣士。 公西歸,流二叔,幼主旣悟,偃禾復。 制禮作樂,興頌聲。 惟我君, 繼伊周。 興頌聲,致嘉 親覩盛世, 祥。 偃禾復, 復何 鳴 鳳爱

濟, 宰宣九伐,萬里舉 戰夷三城。 愚智亦相傾。 雍士多離心,荆民懷怨情。 江漢被美化,宇宙歌太平。 長旌。 霜鋒未及染, 樓船掩 江潰, 鄢郢忽已清。 二凶不量德, 駟介飛 惟我東郡民,曾是深推誠 、重英。 構難稱其兵。 西川 無潛鱗, 歸德戒後夫, 王 北渚有 人銜朝命, 賈勇尚 奔鯨。 先鳴。 正辭糾不 凌威致天府, 逆徒旣不 庭。

戰城南篇

從,气三應三靈。 戰城南, 衡黃塵。 義之所感,士忘生。 丹旌 電 烻, 鼓雷震。 長劍擊,繁弱鳴。 勍敵猛, 戎馬殷。 飛鏑炫晃, 横 陳 亂奔星。 亘 野, 若屯雲。 虎騎躍, 華毦 仗大

惠,詠來蘇。 朱火延起,騰飛煙。 奏愷樂,歸皇都。 驍雄斬, 高旗搴。 班爵獻俘,邦國娛。 長角浮叫, 響清天。 夷羣寇, 殪逆徒。 餘黎霑

巫山高篇

靈威。 鳴。 民、气息鮮不顚墜。 洪波迅澓,載逝載停。 巫山高,三峽峻。 蠢爾逆縱,復踐亂機。 矧乃叛戾, 伊胡能遂。 青壁千尋, 深谷萬仞。 **悽悽商旅之客,懷苦情。** 王旅薄伐,傳首來至京師。古之爲國,惟德是貴。 咨爾巴子,無放肆。 崇巖冠靈,林冥冥。 在昔陽九,皇綱微。 山禽夜 李氏竊命 響,是 力戰而 一,宣武 猿 相 燿 和

上陵者篇

酸。 旣沒,景君歎。嗟歲聿,游不還。[圖]志氣衰沮,玄鬢斑。 通衢端。 生必死,亦何怨。 上陵者,相追攀。 高甍華屋,列朱軒。 被服纖麗,振綺紈。 取樂今日,展情歡。 臨濬谷,掇秋蘭。 攜童幼,升崇巒。 士女悠奕,映隰原。指營丘,處牛山。 野莽宿,墳土乾。 南望城闕,鬱槃桓。 顧此纍纍,中心 王公第, 爽鳩

將進酒篇

鑣。 懷溫克,樂林濠。 將進酒,慶三朝。 備繁禮,薦嘉肴。 士失志,慍情勞。 思旨酒,寄游遨。敗德人,甘醇醪。 榮枯換,霜霧交。 緩春帶,命朋僚。 耽長夜, 車等旗,

志

+

樂

四

六六四

妖。 興屢 舞 属 哇 謠。 形傞傞,聲號呶。 首旣濡,志亦荒。 性命天, 國家亡。 嗟後生, 節酣

是無篇

匪酒

一,孰爲

駟, 情營所私。 霄翼羽蓋,長風靡淑旂。 造父爲之悲。 君 馬麗且閑,揚鑣騰逸姿。 疲民甘藜藿,愿馬患盈肥。 不怨吳坂峻,但恨伯樂稀。 願為范氏驅,雍容步 駿足躡流景, 高步追 人畜貿厥養,蒼生將焉歸 中畿。 赦彼岐山 **豈效詭遇子**, 輕飛。 盜, 實 冉冉六轡柔, 濟 C韓原 馳 騁越 師 危機。 奕奕金華暉。 柰何 漢魏主, 鉛陵 策 良 輕

芳樹篇

堂,要妙清 房掩綺幌 芳樹 上生北庭,豐隆正裴徊。 ,綠草被長階。 且悽。 嘯歌流激楚,傷此碩 日夕游雲際, 翠穎陵冬秀,紅葩迎春開。 人懷。 歸禽命 梁塵集丹帷 同棲。 皓月盈素景, 一微楓 佳 人閑 揚羅袿。 涼風 幽室, 拂 **豈怨嘉時莫**,徒惜 中閨 惠 心婉 以 哀 弦 諧。 理 虚 闌

有所思篇

良願

乖

爲 齊 卿。 有所 稱身受祿,不貪榮。 思,思昔人。 曾閔二子,善養親。 道不用,獨擁楹。 和 顔色, 三徙旣醉,禮義明。 奉晨昏。 至誠 烝 烝, 飛鳥集,猛獸附。 通 明 神。 鄒 孟 功成 軻

事 畢,乃更娶。 哀我生,遘凶旻。 幼罹荼毒,備艱辛。 慈顏絕,見無因。 長懷永思,託丘

雉子游原澤篇

美,寵辱亦相尋。 然寄卜肆,揮櫂通川陰。 雉子游原澤,幼懷耿介心。 冰炭結六府,憂虞纏胸襟。 消搖風塵外,散髮撫鳴琴。 飲啄雖勤苦,不願棲園林。 當世須大度,量己不克任。 卿相非所眄, 古有避世士,抗志淸霄岑。 何況於千金。功名豈不 三復泉流誠,自驚 浩

上洲篇

良已深。

罰,六世獪克昌。 志。 故稱良。 王旣已沒,誰能弘至道。 上邪下難正,衆枉不可矯。 行葦非不厚,悠悠何詎央。 李斯肆濫刑,秦氏所以亡。漢宣隆中興,魏祖寧三方。譬彼針與石,效疾 開春湛柔露,代終肅嚴霜。承平貴孔孟,政敝侯申商。 音和響必淸, 端影緣直表。 琴瑟時未調,引到改弦當更張。矧乃治天下,此要安可 大化揚仁風,齊人猶偃草。 孝公明賞 聖

臨高臺篇

臨高臺,望天衢。 清暉浮景,溢蓬萊。 飄然輕舉,陵太虛。 濟西海,濯洧盤。佇立雲岳,結幽蘭。馳迅風,遊炎州。 攜列子, 超帝鄉。 雲衣雨帶, 乘風翔。 肅龍駕。

志

第十二

六六六

任窮達,隨所遭。 桑梓,思舊遊。 傾霄蓋,靡電旌。 何爲遠想,令心勞。 降彼 天塗,頹窈冥。 辭仙族,歸人羣。 懷忠抱義,奉明君。

遠期篇

保萬春。 捷,丸劍亦入神。 唐儛六佾,三廂羅樂人。 遠期千里客,肅駕候良辰。 遷善自雅調,成化由淸均。 簫管激悲音,羽毛揚華文。金石響高宇,絃歌動梁塵。 近命城郭友,具爾惟懿親。 主人垂隆慶,羣士樂亡身。 高門啓雙闡,長筵列嘉賓。 願我聖明君,邇期 修標多巧 中

石流篇

成。 徒已。 懐。 幸遇開泰,沐浴嘉運。 嗟我殷憂,載勞寤寐。 石上流水, 湔湔其波。 **遘此百罹,有志不遂。** 發源幽岫,永歸長河。 緩帶安寢, 亦又何慍。 行年倏忽,長勤是嬰。 瞻彼逝者,歲月其偕。 古之爲仁,自求諸己。 子在川上,惟以增 永言沒世,悼茲 虚情遙慕, 終於 無

可分。

校勘記

當關· 東有賢女 「關東」各本並作「關中」。 按本卷首列漢鼙舞歌作「關東有賢女」,不作「關中

有賢女」,今改正。

鄒羨囚 [燕市 「鄒羨」樂府詩集五三作「鄒行」。 蓋沈約避梁武帝諱改。

[N] 鍾擊位無餘 曹植集作「擊鐘釂無餘」。

「四」帝王道 「道」下晉書樂志有「大」字」是。

五五 前鋒據項城 「城」各本並作「成」,據晉書樂志、樂府詩集五三改。

聖人制禮樂篇 樂府詩集五四引古今樂錄云:「古鐸舞曲有聖人制禮樂篇,聲辭雜寫,不復可

辨,相傳如此。」

夏夏殷濩 各本不疊「夏」字,據南齊書樂志、樂府詩集五四補。

形爲主 「形」各本及樂府詩集五四作「刑」,據南齊書樂志改。

へたし 樂道亡飢 「飢」各本並作「餘」,據晉書樂志、樂府詩集五四改。

志第十二 校勘記

- 苦身不已 各本並脱「苦」字、據晉書樂志、樂府詩集五四補。
- [11] 右五篇拂舞行 據前後文例、「拂舞」下當脫「歌」字。
- 白紵舞歌詩三篇 樂府詩集五五亦有此篇,通篇上下兩句對換,讀之文義似較宋書樂志爲

長。

五行、晉金德王、宋水德王、故上云「金祿」、下云「水命」。 衰數隨金祿登曆昌水命 「水命」北監本、毛本、殿本、局本作「永命」,今據三朝本作「水命」。

按

- 廟勝敷九伐 「九伐」各本並作「九代」,據樂府詩集五六改。
- 二吾 慶歸我 謂 王敬弘等。 南 康 后祚 郡 公劉 |到 無疆 穆之。 到 彦之。 按此詩宋明帝所製。 華容謂華容縣公王弘。 丞相謂 江夏文獻王義恭 烈武謂臨川烈武王道規。 左軍 謂 贈左將軍王鎭 義恭死後 明帝追贈 景王謂長沙景王道憐。 惡。 丞相。 三王謂王華、 沈謂 沈慶 王 之,柳 一曇首 南康

謂 柳 元 景, 宗謂宗愍。 司 徒謂始安王休仁, 驃騎謂晉平王休祐。 江安謂江安侯王景文, 殷謂

殷孝祖。劉謂劉勔、沈謂沈攸之。

- 黃鵠蜚之以千里 從 北 監 本、毛本、殿本、局本作「千里」。 千 里」兩字、三朝本、樂府詩集一六作「 重」一字,本注云:「一作千里。」今
- 今第 一 曲初之平 古今樂錄作「初之平」,同宋書樂志。 晉書樂志、樂府詩集一八作「楚之平」。

按此曲言曹操平邊章、韓遂於金城事,與楚地無關,疑作「初之平」不誤。

北踰岡平 按三國志魏志武帝紀載曹操 北征三郡烏丸, 引軍出盧龍 塞了「經白檀、歷平岡、涉鮮

卑庭、東指柳城」。則此「岡平」當作「平岡」。

二之 又能用武以誅孟度之逆命也 「孟度」 晉書樂志、元龜五六六作「孟達」。 按孟達字子度,蜀將

降魏, 後又叛魏, 爲司馬懿所攻殺。 事見三國志魏志明帝紀及蜀志劉封傳。 本卷晉鼙舞歌天

命篇亦作「孟度阻窮險」。

(三0) 古艾而張行 「艾而張」上漢鼓吹作艾如張。

 \subseteq 宣皇輔政 「政」各本並作「正」、據晉書樂志、樂府詩集一九改。

至 時運多難 各本並脱「難」字,據晉書樂志、樂府詩集一九補。

聰鑑玄察 「察」各本並作「發」,據晉書樂志、樂府詩集一九改。

德化四表 三朝本作「德化四表」。北監本、三本、殿本、局本、晉書樂志、樂府詩集一九作「德

化飛四表」。

至 有其證靈液 不知古人詩歌,凡今庚、青部之字,皆不與蒸部同用。若存此『液』字,則與上句『籍』字別爲一 『液』字,後人疑此二句韻不諧,故去一『液』字,以『靈』字合於上文繩、徵、矜、陵等字爲一韻。 各本並脱「液」字, 據晉書樂志、樂府詩集一九改。殿本考證云:「按原文當有

志第十二 校勘記

韻 **,更合也。**」

云 **今親遊方國** 「方」樂府詩集一九作「萬」。本注云:「一作方」。

「八郡」各本並作「八都」,據樂府詩集一八改。

按後漢荆州所屬七郡,南陽、南郡、

八郡震驚

江夏、零陵、桂陽、武陵、長沙。 劉表據荆州、又分南郡枝江以西立臨江郡、故此曰八郡

安城」 歷撫江安城 疑當作「公安城」。 按本書州郡志:「江安侯相、晉武帝太康元年立。」 孫權欲襲關羽,先遣呂蒙擊取公安城, 然後進據江陵,見三國志吳志 是建安時不得有江安。 此江

呂蒙傳

道化至盛也 「盛」字上,各本並有「德」字,據樂府詩集一八、元龜五六五删。

右九解晚芝曲 「曲」字各本並作「田」,據樂府詩集一九改。又按晚芝曲九解,宋志惟收六解,

尙漏三解。 九解樂府詩集一九全載

右三解艾如 張曲 各本並脱「如」字、據樂府詩集 一九補。

仗大從 「從」樂府詩集一九作「順」。 蓋何承天原作作「順」,沈約爲梁武帝父蕭順之諱改。

力戰 而 虚民 「虚」局本、樂府詩集一九作「虐」。

游不還 「游」樂府詩集一九作「逝」。

琴瑟時未調 「未」各本並作「永」、據樂府詩集一九改。 記

卷。景祐、宋仁宗年號。今改正。

